

明



清 張廷玉 等撰

中華書局

卷三一三至卷三二二(傳)

明史卷三百十三

列傳第二百

雲南土司

化、北勝等處則爲州,或設流官,或仍土職。今以諸府州槪列之土司者,從其始也。 州,以括其所轄。 所屬多蠻夷雜處,卽正印爲流官,亦必以土司佐之。而土司名目淆雜,難以縷析,故係之府 制咸定。統而稽之,大理、臨安以下,元江、永昌以上,皆府治也。孟艮、孟定等處則爲司,新 明洪武十四年,大軍至滇,梁王走死,遂置雲南府。自是,諸郡以次來歸,垂及累世,規 而於土司事迹,止摭其大綱有關乎治亂興亡者載之,俾控馭者識所鑒焉。 蓋滇省

雲南土司一

雲南 大 理 臨安 楚雄 澂江 景東 廣南 廣西 鎭沅

永寧 順寧 蒙化 孟艮 孟定 耿馬安撫司附 曲靖

列傳第二百一 雲南土司一

八〇六三

蒙氏 置 其子嗣 鄯 闡 所據,改鄯 封 萬 戶府 爲梁王 國 闡府。 也。 旣改置中慶路, 漢 武帝時始置益州郡。 歷鄭、趙、楊三氏,至大理段氏,以高 封子忽哥爲雲南王鎭之,仍錄段氏子孫守其土。 蜀漢置雲南郡。 智昇 隋置 領鄯闡 昆州,唐仍之。 牧,遂世其 後為南部 地。元初, 忽哥死

滇 給之曰:「總兵官領三十萬衆至矣。」賊衆驚愕,拔營宵遁,走安寧、羅次、邵甸、富民、普寧、 諸部悉定。 大理、江川等處,復據險樹棚,謀再寇。 爲久困計。 萬攻雲南城。 雲南諸郡蠻。十五年,友德等分兵攻諸蠻寨之未服者,土官楊苴乘隙作亂,集蠻衆二十餘 政吳雲往,中途爲梁使所害。 池 洪武 死,定其地。 六年,遣翰林待制王禪等齎詔諭梁王,久留不遣,卒遇害。八年復遣湖廣行省參 二十五年,英卒,命其子春襲封 時冰英方駐師烏撒、聞之、將驍騎還救。至曲靖,遣卒潛入報城中,爲賊所得, 時城中食少,士卒多病,寇至,都督謝熊、馮誠等攖城固守,賊不能攻,遂遠營 改中慶路爲雲南府,置都指揮使司,命都督僉事馮誠署司 十四年,征南將軍傅友德、藍玉、沐英率師至雲南城, 英分調將士剿降之,斬首六萬餘級,生擒四千餘人, |西平侯,[I] **仍**鎮 雲南 事。二月詔 梁王赴 諭

日 :「此令旨也。」|沐氏亦皆能以功名世其家。 自英平雲南,在鎭 十年,恩威著於蠻徼,每下片楮,諸番部具威儀 每大征伐,輒以征南將軍印授之,沐氏未嘗不 出 . 郭 叩 迎, 盥 而 後啓,

大學士 之。 能 職 周密,凡事必與太監撫、按、三司會議後行,動多掣肘,土官子孫承襲有積至二三十年不得 爲然,許之。 在 更革 者。 行 間 雖稍奏膚 一楊 土官復慢令玩法,無所忌憚,待其罪大惡極,然後興兵征剿,致軍民日困,地方日壞 馴至神宗之世,朝廷惰婾, 數傳而 清等因武定安銓之亂,痛切陳之。 自是,遂以公爵佩印,爲故事。 功,而 西平裔孫當襲侯,守臣爭之,謂滇人知有黔國公,不知西平侯也。 | 滇南 喪敗,卒由土官沙定洲之禍。 封疆敗壞 諸土司之進止予奪,皆咨稟。及承平久,文網 黔國 H 甚一 公沐紹勳亦以爲言。 日。 緬、漭之叛,皆土官之失職者導 雖得旨允行,亦不 孝宗以

以王 全雲南會 弄 沙 定洲 副長 城,稱首功,累加至宣撫使,時號沙 官事 者 ,王弄山長官司 繼以征建水功,以安南長官司 沙源之子也。 源驍 兵。 定洲 勇有將材,萬曆中,數從征調 廢地畀之。 ,其仲子也 後征· 東川、水西 「馬龍 有功,巡撫委 山等處

言。會奸徒饒希之、余錫朋者逋天波金,無以償。 崇禎 中,元謀土知 州吾必奎叛。 總兵官沐天波剿之, 錫朋常出入土司家,誇黔府富盛。 調定洲從征。 定洲 不欲行, 定洲

出怨

心

動,陰結都司阮韻嘉諸人爲內應。旣定洲入城辭行,天波以家諱日不視事,定洲譟而入,焚 劫其府。 賊。 天波疑鼎爲定洲誘己,殺之,其母妻皆走城北自焚死。 天波聞變,由小竇遁。 時寧州土司祿永命在城,方巷戰拒賊,從官周鼎止天波,留 定洲 據黔府、盤踞 會城。 劫

去。

巡撫 吳 兆 元 使題請代天波鎭滇,傳檄州縣, 全滇震動。 **祿永命與石屏州** 在田 俱引所部

定洲 兵 翔 公在 分兵爲七十二營,環城掘濠,爲久困計。 巨礮擊之,煙焰籠城櫓,衆謂畏知已死,而 殺 李 聞 , 賊甚衆。賊引去,攻石屏不下,還攻寧州 一彼掎角,首尾牽制之,上策 天 日芳等,攻陷大理、蒙化。 波 禄永命等各固守,不敢至永昌,恐畏知截其歸路,急還兵攻楚雄。 走楚雄, 金滄副使楊畏知 也。」天波從之。 畏知乘間檄城外居民盡入城,築陴濬隍, 奉調駐城中,謂天波曰:「公何不走永昌,使楚 畏知端坐自如,賊相驚謂神。畏知伺 ,祿永命戰死。 定洲 至楚雄,城閉不得入, 賊計迤東稍稍定,乃復攻楚雄 畏知 調 · 乃去。 土 坐 賊 間,輒 得爲 城 漢兵守之。 遣 樓,城 其黨王 備,而 出奇 發

天波 兵敗 遂由 喜其來,迎之。 偽號,不殺 一被執 亦來歸。 陸涼、宜良 會 張獻忠死,其部將孫可望率餘衆由遵義入黔,稱黔國焦夫人弟來復仇。民久困 百 姓,不 可望聞 而李定國之徇臨安者,定洲部目李阿楚拒戰甚力。定國穴地置礮,礮發城陷 定洲 入雲南城,分遣李定國徇迤東諸府。 擄婦女,吾從爾。」 解楚雄圍,迎戰於草泥關,大敗,遁 其名,不殺,語之曰:「吾與爾共討賊, 可望皆許之。 即折箭 而 可望 阿迷 何 相誓, 自 如。」畏知要以三事:「不 || 率兵 可望破曲靖及交水,俱屠之。 乃 西出 以 書諭 ,畏知禦於啓明 天波 如 用獻忠 沙兵, 知

遂入。 驅城中官民於城外白場殺之,凡七萬八千餘人,斬獲不與焉。當時皆意定國破 臨安

必 一襲阿 迷,取定洲 ,乃僅掠臨安子女而 回,所過 無不屠滅。 迤西以畏知 在軍 ,得保全。

數日,乃出降。 取定洲自贖。 定洲歸,屯兵洱革龍,且借安南援自固。 定國旣至,定洲土目楊嘉方迎定洲就其營宴。 **遂械定洲及妻萬氏數百人回雲南,剝其皮市中。** 會可望與定國不協,聲 定國偵 可望遂據滇,而天波卒走 知之,率兵圍營, 其罪,杖之百,責 相 以 拒

死於緬甸

治 至五 封智興為 太 代晉時,段思平得之,更號大理國 和 大 城 理 摩 ,唐葉楡縣境 至閣 訶羅嵯,管領 羅 鳳 ,號大蒙國 也。 八方。 麟德 ,異牟尋改大 初,置姚州都督府。開元末,蒙詔皮羅閣建都於此,爲南詔 叉以劉 時中爲宣撫使,同智興安輯 元憲宗取 禮 國。 雲南,至大理,段智興降附,乃設都 其後,鄭買賜、趙善政、楊干貞 其 民。 互篡奪 元

唐交綏之外國 年,征南將 段氏 有大理 軍傅友德克雲南 一,傳 十世 實 、宋斧畫之餘邦,難列營屯,徒勞兵甲。 至寶。 一授段明 聞太祖開基江南,遣其 爲宣慰使。 明遣都使 (叔 段 真 張元亨貽征 請依唐、宋 由 會川 奉 南 故 表 將 歸 事,寬我蒙、 軍 書 日 款。 : 「大理乃 洪武十四

置 唐之小智, 奉 元 益 代,寬延至今。 Ē 州 朔 佩 元 華篆, 卑宋、元之淺 祖親 此 征 我師已殲 一、祗 年一 緣鄯闡。 圖。 小貢、三年一大貢。」友德怒、辱其使。 梁王,報 大兵所至,神龍 乞賜 汝 班 世 師。 仇,不降 友德答書日 助陣、天地應符。 何待 大 明 明 汝段氏接武蒙氏,運 龍飛 再 貽 淮 書 甸 泥 日 漢 區宇 武 習 已 陋 戦 絕 漢、

衆驚 世 聞 指 歸 道 侯 王 揮 仁,授永昌 就 夜 王 冷渡河 丽 師 使 擒 亂 以兵 司 至,聚衆扼 年,征 ,繞出點蒼山後,攀木援崖而 英身先士卒,策馬渡河,水沒馬腹,將士隨之,遂斬關 世 由 與 衞 明皆段寶子 洱水東趨上關,爲掎角勢,自率衆抵 鎭 南左將軍藍玉、右將軍冰英率師 下關。 撫 ,次子名歸義,授雁門鎭 下關者,南韶 也。 至京師 一,帝傳 皮羅閣 上,立旗 撫。 諭 所築 幟。 日 攻大理。 :「爾父寶 大理悉定,因改大理路爲大理府 下關, 龍尾關 昧爽,軍抵下關者望見,皆踴躍 造攻具。 也,號 大理城倚點蒼山 僧有 入。 極 降表,朕不 險。玉等至品 遣都督胡海洋由 蠻兵潰,拔其城,酋長 一西臨 忍廢。」 甸,遣定遠 洱河為固 賜長子名 ,置衞,設 灌課 石門 間 段 蠻

兵往 爲 太 雲南 和 府 年,品 딞 正千夫長,李朱爲副千夫長 甸 繕 甸 土 城 池 立 立 惠 屯 來朝 堡, 一,命爲 置 郵 ,楊奴爲雲南縣丞。 傳, 千 夫長。 安輯 人民。 命六安侯 十七年以 王 十九年置 志 土官阿這 安慶侯 雲南洱海 仇 爲 成 鄧 衞指 鳳 JII 翔 知 侯 揮 州 張 使 阿散 龍

建譙 以賴 樓、治廬舍市里、修屯堡、隄防、斥堠、又開白鹽井、民始安輯。 鎭爲指 揮僉事。 洱海,本品甸也。 兵燹後,人民流亡,室廬無復存 二十年詔景川侯曹震及 *** 鎭至,復城

四川 都 司選精兵二萬五千人,給軍器農具,即雲南品甸屯種,以俟征討。

關長官司於一泡江之西,從巡撫何孟春奏也 水樂以後,雲南諸土官州縣,率按期入貢,進馬及方物,朝廷賜予如制。 嘉靖元年改十

內附,置阿僰部萬戶府。至元中改臨安路,屬臨安、廣西、元江等處宣慰司 臨安,古句町國。漢置縣。唐爲羈縻牁州地。天寶末,南詔蒙氏於此置通海郡。 |元

州,弄甥爲寧州知州,陸羨爲蒙自知縣,普少爲納婁茶甸副長官,俱來朝貢,因給誥敕冠帶 都及土官楊政降,改路爲府,廢宣慰司,置臨安衞指揮使司。十七年以土官和寧爲阿迷知 以命之。 洪武十四年,征南將軍下雲南,遣宣德侯金朝興分道取臨安。元右丞兀卜台、元帥完者 十八年,臨安府千戶納速丁等來朝,人賜米十石。

司 蒇 《納海肥七萬九千八百索,非土所產,乞准鈔銀爲便。」戶部以洪武中定額 永樂 九年,溪處甸長官司副長官自恩來朝,貢馬及金銀器, 賜賚 如 例。 ,難准折輸。帝 自恩因言:「本

曰:「取有於無,適以厲民,況彼遠夷,尤當寬恤,其除之。」

迫令乘載,往往被害,又沿河時有劫盜出沒。乞置巡檢司,以故把事袁凱之子稱爲巡檢。」 容甸長官司奏:「河底自洪武中官置渡船,路通車里、八百。近年軍民有逃逸出境詐稱使者, 宣德 五年,中官雲仙還自雲南,奏設東山口巡檢司,以故土官後普覺爲巡檢。八年,虧

從之。

論 土官祿俸陰賄 死。 嘉靖 撫按請仍設流官,從之。 元 (年復設寧州流官知州,掌州事,土知州祿氏專職巡捕。 劉瑾罷之。 遂交通彌勒州十八寨强賊爲亂,爲官軍捕誅,其子祿世爵復以罪 寧州舊設流官,正德初,

事 療。正德二年以廣西維摩、王弄山與阿迷接壤,盜出沒,仍令普覺後納繼前 初,臨安阿迷州土官普柱,洪武中爲土知州。 後設流,錄其後覺爲東山 巡檢,旣而 職 以他

聲收拾舊部,勇於攻戰,從討奢安有功,仍授土知州,漸驕恣。 普維藩者,與寧州祿氏搆兵,師殲焉。 維藩子名聲,幼育於官,旣長,有司 '俾繼父職。'名

奎。 撫王伉,請討,得旨。 崇禎 時官軍已調必奎隨征,必奎與名聲戰,兵始合,佯敗走。 五年,御史趙洪範按部,名聲不出迎。已,出戈甲旗幟列數里。 官軍進圍州城,名聲恐,使人約降,而陰以重賄求援於元謀土官吾必 官軍望見,遂大潰,布政使周 洪範大怒,謀之巡

州土官祿永命、石屛州土目龍在田,俱與必奎、名聲從征著名,至是,黔國公沐天波檄之統 兵,合剿擒必奎。 西 之子定洲 知府 昌 **|戦死。** 張 繼 名聲有子曰服遠,與萬氏分寨居,定洲誘殺服遠,併其地。 孟 朝廷以起釁罪伉,逮治,而名聲就無。 道出 名聲妻萬氏,本江西寄籍女,淫而狡。名聲死後,改嫁王弄山副長官沙源 阿迷,以計毒殺之。 必奎聞名聲死,遂反,連陷武定、祿豐、楚雄諸城。寧 然驕恣益甚,當事者頗以爲 天波檄定洲取必奎, 患。 已而 廣

定洲不欲行,遂反,詳前傳。

欲 於 **祿仁,安南長官司土舍那代助之以兵,遂稱亂,守臣討平之。** 千戶所。 司 封閉已久,亡命多竊取之。 日 爲 此。 入, 諸長官亦不請代襲, 自相冠帶, 日尋干戈。 王 弄山 新安守禦千戶所,調 臨安領州四,縣四。 [三] 其長官司有九,曰納樓茶甸,曰敎化三部, 蓮花攤之外卽交荒外,而臨安無南 门; 以地近交阯,改安南,屬臨安路。 虧容甸,日思陀甸,日落恐甸,日安南,其地皆在郡 臨安衞中所官軍戍之。 其安南長官司,本阿僰蠻所居,舊名褒古,後名捨資。 面之虞者,以諸甸爲之備也。 正德 八年,蒙自土舍祿祥爭襲父職,鴆殺其嫡兄 納樓部內有 事聞,命革蒙自土官,改長官 礦場三,日 東南。 日溪處甸,日 西平侯征安南, 但地多瘴, 中場、鵝黄、摩訶 元爲 左 流官 一能寒, 捨資 取道 不

楚雄,昔爲威楚。 元憲宗置威楚萬戶府。 至元後,置威楚開南路宣撫司

永樂元年,楚雄府言:「所屬蠻民,不知禮義。惟僰種賦性溫良, 洪武十五年,南雄侯趙庸取其地。十七年以土官高政爲楚雄府同 有讀書識字者。 知,阿魯爲定邊縣丞。 府州已嘗

設學教養,其縣學未設。 縣所轄六里,<

僰人過半,

請立學置官訓誨。」從之。

誠 陞知府,子孫仍襲同知。 宣德五年命故土知府高政女襲同知。 政卒,無子,妻襲。又卒,其女奏乞襲知府。帝曰:「皇考有成 政初爲同知,永樂中來朝,時仁宗監國,嘉其勤

命。」令襲同

知

性頑獷,以無土官管束,多致流移,差役賦稅,俱難理辦。衆嘗推保署州事,撫綏得宜,民皆 向服,流移復歸,乞授本州土官。」吏部言:「南安舊無土官,難從其請。」帝以爲治在順民情, 八年陞南安州琅井土巡檢李保爲州判官,以鄉老言:「本州俱羅舞、和泥、鳥蠻雜類,稟

賊,聚衆抄掠景東等衞。 楚雄縣賊首者些糾合武定賊者惟等,劫掠軍民,殺巡檢張禛。 九年,黔國公沐晟等奏:「楚雄所屬黑石江及泥坎村銀場,軍民盜礦,千百爲羣,執 大理、蒙化、楚雄、姚州皆有盜出沒。」帝敕責晟等,期以三年,討靖 又定邊縣阿苴里諸 處强 兵攘

諸爲亂者。

百人。 王,約土官王一心、王行道爲援。 嘉靖四十三年,楚雄叛蠻阿方等兵起,先攻易門所,流劫嶍峨、昆陽、新化各州縣,僭稱 官軍分道進,擒獲賊黨。 乘勝攻大、小木址二寨,克之,斬阿方首,餘賊悉平。 一心後悔,詣軍門請討賊自効。 巡撫呂光洵許之,招降數

家、刲羊擊豕、罄所有以供之、婦女皆出羅拜、故於諸府獨號安靜云。 置羅伽萬戶府。 之中,山川明秀,蠶衣耕食,民安於業。近郡之羅羅,性雖頑狠,然恭敬上官。官至,爭迎到 灣江,唐爲南寧、昆二州地。 天寶末,沒於蠻,號羅伽甸。 宋時,大理段氏號羅伽部。元 至元中,改澂江路。洪武十五年,雲南平,澂江歸附,改澂江府。 地居滇省

三年討平之,以所部隸威楚萬戶。 景東,古柘南也,漢尙未有其地。 至元中,置開南 唐南詔蒙氏始置銀生府,後爲金齒白蠻所據。元中統 州

洪武十五年平雲南,景東先歸附。 土官俄陶獻馬百六十匹、銀三千一百兩、馴象二。詔

列傳第二百一 雲南土司

置景東府,以俄陶知府事,賜以文綺襲衣。十八年,百夷思倫發叛,率衆十餘萬攻景東之北 要衝,宜置衞。 政司經 一腴田,調白崖川軍士屯守。 歷楊大用齎白金文綺賜之。二十三年,沐英討平思倫發,復景東地,因奏景東百夷 俄陶率衆禦之,爲所敗,率其民千餘家避於大理府之白崖川。 以錦衣衞僉事胡常守之,俄陶仍舊職。二十四年,帝以景東爲雲南要害,且 二十六年命洱海衞指揮同知賴鎭守景東,從沐春請也 事閒,帝嘉其忠,遣通

孟梳於孟緬,設長官司,授把事姜嵩爲長官,以隸景東,歲增貢銀五十兩。 州刀奉漢侵據孟緬地,敕黔國公沐晟遣官撫諭 宣德五年置孟緬長官司。 時景東奏所轄孟緬、孟梳,地方遐遠,屢被外寇侵擾。 六年,大侯土知 乞幷

刑部 追斬其頭目,奪印歸。 景東衞雲霧黑暗,至晝夜不別者凡七日,巡撫陳金以聞。 :、都察院承旨,考黜文武官千二百員。 嘉靖中,者東甸稱亂,劫景東府印去。 土舍陶金 E 統中,思任發叛,官軍征麓川,知府陶瓚從征有功,進階大中大夫。弘治十五年正月, 命廷臣議考察,以謝天變。 南京

十五里。 調其兵及戰象。天啓六年,貴州水西安邦彥反,率衆二十萬入滇境,至馬龍後山,去會城 景東部皆僰種,性淳樸,習弩射,以象戰。 總兵官調景東土舍陶明卿率兵伏路左。 歷討鐵索、米魯、那鑑、安銓、鳳繼祖諸役, 賊分道幷至,官兵禦之,賊拒戰,勢甚銳。

明卿 二千,必自効千餘,餉士之費, 乃以象陣從左翼衝出横擊,賊潰,追奔十餘里。 未嘗仰給公家、土司中最稱恭順。 巡撫上功,推明卿第 其府治東有 0 邦泰山 景東毎 . ,頗險 調 兵

峻、土官陶姓所世居也

廣南,宋時名特磨道。 土

自

農

姓

,

智
高

之

裔

也

。 元至元間,立廣南西路宣撫司。四初

領路城等五州,後惟領安寧、富二州。

錠。 等分兵攻各寨,自將取貞佑,又以兵扼間道,絕其救援。 送京師。 安,結衆據山寨拒守。 二十八年,都指揮同知王俊奉命率雲南後衞官軍至廣南,築城建衞。 洪武十五年歸附,至改廣南府,以土官儂郎金爲同知。十八年,郎金來朝,賜錦綺鈔 降郎金爲府通判。 俊遣人招之,不服,時伏草莽中劫掠,覘官軍進退。俊乃遣指揮歐慶 諸寨悉破,衆潰,貞佑窮促就擒,械 郎金父貞佑不自

永樂六年,富州土知州沈絃經入貢,值仁孝皇后喪,絃經奉香幣致祭。 宣德元年,土官

儂郎舉來朝,貢馬。

列傳

第

百

雲南

土司

正統六年,廣南賊 阿羅 、阿思等劫掠、命總兵官沐昂等招撫之。時富州土官沈政與郎舉

從征 服。 旭 等罪,帝以 互訐 從 糾衆侵 征 功陞同 三鄉,親獲賊首,詔賞銀百兩。 蠻人宥之。 知,死無嗣,四門舍目共推儂文舉署事,屢立戰功。 地 市 命昂等勘處。 政、舉相響殺已十餘年,時方征麓川,憚兵威不敢動。 七年, 播州之役,徵其兵三千討尋甸叛目,皆有功, 昂奏二人叛逆無實迹,因有隙相妄奏。 萬曆七年,實授同知。 未 兵部 幾, 賜四品 鄎 請治 子 舉 政 應 以

租

可。 獻 仕 奴竊 取,必有瘟 稅 而 於官 祥 經 僅 未幾,儂紹湯兄弟爭襲,各糾交阯兵象,焚掠 歷 不 即 取十之一。 儂 幷 司 與,逐獻 氏自文舉 時兵 即 經 癘 又爲琳 歷司 死亡。 方調 地 即 道險多瘴,知府不至其地,印以臨安指 藉四門舍目推擁之力得授職,後儂氏襲替必因之。 與泗城土官岑接, 以逃, 弟瓊所有。 至境,遽遣歸 萬曆末,知府廖鉉者,避瘴臨安, 旣 而 歸印於其族叔 巡撫 廷 王懋中 與 議治鉉擅離 連婚搆 調兵往問 儂 兵, 仕祥。 與守巡失撫之罪,瓊、接已輸服, 滅 空。 瓊懼, 以印 仕獬家。 時仕英語 揮一人署之。 付同 還印 親 及 知儂仕 弟仕 仕 於通 祥 土官之政出 郷例 死,子 英子 指揮 判 周 得襲, 添 出,印 憲 琳以 壽 接 索 府印送接 添壽 封 於四門, 亦 勿問 仕 一室,入 出 祥 死 府印 印, 詔

西,隋屬牂州,後爲東僰、鳥蠻等部所居。云唐隸黔州都督府。 後師宗、彌勒二部寖

盛,蒙、段皆莫能制。 元憲宗時始內屬。至元十二年籍二部爲軍,置廣西路。

各遣 人貢馬、詔賜文綺鈔錠。二十四年,布政使張紞奏:「維摩、雲龍、永寧、浪渠、越順等州 洪武 十四年歸附,以土官普德署府事。二十年,普德及彌勒知州赤善、師宗知州阿的

縣蠻民頑惡,不遵政敎,宜置兵戍守,以控制之。」是後,朝貢賜予如制

間 平。 南彌勒州十八寨守禦千戶所。 ,巡按御史傳宗龍由順入點,招普兵以行。 成化中,土知府昂貴有罪,革其職,安置彌勒州,乃置流官,始築 正統六年,總兵官沐昂奏師宗州及廣南府賊阿羅、阿思糾合爲亂, 其部衆好擴掠,無紀律,至水西、烏撒用 時順中最勍稱沙普兵,亦曰昂兵。 土城。 兵,始征調之。 命昂等招諭 嘉靖 元年 設雲 未幾

僰蠻據之。 鎭沅,古濮、洛雜蠻所居,元史謂是和泥、昔樸二 元時爲威遠蠻棚府,屬元江路總管。 一蠻也。 唐南詔蒙氏銀生府地。其後,金

齒

|永樂三年,刀平率其子來朝,貢方物,賜鈔文綺。從征八百,又從攻石崖、者達寨外部。整線 洪武 十五年,總管刀平與兄那直歸附,授千夫長。 建文四年置鎮沅州,以刀平爲知州。

列

傅

八〇七八

來降,入貢方物。 陞爲府,以刀平爲知府,置經歷、知事各一 員。貢賜皆如例。 成化

以地方未平,免鎮沅諸土官朝覲。正統元年復免。「も

克魚復寨。 嘉靖中征安銓,調鎭沅兵千人,命刀寧息領之。 初,鎭沅印爲那氏所奪,至是得印以獻,命給之。 復調其子刀仁,亦率兵千人,征挪鑑,

領長官司一,日祿谷寨,永樂十年置。

永寧,昔樓頭睒地,接吐蕃,又名荅藍。唐屬南詔,後爲麼些蠻所據。元憲宗時內附,至

元間,置荅藍管民官,尋改永寧州,隸北勝府。

前軍都督僉事何福遣指揮李榮等討之。其子阿沙遁入革失瓦都寨,官軍齎三日糧,深入追 洪武平雲南時,屬鶴慶府。二十九年,改屬瀾滄衞。十二月,土賊卜百如加劫殺軍民,

之,會天大雨,衆饑疲,引還。

陞永 永寧蠻寨矢不剌非糾四川鹽井衞土官馬剌非殺各吉八合,官軍撫定之。 寧爲府,隸布政司,陞土知州各吉八合知府,遣之齎敕往大西番撫諭 永樂四年設四長官司,隸永寧土官,以土酋張首等爲長官,各給印章,賜冠帶 命卜撒襲知府,復 蠻衆。 宣 綵幣。 德 匹

井衛 夜白 爲矢不剌非所殺。 諭馬刺非還所據 、尖住、促卜瓦諸寨。 已,命卜撒之弟南八襲,馬剌非又據永寧節卜、上、下三村,逐南八,大掠 が村寨。 事聞,帝命都督同知沐昂勒兵諭以禍福,幷移檄四川行都司下 正統二年,馬剌非爲南八所攻,拔烏節等寨,南八亦言馬剌非 鹽

殺害。 四 ,日<u>刺次和,日瓦魯之,〔5〕日</u>革甸,日香羅。 永寧界,東至四川鹽井衞十五里,西至麗江寶山州,南至浪渠州,北至西番。 詔鎭巡官驗問,令各歸侵地,乃寢。

領長官司

順寧府,本瀟蠻地,名慶甸。宋以前不通中國,雖蒙氏、段氏不能制。元泰定間始內附。

天曆初,置順寧府幷慶甸縣,後省入府。

沐春遺鄭祥 年、土
督猛丘、土
知府子丘等,不輸徵賦,自相仇殺。
大理衞指揮鄭祥征蒙化賊,移師至甸 頭,破其寨。 洪武十五年,順寧歸附,以土酋阿悅貢署府事。 與指揮李榮等,分道進討,擒阿羅等誅之。 猛丘請降輸賦,乃還。 猛丘死,把事阿羅等復起兵相攻擊。 十七年命阿日貢爲順寧知府。二十三 後貢賜 如 制 二十九年,西平侯

順寧與大侯接境。 列 傅 第 百 萬曆中,大侯土舍奉赦、奉學兄弟不相能。〔去〕 雲 南 土 司 奉學倚妻父土知府猛

幾坐大辟,繫獄,應揚亦病卒。人以爲天道云。 於是所部十三寨盡憤,始聚兵反,官兵悉剿除之,并殺其子。以仁超擢右都御史,廕子。 命,不從。 已斬奉學以獻。 顯忠覘其富,誣以助惡,索金不應,遂讒於巡按張應揚,轉告巡撫陳用賓。 廷瑞大恐,不得 改順寧爲流官。先著被檄,極言不可討,被謗語,逮下獄瘐死。然廷瑞實無反謀,以參將吳 與兄赦日搆兵。 顯忠帥兵入其寨,盡取猛氏十八代蓄貲數百萬,誘廷瑞至會城執之,獻捷於朝。 顯忠益誣其陰事,傅以反狀,撫按會奏,得旨大剿。」廷瑞出,獻印獻子以候 。巡撫陳用賓檄參將李先著、副使邵以仁勘處。 以仁襲執廷瑞,因請

於耿馬云 地 田 少箐多,射獵爲業。 順寧附境有猛猛、猛撒、猛緬,所謂三猛也。[10]猛猛最强,部落萬人,時與二]猛 猛緬地雖廣,而人柔弱。 部長賜冠帶,最忠順。 猛撒微弱,後折入 爲難。其

蒙化,唐屬姚州都督府。 蒙氏時,細奴邏築城居之,號蒙舍詔。 段氏改開南縣。 元爲

州,屬大理。

洪武十七年以土酋左禾爲蒙化州判官、施生爲正千夫長。 二十三年,西平侯沐英以蒙

化 所屬蠻火頭字青等梗化不服,請置衞。命指揮僉事李聚守蒙化。 賊高天惠作亂,大理衞

指揮使鄭祥捕斬之,傳首雲南。

大侯,功第一,進秩臨安知府,掌州事。 永樂九年,土知州左禾、正千夫長阿東來朝,貢馬,賜予如例。 正統中,陞州爲府,以左伽爲知府 旣,左伽從征麓川,戰於 世襲。 所部江內

諸蠻,性柔,頗馴擾,江外數枝,以勇悍稱。 每應征調,多野戰,無行伍。

進討,進忠從間道欲趨大理,官軍擒誅之,改設流官,授段氏世吏目一人。 成化十七年,巡撫奏地方未寧,免蒙化土官明年朝貢。 萬曆四十八年,雲龍土知州段龍死,子嘉龍立,養子進忠殺嘉龍爭襲,流劫殺掠。 正統元年詔復免。

日三 |交遣弟刀哈哄貢象及 金銀器。 爲 命內官楊琳齎 知府、給印誥冠帶。 蠻夷能 孟艮, 蠻名孟掯,自古不通中國。 悔過來朝,往事不足責。」命賜鈔及絨錦綺帛。 綵幣往賜孟艮 時刀哀遣人來朝,請設治所,歲辦差發黃金六十兩。 知府刀光。 禮部言:「刀交嘗搆兵攻劫鄰境, 永樂三年來歸,設孟艮府, 正統間,孟艮地多爲木邦所幷。 是後, 貢賜皆如 詐譎 隸雲南都司, 不誠,宜却 景泰中,入貢知府 例。 六年,土知府刀 以土

一

以

力

京 宣德六年, 其貢。」帝

名慶馬辣,不知於刀氏何屬也。

南知府趙混一嘗入其境,待之禮慢, 孟 良 在姚關東南二千里外,沃野千里,最殷富。 後無復至者。 地多虎,農者於樹杪結草樓以護稼。雲

拘例。 符、金字紅牌。 府。 洪武 永樂二年,孟定土官刀景發遣人貢馬,賜鈔羅綺。 孟定,蠻名景麻。 十五 四年,帝以孟定道里險遠,每歲朝貢不便,令自今三年一貢,如慶賀謝恩不 年, 至元中,立孟定路軍民總管府,領二甸,隸大理、金齒等處宣慰司 遣使往賜印誥、冠帶、襲衣,復 |預信 爲 知

仇殺。 [隴川],平孟定故地,以罕葛之後爲知府。 十五年頒孟定府印。 川叛,孟定知府刀祿孟遁走。木邦土官罕萬從征有功,總督王驥奏令食孟定之土。嘉靖間, 木邦罕烈據地奪印,令土舍罕慶守之,名爲耿馬,地之所入,悉歸木邦。萬曆十二年,官兵取 初,孟璉與孟定皆麓川地,其土目皆故等夷,惡相屬;後改孟璉隸雲南,多以互侵土地 宣德六年,土知府罕顏法以爲言,敕黔國公沐晟遣官撫諭,俾各歸侵掠。 崇禎末, 孟定叛, 降於緬甸。 正統中,麓

耿馬 援。 天啓 居北 其 領安撫司一,日耿馬。 地,自姚關南八日程,西接隴川,東連孟璉,南木邦,北鎮康。 二年,緬人攻猛乃、孟艮,罕金欲救之。 罕死,弟們罕金護印,屢奉 萬曆十二年置,以們罕爲安撫使。 朝貢。 時木邦思禮作亂,侵灣 | 緬移兵攻'金, 金厚路之, 與孟定隔喳哩江。孟定居南, 土瘠人稀,有馬援城在 甸、鎭康,倚罕金 乃解。 後與木邦 二爲聲

戶,後改爲曲靖路宣慰司 |曲 「靖,隋恭、協二州地。 唐置南寧州,改恭州爲曲州, 分協州置靖州。 至元初,置磨彌

部

萬

罕正

搆難不絕云。

酋納居來朝,賜鈔幣。 磁等貢馬及羅羅刀甲、氊衫、虎皮。詔賜磁、冠帶、綺羅衣各一襲幷文綺、鈔錠。 五年改曲靖千戶所爲曲靖軍民指揮使司,置曲靖軍民府。 洪武十四年,征南將軍下雲南,元曲靖宣慰司征行元帥張麟、行省平章劉輝等來降。十 十七年,亦佐縣土酋安伯作亂,西平侯沐英發兵討降之。 十六年,霑益州土官安索叔、安 羅雄州土

爲苦麻部。 二十年,越州土酋阿資與羅雄州營長發束等叛。 元末,龍海 居之,所屬俱羅羅斯種。 王師征南時,英駐兵其地之湯池山。 阿資者,土官龍海子也。 越州 蠻呼 龍

列

傅

痹

二百

雲南

土

司

資 勝數 普 遷 降, 率 益桀驁 介窮 衆 日 其 遂 英 一來降。 寇普安 蹙請降。 Щ 生擒 造者 乃 民 至是 請 往 入 阿資 置 ,燒府治,大肆 居卑午村,留 千三百餘 叛 朝 初,阿 越 州 (退屯 帝命 詔 馬 資 以 普安, 龍 之遁 人,獲馬畜 龍 英 會 神 |海 剽掠。 衛,二三扼 也 、倚崖 策衞 征 爲 南 知 揚言 壁爲寨。 州 干 將 甚衆。 友德 戶 軍 其 日 傅 劉 尋爲 率 友德 險要,復分兵追捕,至 成等 阿資遁 兵擊之, 友德以精兵蹙之, 國家有萬軍之勇, 亂 將千 進討 一英擒 還越州 人 斬其營長。 置 道 屋其地 過 徙 復追 平夷, 遼東, 我 蠻衆皆緣壁攀崖, 是遂 撃敗 ,後以爲 二十二年, 以其 地 至蓋 有萬 降 之,斬 Щ 州 不夷 險 Щ 病死 其 悪,宜 之 友德等進攻, (黨五 千月 險 一駐兵 阿 岦 墜 所 十 資 能 餘 死 繼 屯守,遂 者 蠢 人。 阿 其 資 滅 土官 不 四 可

資 衞 辰 本 指 陽 衞 揮 阿資 集民 鎭 二十四年 使 英 司 等 守,庶絕後患。」韶從之。 復 與其衆降。 間丁 以 叛 陸 英又言:「曲涛指揮千戶哈刺 徙 壯 涼 命都 越州衛 五千人,統以右軍都督僉事王 西 南 督僉事 福擇曠地列栅, 要地 於陸涼州 ,請設衞 何福 帝以平夷 爲 ,以英言雲南 屯守。 平羌將 以置其衆。 不花,乃故元守禦陸涼 尤當 命 軍 洱 率師 成, 要衝, 海 諸蠻皆降,惟 衞指 西南有木蓉箐, 即平夷千戶所改置衞。 進討 四 揮僉 面 屢敗賊 皆諸蠻部落,乃遣開 事 阿資 滕聚於古魯昌築城, 千戶。 一恃險屢叛,宜徙衞軍守禦。 賊常 衆。 會連 出沒處, 今陸涼置 二十三年置 月淫 復調普安衛 國 雨 衞 公常昇 置 水 宜 陸 溢, 越州 調 涼 SH 往 於

官軍置寧越堡鎭之,然阿資終不悛。

乃平。 挑戰。 州 賊益困。 接壤,部衆多相與貿易。春使人結阿保等,覘阿資所在及其經行地,星列守堡,絕其糧道 蠻兵悉衆出,伏起,大敗之,阿資脫身遁。初,曲靖土軍千戶阿保、張琳所守地 十七年,阿資復反。西平侯沐春及福率兵營於越州城北,遣壯士伏於岐路,而以兵 自是以後,諸土官按期朝貢,西南晏然。 二十八年,福潛引兵屯赤窩舖,遣百戶張忠等擣賊巢,擒阿資,斬之,俘其黨,越州 ,與越

繼嫡 故, 所司 如序襲職。 ,皆無豫定次序,致臨襲爭奪,仇殺連年。 正統二年,曲靖軍民知府晏毅言四事。一 議 行。 毅復請設霑益州松韶巡檢、從之。 一,請卹陣亡子孫。 一,請雲南官俸,悉如四川之例。 ,土官承襲,或子孫,或兄弟,或妻繼夫,或妾 乞敕該部移文所司, 豫爲定序造册, ,均戶口田 土官有 地。

|州,留土官||資氏家,淫樂不進。 實 母 故 死,妻安素儀署州事,口巴亦提兵赴調。 加禁錮。 不忍。 嘉靖中,羅雄知州者濬殺營長,奪其妻,生子繼榮,稍長卽持刀逐濬。濬欲置之死,以其 萬曆 及濬請老,以繼榮代襲,繼榮遂逐濬。 九年調羅雄兵征緬。 知州越應奎白於兵備,將擒之,繼榮走,遂聚衆反。攻破陸涼 繼榮將行,恐留濬爲難,遂弑濬。時霑益土知州安世 繼榮與之合營,通焉,且倚霑益兵力爲助。師過越 濬訴之鎭巡官,命迎濬歸。繼榮陽事之,

曾以兵屬綎。 設千戶所日 繼仁爲巡檢。 以羣寨,實諸軍士妻女其中。 一萬七千人,追奔至阿拜江,斬繼榮, 子塘、陡陂 定雄 諸寨, 未幾,蠻寇必大反,殺繼仁,執倓。參將蔡兆吉等討定之,乃改羅雄州 疑遂馳赴普鮓營,直擣赤龍寨,斬賊渠帥,繼榮遁去。 築石城於赤龍山,據龍潭爲險,廣六十里。名己所居曰「龍樓鳳閣」,環 十三年,巡撫劉世曾乃檄諸道進兵。 賊平。 世曾請築城,改設流官, 適劉 綎復 乃以何後 挺破緬 「連破三寨,降其衆 爲 解官回,世 知州,者 日羅平,

遠, 水西叛。 糾衆焚掠霑益諸堡站,陷平夷衞。 時 霑益安素儀無子,以烏撒土官子安紹慶爲嗣。 事詳鳥撒傳中, 天啓三年,官兵擒設科,誅之。 慶死,孫安遠襲。土婦設科作亂,逐安 五年,安邊據霑益,從

一十里,士馬精强,征調 初,越州 阿資罪誅,永樂間以其子祿寧爲土縣丞,與亦佐沙氏分土而居。其地南北一 銀室三千八百 兩

百

築城 撫臣議:「曲靖鎖鑰全滇,交水當點、滇之衝,乃阨塞要地。 · 俾與平夷衞相望,互爲聲援,便。」報可。 曲 靖境內有<u>交水,去平夷衞二舍,與黔接壤,</u>滇師出上六衞必由之道。 天啓初,水西 平夷右所宜移置交水,去險 用

校勘記

ロコニ十五年英卒命其子春襲封西平侯 二十五年,原作「二十六年」。按本書卷三太祖紀、 實錄卷二一八都繫沐英死於洪武二十五年六月丁卯,繫其子春襲西平侯於本年十月乙亥,據 (太)(社

ヘニー 臨安領州四縣四 紀要卷一一五作「州五縣五」。 萬曆十九年,新化州「來屬」,又置新平縣,遂領州五縣五。本書卷四六地理志作「領州六縣五」 (「縣五」原作「縣四」,已改正),係將宣德元年已「與安南」之寧遠州亦列爲屬州之故。 **(金典卷一六都作「州四縣四」,因三書分別纂修於景泰、天順、萬曆初,時臨安府領州四縣四。 至** 州四縣四, 當作州五縣五。按寰宇通志卷一一二、明一統志卷八六、重修明 讀史方輿

弘治十五年正月景東衞雲霧黑暗 治十五年十一月。 本書卷二八五行志、 | 國権卷四四頁二七九二都繫此事於弘

29 立廣南西路宣撫司 廣南西路,原作「廣南西道」,據本書卷四六地理志、 元史卷六一地理志

五二 洪武十五年歸附 列 傳 第二百 洪武十五年,原作「洪武十七年」,據本書卷四六地理志、太祖實録卷一五 交 勘 記

明

- ○洪武十五年十一月「是月」條改。
- へ <u>ベ</u> 」 後爲東僰鳥蠻等部所居 東僰,明史稿傳一八七廣西傳、元史卷六一地理志改作「東爨」。
- 正統元年復免 按正統元年不應敍在成化十七年之後,疑「正統」當作「正德」。
- 日瓦魯之 原「瓦」「魯」二字倒置,據本書卷四六、地理志、明史稿傳一八七永率傳、明一統志卷

八七改。

- , . ≯i ∐/ 萬曆中大侯土舍奉赦奉學兄弟不相能 兵事,蠻司合誌卷一一稱在「萬曆中」。 一三萬曆二十五年八月甲申條。此作「宣德中」誤,今改正。 撫按以聞,明朝廷命猛廷瑞擒獻奉學, 萬曆中,原作「宣德中」。按奉學與兄奉赦不相能日搆 見神宗實録卷三
- 所謂三猛也 三猛,原作「三緬」,據本書卷四六地理志改。
- 正統元年韶復免 按上文已見正統,不應重出,也不應敍在成化之後,疑「正統」當作「正德」。
- 〇三)洪武十五年至設孟定府 十五年,原作「三十五年」,「三」字衍,據本書卷四六地理志改。太祖 實録卷一四三洪武十五年三月己未條載是年所定之雲南府名中有孟定府。
- 英乃請置越州馬龍二衞 明一統志卷八七改。 按「馬龍」一作「馬隆」,見太祖實録卷一九五洪武二十二年二月「是月」條、 馬龍,原作「龍馬」。據明史稿傳一八七曲靖傳、寰宇通志卷一一二、

國権卷九頁六九四。 本書卷四六地理志曲靖府馬龍州注云、「北有馬隆守禦千户所,本馬隆衛、

〇〇 妻安素儀署州事

安素儀,原作「安索儀」,據下文及明史稿傳一八七曲靖傳改。

列傳第二百一 校 勘記

明史卷三百十四

列傳第二百二

雲南土司二

姚安 鶴慶 武定 尋甸 麗江 元江 永昌 新化 威遠

爲弄棟府。宋時,段氏改姚州。元立統矢千戶所,天曆間,陞姚安路。 姚安,本漢弄棟、蜻蛉二縣地。 北勝 灣甸 鎭康 大侯 唐置姚州都督府,以民多姚姓也。 瀾滄衞 麓 川 天寶間,南詔蒙氏改

保、惠從英擊自久,平之。二十年命普定侯陳桓、靖寧侯葉昇往雲南總制諸軍,於定邊、姚 **按等處立營屯種。二十六年,保以襲職,遣其弟貢馬謝恩。** 自久遁去。明年復寇品甸。西平侯沐英奏以土官高保爲姚安府同知、高惠爲姚安州 洪武十五年定雲南,改爲府。十六年,姚安土官自久作亂。官兵往討,師次九十九莊, 同知。

列傳第二百二 雲南土司一

嘉靖三十年,土官高鵠當元江之變布政司徐樾遇害,奮身赴救,死之。 宣德九 年,姚安 土知府高賢遣使貢馬。 弘治中,土官高棟與普安叛賊戰,死於板橋驛。 萬曆中,同知高金以

征

緬功,賜四品服

有 歸 命者, 元年,巡撫鄒應龍與總兵官沐昌祚討平之,諸郡乃安。 所屬 大姚縣 分隸 於姚安、姚州 ,有鐵索籌者 本保種。 嘉靖中, 功 依 、專屬 山險,以剽掠爲業, 姚安。 其渠羅思者, 旁郡皆受其害。 有幻術,造偽印稱亂 弘治間,稍

與 知州 前 以土官高隆署府 子節並 衛世 洪武 鶴慶 一襲指 賜率其 中, · 唐時名鶴川,南詔置謀統郡。 一有世襲知府、知州之命。 大軍 揮僉事。 (屬來朝,貢馬及方物,詔賜冠帶幷織金文綺、布帛、鈔錠。 平雲南,分兵拔三營、萬戶砦,獲爲參政寶山帖木兒等六十七人。 事。 賜,安寧州人,世爲酋長。 十七年以董賜爲知府、高仲爲 及賜來朝,以父子俱受顯榮,無以仰報,子幼沖, 元初,置鶴州。 大軍 入滇,率衆來降,復從軍討賊有功, 同 至元中,陞鶴慶府,尋改爲 知、賜子節爲安寧知州、楊 十八年以賜 置鶴 奴 不達 為雲 爲 慶 劍

故

政治,乞還父子所授官,而自爲安寧知州。

帝曰:「爾能綏靖邊鄙,授爾官以酬爾勳。

今辭

南

府

可発。 尊居卑,奈何。] 命潁國公傅友德及諸大臣議之。 乃改賜明威將軍雲南 前 衞 世襲指揮僉事, 皆以賜旣有功,不可聽其辭,而節之官則 諭 日「雲南前衞密邇安寧, 特 命爾是職

爾其綏輯遠人,以安邊鄙,其毋再辭。」

學敎育。」從之。 十五年,順州知 JII ,復聚蠻爲 一十年, 亂,祥復以 劍川 、州王義言:「霑被聖化三十餘年,聲敎所屆,言語漸通, 土官楊奴叛。 兵擊斬之。 大 二十四年置鶴慶衞。 理衞指揮鄭祥討之,斬八十餘人,楊奴遁。 三十年改鶴慶府為軍 子弟亦 有 民府。 没秀, 未幾, 請 還劍 永 建 樂

沐晟 害親 知 仕潔妻阿夜珠告倫謀殺其子,復命法司移文勘驗。 卽委官至彼 耳 府高倫 相 、賊害。 等勘覆。 母,又稱其母告倫不孝及 正 以致挾 統二年,副使徐訓奏鶴慶土知府高倫與弟純屢逞兇惡,屠戮士庶,與母楊氏幷叔宣 妻劉氏同倫弟高昌等,糾集羅羅、麼些人衆,肆行兇暴。 勘實 敕黔國公沐昂諭使輸款,如恃强不服,卽調軍擒捕。 仇誣陷。 及奏至,言倫所犯皆實,罪應死。 ,量調官軍擒捕首惡,幷逮千戶王蕙及高宣等至京質問。」八年,鶴慶民楊 所 勘殺 私斂民 死, 皆病死及强盜拒捕之人。 財,多造兵器,殺戮軍民,支解梟令等罪。 倫 ,復屢訴,因與叔宣爭襲,又 已而大理衛千戶奏報,倫擅率軍馬欲 倫母楊亦訴倫 五年復敕昂等曰:「比聞土 事發,不從逮訊。 無不孝, 與千戶 遂敕黔國 實由宣 王 敕至, 恵 謀 公

官中擇人,以綏遠蠻。 等陷害。 復敕晟及御史嚴恭確訪。 乃擢瀘州知府林遒節爲知府。 旣而奏當倫等皆伏誅。 鶴慶之改流官自此始。 高氏族人無可繼者, 帝命於流

元世 祖時,爲北部土官總管。 武定,南詔三十七部之一。 至元七年改武定路,置南 朱淳熙間,大理段氏以阿歷爲羅武部長。 甸縣。 三傳至矣格,當

事。 爲 土 知縣吾忠子政來朝。 知州。 十六年,勝遺人來朝,貢馬。 洪武十四年,雲南下,武定女土官商勝首先歸附。 二十一年發內帑,令於武定、德昌、會川諸處,市馬三千匹。 詔賜勝誥命、朝服及錦幣、鈔錠。 十五年改爲武定軍民府,以勝署府 十七年以和曲土官豆派 宣德元年,元謀縣故

賜金帶,部議不可。帝以英有軍功,給之。明年,英貢馬謝恩,賜如例 改隸和曲州,石舊縣改隸祿勸州。三年,土知府鳳英以從征功,進秩右參政,仍知府事,請 正 德二年四月,武定雨雹,溪水漲,決堤壞田,隕霜露殺麥。七月廢武定所屬之南甸縣

府 ,撫臣以聞。 嘉靖七年,土舍鳳朝文作亂。 時安銓未平,朝文復起,滇中大擾。韶以右都御史伍文定爲兵部尚書,提督 殺同知以下官吏,劫州印,舉兵與尋甸賊安銓合犯雲南

之湯 朝文計無所出,絕普渡而走,官兵追及,復敗之。 戮,朝廷且盡剿武定蠻衆。至是,鳳詔同其母率衆自會城往,蠻民相顧錯愕,咸投鳳詔降。 武定。乞敕部授臣方略,俾獲便宜行事,幷宥各土舍往罪,凡有功者,俱許承襲,作其敵愾之 擒渠賊千餘人,斬首二千九百餘級,俘獲男婦千二百餘,撫散蠻黨二萬有奇,奪器械牛馬無 先後破,乃併力攻拔其必古老巢。 以便宜榜示,先給冠帶,待後奏請承襲,衆始感奮。於二月進兵,擊斬强賊十餘人,賊奔回 雲、貴、川、湖軍務,調四鎭土漢官軍討賊。五月,黔國公沐紹勛疏言:「」「臣奉命會同巡撫 氣。」帝納之, 等調發官軍,分道剿撫。 郎等,爲追兵所及,磔死。 賜敕獎勵。 諸賊抗逆,執留所遣官軍二人,所調集各土舍,又重自疑畏。 賊旣敗歸,其黨稍散。 **銓衆猶盛,遁據尋甸故巢,列寨數十。官兵分哨夾攻之,諸寨** 銓奔東川, 入芒部,爲土舍祿慶所執,賊平。 朝文率家奴數人,取道霑益州,奔至東川 初,朝文紿其衆,謂武定知府鳳詔母子已 是役也,生 臣謹

同 知,土知府職專巡捕、徵糧而已。 以印屬瞿氏。 十六年命 土知府瞿氏掌印。 吏部覆言,係舊例,宜如其請,從之。 初,府印自洪武以來俱掌於土官,正德間有司議以界流官 及鳳韶 死,瞿氏以母 襲子官,所轄四十七馬頭阿台等,

捷聞,銓、朝文皆梟示,籍其產,家屬戍邊。

四十二年,瞿氏老,舉鳳詔妻索林自代。 比索林襲,逐失事姑禮。 瞿氏大志,乃收異姓

列傳第

見繼祖 令瞿氏 所,於是婦姑嫌隙益甚。 逼 祖 殺 仏傷調 嗣 奪府印。 暫理府 入鳳氏宗,挾其甥壻貴州水西土舍安國亨、四川建昌土官鳳氏兵力,欲廢索林, 至土官王心一等兵。索林復抱印 不 克,乃具疏自稱爲索林囚禁,令繼祖詣闕告之。 索林抱印奔會城,撫按官諭解之。 事 "貸繼祖,責共自新。 索林謀誅繼祖,事洩,繼祖遂大發兵圍府,行劫和曲 走雲南,巡撫曹忭下令收印,逮其左右鄭竤繫獄 索林歸武定, 繼祖 視事 歸,詐稱受朝 如故, 而復聽繼祖留瞿氏 命襲職,驅 、祿勸等州縣, 以繼 目 兵

鰲、土 竤 思問 林走照姑。 亦敗,澤及 以狀聞 四 含王 前爲 + 四 千戶劉裕 德隆往援,至雞 年添 索林謀殺 ,敕雲南 已,復殺 設府 澤。 四四 被執 繼祖 通判]]] 官軍追之急,由直勒渡過江 溪子隘 者也。 會兵討 一員。 鎭巡官促諸道兵並進,逼繼祖 繼祖 賊 ,遇伏, 四十五年築武定 執 而 鰲及德隆俱死。 殺 之, 新城 糾衆攻新城。 ,趨四川,依 成、巡撫 東山 僉事 寨,圍之。 呂光 張澤督尋甸兵二千餘馳救, 東川 臨安 洵遺鄭竤 通 婦家阿科等。 判胡文顯督百戶李 **繼祖懼,攜** 何府 復業 澤及索 巡按 鄭

劉

背繼祖 先 復擒其餘黨,姚安府同知高 初 , 發卒七千人來援, 繼 繼祖 之走 東]]] 也、土官鳳氏 祖 飲及弟鈞, 益 窮。 與之通。 賊 謀主趙士傑等皆伏誅。 帥者色赴紹先營降,斬 已而 見滇、蜀官軍 與土舍祿紹先等兵皆會,乃 繼祖 守臣議改設流官,猶不欲 以獻。 姚縣土官高 繼

中嚴備不能入,退屯魯墟。宗寅夜出兵,砍其營,賊潰,追至馬剌山,擒鳳曆,伏誅 水 絕 西宣慰安國亭謀作亂。 鳳氏,授索林支屬鳳曆子思堯經歷,給莊百餘。 流官知府劉宗寅遣諭之,不聽,遂聚衆稱思堯知府,夜襲府城。城 鳳曆以不得知府怨望,陰結四川七州 及

立 阿克及其黨至京師,磔於市。 以無印難號召,劫推官,請冠帶、印信。 蠻,直陷武定,大肆劫掠。 阿克 萬曆三十五年,繼祖姪阿克久徙金沙江外,賊黨鄭舉等誘阿克作亂,陰結江外會川 爲知府。 鎮撫調集土兵,分五路進剿,克復武定,元謀、羅次、祿豐、嵩明等州縣,擒 連破元謀、羅次諸城、索府印。 武定平,遂悉置流官。 鎭撫以兵未集,懼,差人以府印授之。 會流官知府攜印會城,不能得。賊 賊退入武定, 諸

氏 為尋甸 尋 甸 ,古滇國 ,至段氏,改仁德部。 地,獛刺蠻 居之,日號仲劉溢源部,後爲 元初,置 仁德萬 戶 ,後改府 島蠻裔斯丁所奪,號斯丁部。

陽 來朝,貢馬及虎皮、氈衫等物 三年置木密關守禦千戶所於 洪武 十五年定雲南,仁德土官阿孔等貢馬及 尋甸 ,詔賜衣服、錦綺、鈔錠。 之甸頭易龍驛, 方物, 又置屯田所於甸頭 改爲尋甸軍民府。 十七 年以尋甸 土官沙琛為 里果馬里, 十六年, 知府。二 土官安 聯絡耕

列

傳

百

種,以爲邊備。是後,土官皆按期入貢。

成化十二年,兵部奏,土官舍人安宣聚衆殺掠,命鎭守官相機撫捕。十四年,土知府安

晟死,兄弟爭襲,遂改置流官。

巡官討之,大敗,賊遂陷尋甸、嵩明,殺指揮王昇、唐功等,知府馬性魯棄城走。 |文叛,||銓與之合,外之伏誅,事詳前傳。 嘉靖六年,安銓作亂,乃土舍之失職者也,侵掠嵩明、木密、楊林等處。 巡撫傅習檄守 時武定鳳朝

中,改置麗江路軍民總管府,後改宣撫司。 麗江,南詔蒙氏置麗水節度。宋時麼些蠻蒙醋據之。〔三元初,置茶罕章宣慰司。

弟虧爲千夫長,代守石門,從之。二十六年十月,西平侯沐春奏,麗江土民每歲輸白金七 之,賊戰敗,遁入山谷,捕獲誅之。時木德從征,又從西平侯沐英征景東、定邊,皆有功,予 世襲。二十四年,木德死,子初當襲。初守巨津州石門關,與西番接境。旣襲職,英請以初 十八年,巨津土鱼阿奴聰叛,劫石門關,千戶浦泉戰死。吉安侯陸仲亨率指揮李榮、鄭祥討 洪武十五年置麗江府。十六年,蠻長木德來朝貢馬,以木德爲知府,羅克爲蘭州知州。

軍民府,從春請 百六十兩 ,

皆麼些洞所產,

民以馬易金,不諳眞偽,

請令以馬代輸,從之。 也。 永樂十六年,檢校龐文郁言,本府及寶山 、巨津、通安、蘭州 三十年改為麗江 四州 歸化

外,請建學校,從之。

誥 命。 移知 也。 行 再 ,勿緣細故激變蠻民。 招撫。 宣 成化十一年,知府木嶔奏,鶴慶千夫長趙賢屢糾羣賊越境殺掠,乞調旁衞官軍擒剿, 守臣計畫。 德五. 四十年又進木植銀二千八百兩,詔進一級,授亞中大夫,給誥命 已,蘭州土官羅牙等奏,者保拒命,請發兵討之。 年,麗江府奏浪滄江寨蠻者保等聚衆劫掠。 嘉靖三十九年,知府木高進助殿工銀二千八百兩,詔加文職三品服色,給 正統五年,賜知府木森誥命,加授大中大夫資治少尹,以征麓川 黔國公沐晟委官撫諭,不服,部議 帝命黔國公及雲南三司 相 命 功 機

得寢。 江 必失遠蠻之心。 自 1大祖 萬 曆三十一 令木氏 年,巡按御史宋興祖奏:「稅使內監楊榮欲責麗江土官退地 即令聽諭,已使國家歲歲有吐蕃之防,倘或不聽,豈獨有傷國體。」 世官,守石門以絕西域,守鐵橋以斷 吐蕃、滇南藉 爲屛藩。 今使退 **,聽採。** 疏 地 竊以麗 上,事 聴採,

覆 賜 三品服 一十八年,知府木增以征蠻軍興,助餉銀二萬餘兩,乞比北勝土舍高 色, 巡 按 御 史劾 其 遠越,請奪新恩,從之。 四十七年,增復輸銀 光裕 例,加 萬 助遼餉。泰 級。 部

昌元 參政致仕。 (年,錄|增功,賞白金表裏,其子||藍及舍目各賞銀幣有差。||天啓二年,|增以病告,加授左 五年,特給增誥命,以旌其忠。 雲南諸土官,知詩書好禮守義,以麗江木氏爲

府那榮及白文玉等來朝貢。 江萬戶府。 等府練兵,時百夷屢爲邊患, 十八年置 張、周、段等十姓戍之。 居於此,和泥又開羅槃甸居之,後爲麼些、徒蠻、阿僰諸部所據。一元時內附。 洪武十五年改元江府。 元江,古西南夷極邊境,日惠籠甸,又名因遠部。 因遠羅 後於威遠更置元江路,領羅槃、馬籠等十二部,屬臨安、廣西、元江等處宣慰司。 必甸長官司隸之, 叉開威遠等處,置威遠睒。 十七年,土官那直來朝貢象,以那直爲元江知府,賜襲衣冠帶。 帝欲發兵平之故也。 以土會白文玉爲副長官。二十年遣經歷楊大用往元江 二十六年置元江府儒學。 後和泥侵據其地。 南詔蒙氏以屬銀生節度,徙白蠻蘇、 宋時,儂智高之黨竄 至元中,置元 二十七年,知

(競運,往攻八百,帝嘉勞之。
一元江府又奏,石屏州洛夾橋,每歲江水衝壞,止令本府修理,民 永樂三年,榮復入朝貢。 帝厚加賜予,遂改爲元江軍民府,給之印信。際請躬率兵及

不堪,乞命石屏州協治,從之。 九年,那樂率頭目人等來朝,貢馬及金銀器,賜予如

二年,故土知府那直子那邦入貢方物。

統 **今獲刀龍** 宣 德 、刀洽赴京,乞如永樂故事,發遼東安置,以警邊夷, 五年,黔國公沐晟奏,元江土知府那忠, 被賊刀正、刀龍等焚其廨宇及經歷印信。 從之。 命禮部鑄印給之。 E

養浩 兵渡江攻城,選路通哨、 簡 出 縛 安,分部進兵。 以 衝 出 聞 職,養浩等各住俸,剋期捕賊 元年,因遠羅 總兵官沐朝弼 沐朝弼 之,越及 城 所乞降。 嘉靖二十五 來降。 命鎭巡官發兵剿 颠 左右皆死。 時左布 、巡撫 左右 破木龍寨, 必甸長官司遣人來朝貢馬。 年,土舍那鑑 以聞, 成調 石簡 政徐樾 之。 調 甘莊哨各精卒二千佐之。 夷詐不 巡按 請以副 武定、北勝、亦佐等土、漢兵, 降甘莊, 二十九 以督餉至南羨,樾迁 趙炳然 殺其姪土知 可信,樾不聽,如 贖罪。 使李維 年, 賊 以聞,并參朝弼、簡 勢漸蹙。 朝弼與簡 那鑑 參政胡堯時督兵剿之, 府 懼, 那憲, 正德二年以那端襲土知 期親 那鑑 乃督集五哨兵,環元江而壁。 密約交蠻 闇,聞維言 那鑑知二哨精卒悉歸南羨, 奪其印,幷收因遠驛 遣經 率百人往城下受降。 分五 及養浩等失事罪。 歴張維 武 謂鑑誠 文淵 哨。 制 及生儒數人詣南 調 謀 兵旣 可。 亂 計窮,乃約 府 那鑑 印記。 集, 撫按官胡奎 鑑 帝降敕切責,褫 縱 朝 益 象馬 翼日 令 潛遣兵象乘 弼 縱 巡撫 羨 南羨哨督 與 兵攻掠村 夷兵突 令 監 應大猷 簡 鑑 督 林 駐 臨 面 王 應

列傳

第

百

雲

南

土

司

江 贀 印,納象十二隻,輸屢歲逋賦。 政徐樾之光龍、光色等,皆斬首以獻。 那鑑懼,伏藥死。 (疏言其狀,請廢恕,貸其死, 土舍那恕招降車里功,許襲祖職,賞銀幣。 領長官司一,日因遠羅必甸。 三十二年,像賢至鎭,調集土、漢兵七萬人,廣集糧運,剋期分哨進剿元江,爲必取計。 <u>像賢檄百戶汪輔入城,撫諭其衆,擒其賊首,及戕土官那憲之阿捉,</u> 命從仁暫統其衆,加汪輔以千戶職,從之。萬曆十三年以元 象賢命官民推挪氏當立者,衆舉前土官那端從孫從仁。 鑑子
密輸所占
所

所

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方

方 殺布

府

南詔 蒙氏所據,歷段氏、高氏皆爲永昌府。 永昌,古哀牢國。 漢武帝時,置不韋縣。 元初,於永昌立三千戶所,隸大理萬戶府。四至 東漢置瀾滄郡,尋改永昌郡。 唐屬姚州 後爲

元 間置永昌州,尋爲府,隸大理路,置金齒等處宣撫司治。

甸長官司,四以土會阿干爲副長官,賜冠帶 年以申保爲永昌府同知。四月,金齒土官段惠遣把事及其子弟來貢,賜綺帛鈔有差。 六年,永昌州土官申保來朝,詔賜錦二匹、織金文綺二匹、衣一襲及鈒花銀帶、 洪武十五年定雲南,立金齒衞。以元雲南右丞觀音保爲金齒指揮使,賜姓名李觀。 鞾襪。 十七 置施

恋,有乖軍律,故特命傑、
武輔之。
觀之寬,可以綏遠;傑、<
武之嚴,可以馭下。
敕至,其整練 諸軍,以觀外變。」 在邊徼,土民不遵禮法。 十八年置金齒衞指揮使司。二十年,遣使諭金齒衞指揮儲傑、嚴武、李觀曰:「金齒遠 爾指揮李觀處事寬厚,名播蠻中,爲諸蠻所愛。 然其下多恃功放

衞。 法,故賞之。 以府衞合爲軍民使司,從之。置鳳谿長官司,以永昌府通判阿鳳爲長官。二十四年置永平 永樂元年,賜金齒土官百戶汪用鈔一百錠、綵幣四表裏,以西平侯沐晟遣用招安罕的 二十三年罷永昌府,改金齒衞爲軍民指揮使司。時西平侯沐英言,永昌居民鮮少,宜 洪熙 元年,金齒軍民指揮使司及騰衝守禦千戶所等土官貢馬,賜鈔幣。

列傳

守。今四百夫已隸本州,止州民守之。乞於五處置巡檢司,以土軍尹黑、張保、李輔、郭節 等爲巡檢。 正統二年以非額革之。 處,人民逃徙者多,有悞差發貢獻。舊四百夫長隸騰衝千戶所,其庫扛關等五處,皆軍民兼 年置騰衝州庫扛關、庫刀關、庫勒關、古湧二關。〔六〕先是,騰衝州奏,本州路通麓川、緬甸諸 言,其地遠在極邊,麓川宣慰思任發不時侵擾,乞設州治。 帝從之,卽以銘爲騰衝知 宣德五年設金齒軍民指揮司騰衝州, 置土知州一員。 時騰衝守禦所土官副千戶張銘 州

嘉靖元年復設永昌軍民府。領州一、縣二。其長官司二,曰施甸,曰鳳谿。

戶 府 。 新化、本馬龍、他郎二甸、阿僰諸部蠻據之。元憲宗時內附、立爲二千戶所、隸寧州萬 至元間,以馬龍等甸管民官併於他郎甸,置司,隸元江路。

公沐晟奏,摩沙勒寨萬夫長刀甕及弟刀眷糾蠻兵侵占馬龍他郎甸長官司衙門,殺掠人民, 馬龍 請遣都督同知沐昂討之。 他郎甸副長官。 洪武初,改名馬龍他郎甸長官司,直隸雲南布政司。 。宣德八年,故長官普賜弟土舍普寧等來朝,貢馬,賜鈔幣。 帝命遣人撫諭,但得刀甕,毋擾平民。 後陞爲新化州。 正統二年,晟等奏甕不服 十七年以普賜爲 一八月,黔國

招撫,請調附近官土兵,令都督昂剿捕。 帝以蠻衆仇殺乃其本性,可仍撫諭之,事遂不竟。

其 、地有馬龍諸山,居摩沙勒江右。 兩岸束隘如峽,地勢極險,故改州以鎭之。

威遠,唐南詔銀生府地,舊爲濮落雜蠻所居。 大理時,爲百夷所據。 元至元中,置威

這州

洪武十五年平雲南後,改威遠蠻棚府爲威遠州。 三十五年,以土官刀算黨爲威遠知

州。

刀慶罕等來朝,貢馬及方物,賜慶罕鈔八十錠,紵絲、羅紗,及頭目以下,皆有加。 象馬方物謝,頒降敕諭金字紅牌,賜之金帶、織金文綺、襲衣及銀鈔、錦幣。二十二年,土官 永樂二年,算黨爲車里所擴,奪其地,命西平侯諭之,乃還算黨幷侵地。三年,算黨進

賜之,仍給信符、勘合底簿。 宣德三年,刀慶罕遣頭目招剛、刀著中等來貢,賜予如例,就令齎敕及織金紵絲、 八年,威遠州奏其地與車里接境,累被各土官劫掠, 播孟貨當 紗羅

要衝,乞置巡檢司,以把事劉禧爲巡檢,從之。

正統二年,土知州刀蓋罕遣人貢馬及銀器, 賜綵幣等物,幷以新信符給之。 正統六年

勉忠義,以副朕懷。」 太宜 給 殺 脋 賊所據江口 成遠土 敗,斬 爾從逆。 人,俱錫誥命、銀帶及綵幣表裏,酬爾母子勳勞。 其 知 、頭目 地。 爾母招룙猛能秉大義,効忠朝廷,悉出金貲,分賚頭目。 州刀蓋罕金牌,印命合兵剿麓川叛寇,以捷聞。 忠義卓然,深足嘉尙。 派罕,行追逐餘賊過江,溺死數千,斬首數百,得其戰艦戰象,仍留兵守 今特陞爾 正五品,授奉政大夫、修正庶尹,封爾母爲 陶孟、刀孟經等亦賜賚有差。 敕曰:「叛寇思任發侵爾境 爾母子躬擐甲胄,賈勇 爾宜益

舍刀朔罕遣頭目刀昔思貢象馬幷金銀器,賜予如例。 貢,因命其管屬本州人民,復給與金牌、信符、織金文綺,賜敕諭遣之。 成化元年,威遠州土 時 西南諸部多相仇殺,所給金牌、信符,燒燬不存。景泰六年,刀蓋罕、隨乃吾等來朝

其俗勇健,男女走險如飛。 境內有河,汲水練炭上卽成鹽。 無秤斗,以簍計多寡量之。

其 地 尋改北勝州。 一號成 北勝,唐貞元中,南詔異牟尋始開 偈 睒 ,又改名善巨郡 宋時,大理段氏改爲成紀鎭。 其地,名北方睒,徙瀰河白蠻及羅落、麼些諸蠻,以實 沅初, 內附。 至元中,置施

州

後爲府,隸麗江路軍民宣撫司。

賜鈔幣。 馬,賜鈔幣。 武 十五年改爲州、隸鶴慶府、後屬瀾滄衞。 正統七年,以北勝州直隸雲南布政司,設流官吏目一員,以州蠻苦於瀾滄衛官軍 宣德四年,土判官高琳子瑛來貢方物,請襲父職。 永樂五年,土官百夫長楊克即牙舊來貢 十年,土知府高瑛來朝貢

侵漁也。

有隱憂。 發其祖父墓, 萬曆 不聽。 上官嘉其義,調增率其部進剿,獲蘭梟之。 四十八年,北勝州土同知高 世昌懼逼,走麗江避之。 自稱欽授把總, 大掠。 世 麗江知府木增請討之,謂法紀弁髦,尾大不掉,不治將 尋還至瀾滄,宿客舍,蘭圍而縱火,殺 一、然死, 異母弟世昌襲。 其族姪蘭妄稱世昌奸生,訟 以其家 七十餘人,

三年 發為 鈔幣。 設 灣 知 甸 灣甸, 貢,著爲令。 州 長 七年,刀景發子景懸等來朝,貢馬,賜予如例。 (官司 , 給印 蠻名細睒。 ,以西平侯沐晟奏地近麓 章、金牌幷置流官吏目 如慶賀、謝恩之類,不拘 元中統初, 內附, 員。 川, 屬鎭康路。 地廣 此例。 四年,帝以灣甸道里險遠, 人 稠故也。 六年 洪武十七年置 ,刀景發遣人來朝,貢馬及方物,賜 尋仍 改 灣甸縣。 爲 灣甸 毎 州 歲朝貢, 永樂元 以土官刀景 令自今 年三月

列

侵削 宣德八年以土官刀景項弟景辦法繼兄職。 成化五 年,灣甸州土官舍人景拙法遣使刀胡猛等來朝, 州有流官吏目一員。 貢象馬幷金銀器,賜宴幷衣 州鄰木邦、順寧,日以

服綵 幣有差。

之。 景眞 萬曆· 干一 子幼,貸死,降爲州判官。 年,土官景宗眞率弟宗材導木邦叛賊罕虔入寇姚關, 後從討猛廷瑞有功,復舊職。 宗眞死於陣, 擒宗材斬

地多障。 有黑泉,漲時,飛鳥過之輒墮。

鎭康,蠻名石睒,本黑僰所居。 元中統初,內附。 至元十三年立鎭康路軍民總管府,領

七年 官徐亮使西南蠻,曩光阻道,詔責之,至是,遺人來朝謝罪。 三甸 賜鈔幣。 成化五年,知州刀門戞遣使貢馬及金銀器,賜予如例,及妻。 以灣甸同 洪 武 一十五年改爲鎭康府,十七年改爲州。 二十一 知曩光爲知州。 年,知府刀孟廣來朝,貢馬。宣德三年賜鎭康州土目刀門淵等鈔幣有 初,鎮康地隸灣甸,曩光請增設署所,故有是命。 永樂二年遺官頒信符及金字紅牌於鎭康州。 十四年,鎮康州長官司遣 九年以中 人貢

死,其弟悶恩歸義。 鎭康後亦爲木邦、順寧所侵削。 恩死,子悶枳襲,木邦思禮誘之歸緬,不從。天啓二年,木邦兵據喳哩 隆慶間,知州悶坎者,罕虔妻以女,因附虔歸緬。 坎敗

江,枳奔姚關,守備遣官撫之,乃退。

大侯、蠻名孟祐、百夷所居。一一統初、內附、屬麓川路。

刀奉偶遣子刀奉董貢馬及銀器,賜鈔幣。六年,長官刀奉偶遣弟不納狂來貢,賜予如例 洪武二十四年置大侯長官司。永樂二年頒給信符、金字紅牌。三年,大侯長官司長官

宣德四年陞大侯長官司爲大侯州,「弘以土官刀奉漢爲知州。「10〕時刀奉漢奏:「大侯蠻

故有是命。八年,大侯州入貢,遣內官雲仙往撫之,幷賜錦綺 俱陞爲州,乞援二州例。」帝諭吏部曰:「大侯民多復業,亦其長官善撫綏也,宜增秩旌之。」 民復業者多,歲納差發銀二百五十兩。灣甸、鎭康二長官民少,歲納差發銀各百兩,永樂中 有差。

川,乞賜金牌、信符,以安民 初,奉漢令把事傅永瑤來朝,貢馬,奏欲與木邦宣慰罕門法共起土兵十萬,協 正統三年,土官刀奉漢子刀奉送來貢,命齎敕幷織金文綺絨錦諸物,賜刀奉漢幷及其 ì 特賜之,復降敕嘉獎。 七年,敕刀奉漢子刀奉送襲大侯知 同 征 剿 麓

銀器、 州,賜冠帶、印章、綵段表裏,以奉送能率土兵助討麓川也。 象馬, 賜綵幣、衣服有差。 十二年敕賜大侯州奉敬法、刀奉送等幷其妻綵幣,命來使 十一年,大侯知州奉外法等貢

齎與之。

雲州,設流官。 學首以獻, 萬曆 中,土目奉學壻於順寧知府猛廷瑞, 學兄赦守大侯如故 子奉先與其族舍猛麻 後巡撫陳用賓誣奏廷瑞與學反狀,廷瑞斬奉 奉恭爭殺抗命, 次年討平之,改爲

直隸布政司,今衞只領州一。 城、置今衞司。 瀾 滄, 元爲北勝州 領北勝、 浪渠、 地。 洪武中, 永寧三州。 屬鶴慶府。 永樂四年以永寧州陞爲府。 二十八年置瀾滄衞。 正統 二十九年於州南築 七年 以 北 勝州

險, 政、恬不加意。 衞 與北勝州同一城, 招服野番千餘家爲莊戶,遂致各番生拗,動輒殺人, 弘治十一年,福建布政李韶以前任雲南參議,知土俗事宜,上疏言四事。[11]一謂瀾滄 又姚安府、大羅衞、賓川州地方有賊穴六七,軍民受害。 地域廣遠, 與四川 建昌西番野番相通。 州官無兵不能禁止。衛官 邇年西番土舍章 朝等倚恃山 請添設兵備副使於 大廢軍

瀾 撫流民法,於賊巢則用立保甲法,朝夕經理,則內外寇患皆可弭矣。 滄衞城,以姚安、大羅、賓川、鶴麗、大理、洱海、景東諸府州衞所,皆令屬之。 因從其議,設兵備副使 於野番則用

員於瀾滄城。

甸之名自此始。緬在雲南之西南,最窮遠。與八百國、占城接境。有城郭室屋,人皆樓居, 地 ·產象馬。元時最强盛。元嘗遣使招之,始入貢。 麓川、平緬,元時皆屬緬甸。 緬甸,古朱波地也。 宋寧宗時,緬甸、波斯等國進白象,緬

發 JII] 遣刀令孟獻方物,幷上元所授宣慰使司印。 相接,土蠻思倫發聞之懼,遂降。因置平緬宣慰使司,以倫發爲宣慰使。 有韶召之,惟儼還,餘皆道卒。十五年,大兵下雲南,進取大理,下金齒。 朝服、冠帶及織金文綺、鈔錠。 與平緬 洪武六年遣使田儼、程斗南、張禕、錢允恭齎詔往諭。至安南,留二年,以道阻不通。 連境,元時分置兩路以統其所部,至是以倫發遣使貢,命兼統麓川 尋改平緬軍民宣慰使司爲麓川平緬軍民宣慰使司。四三麓 韶改平緬宣慰使爲平緬軍民宣慰使司,並賜倫 、十七年八月,倫發 平緬與金齒壤地 之地。

十八年,倫發 列 傅 第 百 反,率衆寇景東。 雲 南 土 司 都督馮誠率兵擊之,值天大霧,猝遇寇,失利,千戶王

昇戰死。

寨,斬首三萬餘級,降卒萬餘人。象死者半,生獲三十有七。倫發遁,以捷聞。帝遣使諭英 諸蠻皆爲盡力。」英選師三萬亟趨至,賊列象陣搏戰。英列弩注射,突陣大呼,象多傷,其蠻 亦多中矢斃,蠻氣稍縮。次日,英率將士,益置火鎗、神機箭,更番射,象奔,賊大敗。擣其 移師逼景東屯田,固壘以待大軍集,勿輕受其降。 破之,斬首千五百餘級。 即文移亦愼答之,毋忽。」明年,倫發誘羣蠻入寇馬龍他郎甸之摩沙勒寨。英遣都督甯正擊 勿輕與戰。又以往歲人至百夷,多貪其財貨,不顧事理,貽笑諸蠻。繼今不許一人往平緬, 到,可卽於金齒、楚雄、品甸及瀾滄江中道,葺壘深池,以固營栅,多置火銃爲守備。 二十年敕諭西平侯沐英等曰:「近御史李原名歸自平緬,口己知蠻情詭譎,必爲邊患。符 倫發悉舉其衆,號三十萬,象百餘,寇定邊,欲報摩沙勒之役,新附 寇來,

等一百三十七人,平緬遂平。自是,三年每來朝貢。 已,遣京衛千戶郭均英往賜思倫發公服、幞頭、金帶、象笏。 兵費,庶免問罪之師。 死,願輸貢賦。」雲南守臣以聞。乃遣通政司經歷楊大用齎敕往諭思倫發修臣禮,悉償前日 二十二年,倫發遣把事招綱等來言:「往者逆謀,皆由把事刀厮郎、刀厮養所爲。 倫發聽命,遂以象、馬、白金、方物入貢謝罪,大用幷令獻叛首刀厮郎 二十七年,倫發來朝,貢馬、象、方物。

聰等使 威德諭 其 部 十八年,緬國 緬 或 衆,叛者稍退。 及 百夷。 王使來言,百夷屢以兵侵奪其境。 思倫發聞詔,俯伏謝罪,願罷兵。 思倫發欲倚使者服其下,强留之, 適其部 明年,緬使復來訴。 以象、馬、 長 刀幹孟 叛,三思思聰 金寶爲 帝遣行 賂, 人李思 思聰諭 以 朝 廷

却之。

歸述其

山川、人物、風俗、道路之詳,爲百夷傳紀以進,帝褒之。

將軍,何福、徐凱爲副將軍,率雲南、四川諸衞兵往討刀幹孟。 幷遣倫發歸,駐潞江上,招諭 遂與其屬叛,攻騰衝。 其部衆。 入其境,能爲火硫、火砲之具,倫發喜其技能,俾繫金帶,與僧位諸部長上。 初 平緬 賜倫發黃金百兩、白金百五十兩、鈔五百錠。又敕春曰:「思倫發窮而歸我,當以 若至雲南,先遣人往諭幹孟毋怙終不臣,必歸而主。 俗 不好佛。 倫發率其家走雲南,西平侯沐春遣送至京師。帝憫之,命春爲征南 有僧至自雲南,善爲因果報應之說,倫發信之。又有金齒戍卒逃 倘不從,則聲罪討之。」 刀幹孟等不服,

瞿能 審度其 景罕 孟 欲假朝 等 時幹孟 宜, ,將兵五 寨憑 |廷威以拒忽都,其言入貢,未可信。」帝遣人諭||春曰:「遠蠻詭詐誠有之,姑從所請, 毋失 既逐倫 事 一千討之。 據險, ,機。」春以兵送倫發於金齒,使人諭 發,亦懼朝廷 堅守不下,官軍 踰 高 良公山 加加 兵,乃遣人詣西平侯請入貢,春以聞。三十一年奏:「幹 · 三 直 濤 南 糧械俱盡,賊勢益張。 甸,大破之,殺刀名孟 刀幹孟,幹孟 福使告急於春,春率五百騎往 不從。 ,斬獲甚衆。 遣左軍都督 回 何福 [兵擊

列

傅

第

峒 降。 救 秦,賊 乘 又命都督何福往討,未幾,擒幹孟 夜至潞江,詰 夜潰。 幹孟遣人乞降, 事聞, 朝廷以其狡詐, 旦渡。 率騎馳躪,揚塵蔽天。 歸,倫發始還平緬,踰年卒。 賊不意大軍至,驚懼,遂破之。 命春俟變討之。 春尋病卒,幹孟 乘勝撃崆

使思 其罪 內官 亭 行發所遣頭目刀門賴訴孟養、木邦數侵其地。 命西 張勤等頒賜 永樂 帝謂 |平侯諭之,遺員外郎左緝使八百國,幷使賜 元年,思倫發子散朋來朝,貢馬。 蠻衆攻奪常事,執一二人罪之,不足以革其俗,且曲直未明,遽罪其 麓川。 麓川、平緬、木邦、孟養俱造人來貢,各賜之鈔幣。 賜絨錦、織金文綺、紗羅幷傔從鈔有差。 禮部請以孟養、木邦朝貢使付 麓 川 平緬宣慰冠帶、襲衣 時麓川平緬宣 使, 法司 二年遣 失遠人 ; 正 慰

中官 刀 刀發孟之地,為頭 年,思行發貢馬、方物謝,賜金牌、信符。 門 奈來 雲仙等 五. 年,麓 貢 、謝罪。 齎]]] 敕 平緬 ,賜金織文綺、紗羅。 目刀薛孟 帝貸之,仍 所隸孟 侵據,請命思行發諭 外頭目 命宴勞其使,幷遣賜行發文錦、金織紵 刀發孟來朝,貢象及 至麓 黔國公沐晟 Ш ,行發失郊 刀薛孟歸侵地。」從之。 一. 一. 迎禮,仙貴之。 麓川 金器,散朋 、平緬 絲紗羅 所 亦貢馬,各賜 隸孟外、 七年,行發來貢 行發惶懼, 陶孟, 鈔幣。 九年遣

皿 等物謝恩。 十 年,行發 二十年,任發遣使奉表來貢,幷謝侵南甸州罪,遣中官雲仙 請以其弟 思任發代職 ,從之。任發遣頭目刀弄發貢象六、馬百 齎賜幷敕戒之。 远及 金銀器

洪熙元年遣內官段忠、徐亮以卽位詔諭麓川。

於朝 發兵討, ,就令使者諭解之,俾安分毋侵越。 宣德元年遣使諭 帝命姑撫之。 西南 置麓川平緬宣慰司所轄大店地驛丞一 夷,賜 麓川錦綺有差,以其勤修職貢也。 黔國公沐晟奏,麓川 員,以土人刀捧怯爲之,從宜 所屬思陀甸 時麓川、木邦爭界,各訴 火頭曲 比 爲 亂,請

慰

刀暗發奏也

詳計 罪不可宥,請發官軍五萬及諸土兵討之。帝以交阯、四川方用兵,民勞未息,宜再行招諭 幣物,諭其勿與木邦爭地抗殺 不得已,其調雲南土官軍及木邦宣慰諸蠻兵剿之。八年遣內官雲仙齎敕至麓川,賜思任發 以聞 三年,雲南三司奏,麓川宣慰使思任發奪南甸州地,請發兵問罪。帝命晟同三司、巡撫 敕任發保境安民,不得侵鄰疆,陷惡逆,以滋罪咎。晟以任發侵奪南甸、騰衝之

侵,百姓希少,無從辦納 正統元年, **免麓川平緬軍民宣慰司所欠差發銀二千五百兩。** 部執不可,帝特蠲之。 以任發奏其地爲木邦所

長官司, 爲宣慰,回居麓川。 初,洪武 隸 金 間,克平雲南,惟百夷部長思倫發未服, 齒。 永樂元年陞孟養、 ,分其地,設孟養、木邦、孟定三府,隸雲南 木邦爲宣慰司。日心孟養宣慰刀木旦與鄰境仇殺而死, 後為頭目刀幹孟 ,設潞江、干崖、大侯、 所逐,赴京陳 訴。 灣甸四

列

傅

第

江, 贼 帝遣 象石 侵孟· 翔統之,至雲南,聽晟節制 南 景罕,指揮唐清 可 死 師,而晟遽信其降,無渡江意。 廷臣舉右都督方政、都督僉事張榮往雲南,協同鎭守右都督昂率兵討之。任發方修貢冀緩 甸 緬 亦 之危 甸順、江東等處軍餘殆盡。 甸 死 甸 政造 使者責狀, 近又侵及金齒,勢甚猖獗。已遣諸衞馬步官軍至金齒守禦,乞調大兵進討。」朝命選將, 定、南甸、干崖、騰衝、潞江、金齒等處,自立 知 乘 重地 叉不進。 州 機 次子 ,任發侵有其地,遂欲)舟欲 刀貢罕亦奏麓川奪其所轄羅卜思莊等二百七十八村。 幷 也。 任 其 濟師, 發襲為麓 地 復擊 政遠攻疲甚, 求援於晟, 政追至 空泥,知晟不救,贼出 仍調湖廣官軍三萬 未 一破之。 晟又不許。 幾, 川宣慰 緬甸宣慰新加斯又爲木邦宣慰所殺。[11]時 ,仍敕晟豫籌 又追之高黎共山 盡復其故 帝以賊勢日甚,責晟等玩寇養患。政亦至軍,欲 任發乃遣衆萬餘奪潞江,沿江造船三百艘,欲取 ,狡獪愈於父兄,差發金銀,不以 政不勝憤,乃獨率麾下與賊將 千五. 地,稱兵擾邊, 糧糒。 晟怒其違節制 百 下,共斬三千餘 象 人、貴州 而晟懼罪,暴卒 陣衝擊,軍 頭目刀珍罕、土官早亨等相助爲暴,叛形 侵孟 萬 渡江,不遣。 殲 人、四川八千五百人,令吳亮、馬 定府 級。 政 死 緬簡戰, 及灣甸等州,殺掠 時納,朝廷稍 於是晟奏:「思任發連年 乘勝深入,逼任發上江。上 焉。 **外之**, 倫發已死 晟 破賊舊大寨。 聞 以少 敗, 優容之。 雲龍 **.兵往,至**夾 出 ,子行發襲, 乃請益 人民。 戰, 晟 賊 叉 會緬 軍 殺 奔 不 Ë 累 而

兵部 乞爲導奏。」 撫 司 諸 司 尚 線 處皆降之。 時 如 任 思 舊 書王驥及英國公張輔等,皆以爲「麓川 任 法 發兵愈横,犯景東,剽孟定,殺大侯知州刀奉漢等千餘人,破孟賴諸寨, 發早自悔 帝降敕 相邀報仇,其後線舊法乃誣己爲入寇,致大軍壓境,惶恐無地。 任發仍遣人以象馬 許赦其罪。 禍 **,縛詣軍門,生全之恩,取自上裁」。 帝然之。 已而侍講劉球復以息** 時刑部侍郎何文淵 金銀來修頁,復致番書於雲南 **負恩怙惡,在所必誅,須更選將練兵,以昭天** 疏請罷 麓川 師, 總兵官,謂「始因潞江安 命下廷臣議。 今欲遣使謝罪 孟璉 於是行在 長官

兵請

如文淵

議。

部覆以麓川之征,已有成命,報聞。

自 保從東路攻細 州,欲奪景東、威遠。 竟 夜不 下江 會諸道兵十五萬計之。 六年以定西伯蔣貴 七 息。 據夾 年 ,驥率兵渡下江,通高黎貢 官軍 、象石。 甸、灣甸水寨,入鎭康,趨孟定。 力戰,拔上江寨,斬刀放憂父子,擒刀孟項,口己前後斬馘 至期,合攻之。 而驥將抵金齒、任發遣人乞降,驥受之,密令諸將分道入。 爲平蠻將軍,都督李安、劉聚副之,以兵部尚書王驥總督雲南軍務, 時任發遣賊將刀令道等十二人,率衆三萬餘,象八十隻,抵大侯 賊拒守嚴,銃弩飛石,交下如 山 道。 至騰 襲與貴 衝, 留都督李安領兵提備 由中路至上江,會騰 酮。 次日 , Ŧi. 衝 乘風焚其栅,火 萬餘,以捷聞 驥 左參將宮聚 由 南 右參將 甸 至羅 冉

1 思 前 軍 抵 杉 木籠。日心時任發率衆二萬餘據高 Щ, 立硬寨, 連環七營, 首 尾 相 應。 驥

其營,賊死不可勝算。 任發父子三人幷挈其妻孥數人,從間道渡江,奔孟養。

搜獲原給虎

齒 大兵 攻之。 發 麓 衝, 符、金牌、信符、宣慰司印及所掠騰衝千戶等印三十二。]|| 復詭以機發致仇爲解。 與蔣貴、沐昂 敵, 歸, 地。 機發遣頭 時任 帝命木 乃宣 圖恢復, 其 發敗走孟蒙,復爲木邦宣慰所擊,追過金沙江 子 言犒師 恵 邦 目刀籠肘偕其子詣軍 分五 機 據麓 緬甸 發窮困, 營進,緬 而 能効命擒任發獻者,卽以麓川地與之。 JII 命貴 出兵侵擾。 驥 乃 趨 者 藍 乞來 潛焚其 人亦聚 朝謝 門求降。 衆待。 於是復 舟數百艘, 罪,先遣其弟招賽 ,搗機發巢,破之。 驥欲乘 命王驥、蔣貴等統大軍 驥 遣 進 人至緬 師 大師 薄之。 攻之,見其衆盛 ,走孟廣。 入貢,帝命遣還雲南安置 麓川平。 甸索任 機發脫 緬甸 未幾,任發爲緬人擒,緬 發 堅執 走, 捷聞,命還師 再征 緬甸宣慰卜剌當亦起兵 俘其妻子部 緬 前 佯諾 麓 ,未易拔,又 詔 JII 必予 不 造。 驥 地 率 衆 恐 乃 驥 師 機發窺 立層 至 人挾 出 多 至 騰 金 任

川宣 慰 司 而 歸。 時思機發竊據孟養,負固不服,自如也

等,以朝廷旣貸思機發以不死,經畫善後長策以聞,幷賜敕諭思機發。 至。 |發掠其牛馬、金銀,欲進兵攻取。 公沐斌奏。「臣遣千戶明庸齎敕招諭思機發,以所遣弟招賽未歸,疑懼不敢出。 征 機發,及沐斌等至 招賽安置 江,分道討機發。 命授機發弟招賽 政 斬之, 斌以春瘴作、江漲 + 無地 年,緬 雲南,其黨有欲稱 函首京 逃死,乞貸餘生,詞甚哀。 甸始以任發及其妻孥三十二人獻 為頭目,給冠帶、月糧 師。 騰衝,督諸軍追 臣等率官軍萬 其子機發屢乞降, 造頭目刀孟永等修朝貢, 不可渡,糧亦乏,引兵還 人駐騰衝,以助其勢。 捕,機發終 臣等議遣人分諭木邦、緬甸諸宣慰司,令集蠻兵, 乃命招賽來京, 、房屋,隸錦衣衞,其從人俱令於馴象所 帝命受其貢,因敕總兵官沐斌及參贊軍 不出 一,潛匿 至雲南。[10]任發於道中不食,垂死。 且冀以招徠機發也。 孟養、遺其徒來貢。 賊四面受敵,必成擒矣。」從之。 獻 金銀。 十二年,總兵 帝 旣命雲南 許以恩貸,復不 言蒙朝 供役。 近緬 務侍 剋期過 甸 官黔國 廷 出 郞 先是, 千戶 以 「兵剿 調兵 楊 已, 機 寧

諭 驥 南 京 日 帝 「一萬 以 、雲南 斌 .師 湖 思 出 無功, 廣 機 了 四 發遠遁 川、貴州 復 命兵部尚書靖遠伯 則 先擒刀變蠻, 官軍、土軍 十三萬 平其巢穴。 王 驥 人往討之。 總督軍 或遁入緬地, 務, 至是 都督同知宫聚 驥 凡三征 緬 人黨蔽, 佩 麓 平蠻將 JII 亦相 矣。 軍印, 機擒

列

傳

第

百

雲

南

土

司

之。 甸、干崖 庶 蠻 隴 衆 川等宣慰司罕蓋發等,各整兵備船,積糧 知 懼,大軍不爲徒出。」又敕諭斌,軍事悉與驥會議而行。 辺 人俟調 度 又敕諭木邦、緬甸、南

沙江。 倍。 道並進,皆攻拔之,斬獲無算,而思機發、思卜發復奔遁 兩岸,緬甸備舟二百餘爲浮梁濟師,併力攻破其栅寨,得積穀四十萬餘石。 賊領衆至鬼哭山,築大寨於兩峰上,築二寨為兩翼,又築七小寨,綿亙百餘里。 機發於西岸埋栅拒守。 四 年 ,驥率諸將自騰衝會師,由于崖造舟,至南牙山舍舟陸行,抵沙壩,復造舟至金 大軍順流下至管屯、適木邦、緬甸兩宣慰兵十餘萬亦 軍 飽、銳氣 官軍分 列 於 沿 增

江 亂 無渡金沙江者,今王師至此,眞天威也。」驥還兵,其部衆復擁任發少子思祿據孟養地 爲界,誓曰「石爛江枯,爾乃得渡」。 。三]驥等慮 時王 一師踰孟養至孟那。 師老,度賊不可滅,乃與思祿約,許土目得部勒諸蠻, 孟養在金沙江西,去麓川千餘里,諸部皆震響曰:「自古, 思祿 亦懼,聽命,乃班師。 捷聞,帝爲 居孟養如故,立石 告廟 云 漢 金沙 爲

等處地 人 復 ,乃誅思機發於京師。 景泰元 挾爲奇貨, 方 與 之, 年,雲南總兵官沐璘奏:「緬甸宣慰已擒獲思機發, 不若緩之,聽其自獻便。」從之。 乃送思機發及其妻孥六人至金沙江 七年,任發子思卜發奏。「臣父兄 五年,緬 . 村, 人索舊地,左參將 犯法, 誌等檻送京 又將思卜發放 時臣幼無知。 師。 胡誌等諭 南寧伯 歸 今不敢如父 孟 毛 養, 福 以 銀 壽 以 憂

兄所爲,甚畏朝廷法,謹備差發銀五百兩、象三、馬六及方物等,遣使人入貢,惟天皇帝主哀

因賜敕戒諭

成化 元 年,總兵官沐瓚等以思任發之孫思命發至京師,乃逆賊遺孽,不可留,請發沿海

登州衞安置,月給米二石,從之。麓川亡。

頒給。 使,隴帚爲僉事,俱賜冠帶,從宣撫恭項請也。 長, 史。未幾,隴川宣撫失印,請再給。帝責恭項以不能宣揚國威,反失印,罪應不宥,姑從寬 帝命還守本土,有功,卽加敍。諸凡來歸者視此例。 命賜有功者皆爲冠帶把事,幷賚織金文綺 首先歸順効力有功,因命於麓川故地開設宣撫。 先是,麓川之初平也,分其地立隴川宣撫使司,因以恭項爲宣撫使。 時板蹇據者藍寨,侵擾隴川,百夫長刀門線、 恭項子恭立來貢,給賜如例,幷授恭立爲長 刀木立進兵圍之,斬板蹇等二十三人。 已,頭目囊渙等復來歸,願捕賊自効。 遂以刀歪孟爲本司同知,刀落曩爲副 恭項者,故麓川部

旣 孟 怨,欲謀害爾父子。今遷爾於雲南,俾不失所,且遣官護爾家屬完聚,其體憫 止 而總兵官言:「隴川 地予之,報可。 正統 十一年,木邦宣慰罕蓋發來求麓川故 十二年敕諭恭頂,言:「比者,總兵奏爾與百夫長 致亂 皆由恭項暴殺無辜,刻虐蠻人。 地。 有司以已設隴川宣 同知刀歪孟 刀木立 撫 司,建官分管,以 為蠻衆信服,乞安 相 恤,無懷疑懼 "仇殺? 人民懷

置項於別衞,以刀歪孟代。」帝以恭項來歸,屈法宥之,命於曲靖安置,幷遣敕往

齎敕賜之,以多外悶 景泰七年 ,隴川宣撫多外悶遣 初修朝貢故也。 人貢象、馬及金銀器皿、方物, 成化十九年,以隴川宣撫司 多歪孟子亨法代職 賜綵幣、 襲衣 如 例。 仍命

問,伏辜,還職兄子多參。 初,隴川與木邦相鄰,爭地仇殺,搆兵不息。 詔貰其罪,幷戒木邦罕孟毋得復黨鯨爭職 嘉靖中, 土舍多鯨刃兄自襲,下鎭巡官按

罕拔等歃血盟,誘士寧往擺古,歸附緬酋。陰使其子爨烏鴆士寧幷殺其妻女,奪印投緬,受 |緬爲命,代<u>|</u>士寧爲宣撫。及瑞體死,子應裏嗣,鳳父子臣服之。誘敗官軍,獻士寧母胡氏及 親族六百餘人於應裏,盡殺之,多氏之宗幾盡 人,黠而多智,商於隴川,士寧信任之,妻以妹。 層初,緬甸莽瑞體叛,來招隴川宣撫多士寧, 鳳曲媚士寧,陰奪其權,與三宣六慰各土舍 士寧不從。 其記室岳鳳者,江西撫州

|籠山,先據其險,而自領大兵馳入隴川。 曲 與之盟誓。 不足恃。 來降。三三級責 初,鳳之附於緬也,爲瑞體招諸部,拒中國,傷官軍,逆勢寖成,緬深倚之。 久之,以緬 而鄧川土知州何鈺,鳳友壻也,初使人招鳳,鳳執使獻緬。 時官 令獻金牌、符印及蠻莫、猛密地。 軍亦大集,諸將劉綎、鄧子龍各率勁師至,環壁四面。 鳳度無可脫,遂詣軍門降。 乃以 送鳳妻子還隴川爲名, 及是,鈺復開示百方, 艇復率兵進緬, 鳳懼,乃令妻子及部 分兵趨 |緬 沙水

莫,日 應裏 宣撫使。 先遁,留少兵隴川, 並鑄印記,建大將行署於蠻莫。 年九月也。 象走,追獲之。 [耿馬,長官司二,日孟璉, 發兵圖 踰年復鑄隴川宣撫司及孟定府印,陞孟密安撫爲宣撫司。 隴 復移師圍孟璉,生擒其魁,隴川平。 JII**綎攻之,鳳子囊烏亦降。** 艇乘機掩殺,賊窘,乞降,縛緬人及象馬來獻。 日孟養;千戶所二,一居姚關,一居孟淋砦,皆名之日鎮安, 從雲南巡撫劉世曾之議也。 艇乃攜鳳父子往攻蠻莫, 蠻莫賊知鳳降, 獻俘於朝,帝爲告謝郊廟,時萬曆十二 於是,多士寧之子思順襲隴川 遂招撫孟養賊,賊 添設安撫司二,日蠻 將 馳 報 乘

索路 恃爲巢穴者也。 即。 襲之,敗績。 殺之。曰司未幾,思順死,蠻莫思正乘喪襲隴川,據其妻罕氏。 多思順 ,叛入緬。 安民弟安邦治 二十九年,莽應裏分道入犯, 不敵,奔猛 王師 已 卯 而 亟討,其族人挾其弟多安靖誅之以獻。 亦附緬,後寄居蠻莫。 緬聽撫,遣安民 緬 初以猛卯同知多俺爲嚮導,寇東路。 一入遮放、芒市,一入臘撒 歸。 安民 其地有馬安、摩黎、羅木等山,極險峻, **久據蠻灣,桀驁甚,署永騰參將周** 時安靖尙幼,勢孤,韶俟 **蠻**類, 三十五年,思順子安民 至是大軍遣木邦罕欽 一入杉木籠, 會遣二 並出 其長給之 麓川之所 擒多俺 以守將 隴 一指揮 JII

校勘記

黔國公沐紹勛疏言 沐紹勛,原作「沐勛」,據本書卷一〇五功臣世表、卷一二六沐英傳及世宗

實録卷八八嘉靖七年五月甲申條補。

ヘニン 獛剌蠻居之 獲刺,明一統志卷八七、讀史方與紀要卷一一四作「僰剌」。

宋時麽些蠻蒙醋據之 蒙醋,寰宇通志卷一一三、明一統志卷八七麗江軍民府作「蒙醋醋

四 隸大理萬户府 府,原作「所」,據寰宇通志卷一一三、明一統志卷八七、元史卷九一百官志改。

五. 置施甸長官司 施甸,原作「司甸」, 據本書卷四六地理志、明史稿傳一八八、太祖實録卷一六

二洪武十七年五月己酉條改。

(八) 古湧二關 宣宗實録卷一〇六宣德八年九月己丑條同,本書卷四六地理志、寰宇通志卷一一

三作「古勇關」。

. . - 給威遠土知州刀蓋罕金牌 統六年七月己亥條補 刀蓋罕,原作「刀蓋」,脱「罕」字。據上下文及英宗實録卷八一正

斬其頭目派罕 卷二五頁一六一二。下文刀孟經未省「刀」,此亦不宜省。 派罕,當作「刀派罕」,派罕姓刀,見英宗實録卷八一正統六年七月己亥條、國権

宣德四年陞大侯長官司爲大侯州 本書卷四六地理志、 宣宗實録卷四三宣德三年五月戊午條

繫於宣德三年。

以土官刀奉漢爲知州 實錄卷四六正統三年九月庚戌條、 三年五月戊午條、 國権卷二〇頁一三四九作「刀奉罕」。 刀奉漢, 原作「刀奉罕」。本傳下文二名錯出。 國権卷二四頁一五五九作「刀奉漢」,宣宗實錄卷四三宣德 明代文獻中多同名異譯者, 本卷上文景東傳、 **今爲劃**

起見,都改作「刀奉漢」。

弘治十一年福建布政李韶以前任雲南 參議知土俗事宜上疏言四事 參議, 孝宗實錄卷一五 四

弘治十二年九月乙丑條作「右參政」。

- 卷四六地理志、太祖實錄卷一六四洪武十七年八月丙子條補 尋改平緬軍民宣慰使司爲麓川平緬軍民宣慰使司 第二個「宣慰」上原脱「軍民」二字、據本書
- 近御史李原名歸自平緬 事跡與此合,據改。 二洪武二十年五月庚申條、 李原名,原作「李原德」。 明史稿傳一八八麓川傳、太祖實錄卷一八 按本書卷一三六有李原名傳,
- 適其部長刀幹孟叛 幹, 原作 「榦」,據本書卷三太祖紀、卷一二六沐英傳、卷三一五緬甸傳及 下同
- 二吾 踰高 列 傅 良 第 公 Щ 百 高 良公山, 校 勘 配 下文作「高黎共山」,「高黎貢山」。 寰宇通志卷一一三謂當地居民稱

眀

爲「高良公山」。

永樂元年陞孟養木邦爲宣慰司 本書卷四六地理志、太宗實録卷二九永樂二年六月癸酉條繫

於永樂二年。

二七 緬甸宣慰新加斯又爲木邦宣慰所殺 新加斯, 原作「新斯加」,據本書卷三一五緬甸傳、宣宗實

録卷三一宣德二年九月丁酉條改。

擒刀孟項 刀孟項,原作「刀孟頊」,據明史稿傳一八八歲川傳改。 英宗實録卷八六正統六年閏

十一月辛巳條作「刀門項」。「孟」「門」當係音譯之異。

二
立 前軍抵杉木籠 作「沙木籠」,本書卷二七四劉綎傳、明一統志卷八七作「沙木籠」, 杉木籠,原作「於木籠」,據本書卷一七一王驥傳改。 乃同一山名之異譯。 本傳下文作「杉木籠」,又

(三0) 十一年緬甸始以任發及其妻孥三十二人獻至雲南 本書卷一〇英宗前紀及英宗實録卷一三六

俱繫於正統十年十二月丙辰,本書卷三一五緬甸傳繫於正統十二年。

其部衆復擁任發少子思禄據孟養地爲亂 書卷一七三王驥傳、 孝宗實録卷一九五弘治十六年正月癸未條俱作「思陸」,本書卷三一五孟 思禄, 原作「禄」,脱「思」字,據下文補。 按思禄,本

養傳作「思陸發」。

鳳懼乃令妻子及部曲來降 令,原作「合」。按時鳳尚未來降,作「合」誤。據本書卷二四七劉綎 記

八八麓川傳改。

[三] 大軍遺木邦罕欽擒多俺殺之 多俺,原作「多掩」,據上文及本書卷三一五緬甸傳、

明史卷三百十五

列傳第二百三

雲南土司三

緬 甸 二宣慰司 干崖 宣撫 潞江 南甸 二宣撫司 者樂甸

茶山

孟璉

卽猛臉

里麻

鈕兀

東倘

瓦甸

促瓦

散金

木邦 孟密安撫司附 孟養 車里 老撾 八百 二宣慰司

南,最窮遠。 緬甸,古朱波地。 有城郭廬舍,多樓居。一一至一一中,屢計之,乃入貢。 宋寧宗時,緬甸、波斯等國進白象,緬甸通中國自此始。 地在雲南西

明太祖卽位,遣使齎詔諭之。至安南,日日留二年,以道阻不能達而返,使者多道卒。洪

武二十六年,八百國使人入貢,言緬近其地,以遠不能自達。帝乃令西平侯沐春遣使至八 百國王所,諭意。於是緬始遣其臣板南速刺至,進方物,勞賜之。二十七年置緬中宣慰使

列 傅 第二 百 Ξ 雲 南 土 司三

年復來訴。 司 以 土酋 下刺 帝遣行人李思聰、錢古訓諭緬及百夷各罷兵守土,倫發聽命。 浪爲使。 二十八年,卜刺浪遣使貢方物,訴百夷思倫發侵奪境土。 會有百夷部長刀 二十九

幹孟之亂,逐倫發,以故事得已。

罪 臣 阻 地 蠻旣服辜 張勤 遏。 先是, 事聞, 永樂元年,緬

個

開

羅塔遣使入貢。 往賜 乞命以職、賜冠服、印章、庶觅欺陵。 韶行· ,其釋不問。」仍給以信符,令三年一 孟養宣慰使刀木旦 冠帶、 人張洪等齎敕諭責。 印章。 於是緬 與憂里相 有二宣慰使, 那羅塔懼,歸其境土,而遣 因言緬雖退裔,願臣屬中國,而 攻,那羅塔乘釁襲之, 韶設緬甸宣慰使司, 朝貢 皆入貢 不絕。 五年, 殺刀木旦 人詣闕 以那羅塔爲宣慰 那羅塔遣使貢 謝罪。 道經木邦、 一及其 、長子, 帝諭 (方物, 孟養, 使,遣內 禮 遂據其 部 謝 多

其弟 仙等齎敕賜 之,使修好鄰封,各守疆界。 土地 初 h 六年,那羅塔復遣人入貢,謝罪,幷謝賜 人民。 刺浪 緬 分其地,使長子那羅塔管大甸,次子馬者速管小甸。 已而 其弟復入小甸, 遣人來朝, 十二年,緬人來言爲木邦侵掠。 金牌、 且 訴 其情。 信符, 敕諭 勞賜遣之。 帝以那羅塔素强横, 那羅塔兄弟 1 刺浪死,那羅塔盡收 七年 和 復遣中官 好 如 遣 初,毋

雲

洪熙元年遣內官段忠、徐亮以卽位詔諭緬甸。 宣德元年遣使往諭雲南土官,賜緬甸錦

莽 綺。 得 刺 二年以莽得刺 權 襲,許之。 爲宣慰使。 自 是 來貢 、者只 初,緬甸宣慰使新加斯與木邦仇殺而死,子弟潰散。 署緬 甸 而 甸 中之稱 不復見。 八年,莽得刺遣 人 來貢,復 緬 共推

遭雲仙齎敕賜之,幷諭其勿侵木邦地。

帶、 蔣貴 兵爲助。 思 之命。 奏,緬 敗,過金沙江,走孟廣 緬 中 緬 李儀等率精 任 宜 方 人 即 (等潛 亦 發首及諸 連 聽 信。 從。」十二年,木邦宣慰罕蓋法,緬甸 嚴 是時,大師已集騰衝,緬 年 帝諭 焚其 征 兵 六年給緬 未幾,以速刺 討 為備 騎通南牙山 俘 以 舟數百,緬 財 馘 機 ,遣人往來江 力困弊,旱澇相 發 至京, 甸信符、金 미 ,緬人攻之。 不 奏求孟養、 路,抵貢章, 幷貢 人潰,驥亦 戦 擒,宜 中,現官軍虛實。 牌。 方物 使致 仍, 帝諭: 即滅賊以求分地,弗爲他人得也。 憂里 時麓 。 (三) 、班師。 書,期以今冬送思任發至貢章交付。 受獻,而緬人送思任發者竟不至。 糧餉不給,未 能 川思任發叛,將討之,命緬甸調兵待。 地, 帝命馬哈省、 擒獻賊首者,予以麓 故宣慰子馬哈省 於是總 且請大軍 驥 以麓 可 兵官沐昂奏:「緬恃險黨賊,應加 輕舉。 以速刺 **亟滅思任發之子** 唯以麓川 川 未平,緬難不 臣 以速 並 已遣 一爲宣 |]] 地爲言, 地。 刺,遺使偕千 人諭 慰 八年, 思機 使, 可復作,乃令總兵官 緬 九年,驥駐 朝命遂有幷征 驥與剋期,遣指揮 禍 賜 發兄弟,而 總督尙 福 敕 七年,任發兵 、獎勞, 戶王政等獻 俾獻賊首 兵,但滇 師江上, 書 己出 給 緬 王 冠 驥 甸

列

傅

第

百

 \equiv

氢

南

土

帝

以思

卜發旣遠遁,不必窮追,仍加賞錦幣,降敕襃獎。

延 知 共 景 要 泰 挾, 年 故緩之。 賜 緬 甸 陰文金牌、信符。 五年, 緬人來索地 時以速刺久獲思機發不獻,又放思卜發歸 ,參將胡誌以銀憂等地 與之,乃送機發及其妻孥。 孟養。 朝

任使。 求地 體,宜勿許。 貢章 來,不得阻遏,餘勿多望。 乃 係木邦、隴川分治,孟養係思洪發所掌 成 兵部尚書余子俊等以思洪發不聞有過,豈可奪其地,李讓中國人,而與爲把事,亦非 前 化 朝所許,貢章乃朝貢必由之途,乞與之。又乞以金齒軍餘李讓爲冠帶把事,以備 七年,鎭守太監錢能言,緬 帝命兵部諭其使,孟養、貢章是爾朝貢所由,當飭邊臣往諭思洪發,以通道往 甸宣慰稱貢章、孟養舊爲所轄,欲復得之。帝命往勘, ,非緬境,乃令雲南守臣傳飭諸部。 而 緬 甸 以所

震,而孟養以緬先執思任發,故 弘治元年,緬甸來貢,且言安南侵其邊境。 怨 緬 二年遣編修劉戩諭安南罷兵。 然緬 地鄰孟

驛舍 地 緬 嘉靖初, 殺 訴 齎 於 金牌千戶曹義,時處倉皇遁,乃別立土舍濟卜信守之而去。 朝 不報。 六年 子思倫 始命永昌知府 糾木邦 及孟 嚴 時 密, 泰 撃破緬, 、衞指 揮 殺宣慰莽紀歲幷其妻子, 王訓往 勘。 思倫 値 安鳳之亂,不暇究 夜縱 兵鼓躁, 分據其 焚

共**事。**

濱 海 少與佛 莽紀 歲有子喘體,少奔匿洞吾母家,其酋養爲已子。 鄎 機鄰。 古喇鱼兄弟爭立 ,瑞體和解之,因德瑞體,爭割地爲獻 旣長,有其地。 洞吾之南有古喇, 一受其 約 束

孟養,而與緬相抗者孟密也。 體 爲噠喇。 瑞體乃舉衆絕古喇糧道,殺其兄弟,盡奪其地,諸蠻皆畏服之。 孟密土舍兄弟爭立,訴於瑞體。 瑞體乃納其弟爲壻,改名思 時滅 緬 者木邦、

忠,遣歸孟密,奪其兄印,因假道攻孟養及迤西諸蠻,以復前仇,又使其黨卓吉侵孟養境

後卓吉為思眞壻猛乃頭目別混所殺,瑞體怒,自將攻別混父子,擒之。 遂招誘隴川、干崖

事 南甸諸土官,欲入寇。 旣覘知有備, 又慮他蠻襲其後,乃遁歸。 於是鎭巡官沐朝弼等上其 韶可。 時

兵部覆,荒服之外,治以不治。 **噠喇已畏威遠遁,傳諭諸蠻,不許交通結納。**

嘉靖三十 儿 年 也

之, 請瑞 雖 廣 兵 大 衆 、因借木邦兵一萬取干崖,而 體 ,威加諸 ,誠勿妄動 木邦 入干崖 遠難猝 土含罕拔 部, ,干崖舉,則隴 ,瑞體稍稍寢。 取。 中國復禁絕之, 求襲不得,怒投于緬,潞江宣撫線貴聞之,亦入緬 孟 養思箇 JII 近在肘腋, 自 可 未幾,士寧爲其下岳鳳所殺,于崖宣撫刀怕舉 率兵侵孟養。 坐定也。 遂謀內侵, 又吾世仇,萬 瑞體 乃命線貴趣召隴川 子應 旣至,屢爲思箇所敗,思箇亦退保孟倫,相 裏桀黠多智,言於瑞體 乘虛順流下, 土官 多士寧 瑞體自以 禍 不測 日 亦 「龍川 死 。」瑞體深然 士寧言中 起 孤微,有 罕拔 干 崖 乃 國

列

持 、久之。 ,調緬兵萬餘,出入於迤西界上,以牽制思箇。 而 隴川 書記 岳鳳欺其主幼, 私齎重賂投緬, 復徵木邦罕拔兵,會岳鳳於隴川,襲孟密。 結爲父子。 蠻莫土目思哲亦迎附瑞

中國。 崖印,付罕拔妹,以女官攝宣撫,召盞達副使刀思管、雷弄經歷廖元相佐之,同守干崖,以防 主 怕文拒 乃與罕拔、思哲盟,必下孟密,奉瑞體以拒 |莽噠喇弄王書報天皇帝, 書中嫚辭無狀。 萬曆元年,緬兵至隴川,入之。岳鳳遂盡殺士寧妻子族屬,受緬偽命,據隴川爲宣撫。 於是木邦、蠻莫、隴川、干崖諸蠻,悉附緬,獨孟養未下。 之,與戰。 適應裏率衆二十萬分戍隴、干間,以其兵驟臨之,怕文潰奔永昌。 中國。 罕拔又爲緬招干崖土舍刀怕文,許代其兄職。 係爲錦囊象函貝葉緬文,稱西南金樓白象 遂取|干

告急。 程 生 約 土目馬 援兵 事不 進,導瑞體由 金騰副使許天琦遣指揮侯度持檄撫諭孟養。 自隴 便者,凝馳使止援軍。 祿 會天琦 喇送等領兵萬餘,絕緬糧道,且導大兵伏憂撒誘緬兵深入。 川尾擊之。 卒,署事羅汝芳犒思箇使,令先歸待援,遂調兵至騰越。 間道遁去。思箇追擊之,緬兵大敗,當是時幾獲瑞體 緬兵旣敗,糧又絕,屠象馬以食,瑞體窘甚。 汝芳聞檄退,思箇待援不至。 思箇受檄、益拒緬。 岳鳳偵知之,集隴川兵二千衆 會有陳於巡撫王凝,言 箇閒援兵至,喜, 箇率蠻卒衝 緬大發兵攻之,思箇 其前,而

六年,廷議遣使至孟養,俾思簡還所俘綱兵象,幷賚以金帛,好言慰諭之。 瑞體不謝。

之怨。 永昌千戶辛鳳奉使買象於孟密,思忠執鳳送緬,緬遣回。 思箇 以無援敗,將走 騰越,中途爲其下所執,送瑞體,殺之,盡幷孟養地。八年,巡 是年,緬復攻孟養,報憂撒

饒仁侃 遣 人招緬 河緬不 應。

子 將 其 年 **| 襲烏領衆六萬,突至孟淋寨,指揮吳繼勳、千戶祁維** 南京坐營中軍 得,城破,妻子族屬皆盡。 思斗 、象陣 軍 四 之守隴 月, 應援。 盡俘其衆。〇〇 , 生 擒 五 守阿瓦,復攻孟養、蠻莫, 年,岳鳳導緬兵襲破干崖,奪罕氏印,俘之。 斬 JII首萬 緬亦 、孟養、蠻莫者, 劉綎為 千餘 餘。 合 兵 復率兵出 又說應裏起兵象數十萬, 騰越 犯 姚 關 遊擊,移武 且窺騰 皆遁去, ,凝與子龍 隴 聲言復仇。]][衝、永昌、大理 、孟密、直抵 岳 、靖參將鄧子 鳳及其子皆伏 大 破之於攀枝花 副使李材備兵騰衝,遣兵援之,戰於遮浪 分道 阿瓦, 、蒙化、景東、 龍 內侵。 爲永昌參將, 垣戰死。 俄, 瑞體死, 子應裏嗣。 誅。 緬 將 地, 官軍 猛 十一年焚掠施甸,寇順寧。 乘勝追擊, 勺詣 又破盞達,副使刀思定求救 鎭沅諸郡。 定隴 各提兵五 凝降。]]] 自十 遂歸。 勺,瑞 巡撫 干 年 ·赴剿 岳鳳嗾應裏殺 應裏 體 于 劉 弟 月 世 万 至十 幷調 也 曾 鳳 請 以 其 諸 以 不 緬

先是 (暑,)軍 蠻莫 行 思化 不 前 投緬。 裨將 萬 材遣 國 春 人招 夜馳至,多設火炬爲疑兵, 之,思化降。 + 九年,應裏復 緬 人懼 率緬 面 退, 兵圍 追 蠻莫,思化告 敗 英

人。

列

僔

爲嚮導,寇東路。 ,巡撫 陳用賓設八 至是遣木邦罕欽擒多俺殺之,遂築堡於猛卯,大興屯田 關於騰衝,留兵戍守,募人至暹羅約夾攻緬。 緬 初以猛 是年,緬 帥思仁

寇蠻莫,敗之,斬其渠丙測

| 榼俱入貢,緬勢頓衰。 然近緬諸部附之如初。 賜之,至境,不受。 二十三年,應裏屬孟璉、孟艮二土司求朝貢,鎭巡以聞。 韶以景桂首事貪功納侮,下於 暹羅得楞復連歲攻緬,殺緬長子莽機撾,古喇殘破。 理。 三十一年,阿瓦雍罕、木邦罕拔子罕 朝議令原差官黎景桂齎銀幣 自此不敢內犯,

<u>緬遣人迎之,傳語述萬曆時事,幷出神宗璽書,索今篆合之,以爲爲。</u> 文檄相比無差,始信。 崇禎末,蠻莫思縣爲緬守囊木河。及黔國公沐天波等隨永明王走蠻莫,思縣使告緬 蓋自天啓後,緬絕貢職,無可考驗云。 天波出己印與先所頒

皆蠶,以其絲織五色土錦充貢。 洪武十五年改鎭西府。 干崖,舊名干賴睒,僰人居之。 永樂元年設干崖長官司。 元中統初,內附。 東北 接南甸,西接隴川,有平川衆岡。 至元中,置鎭西路軍民總管府 二年頒給信符、金字紅牌幷賜冠服 境內甚熱, ,領三甸。 四時

司,賜 崖。 於布政司。 司。 三年,于崖長官毚歡遣頭目奉表貢馬及犀、象、金銀器,謝恩,賜鈔幣。 髮歡 綵幣,以歸附後屢立功,從總兵官沐昂請也。 時長官刀弄孟奏,其地近雲南都司,而歲納差發銀於金齒衛,路遠,乞改隸, 復遺子刀思囊朝貢,賜賚如 從之。 正統三年命仍隸金齒軍民指揮使司。 例。 自是,三年 九年陞干崖爲宣撫司,以刀怕便爲宣 一朝貢不絕。 六年陞干崖副長官刀怕便爲長官 宣德六年改隸雲南都 五年設古刺驛,隸干 而 輸銀 撫

副使,劉英爲同知,從總督王驥請也。

即。 云。 **緬兵十萬驟臨,怕文潰奔永昌。** 木邦宣慰罕拔妹也。 之。 年,按察司副使林俊同參將沐詳移文往諭,始釋兵歸印。 嘉靖三十九年,緬貧莽瑞體叛,招于崖諸土官入寇。 十一年,遊擊劉挺破隴川, 弘治三年,干崖土舍刀怕愈欺其姪刀怕落幼,劫印奪職。 拔旣叛附緬,召怕舉弟怕文襲職以臣緬,且許以妹。 (E) 鳳降,追印竟不得。 罕拔遂取干崖印付罕氏。 而干崖部衆自相承代,亦莫得而考 萬曆初,宣撫刀怕舉死,妻罕氏, 事聞,帝以鎭巡官不以時奏報,責 十年,隴川 蠻衆不服, 遂起兵相攻。 岳 鳳破干崖,奪罕氏 怕文不受,與戰。 四

潞江 在永昌、騰越之間,南負高崙山,北臨潞江,爲官道咽喉。 地多瘴癘,蠻名怒江

甸。至元間,隸柔遠路。

幣,尋陞爲安撫司。 司 治之。 永樂元年內附,設潞江長官司。 二年頒給信符、金字紅牌。 曩壁來朝,貢象、馬、金銀器,謝恩。 九年, 其地舊屬麓川平緬, 潞江 長官司囊壁遣子維羅法貢馬、 西平侯奏其地廣 人稠, 方物, 宜設長官 賜

州, 驛,逐驛丞周禮,立寨固守,斷絕道路,請發兵討。 之,遂以阿都鲁爲廣邑州知州, |蕭酋||莽塞等詣京貢方物,乞於廣邑置州,使阿都鲁掌州事, 班懼罪,還所據地,歸舊部,輸役如故,乞宥之。 「金齒廣邑寨,本永昌副千戶阿干所居。 隸雲南布政司,以千夫長刀珍罕爲知州, 三年,黔國 宣德元年, 曩壁遺人貢馬,請改隸雲南布政司,從之。 公沐晟奏,潞江千夫長刀不浪班叛歸麓川,劫潞江, 莽塞爲同知, 干當奉命招生蒲五千戶向化。 鑄印給之。 刀不浪班爲同知,置吏目及淸水關巡檢各一 報可。是年置雲南廣邑州。 帝敕晟與三司計議。 八年改金齒永昌千戶所爲潞江 以熟滯弁所招生滯屬之。」帝從 遣中官雲仙齎敕及綺幣賜 逐曩壁入金齒, 五年,晟奏,刀不浪 今干孫阿都鲁同 時雲仙還言: 據潞 曩

正統三年從黔國公沐晟奏,改潞江安撫司仍隸金齒, 悉還舊制。 五年,安撫使線舊法

以 麓 川思任發叛來告,諭整兵以俟。 未幾,麓川賊遣部衆奪據潞江,殺傷官軍,潞江遂削

弱

於獄。 兵圍掩寨,縱火屠掠,掩母子妻妾及蠻民男婦死者八十餘人,據有其地。 正德十六年,安撫司土官安捧奪其從弟掩莊田三十八所,掩訟於官,不報。 帝命戮屍棄市,其子詔及黨與皆斬。 天啓問,有線世祿者,繼襲安撫 官軍誘執之,捧死 捧遂集蠻

南 甸 宣 一無司、舊名南宋、在騰越南半箇山下,其山巓北多霜雪、南則炎瘴如蒸。 元置南

甸路軍民總管府,領三甸。

官。 川侵據,不守者十餘年。 各置巡檢,以土軍楊義等三人爲之。」命下三司勘覆,授之。 土,賴朝廷威力復之,若不置官司以正疆界,恐侵奪未厭,乞置四巡檢司鎭之。」帝 奪,有司請討。 八年又奏:「與麓川接境,舊十二百夫長在騰衝千戶所時,賴邦哈等處軍民兼守。 洪武 十五年改南甸府。 不許,降敕誡諭麓川,俾還侵地。 今蒙敕諭還,竊恐再侵,百姓逃移,乞於賴邦哈、九浪、莽孟洞 永樂十一年改爲州, 五年,南 云 隸布政司。 甸州奏一先被麓川宣慰 宣德三年, 南甸為 命吏部除 司 奪 麓 三處 後 其 Л 麓 境 侵

列傳第二百三 雲南土司三

刀落硬爲宣撫使,通判劉思勉爲土同知。 金牌、信符諭之退還。」帝敕沐晟處置奏聞。 正統二年,土知州刀貢罕奏:「麓川思任發奪其所轄羅卜思莊二百七十八村,乞遣使齎 六年頒給金牌、信符、勘合,加敕諭之。十年免所 麓川之役自是起。 九年陞州爲宣撫司,以知州

勝、愈罪 蘭愈占其招八地, 逼民逃竄。 天順二年復置南甸驛丞一人, 敕雲南三司官同巡按御史詣其地體勘, 以土人爲之。 時宣撫刀落蓋奏南寧伯毛勝遣騰衝千戶 以所占田寨退還,治

欠差發銀兩,令安業後,仍前科辦。

日南牙,甚高,山勢延袤一百餘里,官道經之。 直抵金沙江,地最廣。 南甸所轄羅卜思莊與小隴川,皆百夫長之分地。 司東十五里曰蠻干,宣撫世居之。 上有石梯,蠻人據以爲險 知事謝氏居囊宋,悶氏居盞西, 南百里有關, 立木爲棚,周 屬部

中統初,內附。至元十三年立茫施路軍民總管府,領二甸 芒市,舊日怒謀,又日大枯睒、小枯睒,在永昌西南四百里,即唐史所謂茫施蠻也。 元

洪武十五年置茫施府。 正統七年,總兵官沐晟奏:「芒市陶孟刀放革遣人來訴,與叛寇

革先與任發同惡,今勢窮乃言結釁,譎詐難信。 思任發有讐。 今任發已遁去,思機發兄弟三人來居麓川者藍地方,願擒以獻。」兵部言:「放 宜敕諭放革,如能去逆效順,當密調土兵助

剿機發。」從之。八年,機發令其黨涓孟車等來攻芒市,爲官軍所敗。 放革來降, 靖遠伯王

驥請設芒市長官司,以陶孟刀放革爲長官,隸金齒衞。

隴 Ш 岳鳳聯姻,導緬寇松坡營。 成化八年,木邦爨罕弄亂,掠隴川。敕芒市等長官司整兵備調。 事覺、伏誅、立舍目放緯領司事 ,轄於隴川。 萬曆初,長官放福與

設者樂甸長官司,改隸雲南都司,以沐晟言其地廣人稠也。十八年,長官刀談來朝,貢馬。 兵寡而勍,諸部畏憚之。 自是,皆以刀氏世領司事。 者樂甸,本馬龍他郎甸猛摩地,「引名者島。洪武末,內附,隸雲南布政司。 其地山險多瘴,介於鎭沅、元江、景東間。 日事攻戰,鎧械犀利, 永樂元年

<u>滇灘巡檢司。以長官司奏滇灘當茶山瓦高之衝,蠻寇出沒,民不能安,通事段勝頗曉道理,</u> 茶山 長官司、永樂二年頒給信符、金字紅牌。八年,長官早張遣人貢馬。 宣德五年置

能安人心,乞置司,以勝爲巡檢。從之。

宣慰司,後隸孟定府。 隸雲南都司,命刀派送爲長官,賜冠帶、印章。 孟璉長官司,永樂四年四月設。 而孟定知府刀名扛亦故平緬頭目,素與等夷,乞改隸。 時孟璉頭目刀派送遺子壞罕來言,孟璉舊屬麓川平緬 **遂**設長官司,

也。 王驥征麓川 嘉靖中,孟璉與孟養、孟密諸部仇殺數十年,司廢。 正統四年,思任發反,以兵破孟璉,遂降於麓川,爲木邦宣慰罕蓋法擊敗。 ,招降孟璉、亦保等寨。 敕賜孟璉故長官司刀派罕子派樂等綵幣, 至萬曆十三年,隴川平,復設,稱猛 以麓川 七年,總督 平故

)臉云。

里麻長官司,永樂六年設,隸雲南都司,以刀思放爲長官。 時思放爲里麻招剛。 招剛

貢馬。 者,故西南蠻官名。 思放籍其地來朝,請授職事,遂有是命,仍賜印章、 冠帶。 八年遺頭目

鈕兀長官司,宣德八年置。 鈕兀、五隆諸寨在和泥之地,其酋任者、陀比等朝貢至京,

奏地遠蠻多,請授職以總其衆。

兵部請設長官司,從之。遂以任者爲長官,陀比爲副。

其 爲長官。 地 東倘長官司,宣德八年置,隸緬甸宣慰。 新把的遺子莽只貢象、馬、方物,乞置司,庶免侵殺,從之。 時緬甸宣慰昔得謀殺當蕩頭目新把的, 置東倘長官司, 命新把的 而奪

隸焉。 瓦甸長官司,初隸金齒,永樂九年改隸雲南都 宣德 八年置曲石、高 松坡、馬緬三巡檢司。 司。 初,長官司言其地山高林茂,寇盜出沒, 土官刀怕賴言金齒遠,都司近,故改

列

命所司褒賞,以早貴爲安撫,賜綵幣、誥命。 興於馬緬。 人民不安,乞置巡檢司,以授通事楊資、楊中、范興三人,從之。 正統五年,長官早貴爲思任發所獲,殺其守者十七人,挈家來歸。 命資於曲石,中於高松坡, 帝嘉其忠順,

甸八等來朝,請別設長官司,從之。 命註甸八等爲長官,各給印章。 促瓦、散金二長官司,皆永樂五年設,[5] 隸雲南都司。其地舊屬麓川 平緬。

南,改木邦府。建文末,土知府罕的法遣人貢馬及金銀器,賜鈔幣。 木邦, 一名孟邦。元至元二十六年立木邦路軍民總管府,領三甸。洪武十五年平雲

平侯諭之,因改木邦爲軍民宣慰使司,以知府罕的法爲使,賜誥印。 及其部領有差。 發兵助戰,攻江下等十餘寨,斬首五百餘級。 永樂元年遣內官楊瑄齎敕諭木邦諸土官。明年遣人來貢。時麓川訴木邦侵地, 明年遣使貢象馬、方物,謝恩。 詔遣鎮撫張伯恭、經歷唐復往賜白金、錦幣, 頒賜如例, 復加賜其母及妻錦綺。 時官軍征八百,罕的法 罕的法 命西

列傳第二百三 雲南土司三

十一年,賓發遣使獻緬甸 賓發叛,賓發不敢從逆,若天兵下臨,誓當效命。 卒,其子罕賓發來朝,請襲,命賜冠服。七年遣使謝恩。又遣人奏緬甸宣慰使那羅塔數誘 三千兩、錦綺三百表裏,祖母、母、妻織金文綺、紗羅各五十疋。 自是,每三年遣使貢象馬 俘。 時木邦攻破緬甸城寨二十餘,多所殺獲,獻於京師 帝嘉其忠,遣中官徐亮齎敕勞之,賜白金

麓川 、緬甸各爭地、訴於朝、帝命沐晟幷三司巡按公勘。 宣德三年遣中官徐亮齎敕及文綺賜襲職宣慰罕門法幷及祖母、母、妻。 八年,木邦與

慰]]] 以麓川已設隴川宣撫司,請以孟止地給之,幷遣官諭祭其母,以表忠勤,免木邦歲辦銀八錠 麓 年,總督王驥奏,罕蓋法遣兵攻拔麓川板罕、貢章等寨,追至孟蒙,獲其孥七人,象十二,麓 敕及綵幣獎勞。 獲馬象器械甚衆。 三年,從之。 祖 Ш 土 母美罕板、其孫宣慰罕蓋法與麓川 正 地 統三年征麓川,敕諭木邦以兵 人民。」八年免木邦歲辦金萬四千兩。 十一年,緬甸獻任發首,木邦亦遣使與同獻,且修貢職,因求麓川地。 帝嘉其功,加授罕蓋法懷遠將軍,封美罕板太淑人,賚以金帶、綵幣。 帝命指揮陳儀往勞之,且曰「木邦能自効,生縶賊首獻,其酬 會剿。 戰於孟定、孟璉地, 五年,總兵官沐昂遣人間道達木邦,得報,知宣 木邦遣人謝恩,幷獻所獲思任發家屬,復 殺部長二十人,斬首三萬餘級, 兵部 賜

衆設盟而 構難,

落法避於

孟更,

遣人

赴總兵官

求救。 撫 歪孟 景泰 還。 訴 元 年 於總兵官沐璘。 然落法猶避居孟都不敢歸。 ,

罕蓋法奏

定

龍川界者

闌景線

地,

未報,

蓋法子

罕落

法

輒發

兵據之

。 璘遣 使諭 歸之,而 孟都蠻者,地近隴川,歲調蠻兵二百更番護之。 隣以聞,詔左參將胡誌調兵撫諭之,與其族 與以底麻 之地。 四年,罕落法襲父職 隴川宣 族人

攻,乞兵剿除,命總兵官區處。 都督胡誌 天順 量調官軍,相機剿捕。」帝以非犯邊疆,不許。 元年,鎮守中官羅珪奏:「罕落法與所部交攻,遣人求援。 臣等議委南寧伯毛勝、 六年,總兵官沐瓚奏罕落法屢侵隴川地,欲以撥守貴州兵八 二年,落法奏爲思坑、曩罕弄等所

千調回防禦,詔留其半。

時成化 孟 屬不樂受節制,嗾族人與爭。 邦宣慰罕撰法之女,嫁其孟密部長思外法。地有寶井。 外結交阯兵,逼脅木邦、八百諸部,琮等復以聞。 日盛,自稱天娘子,其子思柄自稱宣慰。 密 與木 成化 十八年也。 十年,木邦所轄孟密蠻婦曩罕弄等侵掠隴川, 邦 仇 殺り 並未侵犯邊境,止宜撫諭 踰年,孟密思柄遣人入貢,宴賜如土官例。 景泰中,叛木邦,逐宣慰,據公署,殺掠鄰境隴川、孟養, 黔國公琮奏委三司官往撫,曩罕弄驕 因 兵部尚書張鵬主用 命 副都御史程宗馳 黔國公沐琮以聞。 罕揲法卒,孫落法嗣。 已,孟密奏爲木邦所擾,乞別 傳 兵。 與譯者序 詔 曩罕弄者,故木 廷臣集議 蹇不服 **曩罕弄以**尊 班蘇銓往。 一皆以 且. 兵力

設安撫司。 張鵬以太監覃平、御史程宗撫馭已有成緒,遂命宗巡撫雲南,敕平偕詣金齒勸

諭之,其孟密地或仍隸木邦,或別設安撫,區處具奏。

據寶井之利,資爲結納,而木邦爲孟密所侵,兵力積弱,不能報,雖屢奏訴,竟不得直云 命,木邦亦已允服,乞遂行之。部覆,從之。二十年遂設孟密安撫司,以思柄爲使。時孟 殺已久,勢難再合,已喻諸蠻,示以朝廷德意,宥其罪,開設衙門,令還其所侵地,皆踴躍奉 弄叛,而請命 金,乞開設治所,直 ,曩罕弄竊據孟 於朝,若許之,則土官誰不解體。 隸布政司。閣臣 密,貳於木邦。 萬安欲許之,劉珝、 畏鄰境不平,遣人從間道抵雲南, 蘇銓私以告於宗。 劉吉皆以孟養原木邦屬夷, 宗復奏曩罕弄與木邦仇 至京,獻寶石、黃 今爨罕

南京 叛, 法發其事,時宗已致仕,

巡按請 爲設孟 幷敕雲南守臣親詣金齒 心,親愛骨肉,勿使孟 其勢必盡吞後已。 弘治二年,雲南守臣奏,孟密曩罕弄先後占奪木邦地二十七處,又誘其頭目放卓孟 工部尚書程宗罪。 密 安撫司。 銓復 密得 乞敕八百宣慰司俾與木邦和好,互相救援。 教 先是,宗以右副都御史奉命率蘇銓往撫諭,而銓受思 曉 思柄 諭 乘間誘叛,自致孤弱。 , 追罪之。 偽歸木邦地,而 復降敕詰責前鎭巡官所以受賂召侮啓釁者。 獄具,帝以事在赦前,不問。 占據如 如孟密聽諭,方許曩罕弄孫承襲。 故, 思柄益横 亦敕木邦宣慰收復人 六年, 至是, 雲南守臣奏孟 三年追 木邦宣慰罕空 柄金,紿宗奏 定論致仕 報可

密侵奪木邦,兵連禍結,垂四十餘年,屢撫屢叛,勢愈猖肆,請調兵往討。兵部議以孟密安 撫,初隸布政司,今改隸木邦,以致爭殺,仍如初隸可息兵,從之。

誥等奏其事,且乞賞有功者。兵部議,罕空法雖還木邦,思撰猶未悔罪,必令歃血同盟 欲殺之,罕穵法乞救於鄰部,調土兵合隴川等三宣撫兵至蠻遮,共圍之。 誥等會奏,議遣文武大員詣孟密撫諭,思揲猶不服。 據木邦,誘降其頭目高答落等,聚兵阻路。罕密法不得歸,依孟乃寨者三年。於是巡撫張 地獻叛,永息爭端,乃可論功行賞,報聞。 司,積糧開道,示以必征之勢,文令漢土官舍耀兵以威之。高答落等懼,謀歸罕穵法。 初、孟密之復叛木邦也,因木邦宣慰罕空法親迎婦於孟乃寨、孟密土舍思揲乘虛襲之, 問乃遣官督率隴川、南甸、干崖三宣撫 思揲懼,乃罷兵。 思揲 歸

思陸。 在孟養矣。自萬安、程宗勘處失宜,諸酋長紛紜進退,中國用兵且數十年 九年,罕空法及思揲各遣使來貢,報賜如例。 孟密素畏思陸之兵,聞其將至,遂解去。 木邦與思陸謀共取孟密,於是蠻中之患,又 初,思撰圍蠻遮,木邦宣慰妻求救於孟養

修怨於木邦。 來道,商旅不前,而已食鹽亦乏絕,乞於緬。 緬以五千籝餽之,自是反德緬,攜金寶象馬往 嘉靖初,思陸子思倫與木邦宣慰罕烈同擊殺緬酋莽紀歲,而分其地。 隆慶二年,木邦土舍罕拔告襲,有司索賂不爲請。拔怒,與弟罕章集兵梗往 後莽瑞體强,將

謝之。 瑞體亦厚報之, 歡甚, 約爲父子。 瑞體死,子應裏用岳鳳言誘拔殺之。 時萬曆十

也。

城陷 死,其叔罕榼約暹羅攻緬,緬恨之。 進忠攜妻子內奔, ,罕榼被擄。 拔 子進忠守木邦,應裏遣弟應龍襲之,其孽子罕鳳與耿馬舍人罕虔欲擒 緬爲立孟密思禮領其衆。 虔等追至姚關,焚順寧而去。十二年,官軍破緬於姚關, 三十四年,緬以三十萬衆圍其城。 事聞、黜總兵官陳賓、木邦遂亡。 請救於內地,不至, 立其 進忠獻 子 欽。 應龍。 欽

廣,而孟密遂失。十八年,緬復攻孟廣,罕烘、思禮奔隴川,思仁奔工回,而孟廣又失。先是, 走訴 弗克,

思仁亦走歸緬,

緬偽署

思仁於

孟密,

食其地 烘不許。至是,罕烘攜線姑走隴川,思仁奔雅蓋,率兵象犯隴川,欲擄線姑去。會隴川有備, 思仁從罕烘奔孟廣時,有甘線姑者,思忠妻也。思忠旣投緬,思仁通於線姑,遂欲妻之,而罕 於緬 孟 密自思柄授安撫,繼之者曰思撰,曰思眞,眞年至百十歲。 已而復投緬,乃以其母罕烘代掌司印。 緬 人爲立其弟,改名思忠,忠遂以其地附緬。 緬攻孟密,罕烘率子思禮、從子思仁奔孟 萬曆十二年,忠齎僞印來歸,命授 嘉靖中,土舍兄弟爭襲,

初,孟密 寶井,朝 Ξ 廷每以中官出鎮,司採辦。 武宗朝錢能最横、至嘉靖、隆慶時猶然。萬

列

第

百

雲 南 土

司 Ξ

嘗剿之,殺數千人,不得絕。 採辦必先輸官,然後與商賈貿易,每往五六百人。其屬有地羊寨,在孟密東,往來道所必經。 令**麗江退地聽採,緬**酋因得執詞深入。 曆二十年,巡撫陳用賓言,緬酋擁衆直犯蠻莫,其執詞以奉開採使命令,殺蠻莫思正以開道 人工幻術,採辦人有强索其飲食者,多腹痛死,己所乘馬亦斃,剖之,則馬腹皆木石也。思眞 全滇之禍,皆自開採啓之。 至是,復議剿,以兵少中止。 時稅使楊榮縱其下,以開採爲名,恣暴橫,蠻入苦之。且欲 巡按宋興祖極言其害,請追還榮等,帝皆不納。凡

爲雲遠府。 孟養,蠻名迤水,有香柏城。 其地故屬平緬宣慰司。平緬思倫發爲其下所逐,走京師。帝命西平侯沐春以 元至元中,於孟養置雲遠路軍民總管府。洪武十五年改

兵納之,還故地。

齎敕諭責緬。 相 物及金銀器,賜賚遣歸。二年改陞軍民宣慰使司,以刀木旦爲使,賜誥印。四年,孟養與戞里 仇殺,緬甸宣慰那羅塔乘釁劫之,殺刀木旦及子思欒發而據其地。 成祖即位,改雲遠府爲孟養府,日以土官刀木旦爲知府。 那羅塔懼,仍歸其境土。會木邦宣慰使罕賓法以那羅塔侵據孟養,請自率兵 永樂元年,刀木旦遣人貢方 事聞,詔行人 、張洪等

孟爲使,以木旦姪玉賓 討,遂破 處者三千餘人。 緬甸 城寨二十餘,獲其象、馬獻京師。 朝廷嘗命玉賓署宣慰使以撫之,故仍命爲本司同知,令其率衆復業。 爲同知。 自木旦被害,司遂廢,孟養之人從玉賓散居干崖、金沙江 十四年復設孟養宣慰司,命刀木旦 次子刀得

年,刀得孟遣使貢馬及方物

沐晟遣還之,然其地仍爲任發所有。 緬甸 居金齒者二十餘年。 ,子機發潛匿孟養,求撫 宣德五年,刀玉賓奏:「伯父刀木旦被殺,蒙朝廷遣官訪玉賓,授同知,又阻於緬難,寄 今孟養地又爲麓川宣慰思任發所據,乞遣兵送歸本土。」 時爲孟養宣慰者名刀孟賓,亦寄居雲南。 帝命黔國 及任發敗奔 公

宣慰 伐。 等與仇爲黨,三可伐。雲南總兵官世世管屬爾地,奉命捕取賊子,爾等不從調度,四可伐。 弱 爾等不過以爲山川險阻,官軍未易遽到,又以爲氣候瘴癘,官軍不可久居。 則奔遁。殊不知昔馬援遠標銅柱,險阻無傷,諸葛亮五月渡瀘,炎蒸無害,皆能 開拓境土。 思機 頭目刀變蠻等匿機發,敕數其罪,曰:「孟養乃朝廷開設,爾刀變蠻等敢違朝命,一可 正統 十三年敕孟養頭目伴送思機發來朝,[10] 許以陞賞,機發疑畏竟不至。 一發係賊子,故縱不捕,二可伐。爾孟養被思任發奪地,逐爾宣慰,見在雲南優養,爾 況今大軍有必勝之機,麓川之師可爲前鑒。 爾等速宜悔過自圖,令思機發 勢强則拒敵,力 帝以孟養 破 滅 變

列

傳第

百

Ξ

雲南土司

三

軍 欲 親 + 征,機發卒遁去,不可得。 生擒 捕 自前 四年也。 取 、機發, 來, 爲 中策;若代彼支吾,令其逃匿,則幷爾等剿滅, 仍 與 已密諭總督王驥, 官一地,令享生全。 於是乃以孟養地給緬甸宣慰馬哈省管治,命捕思機發。 又敕諭以雲南安置孟養舊宣慰刀孟賓爲嚮導。 如不肯出,爾等卽擒爲上策; 悔無及矣。」 迹思機發所在, 時已三征麓川 及兵 時正統 內旨 報與官 出 必

묘 順、成化,每朝貢輒署孟養地名,嚴然自有其地矣。 可移易。 景泰二年,任發之子思卜發遣使來貢,曰了求管孟養舊地。 時朝命雖不許,然上發已潛據之,即緬甸不能奪也。 廷臣議,孟養地已與緬甸, **卜發死,子思洪發嗣,自天**

職。 監 思英以兵守蠻莫。 過 議 相 江 傳孟密畏思陸兵,參政毛科請於總兵鎭巡官, 調 一錢能鎭雲南,思陸發數以珍寶遺能, 思陸 ,指鷹謂 適孟 成化 兵,令戮力捕思撰,乃遣使促之發兵。思陸遣 密安撫土舍思揲侵據木邦 中,孟養金沙江思陸發遣 使者 曰:「我曹猶此鷹, 孟養兵至,思英堅守不出, 人貢象馬,宴賜皆如 地,爭殺累年, 奪得土地, 因得入貢, 已而請和。 即管食之耳。」科聞之憂甚。 許之。 稱孟 守臣議征之,思陸發乃請 大陶孟倫索領蠻兵象 例。 思陸兵未至,思撰解 養金沙江 孟養兵聞官軍聽思英約降, 思陸發者,思任發之遺孽也。太 思陸發,常規立功以 馬過江 時思撰 自效。 去。 巡撫 倫 時 令陶 頗有 襲祖 索旣 蠻 張

令孟養還兵守疆界,孟養不聽。 官軍糧絕,遽引退。 倫索亦恐思英絕其歸路,取道干崖而還。 初, 靖遠伯王驥與之約誓, 非總兵官符檄不得渡江。 科念倫索前語, 自是 急戒

遂犯約,數興兵過江與孟密戰。

弘治十二年,雲南巡按謝朝宣奏:

禁制。 聽。 鵩 民困苦,將雲南鎭守太監止存一員,別用指揮一員守備鎭夷關,驅思陸退歸江外,而移 來,屢撫不退,皆鎭巡失之於初,逋逃奸人謀之於中,撫蠻中官壞之於後。 臣 時太監吉慶貪暴無狀, 劫象馬金寶,有幷吞孟密覬覦故土之志。 調其兵渡江,遂復據騰衝之蠻莫。 聞 衝司於蠻莫,幷木邦、孟密不得窺伺,乃爲萬全之策。設思陸冥頑不聽撫諭,便當決 雲南差官每多齎違禁物往彼餽送,漏我虛實,爲彼腹心。 蠻莫等處,乃水陸會通之地,蠻方器用咸自此出,江西、雲南大理逋逃之民多赴 雲南會城去孟養遠,聲勢難接。 孟養思陸本麓川叛種,竄居金沙江 臣計孟養甲兵不能當中原一大縣,以雲南之勢臨之, 雖嘗陽却思陸之贄,然蠻知其貪,又烏知不因其却而更進之。 又糾木邦兵,攻燒孟密安撫司,殺掠蠻民二千餘人, **曩於金騰添設鎭守太監,爲撫蠻安民之計。** 外。 迤西人恭們、騰衝人段和為之謀主, 屢撫不 成化 中,嘗據緬甸之聽盞。 易於壓卵。 鎭夷關一巡檢耳,安能 柰何一調卽 伏望垂念邊 弘治七年徵 而近

策用兵,使無噍類,以爲土官不法之戒。

印、部執不予、於是仍數出兵與木邦、孟密仇殺無寧歲。 目、冠帶,貢使已言思陸不願受,不宜輕畀,請賜敕厚勞遣歸之。 請賜以名目、冠帶,仍降敕獎諭。」部議以蠻莫等處本木邦分地,在大義宜歸之木邦。其名 崖、南甸三宣撫,宜暫於騰衝歲檄官軍四百分番守之。 先是,吉慶已爲思陸請朝貢,至是因朝宣疏,幷下鎭巡官議剿撫之宜,數年不決。 有,近又爲思陸所據,連年搆禍,今始平定。旣不可復與木邦、孟密,又不可割畀隴川、干 銀六百兩幷金銀器納款。鎭巡官以聞,幷奏言:「蠻莫等地原隸木邦,成化間始爲孟密所 官軍分道至金沙江。 和諭以禍福,令掣兵 命,退還前所據蠻莫等地十三處,撤回象馬蠻兵,渡金沙江而歸。又遣陶孟、招剛等貢象六、 十六年,巡撫陳金乃遺金騰參將盧和撫諭思陸。 、過江,歸所占蠻莫等地,且調隴川、干崖、南甸三宣撫司蠻兵及戰象,隨 思陸乃遣大陶孟倫索、 怕卓等率所部來見, 和至騰衝,思陸遣陶孟投書,致方物。 思陸前有助平思撰功,今悔禍納款, 報可。時思陸凱得宣慰司 和等再申諭之。 思陸 聽

屬之騰衝司,檄軍輪守,則烟瘴可虞,屬之木邦,則地勢遼遠,蠻心不順。 莫若仍屬孟密管 倫等各願貢 嘉靖七年,總兵官沐紹勛、巡撫歐陽重遣參政王汝舟等徧歷諸蠻,諭以禍 、象牙、土錦、金銀器,退地贖罪。 乃以蠻莫等十三處地方寬廣,諸蠻歷年所爭, 福。 孟養思

領,歲徵差發銀一千兩,而割孟乃等七處仍歸木邦罕烈,則分願均而忿爭息矣。

十一年, 劉健嘗議孟養事狀,謂思陸有官猶可制,卽無官,其僭自若也,不如因而官之以抗綱。報可。 萬曆五年,雲南巡按陳文燧言,孟養思箇與緬世仇,今更歸順於緬。 緬為遊擊劉挺所敗, 孟養思威亦殺緬使降於凝。十三年, 隴川平, 乃於孟養立長 因引弘治朝先臣

官司。

殺。 成守,連年徵發,從行甚苦,曰:「孟養不亡,蠻何得至此!」轟之後曰放思祖,有衆千餘,不敢 轟者,內附,與<u>蠻莫</u>

曾思正共據險抗緬。三十年,緬攻思正,轟率兵倍道馳救,至則正 立爲宣慰,貢象進方物。 歸,寄食於干崖云。 三十二年,緬攻入迤西,轟走死,緬以頭目思華守其地。 未幾,長官思眞復爲緬所擴,部長思遠奉思眞妻來歸,給以冠帶,令歸守。 然遠暴虐,諸部恨之,引緬兵至,聲言還思眞,思遠奔盞西。 華死 ,妻怕氏代理。 思遠乘亂自 緬 人更番 已被 有思

於奏章,因其俗不改。 舊制,宣慰遣人俱稱頭目,唯木邦及緬甸又有陶孟及招剛等稱,孟養又有招八稱,皆見

伐交阯,經所部,降之,置撒里路軍民總管府,領六甸,後又置耿凍路耿當、孟弄二州 車里,即古產里,爲倭泥、貂黨諸蠻雜居之地,自己古不通中國。 元世祖命將兀良吉욝

以賜誥命謝恩,予賜皆如 鈔幣,改置軍民宣慰使司,以收為使。 二十四年,子刀暹答嗣,遣人貢象及方物。 刀坎及使人衣服、綺幣甚厚,以初奉貢來朝故也。 洪武十五年,蠻長刀坎來降,改置車里軍民府,以坎爲知府。 例。 十七年復遣其子刀思拂來貢,賜坎冠帶、 坎遺姪豐祿貢方物,詔賜

漢也。 自立,驕狠失民心,未幾亦卒。更孟長子霸羨年幼,衆推刀賽署司事。刀賽者,更孟弟刀怕 百,帝嘉其忠。八百伏罪,敕車里班師,復加獎勞。四年遣子刀典入國學,實陰自納質。帝 朝廷遣內官往車里者,道經八百大甸,爲宣慰刀招散所阻。三年,刀暹答遣使請舉兵攻八 刀雙孟爲本司同知。 知其隱,賜衣幣慰諭遣還,以道里遼遠,命三年一貢,著爲令。十一年,暹答卒。長子刀更孟 使至,暹答果懼,還刀算黨及威遠之地,遣人貢馬謝罪。帝以其能改過,宥之。自是頻入貢。 命晟移文諭之,如不悛,卽以兵繼。又以軍里已納威遠印,是悔過之心已萌,不必加兵。晟 永樂元年,刀暹答令其下剽掠威遠知州刀算黨及民人以歸。 怕漢死,妻以前夫子刀弄冒爲暹答孫,請襲。十五年命刀弄襲宣慰使,以更孟從弟 十九年,雙孟言刀弄屢以兵侵劫蠻民,乞別設治所,以撫其衆。 西平侯沐晟請發兵討,帝

其 地,置靖安宣慰使司,陞雙孟爲宣慰使,命禮部鑄印給之。

本司復來徵,蠻民因而激變逐弄,弄逃入老撾,尋還境內以死。 計議。六年,黔國公奏,謂奉命招撫刀弄,其母具言布政司差官劉亭徵差發金,亭已取去, 宣德三年,雲南布政司奏刀弄、雙孟相仇殺,弄棄地投老撾,請差官招撫。 未嘗棄地外投,亦未嘗與 帝命黔國公

雙孟仇殺。

帝命法司執劉亨等罪之。

宣慰,仍歸車里,命刀霸供、刀霸羨共爲宣慰使,俾上所授靖安宣慰司 霸供言:「靖安原車里地,今析爲二,致有爭端,乞仍併爲一,歲貢如例。」帝從其請, 革靖安 七年,車里土舍刀霸羨請襲,許之,遣行人陸塤齎敕賜冠帶、襲衣。 即 九年,靖安宣慰刀

亂 天順元年,總兵官沐璘奏:「刀霸羨自殺,弟板雅忠等已推兄三寶歷代承職。 ,糾合八百相仇殺。」帝命璘亟爲撫諭,幷勘奏應襲者。二年,帝以三寶歷代者,雖刀更孟 正統五年命貢使齎敕及綺帛歸賜刀霸羨及妻,嘉其勤修職貢也。 景泰三年以刀霸羡奉調有功, 六年,麓川宣慰思倫 趸 其積欠差發金。 今板雅忠又作

之子,乃庶孽奪嫡,謀害刀霸羨,致板雅忠借兵攻殺,不當襲。但蠻民推立,姑從衆願,命襲

宣慰使。

十六年,交阯黎灝叛,頒爲敕於車里,期會兵共攻八百, 車里持兩端。 雲南守臣

列 傅 第 __ 百 = 雲 南 土 司 =

猛折而 舍那恕往招,燸猛復歸,獻馴象、金屏、象齒諸物,謝罪。 詔受之,聽復職 寇,不得輕與文移,啓釁納侮。 以 聞,遣使敕車里諸土官互相保障,勿懷二心。二十年復敕車里等部,愼固封疆,防交人入 入緬,有大、小車里之稱,以大車里應緬,而以小車里應中國。萬曆十三年命元江土 嘉靖十一年,緬貧莽應裏據擺古,蠶食諸蠻。 車里宣慰刀糯

至思毛地,緬追執之以去。 岡色美,責獻鳥岡。 緬人以是恨車里,興兵報復,體猛年已衰,重路求和。 天啓七年,巡撫閔洪學奏,緬人侵孟艮,孟艮就車里求救,宣慰刀韞猛遣兵象萬餘赴 河璇別以女給之。 中朝不及問,車里遂亡。 緬知其詐,大憤,攻車里愈急。 緬聞韞猛子召河璇有女名召烏 韞猛父子不能支, 遁

慰 南季犛,遣使詰責,諭其悔過。 謝罪。 使司 老撾,俗呼爲撾家,古不通中國。 宣德六年遣使齎敕獎諭宣慰刀線達。 永樂二年以刀線歹爲宣慰使, 自是連年入貢,皆賚予如例。 六年,刀線歹遣人貢象馬、方物。 成祖卽位,老撾土官刀線歹貢方物,始置老撾軍民宣 帝遣中官楊琳往賜文綺。十年來貢,命禮部加 給之印。五年遣人來貢。 九年、老撾貢使還、恐道中爲他部所阻、給信符、 七年復進金銀器、犀象、方 旣而帝以刀線歹 潛通 、賜焉。 安

職,免其貢物一年,賜冠帶、綵幣,以示優恤。旣怕雅賽欲報安南之仇,覬中國發兵爲助。帝 也。 幷及其妻。 敕孟艮、車里諸部遣人護之。景泰元年請賜土官衣服。故事,無加賜衣服者,命加賜錦幣 二人。其季子怕雅賽走八百,宣慰刀攬那遣兵送至景坎。 十六年,貢使至,會安南攻老撾,鎭守內官錢能以聞。 明年,安南黎灝率兵九萬,開山爲三道,進兵破哀牢, 成化元年頒金牌、信符於老撾。 七年鑄給老撾軍民宣慰使司印,以皆爲賊焚 入老撾境, 殺宣慰刀板雅 黔國公沐琮以聞,命怕雅賽襲父 因敕其使兼程回,幷量給 及其子 道 里 燬

其金牌、信符,俟鎭巡官勘奏至日給之。十一月,招攬章遣使入貢。 人,未授職,僭稱宣慰使,雲南三司官冒奏違錯,宜治罪。」宥之。 弘治十一年,宣慰舍人招攬章應襲職,遣人來貢,因請賜冠帶及金牌、信符。賚賞如制, 吏部言:「招攬章係舍

以老撾、交阯皆服屬中國久,恤災解難,中國體也,令琮愼遣人諭之。

奮,且地廣兵多,可獨當一面。八百、車里與老撾相近,孟艮在老撾上流,皆多兵象,可備征 弁責其私納罪。」報可。

二十四年,雲南巡撫汪文盛言:「老撾土舍怕雅聞征討安南,首先思 言:「據招攬章之言,懼納亡之罪,且假我爲制服之資,留之啓釁,遣之招兵,宜聽光紹自歸, 請免其察勘,就令承襲,以備征調。」從之。四十四年,土舍怕雅蘭章遣人進舞牌牙象 嘉靖九年,招攬章言:「交阯應襲長子光紹,爲叔所逐,出亡老撾,欲調象馬送回。」守臣

列傅

第

百三

南雲土司三

印俱失。 年,宜受其所貢,給賞遣之,毋令赴京。報可。時綱勢方張,剪除諸部,老撾亦折而入緬,符 二、母象三、犀角十,雲南守臣以聞。 禮部以非貢期,且無漢、緬公文,第來路險遠,跋涉踰

四十年貢方物,言印信燬於火,請復給,撫鎭官以聞。 萬曆二十六年,緬敗,老撾來歸,奉職貢,請頒印。 明年再頒老撾印。 命復鑄老撾軍民宣慰使司印給之。 時宣慰猶貢象及

銀器、緬席,賜予如例。

自是不復至云。

六十八程至雲南布政司 慰者,招木弄也,代存』子,絕不嗣。 其俗與木邦同,部長不知姓,有三等:一曰招木弄,一曰招木牛,一曰招木化。 其地東至水尾,南至交阯,西至八百,北至車里,西北 而爲宣

八百,世傳部長有妻八百,各領一寨,因名八百媳婦。 元初征之, 道路不通而還, 後遣

使招附。元統初,置八百等處宣慰司。

貢象及方物。先是,西平侯沐英遣雲南左衞百戶楊完者往八百招撫,至是來貢。帝諭兵部 洪武二十一年,八百媳婦國遣人入貢,遂設宣慰司。二十四年,八百土官刀板冕遣使

深見至誠 尙 書茹瑋曰:「聞八百與百夷搆兵,仇殺無寧日。 今與百夷構兵,當有以處之。 可諭意八百, 朕念八百宣慰遠在萬里外,能修職奉貢, 令練兵固守, 俟王師進討。」自是及

永樂初,頻遣使入貢,賜予如例

甸宣慰使, 永樂二年設軍民宣慰使司二,以土官刀招你爲八百者乃宣慰使,其弟刀招散爲八百大 遣員外郎左洋往賜印誥、冠帶、襲衣。 刀招散遣人貢馬及方物謝恩, 命五年一

百爲援,可遣其部長率兵一 辜,有所 衆。 軍六百、步軍一 京,庶境土 禍,使臣至境,拒却不 三年遣使諭刀招散曰:「朕特頒金字紅牌,敕諭與諸邊爲信,以禁戢邊吏生事擾害, 諸宣慰皆敬恭聽 是歲,遣內官楊瑄齎敕諭孟定、孟養等部,道經八百大甸,爲土官刀招散所阻,弗克進 不忍。 可 保。 千四 茲特遣司賓田茂、推官林楨齎敕往諭、爾能悔過自新、即將奸邪之人 其或昏迷不悛, 百護內官楊安、郁斌 納。 命, 無所違禮。 廷臣咸請興師問罪,朕念八百之人豈皆爲惡, 萬五千往備 發兵討罪, 孥戮不貸!」幷敕西平侯沐晟嚴兵以待。 惟爾年幼無知, 前往。 又慮老撾乘車里空虚,或發兵掩襲,或 惑於小人孟乃朋、孟允公等, 兵戈所至, 啓釁生 擒送至 必 用 與八 以馬 及 福 無 爾

三年,刀招 列 傅 第 你等遺使奉金縷表文,自己貢金結絲帽及方物。 百 \equiv 雲 南 土 司 Ξ 帝命受之,仍加賜予。

平侯奏,言八百已伏罪納款。夫有罪能悔,宜赦宥之。 禮部受之。 四年降敕誡諭刀招散,刀招散遣人貢方物謝罪。 諭車里、木邦等曰:「曩者八百不恭朝命,爾等請舉兵誅討。 侯沐晟奏:「奉命率師及車里諸宣慰兵至八百境內, 破其猛利石厓及者答二寨, 木邦兵破其江下等十餘寨。八百恐,遣人詣軍門伏罪。」乃以所陳詞奏聞。 帝以不誠,却之。五年貢使復來謝罪,命 敕至,其悉止兵勿進。」遂敕晟班師。 嘉爾忠誠,已從所請。 又至整線 因遣使敕 今得西

國 之兵入境殺掠,乞發兵討之。 爲遠蠻役,非計,止降敕撫諭而已。 洪熙元年遣內官洪仔生齎敕諭刀招散。 帝以八百大甸去雲南五千餘里,波勒、土雅皆未嘗歸化,勞中 宣德七年遣人來貢,因奏波勒土
曾常糾土雅

令通 宣慰司金牌、信符各一,以前所給牌符爲暹羅國寇兵焚燬也。 |事齎捧金牌、信符,催督進貢,驛路令軍卒護送,庶無疏失。」 從之。 十年,給八百大甸 正統五年,八百貢使奏:「遞年進貢方物,土民不識禮法,不通漢語。 乞依永樂問例,仍

言爲雷所震。八百因遣兵扼其歸路,襲殺萬餘,交人敗還。土官刀攬那以報。 奏:「攬那能保障生民,擊敗逐賊,救護老撾。一麼人嘗以爲敕脅誘八百,八百毀敕,以象蹴之, 成化十七年,安南黎灝已破老撾,頒爲敕於車里,期會兵攻八百。其兵暴死者數千,傳 黔國公沐琮

貢。 物,求襲祖職。兵部言:「八百遠離雲南,瘴毒之地,宜免勘予襲。」從之,仍給冠帶 請頒賞以旌忠義。」帝命雲南布政司給銀百兩、綵幣四表裏以獎之。二十年,刀攬那遣人入 雲南守臣言:「交兵雖退, 宜令八百諸部飭兵爲備。」弘治二年,刀攬那孫刀整賴 貢方

平川數千里,有南格剌山,下有河,南屬八百,北屬車里。好佛惡殺,寺塔以萬計。 **乃舉兵,得仇卽已,俗名慈悲國。** 其地東至車里,南至波勒,西至大古喇,與緬鄰,北至孟艮,自姚關東南行五十程始至。 初,四譯館通事惟譯外國,而緬甸、八百如之,蓋二司於六慰中加重焉。 嘉靖間,爲緬所幷,其酋避居景線,名小八百。 萬曆十五年, 八百大甸上書請恢復, 自是朝貢 有見侵,

校勘記

至安南 改。 安南,原作「南安」,據本書卷三一四麓川傳及太祖實錄卷八六洪武六年十一 月己酉條

十二年木邦宣慰罕蓋法至幷貢方物 英宗實錄卷一三六均繫於正統十年十二月丙辰。 本書卷三一四麓川傳繫於十一年,又卷一〇英宗前紀及

盡俘其衆 此繫於萬曆十年,同卷木邦傳作「萬曆十一年」,彼此互異。

- 宣德六年改隸雲南都司 本書卷四六地理志、 宣宗實錄卷六七宣德五年六月壬午條繫於宣德
- 五年。
- ハガリ 十一年遊擊劉綎破隴川 本書卷二〇神宗本紀繋於十二年。
- 永樂十一年改爲州 本書卷四六地理志及寰宇通志卷一一三、明一統志卷八七繫於永樂十二

年。

- . . . 本馬龍他郎甸猛摩地 馬龍,原誤倒作「龍馬」,據本書卷三一四新化傳、寰宇通志卷一一三、
- 讀史方興紀要卷一一五改正。
- 皆永樂五年設 本書卷四六地理志、太宗實錄卷五六永樂六年四月癸未條繫於永樂六年。
- 一 九 改雲遠府爲孟養府 雲遠府,原作「雲南府」,據本書卷四六地理志、太祖實錄卷一四三洪武十
- 五年三月己未條、太宗實錄卷一五洪武三十五年(即建文四年)十二月丙辰條改。

正統十三年,原脫「正統」年號,只作「十三年」,繫於

正統十三年敕孟養頭目伴送思機發來朝

- 見英宗實錄卷一六三正統十三年二月乙丑條,據補「正統」二字。 宣德之下。按宣德共十年,不得有十三年。敕孟養頭目伴送思機發來朝,事在正統十三年二月,
- 任發之子思卜發遣使來貢 景泰七年四月乙卯條改。 任發,原作「機發」,據本書卷三一四號川傳及英宗實錄卷二六五

記

讀史方輿紀要卷一一九改。

[1三] 三年刀招你等遺使奉金縷表文 此「三年」,與上文「三年」重出。按上文「三年遺使諭刀招散」,

是三年七月事。此「三年,刀招你等遣使奉金縷表文」,是三年十月事,見太宗實錄卷三六永樂

三年七月壬子條、又卷三八水樂三年十月壬午條。此「三年」疑當作「是年」。

明史卷三百十六

列傳第二百四

貴州土司

後來歸,皆予以原官世襲。帝方北伐中原,未遑經理南荒。又田仁智等歲修職貢,最恭順, 乃以衞指揮僉事顧成築城以守,賦稅聽自輸納,未置郡縣。 之,時至正二十五年也。及洪武五年,貴州宣慰靄翠與宋蒙古歹及普定府女總管適爾等先 以羈縻之。明太祖旣克陳友諒,兵威遠振,思南宣慰、思州宣撫率先歸附,卽令以故官世守 貴州,古羅施鬼國。漢西南夷牂牁、武陵諸傍郡地。元置八番、順元諸軍民宣慰使司,

以長官司七隸焉,屬兵部。 州,設貴州布政使司,而以長官司七十五分隸焉,屬戶部。 永樂十一年,思南、思州相仇殺,始命成以兵五萬執之,送京師。乃分其地爲八府四 府以下參用土官。其土官之朝貢符信屬禮部,承襲屬吏部,領 置貴州都指揮使,領十八衞,而

列

土兵者屬兵部。 其後府幷爲六,州幷爲四,長官司或分或合,釐革不一。

家,宜並罪。帝曰:「蠻人鴟張鼠伏,自其常態,勿復問。」明初御蠻之道,其後世之龜鑑也夫。 也」,則志已在黔,至成祖遂成之。 臣以貴州逋賦請,帝曰:「蠻方僻遠,來納租賦,是能遵聲教矣。逋負之故,必由水旱之災,宜 則汝可長享富貴。夫禮莫大於敬上,德莫盛於愛下,能敬能愛,人臣之道也。」二十一年,部 畔服不常。 行蠲免。 入朝,帝諭之曰:「天下守土之臣,皆朝廷命吏,人民皆朝廷赤子,汝歸善撫之,使各安其生, 其地西接滇、蜀,東連荆、粤。 自今定其數以爲常,從寬減焉。」二十九年,清水江之亂旣不,守臣以賊首匿宣慰 靄翠歸附之初,請討其隴居部落。 帝曰:「中國之兵,豈外夷報怨之具。」及仁智 然貴州地皆崇山深箐,鳥道蠶叢,諸蠻種類,嗜淫好殺, 太祖於平滇詔書言:「靄翠輩不盡服之,雖有雲南不能守

貴陽 石阡 新添 思南 思州附 金筑安撫司附 鎭遠 銅仁 黎平 安順 都匀 平越

化十二年置程番府。 曆時,改爲貴陽軍民府。 貴陽府,舊爲程番長官司。 隆慶三年移程番府爲貴陽府,與宣慰司 領安撫司一,日金筑,領長官司十八,「一日貴竹,日麻嚮,日木瓜, 洪武初,置貴州宣慰司,隸四川。 同城,府轄城北,司轄城 永樂十一 年改隸貴州。成 《南。萬

東 目 日日 大華,日程 日 中 小 ·曹,曰 程 番 番,日 青山 日 上 馬橋 韋番,日方番, 門,日 一一日龍 盧番 日洪番, 日 盧山 曰臥龍番 日 平伐。 日 底 寒,日 其 曰金石番, 、貴州宣慰 乖西,日 【養龍: 日小龍 司 所 領 坑 番, 長官司九,三 日羅番 一, 曰 日水 大龍

十 衣,而 最 五 幷 貞 香 皆 俱 四 世 十錠。 代 令世 年, 令領 有土 聞 訴 年 誠 ·,宋欽 曄激變狀, 襲。 止之,爲走愬京 自 召 香進馬 恪 其 於水西宣慰司。 原 蜀 曄還,罪之。 香復 都督 漢 職 職 死 命禮 世 時,濟火從諸葛亮南征 一妻劉 遺其子 二十三匹, 馬 襲。 六年韶靄翠位各宣慰之上。 Ħ. 曄 部厚賞 願 及設 欲 淑 (効力開 師 婦 香遂開 盡 貞 0 滅諸羅 奢助及 (其使。 隨 布政使司, 靄翠,其裔也,後爲安氏。 毎 帝旣 其子誠入朝,賜米三十石、鈔三百錠、衣三襲。 西鄙, 歲定輸賦 偏橋、水東,以達烏蒙、 召問,命淑 其部長來貢馬六十六匹,詔賜香銀 代 二十五年, 3 里,日白納, 有功 以流官,故以事撻香 而宣慰司如故。 世 一萬石。 7,封羅 .世保境。 貞 的 、歸,招香,賜 靄翠每年貢方物 來 甸 子安 朝, 國 帝悅,賜 玉。 洪武初, 的 烏撒 賜三品服幷襲衣 安氏領水西, 襲,貢馬 以綺 後五十六代爲宋普貴,傳至元 ,激爲兵端。 及容山、草塘諸 香錦綺、 與馬, 鈔。 同宣慰宋蒙古歹來歸,賜名 謝 + 恩。 宋氏領水東。 四 珠翠、 帝賜 ·七年 金帶、 諸羅果怒,欲反。 百 帝 兩, 錦 境,立 奢 日 時靄翠 如 綺 自 錦 意 香 一安的 鈔 金 綺 龍 冠 率)幣有 三百 所屬 亦死 鈔幣有差。 場 八番降者 金環、 居 九驛。二 加 兩、鈔 妻奢 水西, 阿畫, 來 劉淑 欽 朝 襲

列

傅

自是每歲貢獻不絕,報施之隆,亦非他土司所敢望也。二十九年,香死,朝廷遣使祭之,的

貢馬謝恩。

警之。 之功。 衆二萬攻白石崖,四旬而克,家自餽餉,口不言功,特給觀正三品昭勇將軍誥。 之。是時,宋誠之子斌年老,以子昂代,昂死,然代。十四年賜敕隴富母子,嘉其調兵保境 正統七年,水西宣慰隴富自陳:「祖父以來,累朝皆賜金帶。臣蒙恩受職,乞如例。」從 富死,姪觀襲。觀老,子貴榮襲。巡撫陳儀以西堡獅子孔之平,由觀與子貴榮統部 隴富頗驕。天順三年,東苗之亂,富不時出兵,聞朝廷有意督之,乃進馬謝罪,賜敕

其 賜貴榮父子錦紵。 設治所於城內,銜列左右。 、以時巡歷所部,趣辦貢賦,聽暫還水西,以印授宣慰宋然代理。 初,安氏世居水西,管苗民四十八族,宋氏世居贵州城側,管水東、貴竹等十長官司,皆 而安氏掌印,非有公事不得擅還水西。 貴榮老,請以子佐襲,命 至是總兵官爲之請,許

亂。 遽以狀上,冀令已按治之。 - <u>,</u>貴榮已死,坐追奪,然坐斬。然奏世受爵土,負國厚恩。 於是阿朵等聚衆二萬餘,署立名號,攻陷寨堡,襲據然所居大羊腸,然僅以身免。 先是,宋然貪淫,所管陳湖等十二馬頭科害苗民,致激變。而貴榮欲幷然地,誘其衆作 會阿朵黨洩其情,官軍進討。 貴榮懼,乃自率所部爲助。 但變起於際,而身陷重辟,乞分 貴榮 及賊

釋。 理 因從末減,依土俗納粟贖罪。 撫 覆奏以蠻民不願,遂寢。 都御史請以貴筑、平伐七長官司地設立府縣, 宋氏亦遂衰,子孫守世官,衣租食稅,聽徵調 而 皆以流官 已。

謀也, 萬鍾弟日萬鈞 撻 宜 襲,但與烏掛相誣託,宜各宥輸贖。 其左右,爲所殺。 時安萬鍾應襲,驕縱不法。 遂以兵襲烏掛,烏掛亦發兵相仇殺,皆以萬鍾之死爲辭。 告襲,承勘官入其賄,遂暫委踵妻審播攝事。 無子,其從弟萬鎰宜襲,鎰以賊未獲辭。 漢民張純、土目烏掛等導之游獵,酒酣,輒 而梟殺鍾者,幷戍純等,受其賄者亦罰治,詔如之。 萬鎰悔不立,而恨鳥掛 烏掛等遂以疏 巡按御史上其狀,以萬鎰 射人 族幼子普者冒 爲戲。 之主其 叉嘗

遣使 廣河 亨反。 萬銓 亭子民襲。 以處安智 幾死,子 哀辭乞降,朝廷未之許。 亦自陳其功,乞加參政銜,賜蟒衣,帝命賜以應得之服。 未幾,鎰死, 智糧 巡撫王諍 國亨襲。 母 不至。 國亨 子, 還所費兵糧 事 遽請發兵誅國亨, 子阿寫幼, **諍乃令人諭國亨,而止大朝毋** 淫虐,乃以事殺萬銓之子信。 起於隆慶四年,至萬曆五 ,朝廷當待汝 命以萬銓借襲。 巡撫 阮文中 智遂爲總兵安大朝畫策, 以 至,檄捕 年乃已。 不死。 萬銓有助平阿向功,提督尚書伍文定爲之請。 進。 信兄智與其母 諸 於是國亨悉聽命,帝果赦不誅,而命國 兵已渡河 反者,密使語國亨, ,爲國亨所敗。 別居於安順州,聞之,因告國 且約輸兵糧數萬。 後阿寫長,襲職,改名仁。 極出 諸 國亨懼 奸 及師 徒,割 未 地

奪所賚。

國亨請補貢以明不欺,上仍如所請。

魚服 ,國亨亦請以大木進,乞還給冠帶誥封如播 國 亨旣革任 ,日遣人至京納賂,爲起復地。 例。 十三年,播州宣慰楊應龍以獻大木得賜飛 旣而木竟不至,乃諉罪於木商。 上怒,

臣兵從沙溪入。 復優 案。 落濛關,至大水田 詔報之。 科臣有言其逆節漸萌者,詔不問,許殺賊圖功。 萬 曆二十六年, 巡撫郭子章許疆臣以應龍平後還播所侵水西烏江地六百里以酬功 有蜚語· ,焚桃溪莊 國亨子疆臣襲職。 水西佐賊者,總督李化龍檄詰之,疆臣遂執賊二十餘人,率所部奪 應龍伏誅 會播州楊應龍反, |疆臣奏稱:「播警方殷,臣心未白。」上 疆臣亦以戕殺安定事爲有司所 於是疆

乾代 且 君 願 喪亂之時 水 罷 助 示 西 化龍 逆,迹已昭然。 去。」 所 初,應龍之祖 據。 象乾 ,非擅取於應龍蕩平之日。 ,命疆臣歸所侵播州 疆臣旣無功,不與之地,正所以全撫臣之信。 及播州平,分其地爲遵義、平越二府,分隸蜀、黔,以渭 疏言 以內難走水 疆臣 令還侵地,不咎旣往 征播,殲應龍子 地。 西,客死。 子章奏言:「侵地始於萬銓,而 且 臣 ,已屬國 宣慰萬銓挾之,索水烟、天旺 惟棟 .曾許其裂土,今反奪其故地,臣無面 不 家寬大。 實,首功可知 宜留撫臣罷臣,以爲重臣無能 若因 「其挾而予之, 非疆 至佯敗棄陣,送藥往來,欺 河 臣。 中 地,聽還葬,其 心 安氏 爲界。 彼不爲恩,我 目 迫取 以謝 總督 於楊相 地遂為 疆臣, 與蕞 王 象

章詆象乾貪功起釁。 之故傷字小之仁,地宜歸疆臣。」於是疆臣增官進秩,其母得賜祭,水西尾大之患,亦於是乎 之役,水西不惟假道,且又助兵。矧失之土司,得之土司,播固翰糧,水亦納賦,不宜以土地 京行賄之人與金,以聞於朝。 爾苗噂沓者之戒。」於是淸疆之議,累年不決。 科臣呂邦耀復劾子章納賄縱奸, 然議者多右疆臣,尚書蕭大亨遂主巡按李時華疏,謂:「征播 兵部責令兩省巡按御史勘報,而南北言官交 子章求去益力。 象乾執疆臣 .所遣入

不可制矣。

分兵破 臣死。 |彥遂挾|位叛以應之,位幼弱不能制。 兵數萬長驅入滇,直薄霑益州,所過焚掠,備極慘毒。 年二月也。[三] 爭地,相仇恨。 三十六年,疆臣死,弟堯臣襲。四十一年,烏撒土舍謀逐安効良,堯臣以追印爲名,領 安順、平壩、霑益。 子位幼,命其妻奢社輝攝事。 而安邦彥者,位之叔父也,素懷異志,陰與崇明合。 而萬化亦率苗仲九股陷龍里,遂圍貴陽, 社輝,永寧宣撫奢崇明女弟。 邦彦更招故宣慰土舍宋萬化爲助,率兵趨畢節,陷之, 朝廷方以越境擅兵欲加堯臣 及崇明反,調兵水西,邦 崇明子寅獲悍,與社 自稱羅甸王,時天啓一 罪,而堯 輝

斷 城中出 巡 撫 李橒方受代,至 入。 鎮將張彥芳將兵二萬赴援,隔龍里不得進。 聞變,與巡按御史史永安悉力拒守。 貴州總兵楊愈懋、推官郭象儀與 賊攻不能克,則沿巖制栅**,**

列

傳

餘月,城中軍民男婦四十萬,至是餓死幾盡,僅餘二百人。「KJ詳李橒及三善傳中。 死安邦俊,遂乘勝抵貴陽城下,先以五騎傳呼曰:「新撫至矣。」舉城懽呼更生。 兵,遂奪龍里。 賊 不之省。 戦於江 已,以王三善爲巡撫,倉卒調兵食,大會將士,分兵二道進。三日抵龍頭營,屢敗賊 . 門 而 死。 邦彥聞新撫自將大兵數十萬,懼甚,遂退屯龍洞。 外援旣絕,攻益急,城中糧盡,人相食,而拒守不遺餘力。 前鋒楊明楷率烏羅兵擊 中朝方急遼, 貴陽被圍十

等,焚其積聚數萬。龍里、定番四路並通,諸苗畔者相繼降。邦彥氣奪不敢出,於鴨池、陸 廣諸要地掘塹屯兵,爲自守計。時奢崇明爲蜀兵所敗,計窮投水西,與邦彦合。 明楷爲所執。邦彥勢復張,合衆欲再圍貴陽。三善遣兵三路禦之,破生苗寨二百餘,擒萬化 衆,三善欲因糧於敵。又諸軍視賊過易,楊明楷營於三十里外。邦彥復糾諸苗來攻,師敗, 貴陽圍旣解, 邦彥遠遁陸廣河外。三善遣使諭社輝母子縛邦彥以降。大軍至者日益

往返間已逾數月,邦彥得益兵爲備。三善糧不繼,焚大方,還貴州,道遇賊,三善爲所害。 督楊述中。 率兵直入大方,奢社輝、安位焚其巢,竄火灼堡,邦彥奔織金。位遂遣人赴鎭遠,乞降於總 其天險。 三年,三善督兵攻大方賊巢,擒土司何中尉等,進營紅崖。連破天台、水脚等七囤,奪 別將亦破賊於羊耳,追至鴨池河,奪其戰象。遂深入至紅鳥岡,諸苗奔潰。三善 許之,令擒崇明父子自贖,一意主撫。而三善責幷獻邦彥,當幷用剿,議不合。

邦 彦 率數萬衆來追,總理魯欽力禦之,大戰數日,大軍無糧, 乘夜皆潰,飲自剄。 賊燒劫諸

堡,苗兵復助逆,貴陽三十里外樵蘇不行,城中復大震。

元 須 永寧 用。 陸廣 交通 四 臨 變元爲蜀督, 干 總 畢 重 べ鴨 節,扼: 督貴、雲、川 兵扼 ·里爲 處。 而 總督閔夢得繼之,亦以貴州抵 初,大方東倚播,北倚藺,相爲掎角。 普市 池 之, 當三善由貴陽陸廣深入大方百七十里,皆羅鬼巢窟, 白巖,六十里爲層臺,又六十里爲畢節。 擣其虚;粤西兵出泗城, 其交通之路,而 ,而摩泥,至而赤水, 斷其四走之路。 建議演兵出霑益,遏安効良應援,分兵於天生橋、尋甸等處, 廣。 於是變元 別出龍場巖後,以奪其險;黔兵由普定渡思臘河,徑趨邦彥巢, 然後遵義、貴陽剋期而 再涖黔,時崇禎元年也。 大方路險, 分道策 百五十里皆坦途。 後播、 應,然後 賊惟恃畢節一路外通。 藺旣 平, 畢節至大方不及六十里,賊 大軍由 赤水 進, 賊惟恃鳥撒爲援,而 亦不果用。 遵義鼓 有城郭 以失地利而陷。 行 可憑 而 及是黔事 我兵宜從永寧始, 前。 而 守, 以絕其走, 蜀兵 尋以 必 宜結營進逼。 畢節爲四夷 棘 併 天啓間,朱 憂去,未及 力來禦, 詔 起 燮 自

水。 劉養 變元授意守將佯北,誘深入,度賊已抵永寧,分遣別將林兆鼎從三岔入,王 奢崇明自 鯤從遵義入。 號 大梁王,安邦彦自號四裔大長老,其部衆悉號元帥。 邦彦分兵四應,力不支。 羅乾象復以奇兵繞其背,急擊之,賊大驚 悉力趨永寧,先 國旗 從 陸廣 犯

列

傅

第

百

四

費州

土

司

而前 而 議欲乘 食,賊益饑。 决,其下謀合潰兵來拒。 潰,崇明 城設官。 明亦旋亡矣。 助邦彥故宣慰宋萬化之子嗣殷亦至是始剿滅。 其敝郡縣之。 變元 邦彦皆授首。 復遣人至大方燒其室廬,位大恐,遂率四十八目出降。 復遣兵平擺金五洞諸叛苗,水西勢益孤。 變元奏未可驟,乃傳檄土目,諭以威德,諸苗爭納土獻印。 邦彦 燮元扼其要害,四面迭攻,斬首萬餘級。 亂七年而誅。 變元乃移檄安位,赦其罪,許歸附。 乃以宋氏洪邊十二馬頭地置 十年,安位死,無嗣,族屬爭立。 復得嚮導,輒發窖粟就 變元奏請許之,報可。 位豎 貴陽甫定, 開 州 子不能 朝 建

朗溪。 爲一宣慰,屬湖廣。 思南,即唐思州。 思州領長官司四:日都坪峨異溪,日都素,日施溪,日黃道溪。 永樂十一年置思南府,領長官司四:日水德江,日蠻夷,日沿河祓溪,日 宋宣和中,番部田祐恭內附,世有其地。元改宣慰司。 明洪武初,析

宣撫使田仁厚亦遣都事林憲、萬戶張思溫來獻鎭遠、古州軍民二府,婺川、功水、常寧等十 宣慰誥。 初,太祖起兵平僞漢,略地 帝以 率先來歸,俾仍爲 湖南。 思南道宣慰使,以三品銀印給之,幷授琛爲宣撫 思南宣慰使田仁智遣都事楊琛來歸附,幷納元所授 思州

,龍泉、瑞溪、沿河等三十四州。 於是命改思州宣撫爲思南鎭西等處宣慰使司,以仁厚爲

使,俱歲朝貢不絕。

卒。 大雅 皆優賜。 輒竄山谷間,退則復出剽掠。 年,大雅入朝。十八年,思州諸洞蠻作亂, 年,仁智入觀,加賜織金文綺,幷諭以敬上愛下保守爵祿之道。 雑耕 來謝恩。 有司以聞,遣官致祭,幷敕送柩歸思南。 二年,仁厚死,子弘正襲。 一使不 十一年,仁智子大雅襲,奉表謝恩。 ·復疑。 思州宣慰弘正死,子琛襲。三十年,大雅母楊氏來朝。 久之,以計擒其魁,餘黨悉定,留兵鎭之。

二十年移思南宣慰於鎭遠。 和等師抵其地,恐蠻人驚潰,乃令軍士於諸洞分屯立栅,與蠻 帝以思南土官世居荒服、未嘗詣闕、詔令率其部長入朝。 命信國 時思州田弘正與其弟弘道等來朝,帝命禮 命思南收集各洞弩手二千人,備征調 公湯和等討之。 仁智辭歸,至九江龍城驛 時寇出沒不常,聞 師至, 十四四 部 病 九

琛 地 田 殺 有 氏 其弟,發其 怨。 世 永樂 坊 守 其 司 禧遂 八 了, 伺 年,大雅死,子宗鼎襲。 土,又先歸 與琛結,圖宗鼎,搆兵。 隙 墳墓,幷戮其母屍。 爲變。 誠,曲與保全,改禧 事覺, 遣行 初,宗鼎兇暴, 宗鼎訴於朝,屢敕琛 人蔣廷瓚召之,命鎭遠侯顧成以兵 踩自稱天主,禧爲大將,率兵攻思南。 為辰州 知府。 與其副使黃禧搆怨, 未幾,思州宣慰 、禧赴闕自辨、皆拒 壓其境, 田琛 奏訐累年。 命 與宗鼎 宗鼎 不至,潛使奸 執琛、禧械 挈家走, 朝廷 爭沙坑 以

列

傅

百

四

貴

州土

司

送京師 ,皆引服。 踩妻冉氏尤强悍,遣人招誘臺羅等寨苗普亮爲亂,冀朝廷遣琛還招撫,以

発死。帝聞而錮之。

州 十二年遂分其地爲八府四州,貴州爲內地,自是始。 地,可更郡縣,設貴州布政使司總轄之。」命顧成剿臺羅諸寨。 **免禍,不自懲,乃更逞忿,亦留之。** 亦發宗鼎縊殺親 思南,皆爲民害。深不道,已正其辜。 以宗鼎窮蹙來歸,得末減,令復職,還思南。 母瀆亂人倫事。 帝命刑部正其罪,諭戶部尚書夏原吉曰:「琛、宗鼎 宗鼎出誹言,因發祖母陰事,謂與禧奸,實造禍本。 宗鼎滅倫,罪不可宥。 而宗鼎必得報怨,以絕禍根。 兩宣慰廢,田氏遂亡。 成斬苗賊普亮。思州乃平。 其思州、思南三十九長官 帝以宗鼎幸 分治思 祖母

結婚者,旣累經赦宥不論,繼今悉依朝廷禮法,違者罪之。景泰間,思南府奏府四面皆山, 關隘五處,無城可守,乞發附近土軍修築。 正統初,蠻夷長官司奏土官衙門婚姻,皆從土俗,乞頒恩命。帝以土司循襲舊俗,因親 命巡撫王來經畫之。

改爲州、隸湖廣。 鎭遠,故爲豎眼大田溪洞。 永樂十一年仍改府,屬貴州。 元初,置鎭遠沿邊溪洞招討使, 領長官司二一日偏橋,日邛水十五洞。 後改爲鎭遠府。 洪武 五年 領縣

一一日鎭遠,即金容金達、楊溪公俄二長官司地,日施秉,即施秉長官司地也

洪武二十年,土官趙士能來朝,貢馬。三十年,鎭遠鬼長箐等處苗民作亂,指揮萬繼、

百戶吳彬戰死。 都指揮許能率兵會偏橋衛軍擊敗之,衆散走。

皆佯、儣、備、佬,力不勝役,乞令軍民參助。」從之。 永樂初, 鎭遠長官何惠言:「每歲修治淸浪、焦溪、鎭遠三橋, 工費浩大。 所部臨溪部

苗銀總劫取之,聚兵欲攻思州。 顧奏:「貴州蠻賊出沒,撫之不從,捕之不得,若非設策,難以控制。 屯兵守禦, 層崖,僅通一徑出入,彼得恃險爲惡。 其黨,銀總遁。 命總兵官蕭授調辰、沅諸衞兵萬四千人剿之,會於淸浪衞,指揮張名討銀總,克奧洞,盡殺 宣德初,鎭遠邛水奧洞蠻苗章奴劫掠淸浪道中,爲思州都坪峩異溪長官司所獲。 又擇寨長有才幹者爲辦事官,庶毋疏虞。」從之。 正統三年革鎭遠州,以鎭遠、施秉二長官司隸鎭遠府。 因令赤溪洞長官楊通諒往撫, 若將江外山口 盡行閉 塞,江內山口 十四年命振偏橋衛,以被苗寇 銀總伏兵殺諒, 臣觀淸水江等處,峭壁 十二年,巡按御 **幷津渡俱設關堡**, 又掠埂洞。 史虞 其父

劫 鎭遠主案。 天順七年,鎭守湖廣太監郭閔奏:「貴州洪江賊苗蟲蝦等糾合二千餘人,爲稱王侯,攻 撫諭 不服,請合兵進討。」命總兵官李震、李安等分道入,賊退守平坤寨,官兵

殺掠,不能自存,有司

以請,從之。

列傳

第

追至清水江,獲蟲蝦,幷斬賊首飛天侯、苗老底、額頭等六百四十餘人,幷復黎平之赤溪浦 洞,賊平。 弘治十年改鎭遠金容金達長官司爲鎭遠州,設流官。時土官何倫父子罪死,云

土人思得流官,守臣以聞,報可。

苗,言:「若等十五洞所苦者,以兵餉月米三斗過甚耳**。** 之。 光春 春金而殺之。 有土舍楊載清者應襲推官,嘗中貴州鄉試,命於本衞加俸級優異之。 平溪驛剩餘徵銀兩,皆可足餉。 春下獄,瘐死。 與必信遂謀反,言官兵欲剿諸苗,當斂金贖,得金五百餘。 必信復醵諸苗金,訴於朝,言巴也、梁止諸寨爲亂,指揮使陶効忠 萬曆末,邛水長官司楊光春貪暴, 改舊例用新法,不便。 。於是每四戶擇壯兵一人,立四哨,不爲兵者佐糗糧魚鹽,簡土吏何文奎等掌 我爲若通之,毋爲必信所誣。」苗皆悅服,乃坐必信罪。 書上,意自得,歸謁知府王一麟。 土目彭必信濟之箕斂。 然歲給白蟲舖米,每洞月八 都御史何起鳴嗣知之,捕光 苗不堪, 不問,反索土官楊光 麟縛之下 將上訴改設流官。 斗,他於 獄,檄諸

凡思 、石、偏、鎭等處俾練兵萬餘人,平時以之剿苗,大征卽統爲督臣後勁,庶苗患寧而西賊 天啓 五年,巡撫傅宗龍奏:「苗寇披猖,地方受害,乞敕偏沅撫臣移鎭偏橋,勿復回沅,

之氣亦漸奪矣。」報可。

烏羅,日平頭著可。 銅仁,元爲銅人大小江等處軍民長官司。 萬曆二十六年始改鲖仁長官司爲縣治。領長官司五:日省溪,曰提溪,曰大萬山,曰 烏羅者,本永樂時分置貴州八府之一也,所屬有朗溪長官司、答意長官 洪武初,改爲鲖仁長官司。永樂十一年置銅

司、治古長官司,而平頭著可長官司亦隸焉。

龍 苗之地不過三百餘里,乞別遣良將督諸軍殄滅。 陽諸蠻接境,恐相煽爲亂。 **瓮橋諸處,誘脅蠻賊石雞娘幷筸子坪長官吳畢郞等共爲亂,招撫不從。** 力攻剿,庶除邊患。」從之。旣降敕諭授,言「暴師久,恐蹉跌爲蠻羞,或撫或剿,殷觀成功, 力分,卒難扞禦。 所巡司以守之。」事聞,命總兵官蕭授及鎭巡諸司議。 不登等攻劫湖廣五寨及白崖諸寨,爲患滋甚。 宣德五年,烏羅知府嚴律己言:「所屬治古、答意二長官石各野等聚衆出沒銅仁、平頭 賊四出劫掠,殺淸浪衛鎭撫葉受,勢益獗。 請調官土軍分據要地,絕其糧道,且捕且撫。 授言:「殘苗吳不爾等遁入草子坪,結生苗 宜令川、湖、貴州接境諸官軍、土兵分路併 於是授築二十四堡,環其地守之。兵 七年,巡按御史以聞,且言生 緣其地與鎭溪、酉 事平之後,宜置衞

八年,授奏言:「臣受命統率諸軍進攻賊巢,破新郎等寨,前後生擒賊首吳不跳等二百

中制

列

第

百

四

黄州

土司

京師。 男婦九十八口,悉給所親。獲賊婦女幼弱一千六百餘口,以給從征將士。」幷械吳不跳等獻 凡二十餘年。 十二人,斬吳不爾、王老虎、龍安軸等五百九十餘級,皆梟以徇,餘黨悉平。 帝顧謂侍臣曰:「蠻」苗好亂,自取滅亡,然於股心,不能無惻然也。」授威服南荒,前後 還所掠軍民

著可隸鲖仁,以朗溪隸思南,從巡按御史請也。 正統三年革烏羅府,所屬治古、答意二長官司,亂後殘民無幾,亦幷革之,以烏羅、平頭 景泰七年,平頭著可長官司奏其地多爲蠻

賊侵害,乞立土城固守,從之。

執銀等處作亂,鄰洞多應之。 成化十一年,總兵官李震奏:「烏羅苗人石全州,妄稱元末明氏子孫,僭稱明王,糾衆於 因調官軍往剿,石全州已就擒,而諸苗攻劫未已。」命鎭巡官

設策撫捕,未幾**平**。

典。 者,而起都御史萬鏜往討之。 三十九年,總兵官石邦憲剿之,擒首惡龍老羅等,遂平。 命安置遼東。 嘉靖二十二年,平頭苗賊龍桑科作亂,流劫湖廣桂陽間,甚獗。 未幾,龍子賢復叛。二十六年,湖貴巡按御史奏官軍討賊不力,降旨切 明年,饄奏叛苗以次殄滅,惟龍母叟雖降,然其罪大, 帝以諸苗再叛,責激亂 宜置

年幷新化入黎平。 黎平,元潭溪地也。 。領長官司十三:日潭溪,日八舟,日洪舟泊里,日曹滴洞,日古州,日西山 洪武初,仍各長官司。永樂十一年改置黎平、新化二府。 宣德十

洞 日 湖耳,曰亮寨,曰歐陽,曰新化,曰中林驗洞,曰赤溪湳洞,曰龍里。

諸 之,金牌黄 司爲龍里衞,又增立五開衞以鎭之,隸思州。二十九年,淸水江蠻金牌黃作亂,都司發兵捕 宣慰家者,詔勿問 :洞長官皆來朝,納元所授印敕。 帝命皆仍其原官,以轄洞民,隸辰州衞。 初, 洪武三年,辰州衞指揮劉宣武率兵招降湖耳、潭溪、新化、萬平江、歐陽諸洞, (遁去。 捕獲其黨五百餘人,械至京,以其脅從,宥死,戍遠衞。 旣有言金牌黃匿 旣改龍里長官 於是

都指 矢中臂,達拔矢復戰。 | 率護 寬遂犯新化,突至平茶,千戶紀達率壯士擊之。 揮 三十年,古州 使 岡 衞 兵進討、 |齊讓爲平|| 芜將軍,統兵五萬征之。 等處洞蠻二千九百 ,城銅鼓衞。 洞蠻林寬 賊驚曰:「是平茶紀蒙邪。」遁去。 者,自號小師,聚衆作亂,攻龍里。 人以歸,遂班師 未幾,讓擒寬等, 既以讓逗遛,命楊文代之。又命楚王楨、湘 械入京,誅之。三十一年復平其餘黨,幷俘 達突陣殺數人,以鎗橫挑 蠻稱官爲蒙云。 千戶吳得、鎭撫井孚力戰死 已,復熾, 一人擲之,流 命湖 王柏 廣

明

江 統千侯、統萬侯名號,劫掠四出,命都督蕭授調兵剿之。 新溪等十一寨隸黎平赤溪湳洞長官司。 木爲屯長。 生苗遂詣軍門降。 永樂五· 年,寨長韋萬木來朝,自陳所統四十七寨,乞設官。 宣德六年改永從蠻夷長官司爲永從縣,置流官,以土官李瑛絕故也。 授諭遣之,命千戶尹勝誘執苗金蟲,斬以 正統 四年,計砂苗賊苗金蟲等糾合洪江 賊首苗總牌等為都督吳亮所戮,洪 徇 因設西山 陽洞長官司,以萬 生苗,僞立 又割思州

六十餘寨, 覃洞、上隆諸苗悉降。 〔五〕 蠻 龍 千人,能亦死。 將軍,統湖廣諸軍討之。蒙能糾賊衆三萬出攻平溪衞,瑛遣指揮鄭泰等以火鎗攻,斃賊三 里爲巢穴,攻破亮寨、銅鼓、羅圍堡諸城,都指揮汪迪爲賊所殺。 景 泰五 年,巡撫王永壽以苗賊蒙能攻圍龍里、新化、銅鼓諸城,乞調兵剿之。 而能黨李珍等尙煽惑苗衆,官軍計擒之,克復銅鼓、藕洞,連破鬼板等一百 朝議以南和伯方瑛 時賊欲取 爲平

兵李貴進牛皮箐,參將劉玉進谷種,參將李震進鬼山。 賊。[10]三年,督理軍務都御史白圭以谷種山箐,乃東苗羽翼,宜先剿。 東苗 平則諸苗服。臣會同方瑛計議,幷請師期。」於是頒諭四川、湖廣諸宣慰、宣撫會師討 諸將復合兵靑崖,攻石門山,克擺傷等三十九寨。 天順元年,鎭守太監阮讓言:「東苗爲貴州諸苗之首,負固據險,僭號稱王,逼脅他種, 仍分兵四路,進攻董農、竹蓋、甲底 所向皆捷, 克水車壩等一百四十七 因同瑛進靑崖,令總

等四百三十七寨。 賊首干把猪退守六美山。 合兵大進, 斬五千餘級, 生擒干把猪,送京師

伏誅。

潰。 賊首蒙能 添保 先 是,麻城人李添保以逋賦逃入苗中,詭稱唐後,聚衆萬餘, 僅以 子聰爲總兵官,遺之銀印敕書,縱兵剽掠,震動遠近。 身免,潛入鬼池及絞洞諸寨,復煽諸苗劫攻中林、龍里,亦爲震擒,伏 至是爲李震所 **僭稱王**,建元武烈。 敗,餘賊大 誅 署故

稱天皇· 據險不出。 良玭、陳璘合湖、貴兵進討,亦失利,國佐益橫。二十九年命巡撫江鐸會兵分七路進剿,苗 圍上黃堡。 入永從學爲生員,素桀黠,皮林諸苗推服之。因娶叛人吳大榮妾,爲黎平府所持,遂反。 萬曆二十八年,皮林逆苗吳國佐、石纂太等作亂。 上將,陽聽撫而陰與播賊通。 陳璘潛師奪隘,縱火焚其巢。 參將黃沖霄討之,敗績。 纂太亦自稱太保,殺百戶黃鐘等百餘人,與國佐合兵 殺守備張世忠,焚五開,破永從縣,圍中潮所。 國佐逃,擒之,纂太亦爲他將誘縛,皆伏誅。 國佐本洪州司特洞寨苗 ,頗知書,嘗 總兵陳 自

武 初 為普定府,十六年改爲安順州, 安順,普里部蠻所居。 元世祖置普定府,成宗時改普定路,又爲普安路,並屬雲南。 隸四川。 正統三年改屬貴州。 萬曆中改安順軍民府,

列

傅 第

百四四

貴州

土司

長官司二:日寧谷,日西堡。

以普安等州屬焉。 普安,故軍民府也,初隸雲南,尋廢爲衞。永樂間改爲州,始隸貴州,領

洪武五年,普定府女總管適爾及其弟阿甕來朝,遂命適爾爲知府,許世襲。

定、安順等州六長官赴京,命以銀二十萬備糴,遣普定侯陳桓等率諸軍駐普安屯田。 戶。 軍民府爲指揮使司。二十三年,西平侯沐英奏普安百夫長密卽叛,殺屯田官軍及驛丞試 越州叛苗阿資率衆寇普安,燒府治,大肆剽掠。 剿之,乃遁。二十六年, 衆,有子弟皆令入國學。十六年,者額遣弟阿昌及八十一砦長阿窩等來朝。二十年詔徵普 定府流官二員。十四年城普定。十五年,普定軍民知府者額來朝,賜米及衣鈔, 二十八年,成討平西堡土官阿傍。 三千餘人助惡。成皆擊斬之,其地悉平。 調指揮張泰討之於盤江木窄關,官軍失利。 普定西堡長官司阿德及諸寨長作亂, 三十一年,西堡滄浪寨長必莫者聚衆亂,阿革傍等亦糾 征南將軍傅友德擊走之,旦詣軍門降,遂改 更調指揮蔣文統烏撒、畢節、永寧三衛軍 命貴州都指揮顧成討平之。 命諭 六年設普 明年, 其部

闊 四年,慈長謀占營長地,且强娶民人妻爲妾,殺其夫,閹其子。 民稠,輸糧三千餘石,乞仍前職報効。」命仍予安撫。 永樂元年,故普安安撫者昌之子慈長言:「建文時父任是職,宜襲,吏部罷之。本境地 十三年改普安安撫司爲普安州。十 事聞,命布政司孟驥按狀。

長糾兵萬餘圍臟,驥以計擒之,逮至京,死於 獄

石崖,復斬級七百餘,焚其 ,幷貴州宣慰安隴富兵二萬進剿。至阿果,擒賊首楚得隆等,斬首二百餘級。 天順四年, 下巡撫究治,命各貢馬贖罪。 西堡蠻賊聚衆焚劫,鎮守貴州內官鄭忠、右副總兵李貴請調川雲都司官兵 巢而還。 十年,安順土知州張承祖與所屬寧谷寨長官顧鐘 餘 賊 奔泊

仇

防守。 被出 等責安民獻魯,民陰資魯兵五百襲殺適鳥及其二子,據別寨殺掠,又自請襲爲女土官。鎭巡 雲南有警,乞改調沅州、淸浪 諸土兵萬三千人分道進,責安民殺賊自贖。 日適烏,生二子,別居南安。米魯欲並殺之,築寨圍其城。 禮與阿保同烝之。 時 ,居其父家。 弘治十一年,普安州土判官隆暢妻米魯反。日日米魯者, 成化十四年,貴州總兵吳經奏, 名所居寨曰承天,自號無敵天王,出入建黃纛,官兵不能制,鎭巡以聞。發十衞及 東寧伯焦俊爲總兵官,與巡撫錢鉞和解之。 暢老,前妻子 暢聞怒, 立殺禮, 燬阿保寨。 諸軍應援。 禮襲,父子不相能。 西堡獅子孔洞等苗作亂, 十五年,經奏已擒斬賊首 民乃攻斬阿保父子於查刺寨,米魯亡走。 魯於道 米魯與營長阿保通 阿保挾魯與其子阿鮓等攻暢,暢走 中毒暢死,遂與保據寨反。 又別築三寨於普安,而令阿鮓等 霑益州 先調雲南軍 阿屯、堅婁等, 土知 ,因令阿保諷 州安民 八千 助防守。 女也,適 以捷聞 暢妾 禮 雲 迎 暢 聞

列

都指揮李政進剿,破二十餘寨。魯竄馬尾籠,官兵圍之,就擒,伏誅。 熾,官兵敗於阿馬坡,都指揮吳遠被擄,普安幾陷。帝命南京戶部尚書王軾、江三巡撫陳金、 官皆受魯賂,請宥魯。嚴旨切責,必得魯乃已。貴州副使劉福陰索賂於魯,故緩師。 安民自辨,得赦。 賊益 正

縊,其子廷玉請免賦,不允。 也呂死,指揮楊仁撫其衆。 西堡阿得、獅子孔阿江二種,皆革僚也。 巡撫蕭翀請令其輸賦,免用兵,從之。 往徵,爲其寨長也呂等所殺。六年,廷玉弟廷瑞訴於守臣,會 初據滄浪六寨,不供常賦。 土官溫愷懼罪自

德元年,暢族婦適擦襲土判官,赴京朝貢,帝嘉之。 或曰適擦亦暢妾云。

永樂十一年改隸貴州。日司弘治七年置府,領州二,曰麻哈,曰獨山,即合江洲陳蒙爛土長官 日平州六洞,江巴屬獨山者曰九名九姓,曰豐寧,屬麻哈者曰樂平,曰平定。 司 '地。領縣一,曰淸平,卽淸平長官司地也。領長官司八:屬府者曰都勻,曰平浪,曰邦水, 都勻, 元日都雲。 洪武十九年置都勻安撫司。 二十九年改爲軍民指揮使司,屬四川。

降寨洞一百五十二處。二十三年城都勻衞,命指揮同知董庸守之。二十五年,九名九姓蠻 洪武二十二年,都督何福奏討都匀叛苗,斬四千七百餘級,擒獲六千三百九十餘人,收

亂,命何福平之。二十八年,豐寧三藍等寨亂,命顧成平之。二十九年,平浪蠻殺土官王應 名,都指揮程暹平之。 應名妻吳攜九歲子阿童來訴,詔予襲。 永樂四年,鎭遠侯顧成招諭

合江

州十五寨來歸。

敵。 七 韋萬良等恣殺掠。指揮陳原討擒萬良等三人,翁同遂聽撫,而落昌、蔡郞等四十寨仍聚衆拒 同等煽亂,乞立堡,幷請調泗城州土兵一千鎭守,從之。 年,陳蒙爛土副長官張勉奏,所司去衞遠,地連古州生苗,與廣西僚洞近,化從寨長韋翁 總兵蕭授遣指揮顧勇進討,平之。 宣德元年,平浪賊紀那、阿魯等占副長官地, 殺掠葉果諸寨,招諭 九年,翁同 糾下高 不聽。 太刀蠻合廣 詔蕭授平之。 西賊

六年 寧。 相 輝 寒設 謝杲言「自天順 平夭 機剿撫。 成化 時輝已致仕,子愛承 一司 鏞復奏齎果糾合九姓、豐寧幷荔波賊萬人,攻剽愈亟。 壩 + ,隸安寧宣撫。」 干後,即 四年,陳蒙爛土長官司張鏞 二十年,爛土苗賊龍洛道潛號稱王,聲言犯都勻、淸平諸衞。 四年以來,諸苗攻劫舟溪等處,不靖至今。」乃命鎭守太監張成、 灣溪立安寧宣撫 襲,力弗支,求 而豐寧長官司 司。 楊 援於川、貴二鎭。 爛土諸苗惡其逼己, 奏:「天壩干賊首齎果侵掠,請於所侵大陳、 泰亦奏峰峒陸光翁等聚爛土 各奏聞,命仍起輝,會兵討之。 至是果等旣攻陷天漂, 帝責諸守臣玩寇。 一爲亂。 豐寧長官楊泰與 先是,宣慰楊 總兵吳經 於是巡 大步等 逐圍 豐 漁

列

土目楊和 有隙、誘廣西泗城州農民九千於銕坑等一百餘寨殺掠、於是苗息愈盛。

之。 得出。 寨,以捷聞。 七年,諸軍分道進剿,令熟苗詐降於賊,誘令入寇,伏兵擒之,直擣其巢,凡破一百十餘 弘治二年,苗賊七千人攻圍楊安堡,都指揮劉英統兵覘之,爲所困。命鎭巡官往援,乃 五年命鎭遠侯顧溥率官兵八萬人,巡撫鄧廷瓚提督軍務,口三太監江德監諸軍,往征 於是開置都勻府及獨山、麻哈二州。

功爲長官,陣亡。 正德三年,都勻長官司吳欽與其族吳敏爭襲仇殺,鎭巡以聞,言:「欽之祖賴洪武間立 子踪幼,弟貴署之。及踪長,仍襲,傳至歐三世。 敏不得以貴故妄爭。」詔

可之。

級,降苗寨一百五十餘,男婦二萬餘口。 之三月不克,復調宣慰安萬銓兵合剿。萬銓力戰破賊,聰等皆伏誅,前後斬首二百六十餘 佑 推 黨,以地屬都勻府,改名滅苗鎭。 仲武先人所奪,至阿向,與仲武爭印煽亂。 阿向餘擊王聰、王佑爲主。巡按楊春芳遣李佑等撫諭之,賊質佑等,乞還土田官印,乃釋 春芳以聞,詔巡撫調官軍三萬人集聖下。 嘉靖十五年,平浪叛苗王聰攻奪凱口座,執參將李佑等。初,王阿向先世爲土官,爲王 仲武因諸苗失業,陰爲招復,旋科索之。 捷聞,敍功賞賚有差。 總兵楊仁、巡撫陳克宅平之,斬阿向等,盡逐 **聖故絕險,其要害處置弩樓,疊石爲防。** 諸苗一 不勝怨, 其 攻 遂

笙,唱蠻歌 史遣 編氓,名其地曰 部,何故欲屬平定,必有他謀。 亦以格 天金貴等導之。 指 叉 有黑苗曰天漂者,在湖、貴、川、廣界,與者亞鼎足居。 於者亞不得通,都御史王緝遣使責者亞部長阿斗。 揮郭懷恩及長官金篆往問狀,而阻於者亞,乃遠從丹彰間道通天漂。會苗坪、黨銀 ,呼導而馳。 歸化,隸都勻府。 遂治金貴罪,以者亞仍屬養善,路遂通。 事閒,帝嘉之。七年,者亞、阿斗以反誅,乃罷樂平吏目,增設麻哈州 下吏按驗,果得實,蓋欲往 凡使命往來,自生齒以上,悉跪拜迎送,夾騶從行,前吹蘆 平定借諸蒙兵襲養善,皆內 斗願歸附平定,緝謂斗故養善牌 於是苗坪、天漂皆請奉貢賦,比 萬曆六年,夭漂請內附。 地 都御 奸

多皆降 暮 亞 阿 不敢近。 令勿通 一殘苗 撤兵去矣。 其叵測禍及己,請以答干、雞賈、甲多諸寨屬蒙詔,立宣威營,歲輸賦。 初,者亞、阿斗反,答干寨阿其應之。 圍宣威營大課,曰:「此我 獨山 居常 土 張傘鼓角,繪龍鳳器,遂與雞賈、甲多、仰枯諸苗擊牛酒爲誓,劫歸化,官兵 阿其乃親馳樂邦牛場詢視,言人人同,遂弛備。 東蒙天眷願以兵進剿,乃使人佯言,漢已黜蒙詔,令以宣威營地還阿其,旦 地,誰令爾營此。」蒙詔常徵秋稅,阿其度使至,以 斗誅,阿其屢犯順。 十四四 天眷驟入,斬阿其,雞賈、甲 年,土舍吳楠、王國 獨 阿其 不服 血釁門, 。 引 聘慮 者

州判一員,令居樂平司,以養鵝、者亞

、羊腸諸苗屬之。

之也。 寨事,年老,子俸襲,頒糧者遂不及恰,恰輒奪俸 計擒之,死獄中。 旣而都司蔡兆吉招諭令降,待以不死,於是諸苗皆散,俸視 恰輒鎖漢使,已而逐之曰:「速去,此我家事,再來我當以烏雞諸寨踐漢邊矣。」官以 蒙 詔 者 ,自答干、雞賈、甲多外,有塘蛙、當井、斗坡等十七寨。 無何,龍化龍羊山苗引川苗作亂,曰:「漢無故殺苗,苗請報之。」官軍戰不 之有以爲養。 俸訴於官, 事如故。 小橋 官逮問恰, 熟苗龍木恰視 非罪

諭 雄敗走,屠其家。各上疏訐奏,詔推問。都御史趙武以雄不法,逮之獄,檄獨山土酋蒙繼武 復據平州。 珂,復平州,珂走<u>廣西之泗城。</u> 安,而疏珂。阿怨雄,雄乃奪珂財產,幷其父逐之。珂頗得民心,遂爲亂,據唐宿連,攻雄。 珂歸命, 四十三年,平州長官楊進雄兇惡,土人苦之。雄無子,以兄繼祿子珂爲後,旣生子治 許改土爲流以安之。治安計不便,乃陰許以六洞賂繼武借兵。繼武 巡撫吳岳招降其父繼祿,六洞乃安。 繼武遂屯耕六洞地,六洞民不服,復助珂,與繼武相攻。 、乃發兵攻 珂

四川。 平越,古黎峨里。 萬曆中, 始置府,屬貴州。 元爲平月長官 領州一 司。 ,日黃平,卽黃平安撫司 洪武 十四四 年置衞。 十七年改為軍民指揮 地。 領縣四三三三日平越, 使司,屬

日 湄潭,曰甕安,卽甕水、草塘二長官司地, 日餘慶,卽白泥、餘慶二長官司地。 領長官司

一,日揚義。口也

傅友德平之。 二十三年命延安侯唐勝宗往黃平、平越、鎭遠、貴州諸處訓練軍士,提督屯 平越安撫司乞兵援,命指 田,相機剿寇 作亂,命傅友德平之。 戶所以兵討之,亦敗。 洪武八年,貴州江力、江松、剌回四十餘寨苗把具、播共桶等連結苗、僚二千作亂, 時麻哈長官宋成陣歿,命其子襲。 乃命重慶諸衞合擊,大破之,平其地。 揮同知胡汝討之。九年,黃平蠻僚都麻堰亂,宣撫司捕之,不克,千 二十二年,察隴 十九年,平越衞麻哈苗楊孟等 、牛場 、乾溪苗亂,

保定伯 督陳友 自沅州 乃解。 水等二百餘寨,合兵香 糧 盡,官兵逃者九千餘人,貴州東路閉。 正統末,鎭遠蠻苗金臺爲稱順天王,與播州苗相煽亂,遂圍平越、新添等衞。 發兵 由 二年,都御史王來奏,貴州苗韋同烈聚衆於興隆之截洞,復攻平越 梁珤佩平蠻將軍印 萬潮山,都督毛福壽由重安江,攻破黎樹、翁滿等三百餘寨,斬三千餘級,招撫滾 由 東路,都督方瑛由 1鑪山 督師 下。 進剿,大破之,平八十餘寨,擒賊首王阿同等, 西路,合兵興隆,擊破之,同烈退保香鑪山。 衆縛同烈降,械至京。 時王驥征麓川 了班師 過其 地,不之顧。 、清平等衞。 瑛 平越 景 由 半 泰 龍場,都 諸 车 元 梁琉 年 城 衞 圍 中

於淸平、平越

地方,殺指揮王杷,據香鑪山

掠偏橋

應,乞加兵。 五. 年 副 七年,巡撫蔣琳奏,剿苗賊於平越, 總兵李貴奏,黎從等寨賊首阿挐、王阿傍、苗金虎等偽號苗 斬四百餘級。 其阿傍等據車椀寨, 王,與銅鼓諸 仍爲亂 賊相

師龍頭、黎、蘭等寨,悉破之,賊遂平。 鄒文盛、總兵官李昂等分漢、土兵爲五,克其前栅。 十里,高數百尋,四面陡絕,其上平衍,向爲叛苗巢穴。 加 上,焚賊巢,擒阿傍,餘賊猶堅守不下。 正德十一 年命巡撫秦金剿之。 初,黔、楚之交,羣苗嘯聚,連寨相望。 參將洛忠等詭言招撫,自山後擊之,殲焉。 密遣人援崖先登,殺賊守路者,衆蟻附 阿傍等據之,糾諸寨苗作亂。 而香鑪山周 廻四 逐移 巡撫

是不敢再窺鑪山,四衞得安。 督將領攻破巖頭,分遣朗溪司田景祥截平茶賊援。 四 衛,梗塞糧運。總督楊述中檄總兵魯欽馳至淸平,相機進剿,調副使顏欲章等爲後援。 天啓四年, 凱里土司楊世慰叛, 江公合安邦彦兵與平茶羣苗來修怨, 復窺香鑪山, 用藥弩及礮殺傷賊衆,賊乘夜遠遁。 搖動 欽

石阡,本思州地。 |永樂十一年置府,隸貴州, 領長官司四: 日石阡, 日苗民, 日葛彰葛

改龍泉坪爲縣。 險僻,無所支用,恐歲久腐爛, 商,日龍泉坪。 宣德六年,葛彰葛商長官安民奏:「前以官鈔糴糧儲備, 賠納實難,請以充有司祭祀過使廪給之用。」從之。 **令蠻民守視。** 萬曆中, 溪洞

小平伐,日把平寨,日丹平,日丹行。 置長官司。二十三年改爲衞。二十九年置漸添衞軍民指揮使司,領長官司五:曰漸添,曰 新添衛,故麥新地也。 朱時克麥新地,乃改爲新添。元置新添萬蠻安撫司。 洪武四年

的敖,大破之,擒的令、的若而還,蠻大響。 年,平伐、谷霞、谷浪等苗攻劫的敖諸寨,指揮僉事張岱討之。。岱攻谷峽、刺向關破之,追至 洪武五年春,新添安撫宋亦憐眞子仁來朝。其秋,平伐、蘆山、山木等砦長來降。七

西廬者,官軍破之以聞。 劫。時苗民素憚指揮李政,尚書王驥因奏遣政往撫諭。景泰二年,苗賊有在新添行劫,聚於 九年,丹行土舍羅朝煽誘寨長卜長、逃民羅阿記等侵占臥龍番長官龍保地, 永樂二年置丹行、丹平二長官。 成化九年,以旱災免新添衛糧 宣德元年,新添土舍宋志道糾洞蠻肆掠,蕭授討擒之。 又攻猱平寨焚

剽掠 硍 月復克其六等,諸苗盡平。 師,皆九十餘日而克。二寇旣平,專命總兵陳璘率漢、土兵五千移營新添,進攻東路苗,不一 以土兵五千, 降 山 無虚 .男婦甚衆。 介於銅仁、思、石者,日山苗、紅苗之羽翼也、窺黔自平播後財力殫竭,有輕漢 曆三十四 日。 攻水硍山。 子章奏討之,命相機進兵。子章乃命總兵陳璘、參政洪澄源率官軍五千,益 先是,東西二路苗名曰仲家者,盤踞貴龍、平新之間,爲諸苗渠帥。 年,貴州 巡撫郭子章討平貴州苗,斬獲苗長吳老喬、阿倫、阿皆等十二人, 監軍布政趙健率宣慰土兵萬人,使遊擊劉岳等督之。 及兩路會 心,經年 其在水

功。」 而已。 六品,隸四川行省,以密定爲長官,世襲。 八年,密定遣弟保珠來貢。 陞金筑長官司爲安撫 金筑安撫 爾密定首獻馬五百匹,以助征討,其誠可嘉, 司 ,洪武 四年,故元安撫密定來朝貢馬,詔賜文綺三匹,置金筑 司,仍以密定爲安撫使,予世襲。 二十九年以金筑安撫司 十四年敕勞密定曰:「西南諸部雖歸附,然暫 隸貴州軍 故遺特使往諭, 十六年, 民指 揮 使司 密定遣 俟班 師 使貢 之日 長官司 (方物。 重勞爾 |入貢

州布政司。 永樂初年,金筑安撫得垛來 IE 統五年,安撫金鏞 貢馬。 朝,賜絨錦文綺。 成化、弘治、隆慶時歷朝貢。 洪熙、宣德 改元, 皆貢馬。 十年,直隸貴

定州名,鑄給印信,改州判爲流官。 萬曆四十年,吏部覆巡撫胡桂芳奏:「金筑安撫土舍金大章乞改土爲流, 授大章土知州, 予四品服色,不許管事。 設官建治, 子孫承襲,隸 欽

校勘記

州於貴陽府。」遂改金筑安撫司爲廣順州。

- 領長官司十八 本書卷四六地理志稱,貴陽軍民府領長官司十六,未載貴竹、平伐。
- 其貴州宣慰司所領長官司九 本書卷四六地理志稱貴州宣慰司領長官司七,無靑山、劄佐。
- 且願効力開西鄙 西鄙,原作「四鄙」,據明史稿傳一九〇貴陽傳改
- **Z**9 自稱羅甸王時天啓二年二月也 羅甸王,原作「羅殿王」,據本書卷二四九李橒傳、 明史稿傳
- 九〇貴陽傳改。 二年,原作「元年」,據本書卷二二熹宗紀、 又李橒傅及熹宗實錄卷一四天啓二

年二月癸酉條改。

- \neg ፺. 巡撫李橒方受代 李橒,原作「李澐」,據本書卷二四九李橒傳改。 下同
- 者干 城中軍民男婦四十萬至是餓死幾盡僅 餘人」、熹宗實錄卷二四天啓二年十二月已已條作城中「無慮數萬 除二百人 本書卷二四 九李橒傅作 人。 城城 中戶 十萬」
- 摩泥 原作「霑泥」,據本書卷二四九朱變元傳及熹宗實錄卷七四天啓六年十二月戊午條改。

列傳第二百四 校勘記

時土官何碖父子罪死 何碖,原作「何倫」, 據本書卷一八五黃珂傳及孝宗實錄卷一二七弘治

十年七月己未條改。

へ た し 覃洞上隆諸苗悉降 上隆,原作「上陸」,據本書卷一六六方瑛傳、明會典卷一六、讀史方輿紀

要卷一一一改。

於是頒諭四川湖廣諸宣慰宣撫會師討賊 上文係「天順元年」,英宗實錄卷二九三繫此事於天

順二年七月己亥。

弘治十一年普安州

土判官隆暢妻米魯反

本書卷一五譯宗紀繫於十二年九月壬午,

孝宗實錄

卷一五 繫於弘治十二年六月癸卯。

帝命南京戶部

尚書王軾

戶部,原作「兵部」,據本書卷十五孝宗紀、

又卷一七二王軾傳及孝宗

實 錄

卷 七六弘治十四年七月癸亥條改。

永樂十 寰宇通志 卷一 年改隸貴州 一五作洪武「二十三年」,讀史方輿紀要卷一二一 永樂十一年, 本書卷四六地理志及明一統志卷八八作 作「永樂七年」。 「永樂十七年」,

平州六洞 平州,本書卷四六地理志作「平洲」。

至 巡撫 鄧廷瓚提督軍 務 鄧廷瓚, 原作「鄧廷讚」,據本書卷一七二鄧廷瓚傳及孝宗實錄卷六四

弘治五年六月庚子條改。

記

(二六) 領縣四 本書卷四六地理志稱領縣三,無平越。

[1+] 領長官司一日揚義 本書卷四六地理志稱平越領長官司二,日凱里, 日楊義。此作「領長官司

一」,無凱里,又楊義作「揚義」。按下文平越所屬有凱里,此誤奪,地理志是。又據讀史方輿紀要

卷一二一楊義爲土酋楊氏世守地,字以作「楊」爲是。

(14) 凱里土司楊世慰叛 楊世慰,本書卷一七〇魯欽傳作「楊世蔚」。

明史卷三百十七

列傳第二百五

廣西土司

繁,莫可枚舉。蠻勢之衆,與濕爲埓。今就其尤著者列於篇。 以覘中國之德威,知夷情之順逆,爲籌邊者之一助云。 散布於桂林、柳州、慶遠、平樂諸郡縣者,所在蔓衍。而田州、泗城之屬,尤稱强悍。種類滋 廣西瑤、僮居多,盤萬嶺之中,當三江之險,六十三山倚爲巢穴,三十六源踞其腹心,其 觀其叛服不常,沿革殊致,可

廣西土司一

桂林 柳州 慶遠 平樂 梧州 潯州 南寧

|桂林,自秦置郡,漢始安,唐桂州,天寶改建陵,宋靜江府,元靜江路。 明初,改桂林府

克,卒不能草薙而獸獮之,設防置戍,世世爲患,是亦不得而略焉。 官,而無地無路、僮。 爲廣西布政使司治所,屬內地,不當列於土司。 桂林之古田,平樂之府江,潯州之藤峽,梧州之岑溪,皆煩大征而後 然廣西惟桂林與平樂、潯州、 梧州未設土

縣平川 詔寶 林府千戶所,命廣西都指揮同知陶瑾領兵築城守之。 去,置灌陽守禦千戶所。 觀遣千戶廖春等討之,擒殺大孝等二百餘人。 年,未盡殄滅,宜以桂林等衞贏餘軍士,置千戶所鎭之。」詔從其請。 年,富川縣逃吏首賜糾合苗賊盤大孝等爲亂,殺知縣徐元善等,往來劫掠。 慶衞指揮孫宗總兵討平之。 |洪武七年,永、道、|桂陽諸州蠻竊發,命金吾右衞指揮同知陸齡率兵討平之。 二十二 諸源瑤民,聚衆爲亂。 初,灌陽縣隸湖廣,因廣西平川等三十六源瑤賊作亂, 命湖廣、廣西二都司發兵討之,擒殺千四百餘人,諸瑤奔竄遁 縣丞李原慶因奏灌陽去湖廣遠,隸廣西近,遂以灌陽隸桂 觀因言:「靈亭鄉乃瑤蠻出入 二十七年,全州灌陽等 廣西都指揮韓 地, 攻擊縣治, 雖征 剿 有

性無常,讐殺不絕。朝廷每命臣同巡按御史三司官理斷,緣諸處皆瘴鄕,兼有蠱毒,三年之 復業者善撫恤之。 追剿,斬獲頗 永樂二年,總兵韓觀奏:「潯、桂、柳三郡蠻寇黃田等累行劫掠,殺擄人畜。 已調都指揮 多。尋蒙遣官齎敕撫安,其黃田等瑤皆已向化,悉歸所擄人畜。」帝命觀, 宣德六年,都督山雲奏:「廣西左、右兩江設土官衙門大小四十九處,蠻

間,遣官往彼,死者凡十七人,事竟不完。 今同衆議,凡土官衙門軍務重事,徑詣其處。 其

餘爭論詞訟,就所近衞理之。」報可。

景泰 五. 年,廣西古丁等洞賊首藍伽、韋萬山等,糾合蠻類,劫掠南寧、上林、武緣諸處。

鎭守副總兵陳旺以聞,詔令總督馬昂等剿捕之。

林劫布政司庫,殺署事參政黎民夷,縋城而去,官軍追不及。久之,臨桂、永福各縣兵羣起 捕賊,始得賊黨扶嫩、土婆顯等三十餘人於各山寨中。 請降。久之,復猖獗,嘗挾其五子據鳳皇、連水二寨,襲殺昭平知縣魏文端。更自永福入桂 四十五年,提督吳桂芳因其閒,遣典史廖元入上六里撫諭之,諸僮復業者二千人,銀豹勢孤 猛 初 縣官竄會城,遣典史入縣撫諭,烹食之。弘治間,大征,殺副總兵馬俊、參議馬鉉。〇一正德 攻陷洛容縣,據古田,分其地爲上、下六里。銀豹出掠,挾下六里人行,而上六里不與焉。 ·再征,殺通判、知縣、指揮等官。 嘉靖初,又征之,殺指揮舒松等。 時韋銀豹與其從父朝 初 桂林、古田僮種甚繁,最强者曰韋,曰閉,曰白,而皆幷於韋。賊首韋朝威據古田,

圖古田 正茂至,奏請剿賊,合土漢兵十萬,集衆議。 時首惡未獲,隆慶三年,朝議以廣西專設巡撫,推江西按察使殷正茂爲僉都御史以往。 之語。 正茂獨不謂然,先給榜諭八寨,八寨聽命。 時八寨助逆,衆議先剿,敕書亦有先平八寨,徐 然後分兵七哨,以總兵兪大猷統

列

大征河池、咘咳諸瑶,斬首四萬八百餘級,嶺表悉平。 參將王瑞進剿,斬廖金鑑、廖金盞、韋銀花、韋狼化等。 民膽伏兵執狼要,諸瑤大訌。 相仇殺,常安巡檢欲窮治之。 長官及土舍,聽守禦調度。更陞古田縣爲永寧州。 其子扶枝膠送京師,斬之。 生擒朝猛,梟於軍,俘獲男女千餘口。 之,使副總兵門崇文,參將王世科、黃應甲,都司董龍、魯國賢,遊擊丁山等各領一哨,復分 土兵爲二隊,更番淸道,必先淸數里而後行。 古田平。 總制殷正茂、巡撫郭應聘乃檄徵田州、向武、都康諸士兵,屬 狼要遂與右江荔浦山灣諸僮稱亂。 乃幷八寨與龍哈、咘咳爲十寨,立長官司,以黃昌等爲 銀豹窮蹙,擇肖己者斬首獻,捷聞。 及至其巢,合營攻之,斬七千四百六十餘級, 已而永寧僮韋狼要與其黨黃銀成有隙, 萬曆六年,總制凌雲翼、巡撫吳文華 命指揮徐民瞻將兵捕之, 既而生縛銀豹幷

土官 ,而賓、像、融、羅諸<u>瑤蠻蟠結爲寇,城外五里卽賊巢,軍民至無地可田。</u> 柳州置自唐貞觀中,明初移治于馬平。 所屬州二,縣十。 內屬千餘年,惟上林縣尙爲 後屢加征

置土巡檢於各峒隘,稍稱寧焉。

|洪武二年,中書省臣言:「廣西諸峒雖平,宜遷其人入內地,可無邊患。」 帝曰:「溪洞蠻

憭雜處,其人不知禮義,順之則服,逆之則變,未可輕動。 惟以兵分守要害以鎭服之,俾日

漸教化,數年後,可爲良民,何必遷也。」

谷,與之相結。 西參政耿文彬率民兵會桂林衞指揮平之。柳州等府上林等縣僮民梁公竦等六千戶,男女 兵僮二百人,今皆爲民,請收集爲軍。 州瑶民作亂,官軍討平之。十七年,象州土吏覃仁用言,其父景安,故元時常任本州巡檢,有 州遷江縣、象州武仙縣古逢等洞蠻僚作亂。 於寨。 三萬三千餘口,及羅城縣土會韋公、成乾等三百餘戶復業。 永樂七年,柳州道村寨蠻韋布黨等作亂,都指揮周誼率兵討擒之。 廣西洞蠻韋父、融州羅城洞蠻潘父蕊各聚衆爲亂, 事聞,遣御史王煜等招撫復業,至是俱至,仍隸籍爲民。 帝不許。 韶發柳州、南寧、桂林等衞兵討之。十四年 十九年,融縣蠻賊五百餘人,羣聚剽掠,廣 柳州等衛官軍捕斬之。 初,韋公等倡亂,懂民多亡入山 命斬布黨, 九年,實 梟其首 融

官顧 首韋敬曉等 千數,豈無脅從非辜者。 興祖等督兵分道攻之,斬公旺幷其黨千五十餘人。 宣德初,蠻寇覃公旺作亂,據思恩縣大、小富龍三十餘峒, 歸附。 二年,廣西三司奏「柳慶等府賊首韋萬黃、韋朝傳等聚衆劫殺爲民害。」 以後宜開示恩信,撫慰而降之,如賈琮戍交州 捷至, 固守險阻 帝曰:「蠻民亦朕 可也。」元年,柳 , 以拒官 赤子, 軍。 州僮 殺至 總兵

敕

興祖進兵

剿平

之。

寨,斬賊首樂才富、吳金田等,前後捕斬凡三千餘,俘獲男婦及牛馬無算。事聞,議設兵防, 總制殷正茂請於朝,遣總兵官李錫、參將王世科統兵進討。官兵至板江,瑤賊皆據險死守。 知 改萬石、宜良、丹陽爲土巡司,屯土兵五百人,且耕且守。 正茂知諸瑤獨畏永順鉤刀手及狼兵,乃檄三道兵數萬人擊太平、河裏諸村,大破之,連拔數 縣馬希武 爲 、欲乘間築城,召諸瑤役之,許犒不與。諸瑤遂合繩坡頭、板江諸峒,殺官吏反 柳 州 屬邑,在右江上游,旁近靖綏、黎平,諸瑤竊據久。 隆慶時,大征古田 「懷遠

料復引兵擊之,斬五十餘人。 城於白龍巖,不果,至是謝漳遂及於難 兵李錫,參將王瑞、自康仁等剿之,破上油、古底諸寨,斬覃金狼等二千八百三十餘級,俘 巡檢韋顯忠共提兵決戰,斬首三十一級,兵校文斌獲朝義,奪還縣印,守巡官以聞。乃命總 蠻韋朝義率上油、古底諸僮夜半出掠,逐漳,追至城,殺漳,奪縣印去。是夜,指揮朱昌胤、土 二百二十餘人,牛馬器械稱是。 萬曆元年,洛容知縣邵廷臣以養歸,主簿謝漳行縣事。 始洛容在萬山中,城小無雉堞,縣官皆寓府城,知縣余涵請遷 後殘僮黃朝貴復合融縣瑤號萬人,聲言欲入富福鎭。 會上元夜,單騎巡檄山中。 王世 僮

堡兵如仇,常率東歐、大產諸蠻要挾營堡。兵備周浩使千總往撫,遂殺千總,劫村落,總兵王 又韋王朋者,馬平僮也。 初平馬平時,因建營堡,使土舍韋志隆提兵屯其地。 王朋視

南道,乾符中,更宜州。 慶遠,秦象郡,漢交阯、日南二郡界,後淪於蠻。唐始置粤州,天寶初,改龍水郡,屬嶺 宋陞慶遠軍節度,咸淳初,改慶遠府。元爲慶元路。

遠南丹軍民安撫司,置安撫使、同知、副使、經歷、知事各一員,以天護爲同知,王毅爲副 來款附,宜如宋、元制,錄用以統其民,則蠻情易服,守兵可減。」帝從之,詔改慶遠府爲慶 溪洞,所轄南丹、宜山等處,宋、元皆用其土酋安撫使統之。天兵下廣西,安撫使莫天護首 洪武元年仍改慶遠府。 時征南將軍楊文旣平廣西,二年,行省臣言:「慶遠府地接八番

使。

以貌知縣事 以胎 西土官莫金文綺六匹,置南丹州,隸慶遠府, 族。 天護素庸弱、宗族强者、動肆跋扈、至殺河池縣丞蓋讓、 禍將來。 三年,行省臣言:「慶遠故府也, 乞罷安撫司,仍設府置衞,以守其地。」報可。 **今爲安撫司,其地皆深山曠野,其民皆安撫莫天護之** 以莫金爲知州。 與諸蠻相煽爲亂, 乃命莫天護赴 八年,那地縣土官羅貌來朝, 京。 此豈可姑息 七年,賜廣

以官軍守之。 兵擊巴蘭等寨,蠻僚懼,焚寨遁去,官兵追捕斬之,蠻地悉定。 軍進征奉議,調參將劉眞分道攻南丹,破之,執莫金併俘其衆。 帝命征南將軍楊文,龍州平後,移師討南丹、奉議等處。 龍州趙宗壽來朝謝罪,貢方物。 大 趙成秀、韋公旺等,傳首京師。 一十八年,都指揮韓觀率兵捕獲宜山等縣蠻寇二千八百餘人,斬僞大王韋召,僞萬戶 時嶺南盛暑,官軍多病瘴,帝命觀班師。 韶置南丹、奉議、慶遠三衛, 後遣寶慶衞指揮孫宗等分 南丹土官莫金叛,

軍士。 得故宋銅印一來上。 司所徵,不足以給。」帝命俱置屯田,給耕種。尋遣中使至桂林等府市牛給南丹、奉議諸衞 二十九年,廣西布政司言:「新設南丹等三衞及富川千戶所,歲用軍餉二十餘萬石,有 都指揮姜旺、童勝率兵抵思恩縣鎭寧等村洞,殺獲叛蠻三千餘人,降一千一百餘戶,

撫。」乃命右軍都督府移文都督韓觀遣人撫諭,其願爲民者,量給賜資,復其徭役三年。 人民安業,惟八十二洞路民未隸編籍。今聞朝廷加恩撫綏,咸願爲民,無由自達,乞遣使招 朱輝親往撫諭, 公宣等相率歸附, 凡千三十五戶。 荔波縣民覃眞保上言:「縣自洪武至今, 宣德五年,總兵官山雲討慶遠蠻寇,斬首七千四百,平之。九年,雲奏:「思恩縣蠻賊覃 永樂二年,慶遠府言:「忻城、宜山二縣洞蠻陳公宣等出沒爲寇, 請剿捕。」 帝命都指揮

捕餘 廣東 公砦等累年作亂,今委都指揮彭義等率兵剿捕,斬賊首梁公成、潘通天等梟之,仍督官軍搜 都 黨。」 司 調 帝賜敕慰勞。 附近衞所精銳士卒千五百人,委都指揮一員,赴廣西,聽雲調用。 又奏:「慶遠、鬱林等州縣蠻寇出沒,必宜剿除,而兵力不足。」 十年,南丹土 帝命

官莫禎

來朝

· 貢馬,賜綵幣。

使聽 遁。 个莫禎所奏,

意甚可嘉,

彼果能効力,

省我邊費,

朝廷豈惜一 不除,地方不靖,乞究臣誑罔之罪。」帝覽其奏,卽敕總兵官柳溥曰:「以蠻攻蠻,古有成說。 各村寨皆置社學,使漸風化。 州土官知府, 險爲惡者,不能鈐制其出沒。 縣,流官所治,溪峒諸蠻,不時出沒。原其所自,皆因流官能撫字附近良民,而溪峒諸蠻恃 調 及聞招撫,詐爲向順,仍肆劫掠,是以兵連禍結無寧歲。臣竊不忍良民受害,願授臣本 正統四年,莫禎奏:「本府所轄康蘭等三州,土官所治,歷年以來,地方寧靖。 用。 據巖險者,拘集平地,使無所恃。 流官總理府事,而臣專備蠻賊,務擒捕殄絕積年爲害者。 每調軍剿捕,各縣居民與諸蠻結納者,又先漏洩軍情,致賊潛 三五十里設一堡,使土兵守備,凡有寇亂,卽 擇有名望者立為頭目,加意撫恤, 官,爾其酌之。」 其餘則編伍造册, 率 衆 剿殺 督勵 宜山等六 生理。 如賊

調,全倚土兵。 弘治 九年,總督鄧廷瓚言:「廣西瑤、僮數多,土民數少, 乞令東蘭土知州韋祖鋐子一人,領土兵數千於古田、蘭麻等處撥田耕守,候 兼各衞軍士十亡八九, 凡有征

列

遠府天河縣舊十八里,後漸爲僮賊所據,止餘殘民八里,請分設一長官司治之。」部議增設 平古田,改設長官司以授之。」廷議以古田密邇省治,其間土地多良民世業,若以祖鋐子爲 官知縣掌縣事,亦從延瓚奏也。 永安長官司,授土人韋萬妙等爲正、副長官,幷流官吏目一員。是年,裁忻城縣流官,留土 土官,恐數年之後,良民田稅皆非我有。欲設長官司,祗宜於土民中選補。延費又言:「

十二年,韋祖鋐率兵五千助思恩岑濬攻田州,殺掠男女八百餘人,驅之溺水死者無算。

副總兵歐磐詣田州,兵乃解。

嘉靖二十七年,那地州土官羅廷鳳聽調有勞,命襲替,免赴京。四十二年錄平瑤功,授

東蘭州、那地州土官職。

土官。又長官司二,日永安,永順。 🗐 慶遠領州四。河池,弘治中以縣陞州,改流官。 其東蘭、那地、南丹皆土官。縣五,忻城

二年,土官韋富撓遣家人韋錢保詣闕,上元所授印,貢方物。。錢保匿富撓名,以已名上,因 一年內附,因置蘭州,以宴閙知州事,俾世其官。元改爲東蘭州,韋氏世襲如故。洪武十 東蘭州,在府城西南四百二十里。宋時有韋君朝者,居文蘭峒爲蠻長,傳子宴閙。

以錢保知東蘭州。 正其罪,仍以其地歸韋氏。 旣而錢保徵斂暴急,民不堪命,擁富撓作亂。 廣西都司討平之, 執錢保

洪武元年,土官羅黃貌歸附,詔幷挪入地,爲那地州,予印,授黃貌世襲土知州,以流官吏目 蠻納土, 遂置地、那二州, 以羅氏世知地州。 那地州,在府城西南二百四十里。 宋熙寧初,土人羅世念來降,授世職。 大觀中,析地州置字州。元仍為地、那二州。 崇寧五年,諸

佐之。

授奠金知州, 而蠻民作亂,復置土官知州,以金子莫祿爲之。 正末,莫國麒納土,命爲慶遠南丹谿洞安撫使。 南丹州,宋開寶初,土官莫洪臙內附。 世襲,佐以流官吏目。 金以叛誅,廢州置衞。 元豐三年置南丹州,管轄諸蠻,歷世 明洪武初,安撫使莫天護歸附。 後因其地多瘴,遷之賓州。 承襲。元至 七年置州, 旣

管兵官,籍其屯兵爲民,莫氏遂徙居忻城界。 忻城,宋慶 層間置縣,隸宜州。元以土官莫保爲八仙屯千戶。 宣、正後、瑤、僮狂悻、知縣蘇寬不任 洪武初、設流官知 職。 、縣,罷 瑶老

韋公泰等舉莫保之孫誠敬爲土官,寬爲請於上官,具奏,得世襲知縣。 相統,流官握空印,僦居府城而已。 弘治間,總督鄧廷瓚奏革流官,土人韋保爲內官,陰主 由是邑有二令,權不

之,始獨任土官。

思恩土官岑瑛交結,欲割地歸之思恩,因謀於知縣朱斌備。 斌備亦欲藉以自固,遂爲具奏,以地改屬思恩。 成化二十二年,覃召管等復亂,屢征不靖。 永順司、永安司,舊爲宜山縣。 正統六年,因蠻民弗靖,有司莫能控禦,耆民黃祖記與 土民不服, 章萬秀以復地爲名, 因而倡亂。 時暎方雄兩江,大將多右之,

東南棄一百八十四村地,宜山西南棄一百二十四村地。議者以忻城自唐、宋內屬已二百餘 司,各設長官一,副長官一,以鄧文茂等四人爲之,皆宜山洛口、洛東諸里人也。 年,一旦舉而棄之於蠻,爲失策云。 弘治元年委官撫之,衆願取前地,別立長官司。都御史鄧廷瓚爲奏,置永順、永安二 自是宜山

平樂,初爲縣,元大德中改平樂府,明因之。洪武二十一年,廣西都指揮使言:「平樂府

時,統 富川 擒 道 州 縣靈亭山、破紙 所部 永明 可絕後患。」從之。 等縣 會永 道諸軍, 之民亦被害。 山等洞瑤二千餘人,占耕內地,嘯聚劫奪,居民被擾,恭 列屯贼境,扼其要路,收其所 二十九年遷富川縣於富川千戶所。 此 調 衞 兵收 捕, 卽 逃 匿巖谷, 種穀栗。 兵退復 時富川千戶 彼 無糧 肆 跳 梁。 食,勢必自窮,乘機 所 城、賀縣及 臣 新 等欲於 立 一於矮石 湖廣 秋 成

域,

回典

、史言:「縣治無城,恐蠻寇竊發,無以守禦,宜遷城內爲便。」從之。

設長 帶,近已設按察司副使一員,整飭兵備, 從其議 令上林土知縣黃瓊、歸德土知州黃通各選子弟一人,領土兵各千人,往駐其地。 三十,使往來府江巡哨,流官停選。」廷議以昭平堡係內地,若增土官,恐貽後患。況府江一 官司署領,撥平樂縣仙回峒閒田與之耕種。 弘 治 九年,總督鄧廷瓚言:「平樂府之昭平堡介在梧州、平樂間,「吾路、僮率出爲患,乞 土官不必差遣,止令每歲各出土兵一千聽調 其冠帶千夫長龍彪改授昭平巡檢,造哨船 仍築城垣, 詔

揮胡 與東歐 賊 倚 爲 府江 黨援 、「公千戶周濂 西里 有 万日 兩岸三洞諸僮,皆屬荔浦 及三都、五都諸 與府江 、土舍岑文及兵民無算。 **酋長楊公滿等掠荔浦** 賊相倚附,馬多人勁,俗號爲剗馬賊。 延袤千餘里, 、平樂及峰門、南源, 而遷江之北三,來賓之北五 中間巢峒 盤絡, 執 常陳兵 永安 爲瑤 知 僮 走嶺東,掠三水、 ,皆右江 州 窟穴。 楊惟執 僮 江 殺 上

列

傅

第

百

黃勝及其子四人,兵七十餘人,又殺明經諸生王朝經、周松、李茂、姜集等, 清遠諸縣,還入南寧、平南、武宣、來賓、藤、貴,劫府庫。 已而劫來賓所千戶黃元 白晝劫殺 學,殺 道 土 絕 吏

行人。

法眞 南源,修仁之麗壁,永安之古眉諸巡司,爲諸僮所奪。 冠帶管事,三載稱職,始世襲。 寨,斬獲賊渠,餘黨竄入仙回、古帶諸山,搜捕殆盡。 泗 城 同被擴來賓、遷江民蒙演等詣軍前乞降,許之,乃定善後六策以聞。初,荔浦之峰門、 隆慶六年,巡撫郭應聘、總督殷正茂請討。 、南丹、歸順諸士兵,而以土吏韋文明等統之,攻古西、巖口、笋山、古造及兩峰、黃洞等 詔總兵官李錫督軍進剿,幷調東蘭、龍英、 乃移檄北三、北五、趣其歸降。 至是議改土巡檢,推擇有才武者,給 峒老韋

順 班 道路不通。 三千人出仚鳳山、龜鼈塘,與河塘韋宋武傍江結寨。 白山 萬曆六年,北山蠻譚公柄挾毒弩,肆傷行旅,每一出十百爲羣。 兵及狼兵剿之,平横山、咘咳諸巢。 會咘咳寒藍公潺執土吏黃如金,奪其司。 諸瑶請還侵地及所擄生口,願輸賦爲良民,遂 時義寧、永寧、永福諸僮羣起,相殺掠, 巡撫吳文華檄守巡道吳善、陳俊徵永 自殺黃勝後,復聚黨以

右江十寨,隆慶中,總督殷正茂擊破古田,即以檄趣八寨歸降,得貸死。 於是寨老樊公

恩守備於周安堡,而布政使以爲不便,總制乃議立八寨爲長官司,以兵八千人屬黃陽爲長 黄九疇,羅墨、古鉢、古憑、都北、怖咳立一州,屬那地土官黃陽,(+) 皆為土知州。已,移思 立一甲長,寨立一峒老,爲徵賦計。而以思古、周安、落紅、古卯、龍哈立一州,屬向武土官 懸、韋公良等踵軍門上謁,自言十寨共一百二十八村,環村而居者二千一百二十餘家,皆 請受賦。右江兵備鄭一龍、參將王世科,謂十寨旣請爲氓,當以十家爲率,賦米一石。村

官,黃昌、韋富皆給冠帶爲土舍,亦各引兵二百守焉。

帝乃陞賞諸士吏功,復分八寨爲三鎭,各建一城,而以東蘭州韋應覷、韋顯能及田州黃馮克 **堯誨、巡撫張任急統兵進剿,斬首一萬六千九百有奇,獲器仗三千二百,牛馬二百三十九。** 慶遠、賓州,使思恩、三里聯絡不絕,於是右江十寨復安輯輸賦 爲土巡檢,留兵一千人戍之。於三里增建二堡,自楊渡水爲界,墾田屯種,給南丹衞,通道 久之, 十寨復聚黨作亂,據民田產,白晝入都市剽掠,甚至攻城劫庫, 戕官民。 總制劉

官顧寰督兵進剿,擒斬四百八十四,俘獲男女三百四十,牛馬器械甚衆。 **僉事茅坤、參將王寵、都指揮鍾坤秀、參政張謙、百戶吳通等功狀,各陞廕有差** 三十二年,桂林、平樂瑤、僮據險肆亂,殺知縣張士毅,焚劫無虛月。 守臣以捷聞,並上 總督應檟檄總兵

平樂界桂、悟,西北近楚,淸湘、九嶷,鬱相樛結。 東南入悟,溪涧林箐,多爲瑤人盤據。

傅

百五

废西

駸駸馴習於文治云。

自數經 大 征 「後,刊山通道,展爲周行,而又增置樓船,繕修校壘,居民**行旅皆帖**席,瑤、憧亦

祖等既平廣東,[六] 引兵至梧州境。 四年置梧州守禦千戶所。二十三年置容縣守禦千戶所。 是潯、貴等州縣以次降附。 梧州 ,漢之蒼梧郡也。 元至元中,改置梧州路。洪武元年,征南將軍廖永忠、參政朱亮 二年併南流縣於鬱林州,普寧縣於容州,幷藤州皆隸梧州府。 元達魯花赤拜住率官吏父老迎降,亮祖駐兵藤州。 於

村民畏之,東西走匿。都御史吳善檄總兵戚繼光徵兵於羅定、泗城、都康諸土司,分五道, 北流 鴯 十三山、六山、七山諸瑤、憧據山爲寇,居民請剿。 三千人,設參將及屯堡三十治焉。 福 中衝,北科爲六十三山咽喉,懷集爲賀縣諸村出入之所。 ,積善願歸降輸賦,乃貸其死,且以其子入學。 廣西全省惟蒼梧一道無土司,瑤患亦稀。 官軍屢討之,歸降,然盤互如故,往往相結諸峒蠻劫掠,殺百戶朱裳及把總羅定朝, 而懷集瑤賊,在正德中已雄據十五寨,環二百餘里,爲州 萬層初,岑溪有潘積善者,僭號平天王,與六 議者謂七山爲蒼、藤信地,六山爲容縣、 會大兵征羅旁不暇及,總制凌雲翼檄以 因立五大營,營六百人,合得

命參將戴應麟等擊金雞、松柏諸寨,斬渠魁,撫四百餘人。

時 鬱林 · 瑤亦桀驁,數糾諸生瑤破諸村寨,入寇興業縣。 兵巡道副使王原相告於總制,

調兵擊破之,諸瑤悉平。

以軍器衣裝,俾各團村寨置烽火,與官兵相爲聲援,協同捕逐,可以殲之。」帝以蠻夷梗化, 爲桂平、平南二縣,舊附瑤民,皆便習弓弩,慣歷險阻。若選其少壯千餘人,免其差徭,給 捷如猿狖,追襲不及。若久駐兵,則瘴癘時發,兵多疾疫,又難進取,兵退復出爲患。臣以 官軍擒捕之。二十年,知府沈信言:「府境接連柳、像、梧、藤等州,山谿險峻,瑤賊出沒不 夙昔固然,但當謹其防禦,使不爲患。 |海||州 近者廣西布政司參議楊敬恭爲大亨、老鼠、羅碌山生瑤所殺,官軍討之,賊登巖攀樹 ,江日潯江,東城門日潯陽,郡名取焉。洪武八年,潯州大藤峽瑤賊竊發,柳州衞 如爲寇不已,則發兵討之,何必團寨。

等縣蠻寇覃公專等首級數。 年,總兵山雲討潯、柳二州寇,並誅從寇二千四百八十人,梟首境上。 永樂三年,總兵韓觀奏桂平縣蠻民爲亂,請發兵剿捕。 帝顧左右曰:「蠻寇害我良民,譬之蟊賊害稼,不可不去。 帝命姑撫之, 七年, 勿用兵。 雲奏斬 獲桂平 宣德 然殺

列

掠良民,指揮田眞率兵於大藤峽等處,前後斬首九十六級,歸所掠男婦二百三人。 之過多,亦所不 忍。雖彼自取滅亡,朕自以天地之心爲心也。」九年,雲奏潯州等處蠻寇劫

貳等恃所居大藤峽山險,糾集大信等山山老、山丁數百人,遞年殺掠。 千戶滿智等誘殺十 兵,分界耕守,卽委土官都指揮黃竑領之。 之路,不過數年,賊徒坐困,地方寧靖矣。』臣已會同巡按諸司計議,量撥田州等府族目土 南等縣耆民言:『大藤峽等山,瑤寇不時出沒,劫掠居民,阻絕行旅。近山荒田,爲賊占耕, 以聞。景泰七年,大藤峽賊糾合荔浦等處賊,劫掠縣治,殺擴居民,命總兵柳溥等剿之。 人,「云」帝命梟之,家口給賜有功之家。十一年,大藤峽蠻賊流劫鄉村,侵犯諸縣,巡按萬節 而

広、

右兩

江,
人多

食少,

其

狼

兵

素

勇

,

爲

賊

所

憚

。 人,今已逾年,軍器衣裝損壞,宜如貴州諸軍例,予踐更。」從之。二年,山雲奏:「潯州府平 正統元年,兵部尚書王驥奏:「桂平大藤峽等處蠻寇,攻劫鄉村。因調廣東官軍二千 遇賊出沒,協同剿殺。」從之。七年,瑤賊藍受 若選委頭目,屯種近山荒田,斷賊 出沒

|彪奏:| 臣率軍進剿大藤,攻破七百二十一寨,斬首三千二百七十一級,復所掠男婦五百餘 乃命都督僉事顏彪佩征夷將軍印、江四扇京、江西及直隸九江等衞官軍一萬隸之。六年, 會兵剿捕 天順五年、鎭守廣東中官阮隨奏:「大藤峽瑤賊出沒兩廣,爲惡累年,邇來愈甚。雖常 ,緣地里遼遠,且兩廣軍馬不相統屬,未易成功,宜大舉擣其巢穴,庶絕民患。」

口。」帝敕獎之。

任璩。 副 乎! 至,帝曰:「梧州 家居,挺身出,以大義諭賊,爲所害。 賊講解,晡時,縱之出 上 城 使 周璹 爾兵部其卽議處行 ,脛等不覺,遂入府治,劫庫放囚,殺死軍民無算,大掠 年,大藤峽賊夜入梧州城。 脛等倉卒無計,惟擁兵自衞,隨軍器械幷備賞銀物,皆爲 で、僉事 董 蕞爾 應軫 小城、總兵、鎮、巡、三司俱擁重兵駐城中,乃爲小賊所蔑視,況遇大敵 城。 、参議陸禎 財旣出,乃縱濤還。 、都指揮杜衡、土官都指揮岑瑛等議調兵。 時總兵官泰寧侯陳涇駐兵城中,會太監朱祥、巡按吳璘 黎明,賊聲言官軍若動,則殺周 時官軍數千,賊僅七百而已。 城中, 賊有。 執副使周璹爲質,殺訓 副使。 布政使宋欽時致仕 都指揮邢斌 脛等乃遣人 夜半,賊駕梯 與 奏

藤 往來 徒杠 則 峽 以 縣 爲 府 南 五 蠻衆蟻渡,號大藤峽,最險惡 可顧 年,國子 有 江 屯 ,其中 牛腸、大帖諸 障 盼 其左,貴縣 盡, 監生封登奏:「潯州 多冥巖 諸蠻倚爲 村 龍 奥谷,絕壁 一,皆緣 Щ 據其右, 奥區 江立寨。 層崖 地亦 夾江諸 桂平大宣鄉崇姜里 若 一,十步九折,失足隕身。 兩 最高。 藤峽、 臂然。 山、蛤岈鍛業,峽 府江之間 登藤峽巔,數百里皆歷歷 峽 北巖 一為前 峒 .為力 以百計 庭,象州 中有 Щ 中 大藤 產瑤 力山 , 仙 東鄕 如 之險倍於 人關、九層崖 人,藍、胡 斗,延 、武宣 目前 瓦 北 ,軍旅之聚散 藤峽。 、侯、槃四姓 兩 鄉 崖, 極 爲 後戶, 險 叉南 勢如 峻,

列

傅

第

百

五

废

酉

土司

將,多調官軍、狼兵急滅賊。」報聞。 購,莫能得。鬱林、博白、新會、信宜、興安、馬平、來賓亦煽動,所至丘墟,爲民害。乞選良 至萬人,隳城殺吏。而修仁、荔浦、平樂、力山諸瑶應之,其勢益張。渠長侯大狗嘗懸千金 爲渠魁。 力山又有憧人,善傅毒藥弩矢,中人無不立斃,四姓瑶亦憚之。自景泰以來,嘯聚

縣,行三殺典史周誠,擄其妻子,并劫縣印。又人藤縣城,掠官庫,劫縣印,鎮守總兵歐信以聞。 史,都督同知趙輔爲征夷將軍、八三和勇爲遊擊將軍,率師討之。時大藤峽賊三千餘陷平南 臣以招撫爲功,致釀大患,非大創不止。」因薦浙江參政韓雍有文武才。命以雍爲僉都御 合諸軍十六萬人,分五道進,先破修仁,窮追至力山,生擒千二百餘人,斬首七千三百餘級。 於是總兵官趙輔率軍至,奏言:「大藤蠻賊以修仁、荔浦爲羽翼,今大軍壓境,宜先剿之。」乃 成化元年,編修丘濬條上兩廣用兵機宜。兵部尚書王竑奏言:「峽賊稱亂日久,皆由守

背交攻。 分兵二哨,從水路人。 分兵五哨,取道山北以進。臣及指揮白全分兵八哨,直抵潯州, 木石鏢鎗藥弩,憑險拒守。 一年,趙輔、韓雍等奏:「元年十一月,師次潯州,謀深入以覆其巢。 賊知師至,先移妻子錢米入桂州橫石塘等處藏匿。乃於山南各寨, 别遣指揮潘鐸等以兵分守諸山隘口,剋期十二月朔日,水陸並進,腹 官軍用團牌、扒山虎等器,魚貫而進。士殊死戰,一日之間,攻破 以擣山南。 遂調總兵官歐信等 復令參將孫震 立棚自固,用

人,獲賊婦女二千七百一十八人,戰溺死者不可勝計。已將大藤峽改爲斷藤峽,刻石紀之, 面夾攻,連日鏖戰,賊不能支。破賊寨三百二十四所,斬首三千二百七級,生擒七百八十二 擲木石幾盡,別遣壯士於賊所不備處,高山絕頂,舉礮爲號。 諸軍緣木攀蘿,蟻附而上,四 横石塘及九層樓等山。賊已據險立栅數重,復用木石、鎗弩拒守。臣等多設疑兵、誘賊抛 山南、石門、林峒、沙田、古營諸巢,縱火焚其積聚,賊皆奔潰。 復督兵追躡,剷山開路,直抵

以昭天討。」捷聞,帝降敕褒諭,仍敕輔計議長策,永絕後患。

江東西兩岸,大、小桐江、洛口與斷藤峽、朦朧、三黃等處,村巢接壤,路道崎嶇,聚衆劫掠, 爲副巡檢,設武靖州於峽內,以上隆州知州岑鐸知州事,土人覃仲英世襲土官吏目。」然府 顆,殺掠男婦數十人。旋爲參將孫震、指揮張英率軍擊斬賊魁,餘黨仍奔入巢。 終不能除 「諸瑶之性,憚見官吏,攝以流官,終難靖亂。 未幾,雅奏斷藤峽殘賊侯鄭昂等七百餘人,夜入潯州府城,焚軍營城樓,奪百戶所印三 請改設武宣縣東鄉等巡檢司,以土人李昇等 旣雍又奏:

五百六十餘級。 ,副總兵房閏,鎮守太監傅倫,參將牛桓,都指揮魯宗貫、王瑛將之,仁己水陸並進,斬七千 正德十一年,總督陳金復督調兩廣官軍士兵,分爲六大哨,按察使宗璽,布政使吳廷 金謂諸蠻利魚鹽耳,乃與約,商船入峽者,計船大小,給之魚鹽。

列

一,如榷稅然,不得爲梗。 蠻初獲利聽約,道頗通。 金以此法可久,易峽名永通。 諸蠻緣

此無忌,大肆掠奪,稍不愜,卽殺之。因循猖獗,江路爲斷。

佐爲武靖知州,使靖遺孽。 力山,官軍次第破之,擒斬三千餘,俘獲無算。八寨平,兩江悉定。 令官軍突進,連破油碎、石壁、大皮等寨,賊奔斷藤峽,復追擊破之。 賊奔渡橫石江,溺死六 湖南兵至南寧,約日會兵。寇聞湖兵且至,皆逃匿。守仁故爲散遣諸兵狀,寇弛不爲備,乃 百餘人,俘斬甚衆,賊潰散。 時總督王守仁定田州還,兩江父老遮道言峽賊阻害狀。守仁上疏請討,報可。 遂移兵仙臺、花相、白竹、古陶、羅鳳諸處, 賊不支,奔入永安 守仁遂以土官岑猛子邦

城,殺戍兵二百人,貴、香走免。 請置堡。 需春江 弟公丁聚衆譟城下。 至是往戍,遂奪勝海田廬。 會朝議欲征安南,事遂已。 邦佐 . 漲,順流下,乃可破賊,不聽。 堡成,閱令土目黃貴、韋香以三百人往戍。 不能輯衆,且貪得賊賄,峽北賊復獗。 **愈事鄔閱、參議孫繼祖言於都御史潘旦,請討之。** 於是諸瑤俱患,邦佐又陰黨之,公丁遂嘯聚二千餘人,乘夜陷堡 公丁等益横,時出殺掠。 巡按以聞,乃罷閱與繼祖,旦亦代去,命侍郎蔡經督兵討 閱與繼祖以千人往擊,賊遁,斬一 有侯勝海者爲首,指揮潘翰臣誘殺之,勝海 初,貴、香利勝海田盧,故說翰臣殺海, 尪寇還。 參將沈希儀以爲宜 漫言賊退,

瑶,果否。」 諸瑤遂言事自公丁,聽論坐,不敢黨。 害者家,出毆公丁,一市皆譁,遊檄幷逮公丁入繫獄。 經,謂首惡旣誅,宜乘勢進兵討賊。 申飭之,雄紿公丁詣汝成自列,言寇堡事由他瑶, 許之,又令雄假稱貸爲賄,公丁喜,益信雄。 狀,詰之。 使梁廷振監之,副使蕭畹紀功,參政林士元及汝成督餉。 **外之**, 雄懼,請自効。 經乃會安遠侯柳珣決計發兵,以兵事屬副使翁萬達。 萬達佯庇公丁,捕繫訐訟公丁者數人。 乃以副總兵張經、都指揮高乾分將左右二軍,萬達及副 會萬達巡他郡,以事屬參議田汝成。 汝成亦慰遣之。 乃檻致公丁於軍門,磔之。 遣雄諭其黨曰:「寇堡事公丁委罪諸 公丁果遣人自列,萬達 乃密授意城中居民被賊 萬達廉得百戶許雄通賊 汝成因言於 汝成召 雄

沖、大坑等巢;右軍萬六千人,分四道,攻碧灘,羅綠上、中、下洞等巢。南北夾擊,賊大窘, 兵剿之,招降賊黨二百餘人,江南胡姓諸瑶歸順者亦千餘人,藤峽復平。 至羅運山、口巴又斬百餘級。 逐擁衆奔<mark>林峒而東。王良輔邀擊之,中斷,復西奔。諸軍合擊,大破之,斬首千二百級,追</mark> 嘉靖十八年二月,兩軍齊發:左軍三萬五千人,分六道,攻紫荆、石門、梅嶺、木昂、藤 平南縣有小田、羅應、古陶、古思諸瑤亦據險勿靖。萬達等移

盡 滅 隆慶三年,右江諸瑤、僮復亂,巡撫郭應聘請給餉剿除。 宜令守臣 一熟計。 兵部言:「府江自正德十二年都御史陳金征討之後,且六十年。 給事中梁問孟以賊黨衆,不可 而右

毿

百五五

廣

西

土司

便。 江北三、北五等巢, 總兵官李錫等將兵往討,以捷聞。 府江、右江恃險爲亂,若復縱之,非惟無以固八寨懷遠之招,亦恐以啓古田攜貳之漸,剿之 但兵在萬全,宜卽以科臣所慮 素未懲創,生齒日繁,遂肆猖獗。 · 備行提督殷正茂及巡撫郭應聘等便宜行之。」 應聘遂檄 頃者大征古田, 各巢咸畏威斂戢, 獨

故 半月不下。 黄龍冠等。 廣爲總兵官,寶慶衞指揮僉事胡海、廣西衞指揮僉事左君弼副之,率兵討左江上思州蠻賊 及,斬之,上思州平。 命廣等討之。 南寧,唐之邕州也。元,邕州路。 海北等衛官軍來援,賊夜遁,追至上思州境,破之,賊走還,仍結聚不解。 龍冠一名英傑,時聚衆萬餘,寇鬱林州。 廣等兵至上思州,賊拒戰,擊敗之,擒從賊黃權等。英傑走十萬山,官軍追 泰定中,改南寧路。洪武二年命潭州衞指揮同知 知州趙鑑、同知王彬集民丁拒守,賊圍 事聞,

素獷 狼 戾多畔。 (戾,動 三年,置南寧、柳州二衞。 和
曹殺,蓋緣郡縣無兵以馭之。 府衞兵遠在靖江數百里外, 時廣西省臣言:「廣西地接雲南、交阯,所治皆溪洞苗 卒有警, 近盜寇鬱林,同知集民兵拒守,海州經歷徐成 難相援,乞立衞置兵以鎭。」又言:「廣海俗 蠻,性

有 亦 司,有事則捕賊,無事則務農。」 詔從之。 以民兵千餘敗賊,是土兵未始不可用。 乞令邊境郡縣輯民丁之壯者,置衣甲器械,籍之 遂置衞,益兵守禦,賞王彬、徐成祖等有功者。

|殉罪。 民之無籍者爲軍,又縱所部入山伐木,民多擾,遂相搆爲盜。至是討平,命大都督府按居 五年,宣化盜起,劫掠南寧府,詔發廣西官軍討平之。 初,南寧衞指揮僉事左君弼覈

瑶乃稍稍驕恣,不可盡繩以法。 及經略安南,舉弭節兹土。後因瑤蠻不靖,往往仗狼兵,急則藉爲前驅,緩則檄爲守禦。諸 永平尤要害。 南寧故稱邕管,牂牁峙其西北,交阯踞其西南,三十六洞錯壤而居,延袤幾千里,橫山 歷唐及宋,建牙置帥,與桂州等。 議邕事者謂宜開重鎭,以復邕州督府之舊云。 又郡地夷曠,可宿數萬師。 成化時,征田州

南寧領 /州四。 [三日新寧,日横州,爲流官。 日上思州,日下雷州,爲土官。 縣三,日宣

化, 曰隆化,曰永淳。

歸 德州,宋熙寧中置。 元屬田州路。 洪武二年,土官黃隍城歸附,授知州,以流官吏目

佐之。

果化州 列 傳 、宋始置。 箅 百 Ŧi. 元屆田州路。 廢 잴 土 司 洪武二年,土官趙榮歸附,授世襲知州,以流官吏目佐

洪熙元年,果化州土官趙英遣族人趙誠等貢馬及方物。 弘治間,州與歸德皆爲田州所

侵削,因改隸於南寧。

官襲。 治十八年改流官,屬南寧府。 思州本土官,後改流,遂致土人稱亂。 已,越獄復叛,官軍禦之,詐降,攻破州城,復補獲之,伏誅。 上 思州,唐始置。 元屬思明路。 正德六年,土目黃錙聚衆攻城,都御史林廷選捕之,下 洪武初,土官黃中榮內附,授知州,子孫畔服不常。 宜仍其舊,擇土吏之良者任之。」議以爲然,仍以土 嘉靖元年,都御史張嵿言:「上 弘

佐之。 屬南寧府。 傳世烈、國仁繼襲峒事。 下 雷州,宋置。 萬曆十八年以地逼逐南,奏陞爲州,頒印,授宗蔭子應珪爲土判官,流官吏目 明初,印失,廢爲峒,在湖潤寨,屬鎭安府。 嘉靖十四年獲舊印。 國仁及子宗蔭屢立戰功。 峒長許永通奉調有功,給冠 四十三年改

校勘記

参議! · 傳及孝宗實錄卷六一弘治五年三月辛卯條改。 馬鉉 馬鉉,原作「馬鈸」,據本書卷十五孝宗紀、又卷一八三閔珪傳、又卷二二二般正茂

- \subseteq 又長官司二日永安永順 本書卷四五地理志謂領永順、永定、永安三長官司。
- 29 時富川千戶所新立於矮石城 矮石城, 本書卷四五地理志及讀史方輿紀要卷一〇七俱作 靄

石山」。

五 平樂府之昭平堡介在梧州平樂間 昭平堡, 原作「昭仁堡」,據本傳下文及本書卷四五地理志、

孝宗實錄卷一一六弘治九年八月壬寅條改。

八六 殺指揮胡翰 胡翰, 本書卷二二一郭應聘傳作「胡潮」, 萬曆武功錄頁三四七府江右江諸僮列

傳作「胡瀚」。

馬」。

- -屬那地土官黃暘 那地,明史稿傳一九一平樂傳及萬曆武功錄頁三六八十寨諸僮列傳俱作「那
- 傳及太祖實錄卷二八洪武元年五月戊戌條改。 參政朱亮祖等旣平廣東 參政,原作「參將」,據本書卷一三二朱亮祖傳、明史稿傳一九一平樂
- 一元 千戶滿智等誘殺十人 英宗實錄卷八九正統七年二月丙午條作「千戶潘智誘執其十人」。
- 宗實錄卷三二五天順五年二月丙申條改。 乃命都督僉事顏彪佩征夷將軍印 征夷將軍, 原作「征蠻将軍」,據本書卷十二英宗後紀及英

列傳第二百五 校勘記

都督同知趙輔爲 征 夷將軍 征夷將軍,原作「征蠻將軍」, 據本書卷十三憲宗紀、又卷一五五趙

輔傳及憲宗實録卷一三成化元年正月甲子條改。

時大藤峽賊三千餘陷平南縣 平南, 原誤倒作「南平」,據本書卷四五地理志改。

都指揮魯宗貫王瑛將之 王瑛, 明史稿傳一九一及武宗實録卷一五五正德十二年十一月丙戌

條俱作「王英」。

追至羅運山 羅運山, 原作「羅連山」, 據本書卷二〇五張經傳、炎徼紀聞卷二、行邊紀聞頁三

九改。

南寧領州四 本書卷四五地理志作領州七, 横州、新寧州、上思州、歸德州、果化州、忠州、下雷

州

明史卷三百十八

列傳第二百六

廣西土司二

太平 思明 思恩 鎭安 田州 恩城 上隆 都康

元仍爲五寨。後廢,乃置太平路於麗江。 立五寨。其一日太平,與古萬、遷隆、永平、横山四寨各領州、縣、峒,屬邕州建武軍節度。 太平,漢屬交阯,號麗江。唐爲羈縻州,隸邕州都督府。宋平嶺南,於左、右二江溪峒

安靖,待之以誠,諭之以理,彼豈有不從化者哉。」遣中書照磨蘭以權齎詔,往諭左、冶兩江 當臨之以兵,彼始畏服。」帝曰:「蠻瑤性習雖殊,然其好生惡死之心,未嘗不同。 璟還自廣海,帝問黃、

岑二氏所轄情形。

璟言:「蠻條頑獷,散則爲民,聚則爲盜,難以文治, 洪武元年,征南將軍廖永忠下廣西,左江太平土官黃英衍等遣使齎印詣平章楊璟降。 若撫之以

列

傳

第二百

六

黀

西土司

等擊之。 掠楊家寨居民。以權謂彭宗等曰:「奉詔遠來,欲以安民,今見賊不擊,何以庇民。」乃督宗 太平府。 意,以安居民。」以權至廣西衞,鎭撫彭宗、萬戶劉維善以兵護送。 則修職貢,良由其審時知幾,故能若此。頃者,朕命將南征,八閩克靖,兩廣平定。 煩師旅,奉印來歸,嚮慕之誠,良足嘉尙。 眷茲兩江,地邊南徼,風俗質樸。 溪峒官民曰:「朕惟武功以定天下,文德以化遠人,此古先哲王威德並施,遐邇咸服者也。 賊敗走,遂安輯其地,兩江之民由是懾服。二年,黃英衍遣使奉表貢馬,乃改爲 以英衍爲知府,世襲。 自唐、宋以來,黃、岑二氏代居其間,世亂則保境土,世治 今特遣使往諭,爾其克愼乃心,益懋厥職,宣布朕 將抵 兩江,適來賓洞蠻寇 爾等不

廣進圍之,給出所奪各州印,撫諭脅從官民,使復職業。 命總兵官顧興祖會廣西三司剿捕。 母,大肆擴掠,占據村洞四十餘所。造火器,建旗幟,僭稱王,署僞官,流劫州縣。事聞,帝 宣德元年,崇善縣土知縣趙暹謀廣地界,遂招納亡叛,攻左州,執故土官,奪其印,殺其 興祖等招之,不服,遣千戶胡廣率兵進。暹扼寨拒守, **遙計窮,從間道遁。伏兵邀擊,及**

「蠻民愚獷,或挾私讐忿爭戕殺,來告者必欲深致其罪,未可遽信。 其令鎭遠侯幷廣西三司 時左州土官黃榮亦奏:「蠻人李圓英劫掠居民,僞稱官爵,乞發兵剿捕。」帝謂兵部曰: 其黨皆就擒。

勘實,先遣人招撫,如叛逆果彰,發兵未晚也。」

匹、銀百兩,故延緩之,冀幸免。 一年斬南寧百戶許善。 初,善知趙暹謀逆,與之交通。及總兵官遣善追暹,又受暹馬十 事覺,下御史,鞫問得實,斬之,餘黨皆伏誅

太平領州縣以十數。 明初,皆以世職授土官,而設流官佐之。

太平州,舊名瓠陽,爲西原、農峒地。 唐爲波州、宋隸太平寨、元隸太平路。 洪武元年,

土官李以忠歸附,授世襲知州,設流官吏目佐之。

鎭遠州,舊名古隴,宋置,隸邕州。 元隸太平路。 洪武初,土官趙勝昌歸附,授世襲知

州、設流官吏目佐之。

茗盈州、宋置、隸邕州。 元隸太平路。洪武初,土官李鐵釘歸附,授世襲知州,設流官

吏目佐之。

安平州,舊名安山,亦西原、農峒地。 唐置波州,宋析爲安平州,元隸太平路。 洪武初

土官李郭佑歸附,授世襲知州,設流官吏目佐之。

附,授世襲知州,設流官吏目佐之,屬太平府。 思同州,舊名永寧,爲西原地,唐置,隸邕州。 萬曆二十八年,省入永康州 宋隸太平寨。 洪武元年,土官黃克嗣歸

列 傅 第 <u>:</u> 首 六 废 西 土 司

養利州,元屬太平路。 洪武初,土官趙日泰歸附,授知州, 以次傳襲。宣德間,稍侵其

鄰境,肆殺掠。萬曆三年討平之,改流官。

初,土官許郭安歸附,授世襲知州,設流官吏目佐之。 萬承州,舊名萬陽。唐置萬承、萬形二州。 宋省萬形, 永樂間,郭安從征交阯,死於軍,子 隸太平寨。元隸太平路。 洪武

全茗州,舊名連岡,爲西原地,宋置,隸邕州。 元隸太平路。 洪武初,土官李添慶歸附,

授世襲知州,設流官吏目佐之。

永誠襲。

結安州, ,舊名營周,亦西原、農峒地。 宋置結安峒, 隸太平寨。 元改州,屬太平路。 洪

武元年,土官張仕樂歸附,授世襲知州,設流官吏目佐之。

龍英州,舊名英山,宋爲峒。 元改州,屬太平路。 洪武元年,土官李世賢歸附,授世襲

知州,割上懷地益其境,設流官吏目佐之。

路 洪武二年,峒長馮萬傑歸附,授世襲知州,設流官吏目佐之。 結倫州,舊名邦兜,日亦西原、農峒地。 宋置結安峒、三隸太平寨。元改州,屬太平

都結州,元屬太平路,土官農姓。洪武初內附,授世襲知州,設流官吏目佐之。

1 下凍州,舊名凍江。 宋置凍州。 元分上、下凍二州, 尋合爲一, 屬龍州萬戶府。 洪

武元年,土官趙貼從歸附,授世襲知州,設流官吏目佐之,屬太平府。 貼從死,子福瑪襲。

永樂四年從征交阯,死於軍。

,屬太平路。洪武元年,土官趙雄傑歸附,授世襲知州,設流官吏目佐之。 思城州,亦西原、農峒地,唐置州。 朱分爲上、下思城二州,隸太平寨。 元至正間,

贼二千餘人,入宣化縣劫掠,且僞署官職。總兵官趙輔捕誅之,因改流官。 永康州,宋置縣,隸遷隆寨。 元隸太平路,土官楊姓。 成化八年,其裔孫楊雄傑糾合峒 萬曆二十八年

升爲州。

左州,舊名左陽,唐置,隸邕州。 宋隸古萬寨。 元屬太平路。 洪武初,土官黃勝爵歸

附,授世襲知州。 再傳,子孫爭襲,相仇殺。 成化十三年改流官。

羅陽縣,舊名福利,陀陵縣,舊名駱陀,皆宋置。 元隸太平。 洪武初, 土官黃宣、黃富

歸附,並授世襲知縣,設流官典史佐之。

都遺使貢馬及方物。 恩明,唐置州,隸邕州。 韶以忽都爲思明府知府,世襲。 宋隸太平寨。

元改思明路。 十五年,忽都復遣其弟祿政奉表來 洪武初,改爲府。二年,土官黃忽

貢,詔賜鈔錠。

例。 固然,獨廣平不以實言,故繩以法。 百錠。二十五年,憑祥洞巡檢高祥奏,思明州知州門三貴謀殺思明府知府黃廣平,廣平覺 而殺之,乃以病死聞於朝,所言不實。 年,廣平以服闋,遣知州黃忠奉表貢馬及方物。 二十三年,忽都子黃廣平遣思州知州黃志銘率屬部,偕十五州土官李圓泰等來朝。 今姑宥之,使其改過。」命給道里費遣還,是後朝貢如 韶逮廣平鞫之。 詔廣平襲職,賜冠帶襲衣,及文綺十匹、鈔 旣至,帝謂刑部曰:「蠻寇相殺,性習 明

明屬 安南,諭其王陳日焜,令還思明地。 庶疆域復正,歲賦不虛。」帝令戶部錄所奏,遣行人陳誠、<

呂讓往諭安南。 三十年,誠、讓至 銅柱界。 置兵戍守,命交人供其軍餉。一定季擾亂,交人以兵攻破水平寨,遂越鲖柱二百餘里,侵奪思 理於朝,遂致交人侵迫益甚。及告禮部,任尚書立站於洞登,洞登實思明地,而交阯乃稱屬 路州縣峒寨,東至上思州,南至銅柱。 地 二十九年,土官黃廣成遣使入貢,因奏言:「本府自故元改思明路軍民總管所,轄左江 丘溫、如熬、慶遠、淵、脫等五縣,逼民附之,以是五縣歲賦皆土官代輸。 臣嘗具奏,蒙朝廷遣刑部尚書楊靖覈其事,建武志尚可考。乞敕安南,俾還舊封, 議論往復,久而不決。以譯者言不達意,復爲書曉之。 元兵征交阯, 去鲖柱百里, 設永平寨軍民萬戶府, 前者本府失

安南終辯論不已,出黃金二錠、白金四錠及沉檀等香以賄,誠却之。 安南復咨戶部,無還地

廷臣 議其抗命當誅,帝曰:「蠻人怙頑不悛,終必取禍 , 姑 待 之。 」

奏安南 從之。 永 以昇 侵奪其祿州、西平州永平寨地,請遣使諭還,從之。 樂二年,憑祥巡檢李昇言,其地瀕安南,百姓樂業,生齒日繁,請改爲縣,以便 爲知縣,設流官典史一員。 三年,昇以新設縣治來朝,貢馬及方物 九年,免思明稅糧,以廣成言去 謝 恩。 撫 廣成

珊 奏憑祥 宣德 歲凶民饑,命發龍州官倉糧振之。 元年,思明賀天壽節奉表踰期,禮部請罪之。 正統七年,晭遺使入貢。 帝以遠蠻旣至,毋問。 九年,貢解毒藥味,賜 土官知府黃

鈔

秋

雨水傷稼

也

治之。 仍歸 天下國家重事,多官其會議以聞。」」弦爲此舉,衆皆驚愕,謂必有受其賂而敎之者,或疑侍郎 憲司 徵 兵 原案。明日,乃入城,祚發哀,遣人報」強捕賊,以掩其迹。 (思明府,令其子糾衆結營於府三十里外,馳至府,襲殺||明一家,支解||||及||鈞,甕葬後圃, 景泰三年,堈致仕,以子鈞襲。 方殺啊時,啊僕福童得免,走 副總兵武毅以聞,將逮 弦守備潯州,託言

列

傅

第

二百六

废 西 土

司二

江淵 云。 事 成 弦得釋罪,且進秩。 英宗復辟,弦聞自殺。 帝命發棺戮其屍,其子震亦爲都

督韓雍捕誅。

成化 十八年,土知府黃道奏所轄思明州土官孫黃義爲族人黃紹所殺,乞發兵捕剿。 帝

命兩廣守臣區處以聞。

訴於朝,且謂屢經委官勘問,俱被賂免,乞發兵誅之。 弘治十年,況村賊黃紹復占思明、上石、下石三州,復謀殺 十一年,紹集衆數千人焚劫鄉村,據 知府黃道父子。 道妻趙氏 累

二州,屢撫不下,總鎭請發兵捕剿。

隆慶 四 年,忠州土官黃賢相等據南寧府屬四都地作亂, 永康典史李材計誘其黨,縛賢

嘉靖四十一年,以剿平瑤、僮功,命土官知州男黃承祖暫襲本職

相以降。

而 亂 追其所掠,更令族人黃恩護拱極妻許氏撫遺孤世延,待其長官之。 掠 ,村寨,為之援。 按臣請以拱聖及諸凶正法,思明州改屬流府, 革<u>承祖</u>冠帶,立功自贖, 萬曆十六年,思明州土官黃拱聖謀奪襲,殺其母兄拱極等五人。 而思明知府黃承祖乘

官。 黃應宿爭地,殺戮六哨成仇,且係義子,不應襲職。 三十三年,總督戴耀奏:〔三「思明叛目已擒,土官黃應雷縱僕起釁,棄印 黄應聘係承祖幼子,人心推戴,似 而 逃,斷難復

應雷 屬思明府節制。 應 承襲知府,以存黃氏宗祀。 旣廢,不宜 同城,應降爲土舍,其後永襲土舍,給田養贍,制其出入。 於府治設教授一員,量給廩生六名,其寄附太平府者,悉歸本學,嗣後續增 但年甫七歲,暫令流官 同知署府事,待至十五歲, 應宿仍管故業,俱 交印 接管。

之,王綱隳矣。 速擒首惡以靖地方。 崇禎十一 年,總督張鏡心疏報土官殺職官思明州黃日章、黃德志等,鼓衆叛逆。 然骨肉相屠,至是四見,蓋天道云。 論者以黃弦神奸,身逭大盭, 世濟其兇,傳及四世,猶併思明州 帝令 而

其祭祀廩餼之用,則地方可安,文敎可興。」詔悉從之。

族。 洪武初,黃君壽歸附,授世襲知州,屬思明府,後爲黃弦所幷。 思明州,東抵思明府,西抵交阯界,南抵西平州,北抵龍英州。 萬曆十六年,黄拱聖之 土官黃姓,與思明府 同

亂,改屬太平。

府。 州更土官趙氏、何氏、黄氏凡三姓,皆絕,始改流官。 上石西州,宋屬永平寨,回元屬思明路。 明初屬思明府,至萬曆三十八年改屬太平

下石西州 ,宋分石西州置,元屬思明路。 洪武二年,土官閉賢歸附。 授世襲知州,設流

官吏目佐之。

官,不果,遂改隸州於南寧,仍以州印予賢相子有瀚,俾襲職 冬,思明府土官黃承祖奏取四都地,忠州土官黃賢相爭之,遂擅立總管諸名目,分兵數千戍 江 守,因縱令剽掠,爲禍 知 之間 州 忠州 中謹 ,思明、忠州屢肆侵奪。 忠州 知州 隸邕州。 ,皆世襲,設流官同 甚烈。 元屬思明路。 副使翁萬達議改峒名四都,隸之南寧,地方稍定。 知吏目佐之。 洪武 初, 土官黃威慶率子中謹 其隣 地有四峒 者,界於南寧、思明、忠 歸附 授威慶江 隆慶三年 議改流 州

授昇巡檢,屬思明府。 ,宋爲憑祥洞,屬永平寨,元屬思明路。洪武十八年,土蠻李昇歸附。 永樂二年置縣,以昇爲知縣。 置憑祥鎮,

之。 倚思明勢,州民皆右之。 祥, 压奔罄柳。 南,莫登庸 攝 不決,凡三四年,乃以孫珠襲知州職。嘉靖十年,珠死,族弟珍、珏爭立,珍挈印走況村,珏 州事。 時珍淫縱 成化八年升爲州,以昇孫廣寧爲知州,直隸布政司。 十四年,州目李清、趙琪等謀納珍,許思明府黃朝以州屬之。 藉爲 嚮導。 爲部 旣珍悔屬思明,與朝隙,朝乃以外婦所生子時芳,詭云廣寧孫,以兵千人納 民所怨,於是廣寧季子寰以尊屬謀廢立。 總督蔡經屬 萬達黜压而論時芳死,更立李佛嗣珍爲知州,憑祥遂定。 副使翁萬達 擒之,至論死。 廣寧有十子,廣寧死,諸子爭立 十七年,寰逐殺珍而附 於是珏 與時芳復爭立,時芳 朝遂以兵納珍於憑 於安

水、無虞三縣省入上林。 思恩,漢屬交阯。 唐爲思恩州、屬邕,乃澄州止戈縣地。 治平間,以上林之止戈入武緣,隸邕。 宋開寶問,廢澄州,以止戈、賀 元屬田州路。 歷代羈縻而

左都督楊文相機討之,旣以荒遠不問。 土官黃碧言,思恩州知州岑永昌旣匿五縣民,不供賦稅,仍用故元印章。 明洪武二十二年,田州府知府岑堅遣其子思恩州知州永昌貢方物。 永樂初,改屬布政司,時居民僅八百戶。 帝以不奉朝命,命 二十八年,歸德州

所,且有城垣公廨,乞徙置,許之。 屬挾詐事覺,帝以土蠻宥不問,令法司移文戒之。 司 有謀略,善治兵,從征蠻寇,屢有功,故有是命。 議。 永昌死,子瑛襲。 於是安遠侯柳溥等請陞思恩爲府,俾瑛、紹各守疆土,以杜侵爭,從之。 宣德二年,瑛遣弟璥貢馬。正統三年進瑛職爲知府,仍掌 以思恩府爲思恩軍民府。十二年設儒學,置敎授一員, 因與知府岑紹交惡,各具奏,下總兵官及三 瑛以府治僻隘,橋利堡正當瑤寇出沒之 六年,瑛受 州事。 瑛

景泰四年,總兵官陳旺奏:「思恩士兵調赴桂林哨守者,離本府遼遠,不便耕種,稅糧宜 傅 第 百 六 廣 西 土 司

訓導四員,俱從瑛請也

不法。 忠、降敕慰諭。 年應輸田糧之半,進暎從二品散官。」英屢領兵隨征,以子鑌代爲知府。 緞,韋陳威等俱給冠帶。 暫発。」從之。 **暎舉發其事,請於總兵,回府治之。[鑌聞其父將至,自縊死。** 六月,以瑛親率本部狼兵韋陳威等赴城操練,協助軍威,敕授奉議大夫,賜綵 又以柳溥奏,殆思恩調用土軍千五百人、秋糧二千三百餘石 五年從瑛請建廟學,造祭祀樂器。 又以暎征剿瑤寇功,免土軍 事聞,嘉其能割愛効 **資招集無賴**, 肆爲

放 留 $\overline{\mathcal{H}}$ 回全徵。」從之。 百人操練,発其糧七百七十餘石。 天順元年,戶部奏:「思恩存留廣西操練軍一千五百人,有誤種田 放回千人耕種,徵其糧千五百四十餘石,俟寧靖日 「納糧。 乞分爲三班,

同 知,仍聽總兵官鎭守調用,以其子錢爲知 三年,鎭守中官朱祥奏請量遷瑛都司 軍職。 府 帝以瑛歷練老成,累有軍功, 改授都指揮

從總兵趙輔 政、都指 成化元年遣兵科給事 揮使。 請 也。 年且八十,尚在軍 + 四 年, 中王秉彝齎敕獎諭瑛父子,幷賜銀幣。 瑛卒。 中。 瑛自襲父職,頻年領兵於外, 旣卒,錢以誥請,帝念其勞,特賜之。 多 二年命 所 斬獲。 給瑛父母 歷陞. 知府、參 !妻誥· 命,

十六年, 田 州 府 土目黃明作亂, 巡撫朱英

請獎燧功。燧死,子濬襲。

府 命濬 弘治 調 衆 十二年,田州土官岑溥爲子猇所殺,猇亦死。 護猛 |驥厚賂||溶,幷獻其女,且約分地與||溶。 次子猛幼,頭目黃驥、 濟以兵屬驥,送猛 至田州。 李蠻搆難,督 不得

蘭二州攻劫田州,殺掠萬計,城郭爲墟。 入,猛遂久留濬所。 及總鎭諸官攝濬,乃出猛襲知府。濬從索故分地,不得,怒,約泗城、東 濟兵二萬據舊田州,劫龍州印,納故知府趙源妻岑

氏。 道以括商 及總兵官詣田州勘治,黃驥懼,匿濟所。先是,濟築石城於丹良莊,屯兵千餘人,截江 利,官命毁之,不聽。 會官軍自田州還,乘便毁其城。 濟兵來拒,殺官軍二十餘

官軍敗之,俘其目兵九人。 總鎭及巡按等官請治濬罪,而參 |政武淸納濬賂,曲護之。

剿。 物,乃可 所能 調 機 而 剿殺 諭 今濬從弟岑業以 |濬從弟|業少從中官京師,仕爲大理寺副三司。 業亦奏乞養去。 責,宜敕鎭巡召濬至軍門,諭以朝廷威德, 赦。 幷將田 總督鄧廷瓚奏:「濬屢撫不服, 州 土官岑猛 山東布政司 十七 年,濬掠上林、武緣等縣, 幷區 参議在 [處,以靖邊疆。] 十六年,總督 內閣制 請調 敕房辦事 官軍土兵分哨逐捕按問 罪其首 總鎮請敕業往 死者不 一惡,反 ,禁密之地 可 勝計。 侵地, 潘蕃 諭 奏:「濬僭叛 ,恐有泄漏。」 , 納所 兵部以濬 又攻破 劫 如 集 印,并官私財 田 州 浜兵拒 稔惡,非業 當 吏部 猛僅 用 敵 兵 擬 以 詸 改 相

十八年, 總督 潘蕃 、太監 總鎭 幸經、總兵毛銳調集兩廣、 湖廣官軍土兵十萬八千餘人,分六

免,掠其家屬

五.

十人。

以聞,兵部

請調三廣兵剿之。

哨。 良, 捷聞,帝以蕃等有功,璽書勞之。兵部議濬旣伏誅,不宜再錄其後,改設流官,擇其可者。 前,援崖而 以雲南知府張鳳陞廣西右參政,掌思恩府事,賜敕。 捕四千七百九十級,俘男女八百人,得思恩府 印二,向武州印一。 左參將楊玉 都指揮李銘、泗城州土舍岑接由工堯,各取道共抵巢寨。 副總兵毛倫、右參政王璘由慶遠、右參將王震、左參將王臣及湖廣都指揮官纓由柳州, 進。 、僉事丁隆由武緣,都指揮金堂、副使姜綰由上林, 濬勢蹙,遯入舊城,諸軍圍攻之。 濬死,城中人獻其首,思恩遂平。 賊分兵阻險拒敵,官軍奮 都指揮何淸、參議詹璽 自進兵及班師僅踰月。 前後斬 勇直 由丹

正德七年增設鳳化縣治。

當設 化縣治於其處。 昏塞,宜更之爽塏。 列 王 加 思恩 一受與 綏 戢。 衛 時 地為 mi 初設流官,諸蠻未服,相繼 田 州 目把 并鳳化縣 九土 盧蘇 劉觀、盧回以復土爲名,鼓衆作亂 謀煽 巡檢司, 蓋寓犬牙相錯之意。 於是擇地荒田建新郡,割武緣止戈二 裁之,遂令府治益 亂,勢復 管以頭 熾。 目 作亂。 新建伯王守 ,授王受白山 巡撫林富謂遷郡及割止戈里應如守仁議,至 孤 嘉靖四年,都御史盛應期遣官軍平之。 其後 仁受命至,一意招撫,而檄受等破 九司 司 副使翁萬達因有事安南,計擒盧回殺之, 巡檢,得比於世官。 頭 目 旦益 日 恣 一之,又議割上林三里,而移鳳 ,所轄蠻民不堪,知府陳璜曲 又以思恩舊治瘴霧 八寨 六年,土目 以三里 、賊,因

七年,督撫吳文華謂九司日以驕黠,編氓甚少,緩急難恃,奏割南寧武緣縣屬思恩,自是思 回從亂者三十餘人。 最後東蘭岑瑄詐稱岑濬子起雲,謀復土官,爲九司頭目所縛。 萬 曆

恩稱巨鎭云。

日安定,日都陽,日古零。 思恩府土巡檢九司,皆嘉靖七年設,日興隆,日那馬,日白山,日定羅,日舊城,日下旺,

<u>鎮安,宋時於鎭安峒建右江軍民宣撫司,元改鎭安路。</u>

納。 如 折納 <u>鎭安僻處溪洞,南接|交阯,孤立一方,且無所屬。</u> 始到普安。 例。 石。 明洪武元年,鎭安歸附。 而普安荒遠,米不易得,民甚病之。 二十七年,添保上言:「往者征南將軍傅友德令郡民歲輸米三千石,運雲南普安衞 道遠而險,一夫負米三斗,給食餘所存無幾,往往以耕牛及他物至其地易米輸 今願依前例,以蘇民困。」從之。 以舊治僻遠,移建廢 又歲輸本衞米四百石,尤極艱難。 州縣人民鮮少,舟車不通,陸行二十五 凍州 ,改爲府。 授土官岑添保知府,朝貢 舊以白金 兩 H

永樂中,向武 傳 第 百 知州黄世 六 튡 西 鐵 土 侵奪鎭安高寨等地,朝廷遣兵討平之,以其地屬鎭安。 司

成化八年,知府岑永壽姪宗紹糾集土兵,攻破府治,殺傷嫡母,流劫鄉村, 有司撫諭不

服,都指揮學瑛擒斬之。

兵占據諸洞寨。 相託。 佐 金襲破鎭安。 臣曾守約以聞,帝命守臣治之。「弘時蘇倡亂,田州無主,鎭安府土官男岑眞寶以兵納岑邦 亦革冠帶,許立功自贖。二十二年以瑤、憧作亂,防禦需人,兎眞寶諸土官來朝。 於田州。 嘉靖十四年,田州盧蘇作亂,糾歸順州土官岑瓛攻毀鎭安府,目兵遇害者以萬計。 巡按御史言,土蠻自相讐,非有所侵犯,從末減。於是蘇、壩、仲金各降罰有差,眞寶 歸順州岑瓛,蘇壻也,及向武州黃仲金皆與眞寶隙,乘眞寶入田州,蘇造瓛及仲 <u>真寶聞亂,走還。</u>蘇會目兵追圍之武陵寨,殲等遂發眞寶父母墓,焚其骸,分 眞寶訴之軍門,督諭瓛等不退。久之乃解,官軍歸眞寶,於是瓛與眞寶互 按

<u>鎮安所屬有上映洞、湖澗寨。 巡檢皆土人,世官。</u>

置 田 州路軍 田州、古百粤地。 民總管府。 漢屬交阯郡。 明興、改田 州府、省來安府入焉。 唐隸邕州都督府。 宋始置田州,屬邕州 後改 田州 領縣 , 曰 横 上林 山寨。 元改

洪武元年,大兵下廣西,右江田州府土官岑伯顏遣使齎印詣平章楊璟降。 二年,伯顏

發,伯 遣使奉表貢馬及方物,詔以伯顏爲田州知府,世襲,自是朝貢如制。 顔討 平之。 伯顏 請振安州 、順龍州、侯州、陽縣、羅博州、 龍威寨人民,詔 六年,田 州溪峒蠻賊竊 有司 各給牛

米,仍蠲其稅二年。

思恩知州永昌朝貢,如例給賜 子永通爲千戶,統衆守禦,且耕且戰,此古人以蠻攻蠻之術也。」詔行其言。二十年,堅遣子 率其土兵,討捕瑤寇,多樹功績。 十六年,伯顏 死,子堅襲。 十七年,都指揮使耿良奏。「田州知府岑堅、泗州知州岑善忠 臣欲令選取壯丁各五千人,立二衞,以善忠之子振,堅之

賜 知府學紹誥命,并封贈其父母妻 永樂元年,堅死,子永通襲。 永通,上隆州知州也,州以瓊代,而己襲父職。 正統八年,

斬首 直濤 趙 向 勢愈 武 府 匹 州 天 + 順 城。 獗 四年,巡按御史吳禎奏:「奉敕剿捕反賊呂趙 一,殺知府<u></u>岑鑑,占據地方, 九 武進伯朱瑛以聞,兵部請 元 呂趙 級,賊衆悉降。 年,田州頭目呂趙爲稱敵 攜妻子, 挾知州岑鐸等宵遁。 趙 以數騎走鎭安府,追及之,斬趙及其子 命瑛及土官岑瑛剿捕。 **偽稱太平王,圖謀岑氏宗族,冒襲知府** 國 大將 軍,張旗 官軍追至雲南富 選調官軍土兵,攻破功饒 幟, 嗚鉦 三年,巡撫葉盛 鼓, 例 率衆劫掠南 四人,從賊十八人,獲 奪 回鐸等及 奏:] 職事。」帝命 、樊鳳 田州 丹州 其子 叛 著壻, 二關 總兵 目呂 叉據

列

傅

第

百

六

其妻孥及僞太平王木印、 人民。」田州平,帝遣使齎敕獎諭禛等,幷敕鏞謹守法度,保全宗族 無敵 將軍銅印,幷鳳旗盔甲等物。 復委知府岑鏞仍掌府事,撫安

剿 有勞,且有 成化元年,遣兵科給事中王秉彝齎敕諭鏞,并賜銀幣,以兵部言其所部土官 事於大藤峽也。 二年,總兵官趙輔奏鏞從征有功,請給誥命,旌其父母幷妻 「狼兵, 屢調

從之。

五年,復以輔言,予鏞官誥。

地

明 五 ,明敗走,爲恩城知州岑欽所執,幷族屬誅之。 十餘家。 十六年, 時泗城州岑應方恃兵强,復黨欽, 田 州頭目黃明聚衆爲亂, 知府岑溥走避 殺擄人民二萬六千餘, 已,溥復與欽交惡。 思思。 總督朱英調 與欽分割田 欽攻奪田 參將 馬義 州 州 ,逐溥,殺 率 而據其 軍 捕

已而 總督鄧廷瓚言溥前以罪革職,比隨征有功,乞復其冠帶,領土兵赴梧州聽調,從之。 蹙,乞兵於應,遂匿 欽 拒 應弟岑接佯以兵送欽至田州界,亦殺其父子以報。 敵,敗走。 弘治三年,總制遣官護溥之子號入田,爲欽所遏,居潯州。 而應復援之入城,陳兵以備。 應所,總鎭官因檄應捕欽。 巡撫 飲從應飲,殺應父子於坐,收其兵 秦紘請合貴州、湖廣 事聞,廷議仍命溥還田 按察使陶魯率官軍次南寧, 及 兩 廣兵剿之,欽勢 州 以拒 一官軍。 九

十二年,溥爲子號所弑,號亦自殺。

次子猛方四歲,溥母岑氏及頭目黃驥護之,赴制府

爲變, 告襲。 乞以兵納,乃調思恩岑濬率兵衞猛。濬受驥賂,納其女,挾猛,約分其六甲地。 歸至南寧,頭目李蠻來迎。 驥慮蠻奪已權,殺其使。蠻率兵至舊田州,驥懼,誣蠻將 比

田州 爲墟。 變。 會城。 接兵二萬先入田州,殺掠男女八百餘人,驅之溺水死者無算,括府庫,放兵大掠,城郭 ,蠻拒不納,驥復以猛奔思恩,幽之。事覺,廷瓚檄副總兵歐磐等攝濬,久乃出猛,置於 濟兵二萬攻舊田州,據之,殺掠男女五千三百餘人,蠻逃去。 得奏,命猛襲知府。驥、濬怒其事之不由己出也,要泗城岑接、東蘭韋祖鋐各起兵攻 副總兵歐磐、參政武清

等詣田州府勘治,遣兵送]猛還府。 **驥懼罪,匿濟家,有司請治濟罪。**

()蠻之迎猛也,無他念,及猛在外,蠻守土以待其歸。

初

|濬罪惡,正在逐捕,而田州||岑猛亦宜乘此區畫,降府爲州,毋基異日尾大之患,從之。 以致茲變。 清受濬賂,曲右之,且誣蠻占據府治,阻兵弄權,事竟不直。 |驥爭權首亂,濬、接、祖鋐黨惡, 於是廷瓚言思恩岑

才望者假以方面職銜,守田州,仍賜敕以重其權。 十八年,廷議以思、田旣平,宜設流官,岑猛世濟兇惡,致陷府治,宜降授千戶,而遴選 帝然之,於是以平樂知府謝湖爲右參政,

掌府 事

西極 時岑猛 邊率部 下 已降福建平海衞千戶,遷延不行。 立 功, 以便祭養,詔總鎭官詳議以聞。 及湖至,復陳兵自衞,令祖母岑氏奏乞於廣 總督陳金奏: 「猛據舊巢, 要求府佐,

列 傳

第

從征,猛所至剽掠。然以賊平故論功,遷指揮同知。非猛初意,頗怨望。 振 劉 不赴平海衞。 行稍 ,得旨,留猛 復侵旁郡自廣。嘗言督撫 參政 而 謝湖不卽赴任,爲猛所拒,納餽遺而徇其要求,宜逮問。」時猛遣人重路 褫 |湖 ,并及前撫潘蕃、劉大夏,猛 有調發,願立功,冀復舊職。 竟 2得以同 會江西盜起,都御史陳金檄猛 知攝府事。 猛撫輯遺民,兵復

者,乞量振給,免其輸稅。」從之。 正德十五年,猛奏:「田州土兵每征調,輒許戶留一二丁耕種,以供常稅。 其久勞於外

令其下 堯隆 以都 聞。 進,鏌偕總兵官朱麒發兵八萬,守以都指揮沈希儀、張經等統之,分道並入。 與鏌郤 猛 猛 是歸順,鴆殺之,斬首以獻 言接非岑氏後,據其祖業,欲得所侵地。 御 四年,提督盛應期、巡按謝汝儀 嘉靖二年,猛率兵攻泗城,拔六寨,遂克州治。 毋交兵,裂帛書冤狀 史姚鏌代,命懸金購猛。 ,乃誣饃之子淶納猛萬金, 廉得淶書獻之。 猛懼 京謀 出 奔,而 歸 ,陳軍門乞憐察。 順州 然鏌 議大征猛, 知 猛 無反 時方有上思州之役,徵兵皆不至,總督張嵿以狀 蟆不聽,督兵益急,沈希儀斬猛 心,猛· 條征 **奠惶恐,乃再疏請征。** 調 岑接告急於軍門,言猛無故興兵攻寨。 方奏辯,鏌亦欲緩 事宜,詔報可。 而應期以他事去,詔 師。 於是部趣鎮剋期 而巡按謝汝儀 長子邦彦 猛聞大兵至, 於工

六年,鏌以田州平,告捷京師,乃請改田州爲流官,幷陳善後七事,詔俱從之。

壁因請 甚衆。 入 而 猛 惠皆移疾他駐 聞 、據府城,燒倉粟以萬計。 成中陰爲內應,呼譟四出,官軍腹背受攻,力戰不支,突圍渡江走,賊逼其後,爭舟溺 在 ,且借交阯兵二十萬,以圖 鏌 留 仍檄湖廣永順、保靖兵併力剿賊。 賊沿江置闌索,伏藥弩,夾岸並起。 參議 一、惟經、熊兆在府,兵勢分,防守稍懈。 汪必東、僉事申惠、參將張經 御史石金上其事, | 興復。 蠻民信之,聚衆薄府城。 帝以四方兵數萬方歸休,豈可復調, 官軍且戰且行,抵向武,失士卒三四百人。 以兵萬人鎭 頗委罪前撫盛 於是逆黨盧蘇、王受等乃爲僞印 其地,知府王熊兆署 應期生事召釁,而 經出擊,兵少不敵,欲引還, 府 事 命再計 給事 o 會必東、 中 賊 鄭自 死者 逐

容逭。 姚鏌 恩城 寧 効, 且 ',併 以兵未集,姑受之以緩其謀。 , 執 時 責 力進 姑 盧蘇等雖據府叛,佯聽撫,遣人迎署府事 失事守巡參將等官立 知府吳期英、守備指揮 赦 剿。 前 過,益 帝 以蠻 圖 新 亂 日 功。 久, 鎭 功自贖。 乃起原任兵部尚書新建伯王守仁總督軍 門 巡官受命大征,未及殄絕,輒奏捷散兵,使餘孽復滋 祖蔭等。 遣諜者檄東蘭 復疏調 已而 湖 釋期英等,亦投牒上官,願聽招 廣水、保土兵 、歸順 王 一熊兆。 、鎭安、泗城、向武 而 其黨王受等糾衆萬餘,攻據 、江西汀、 務,同鏌討之。 贛 、諸土官,各勒 畬兵, 撫 俱 會於南 都 兵 御 自 史 思

物,護送期英於賓州,因招撫城中未下者。時受攻武緣甚急,參將張經堅壁拒守。 夫長章貴、徐伍等遣壯士由間道入城爲內應,夜引官兵奪門,殺賊二十餘人,收府印及庫 時受旣入思恩,封府庫,以賊兵守之,而自攻武緣。 鏌以聞 守巡官鄒輗等率兵至思恩,思恩千 鎭守頭

目許用與戰,斬其渠帥一人。

賊見援兵大集,乃遁去。

兵利害。 務,調兵數萬人至,諸蠻心懾。守仁至南寧,道中見受等勢盛,度亦未可卒滅,上疏 帝以田州、思恩賊鋒雖挫,首惡未擒,仍令守仁亟督兵剿撫。 兵部議以守仁所見未確,復陳五事,令守仁詳計其宜,於是守仁又疏云 守仁威名素重,及督軍 極陳用

田 與諸臣,摅心極論,今日之局,撫之爲是。 禍結兩省,已踰二年。今日必欲窮兵盡剿,則有十患。若罷兵行撫,則有十善。臣 臣奉命於去年十二月至廣西平南縣,與巡按御史石金及藩臬諸將領等會議。

告,願得歸境投生,乞宥一死。臣等諭以朝廷威德,令齎飛牌,歸巢曉諭,期以速降無 不易卽歸,仍使分留南寧,解甲休養,待間 蘇、受等得牌,皆羅拜踴躍,歡聲雷動。 臣抵南寧,遂下令盡撤調集防守之兵。數日內解歸者數萬,惟湖兵數千,道阻遠, 一而動。而盧蘇、王受先遣其頭目黃富等訴

尋率衆至南寧城下,分屯四營。 蘇、受等囚首自縛,與頭目數百人赴軍門請命。臣

武 杖爾者,人臣執法之義。」衆皆叩首悅服,願殺賊立功。 下蘇、受於軍門,各杖一百,乃解其縛。 等復諭之曰:「朝廷旣赦爾罪,爾等擁衆負固,騷動一方。若不示罰,何以雪憤?」於是 人,復委布政使林富等安插,於二月二十六日悉命歸業。是皆皇上至孝達順之德, 不殺之威,未期月而蠻民率服,不折一矢,不傷一人,而全活數萬生靈,卽古舞于之 又諭之曰:「今日宥爾死者, 朝廷好生之德; 必 臣隨至其營,撫定其衆七萬餘 神

疏聞,帝嘉之,遣行人齎敕獎賚。於是守仁復疏言:

化,奚以加焉

谷,瑶、憭盤據。 使盡誅其人,異日雖欲改土爲流,誰爲編戶?非惟自撤其藩籬,而拓 憤,以殲一隅,無論不克,縱使克之,患且不測。況田州外捍交阯,內屏各郡,深山絕 土開疆以資鄰敵,非計之得也。 地方臲卼,如破壞之舟,漂泊風浪,覆溺在目,不待智者而知之矣。必欲窮兵雪 思、田久搆禍,荼毒兩省,已踰二年。兵力盡於哨守,民脂竭於轉輸,官吏疲於奔

請降 州 知 州 田州府 今岑氏世効邊功,猛獨詿誤觸法,雖未伏誅,聞已病死。 武靖當瑶賊之衝,邦佐才足制馭,宜仍舊職。 爲 田州,而官其子,以存岑氏之後。查猛有二子,長邦佐 而今所建州,請以猛幼子邦相 臣謂治田州非岑氏不可, ,自幼出繼爲武靖

列

傅

第

九 授 吏 人爲之,以殺其勢。 目,署 州 事,俟後遞陞爲知州, 添設田寧府,統以流官知府,以總其權。 以承岑氏之祀。 設土巡檢諸司,即以盧蘇、王受等

從之。惟以守仁所奏岑猛子,與撫按所報異,令再覆。

名實 自 名愼始,杜後 出,次邦彥,妾林氏出,次邦輔,外婢所生,次邦相,妾韋氏出。猛嬖溺林氏而張失愛,故邦佐 幼出繼武靖。 (不正。 於是守仁言:「臣初議立岑氏後,該府土目及耆老俱言岑猛本有四子:長邦佐, 惟 日之爭也。」疏上,如議行 邦相 邦彦既死,邦佐得武靖民心,更代亦難其 係猛 正 派, 質貌厚重,堪繼岑氏。 故當時直謂猛子存者二人,亦所以正 人。 欲立邦輔,土目 謂 外婢所生, 妻張氏

制八 州 衞 居南 縣治於三里,添設流官縣於思龍,增築 於此 寨,遷八寨又不得以還護賓州。 初, 寧 八年,守仁於思、田旣議設流官,又議移南丹衞於八寨,改思恩府城於荒田, 、泗城,交通雲、貴、交阯,爲備 舉而 |邦相兄邦彦有子芝、依大母林氏、瓦氏居、官給養田。 夫設縣則割賓州之地以益思恩,是顧彼而 兩得也。 然不宜屬田州,而 爲今日計,獨上林之三里,守仁所議設縣者,可 非一,不宜改設流官。 五鎭 仍屬南寧爲便。」其議與守仁頗有異同,韶從富言。 城堡於五屯。 失此也。 及侍郎林富繼之, 南丹衛設在賓州,既 其後,邦相惡蘇專擅,密與頭 遷衞則扼八寨之吭以還護賓 叉言:「 改設 不 遷南丹 足以 田 州界 鳳化 遙

|州,而自悔罪,願裹糧立功,及追補累年所逋糧賦。 芝承襲未定,田州無主,致令隣封覬覦,當給劄付令芝管事。 處。[云]蘇之殺邦相也,歸順、鎭安、泗城、向武諸土官羣起搆難,互相訐奏。 等,以兵圍邦相宅,誘邦相出,乘夜與瓦氏縊殺之。 州 目 盧玉等謀誅蘇及芝。 赴軍門告襲,蘇又爲芝疏請。 蘇知之,會邦相又侵削二氏原食莊田,二氏遂與蘇合謀,以芝奔悟 尋令人刺 邦相, 邦相覺,殺行刺者。 巡按御史曾守約以聞,帝命守臣亟 巡按御史諸演疏聞,部議以土蠻自相 蘇又請早給芝冠帶, 而蘇遂伏兵殺盧 當事者謂以岑 以撫 爲 勘 田

賞。 剿倭,隸於總兵兪大猷麾下。 奏令思恩守備張啓元暫駐田 四十二年以平廣西瑤、僮功、准岑大祿實受知 三十二年,芝死,子大壽方四歲。 州鎭之,報可。 以殺賊多,詔賞瓦氏及其孫男岑大壽、大祿銀幣,餘令軍門獎 土人莫葦冒岑姓,及土官岑施,相煽搆亂, 三十四年,田州 州 職 土官婦瓦氏以狼兵應 調至蘇 提督郎檟 州

殺

,當從末滅,皆令立功,方准

贖罪復官

等,[10]糾衆破城,擅殺土官黃德勳,擄其妻女印信,乞正其罪。」詔令岑懋仁速獻印,執送諸 功優敍,從之。 犯,聽按臣 泰昌 元年,總督許弘綱奏:「田州土官岑懋仁 · 一分別正法,違則進剿。 天啓二年,巡撫何士晉請觅懋仁逮問,各率土兵援剿,有 肆惡起 釁,窺占上林,納叛 人黃德隆

八二五四

田 州世岑氏 ,改流者再,而終不果。 盧蘇再叛弑主,終逸於罰,論者以爲失刑云。

縣,流官典史佐之。 上林在田州 東,宋置, 隸橫山寨。 元屬田州路。 洪武二年,土官黃嵩歸附,授世襲知

官鞫理。弘治三年,欽復入田州,與泗城土官岑應分據其地。巡撫秦紘請調兵剿之。〔三〕兵 部言兵不可輕動,惟令守臣諭令應縛飲自贖。五年,欽走岑應所借兵,總鎭檄應捕之,欽 <u></u>欽,田州土官岑溥叔也,相讐殺。 溥敗,欽入田州,焚府治,大肆殺掠。 遂殺應父子。 恩城州,唐置,宋、元仍舊。明初因之,隸廣西布政司,朝貢如例。 已而應弟接佯以兵送歐,亦殺歐父子。 有司以恩城宜裁革,從之,州遂廢。 溥愬於制府,下三司 成化十九年,知州岑

州岑永通遣從子岑安來貢 宣德四年以陳氏爲知州。 上隆州,宋置,隸横山寨。 ,賜綺帛鈔錠。 時瓊已卒,無子,土人訴於朝,願得陳氏襲職,故有是命 元屬田州路,明因之。 洪熙 元年,土官知州岑瓊母陳氏來朝,貢馬,賜鈔 後改隸布政司。 洪武十九年,上隆 知

都康州,宋置,隸横山寨。元屬田州路。洪武間,爲蠻僚所據。三十二年復置,隸布政

司。 土官馮姓。 其界東南抵龍英,西至鎮安,北至向武。

校勘記

- □ 舊名邦兜 邦兜,讀史方輿紀要卷一一○作「那兜」。
- 宋置結安峒 結安峒,原脱「結」字,據上文及寰宇通志卷一一〇、明一統志卷八五改。
- 總督戴耀奏 戴耀, 神宗實録卷四〇五萬曆三十三年正月壬辰條、 **國権卷八○頁四九三六作**

「戴燿」。

- 宋屬永平寨 永平寨,原作「承平寨」,據寰宇通志卷一一〇、明一統志卷八五改。
- 豇 總督蔡經屬副使翁萬達擒之蔡經,本書卷一九八翁萬達傳作「張經」。按卷二〇五張經傳稱, 「初冒蔡姓,久之乃復」,是張經亦稱「蔡經」。
- 大」按臣曾守約以閩帝命守臣治之 靖六年三月乙未條。第二次卽本傳所述,見世宗實録卷一八二嘉靖十四年十二月丁未條。此 條稱「巡按御史曾守約以聞」,「命守臣亟爲議處」。傳文將二事混作一事,故有此誤。且王守仁 首次在嘉靖六年,御史石金以聞,命新建伯王守仁鎮壓之,見下文田州傳及世宗實録卷七四嘉 守臣,原作「新建伯王守仁」。按田州盧蘇反抗事,前後二次。

列

傳

第二百

六

校

勘記

卒於嘉靖七年,安得預卒後事。今改正。

しより 鏌偕總兵官朱麒發兵八萬 朱麒,原作「朱麟」,據本書卷二〇〇姚鏡傳、 世宗實録卷五一嘉

靖四年五月甲戌條、行邊紀聞改。

沈希儀斬猛長子邦彦於工堯隘 工堯隘,原作「工堯隧」,據本書卷三一九歸順州傳、 行邊紀聞

改。

へた し 帝命守臣亟爲勘處 守臣,原作「守仁」,據世宗寶録卷一八二嘉靖十四年十二月丁未條改。

(10) 納叛人黄德隆等 黄德隆,原作「黄得隆」,據本書卷二四二陳邦瞻傳、光宗實録泰昌元年九

月甲午條改。

巡撫秦絃請調兵剿之 秦紘,原作「秦竑」,據本書卷一七八秦紘傳改。

明史卷三百十九

列傳第二百七

廣西土司三

泗城、利州 龍州 歸順 向武 奉議 江州 思陵 廣東瓊州府附

泗城州,宋置,隸横山寨。 元屬田州路。 其界東抵東蘭, 西抵上林長官司,南抵田州,

北抵永寧州。

物,詔賜以鈔錠。

列傳

第

二百

废

西土司

Ξ

子振作亂,寇利州,廣西都司討平之。 洪武五年,征南副將軍周德興克泗城州,土官岑善忠歸附,授世襲知州。 十四年,善忠來貢方物。 二十六年,振遣人貢馬及方 十三年,善忠

氏奏,襲職土官岑豹率土兵千五百餘人謀害己,又棄毀故土官岑瑄塑像,所爲不孝,難俾襲 宣德元年,女土官盧氏遣族人岑臺貢馬及銀器等物,賜賚有差。 八年,致仕女土官盧

八二五七

所信 職。 肆侵擾。」兵部請從雲奏。 公判決。 服,應襲職 豹叔利州知州顏亦奏豹興兵謀殺盧氏,州民被害。 盧氏,瑄妻,豹伯母,初借襲,今致仕,宜量撥田土以贍終身。 帝命行人章聰、侯璡齎敕,諭雲會三司巡按究豹與盧氏是非,從 都督山雲奏:「豹實故 土官瑄姪,人 仍請敕豹無

逆,則率兵剿捕。」從之。八年,別遣人奉貢,賜綵幣。十年,別復奏顧占據其地,帝令速予 總兵官親詣其地,令速還所侵掠,如不服,相機擒捕。六年,總兵官柳溥奏:「三「行人恕、昇 瑄 固 易泗城、古那等甲,開設利州衙門,宜從其請,發附近官軍送顏赴彼撫治蠻民。 同廣西三司委官諭別退還原占利州地,豹時面從,及回,占如故。今顏欲以利州、利甲等莊 議處,不可因循,貽邊方害。 女亦奏豹占奪田地人民,囚其母盧氏。 亦不易,其更遣人諭之。」五年,顏奏剛侵占及掠擴罪。,頭目黃祖亦奏剛殺其弟,籍其家。 不服,增兵拒守。 正統元年, 豹遣人入貢。 二年, 豹攻利州, [1] 掠其叔顏妻子財物。 雲以聞,乞發兵剿之。 帝復遣行人朱昇、黃恕齋敕諭之,幷敕廣西、貴州 帝敕雲曰:「蠻夷梗化,罪固難容,然興師動衆, 朝廷官至撫諭,負 倘豹仍拒

如此,宜調兵擒捕,明正典刑。」從之。 成化元年,豹聚衆四萬,攻劫上林長官司,殺土官岑志威,據其境土。兵部言:「豹强獷 未幾,豹死。

占鄰 城 連 欽 地 年 攻 (奪田 廣 · 壌及 搆 弘治 兵多,宜選頭目,量授職銜,分轄以殺其勢。」詔下總鎭官區處。 禍 社官印信數多,亦宜勘斷,以除禍本,幷令應弟接退還侵地及印信,乃許承襲。 州 ,而應黨之,復據上林長官司,流毒不少,今天厭禍,假手相殘,實地方之幸。 三年,土官知州岑應復據上林長官司及貴州鎭寧等處一十八城。 府,逐知府岑溥。 應與飲黨,旣復相讐,兩家父子交相讐殺。 接遣人朝正,賜綵緞 事 聞、兵部 時 恩城 奏『欽 土官岑 應所 泗

則 以圖報効。」廷臣議:「劫印侵地,雖係接祖父罪,然再四撫諭,接不肯歸之於官,遽使襲職, 志益驕,非馭土官法。」 年, 總督鄧廷瓚奏:「接往年隨征都勻、府江等處有功,乞略其祖父罪,令承襲世職,

|驛 因敕接· 記,遂據興仁。 十二年,田 自備 兩月餉 州土目黃驥作亂 り剋期 十四年,贵州賊婦米魯作亂,提督王軾請調接領土兵二萬營於砦布河 赴 調 ,要接爲聲援, 殺掠! 男婦,劫燒倉庫民廬,又劫府學及橫山

孫滅亡殆盡。其弟接,衆推 | 豹乃叛臣餘孽,子應復自 十八年,泗城土官族 人岑九仙奏:「自始祖岑彭以來,世襲土官。至豹子應罹 取 護印 滅亡。今接者,人皆傳稱爲梁接,非應親枝,又不知岑九仙是何 ,累著勞勩,乞令襲職,俾掌轄蠻衆。」兵部尙 書劉 大夏等議 欽之禍,子

列

府之祖: 前已令鎭巡官勘奏,岑九仙雖蠻人難以深究,亦當摘發以破其奸。」從之。 逋逃,冒爲奏擾。臣<u>大夏先在兩廣,見岑氏譜。</u>岑之始祖木納罕於元至正年間,與田州知 伯顏,一時受官。今九仙妄援漢岑彭世次,塵瀆聖聽,請治其罪。其岑接應襲與否,

正德十二年,泗城及程縣各遣官族來貢。後期,賞減半。 泗城貢厚,仍全給之。

嘉靖二年,田州岑猛率兵攻泗城,拔六寨,進薄州城,克之。接告急軍門,言猛無故攻

猛言接非 人氏後,據其祖業,欲得所侵地。 韶下勘處。

華等司,時出擴掠,官軍剿之,豹等遁去。 舍施襲替,免赴京,以嘗聽調有勞也。隆慶二年,泗城蠻黃豹、黃豸等據貴州程番府麻嚮、大 十六年,田州盧蘇作亂。 泗城土舍岑施以兵納岑邦佐。 兵敗,弗克納。 二十七年詔土

銜,戴罪管事。 雲漢乃紹勳 扶弟以奔, 萬曆二年,泗城土官岑承勳等貢馬及香鑪等物。 嫡嗣,紹勳龍庶孽雷漢,頭目黃瑪等從中煽禍,以至焚劫稱兵。 撫按以聞。 詔 可。 天啓二年,巡撫何士晉請復雲漢知州 廷議請釋紹勳罪以存大倫,杖雷漢、黃瑪等以息囂孽,雲漢從寬削 四十一年,土官岑雲漢貢方物。 職,量加都司職銜,令率土兵 雲漢紿母出印, 初,

泗城延袤頗廣,兵力亦勁,與慶遠諸州互相雄長。 其流惡自別而應而接,且三世。 領

援黔。

從之。

那 服。 史攝印,旋亦罹害。 戶一 地俱欲得之,時治兵相攻云。 嘉靖二年,接爲諸土官攻殺,督府遣官按問,得縣印,貯於官,後僅存荒土。泗城 里。後改屬慶遠府,尋復隸 程縣在泗城州之東北,舊號程丑莊。 豹逐 奪其印 **松泗城州** ,據縣治。 ,設流官知縣。 明初歸附,隸泗城州。 事聞,屢遣官諭之,歷岑應、岑接凡七十餘年不 正統 間,爲岑豹 洪武二十一 所逼, 年改爲 棄官遁 去, 縣, 編 典

洪武 永樂元年設安隆長官司,以子得爲長官,撫其衆。十二年貢馬,賜鈔幣,予世襲。 元年,泗城州土官岑善忠以次子子得領安隆峒。三十年,子得來朝,貢馬。 安隆長官司,東抵泗城,西抵雲南,南抵上林長官司,北抵貴州宣慰司,元泗城州地也。 設治所。

州 威,滅其族,劫印,占其境土。 司 年,子成遣子保貢方物,賜鈔幣,自是貢賜不絕。 遣頭目入貢 明興因焉。 上林長官司,東北俱抵泗城界,西抵安隆長官司,南抵雲南。 ,禮部以過期至,給半賞。 永樂初置長官司,以泗城州土官岑善忠三子子成爲長官,撫其民。 兵部移文議豹罪, 旣而泗城岑應復奪據上林長官司,然正 仍以 成化元年, 地 與印 給上林。 泗城岑豹攻劫上林, 宋、元號上林峒, 弘治三年, 、嘉、隆、萬 上林長官 殺長官志 屬泗城 永樂 几

列傳第

百七

废

西土

司

Ξ

間 朝貢猶時至

利州,漢屬交阯,號阪麗莊。 宋建利州,隸横山寨,元因焉。土官亦岑姓,洪武初歸附。

授知州,以流官吏目佐之,直隸布政司。 宣德二年,利州知州岑顏遣頭目羅嚮貢馬

正統元年,泗城岑豹侵據利州地,并掠顏妻子財物。

總兵官山雲以聞,帝敕鎭、巡官撫

諭之。 遂以流官判州事。 |豹復與顏相仇殺,帝敕總兵官吳亮宣布恩威,令各罷兵,而別終殺顏及其子得,奪州印去, |覃被囚,妻財被掠,累奉敕撫諭,猖獗不服。」帝遣行人||黃恕、||朱昇敕諭||豹,事具前傳。 四年,顏遣族人岑忻貢銀器方物。 數十年間,屢經諸司勘奏,移檄督追,歷岑應、岑接二世如故。 五年,顏奏:「本州地二十五甲,被別興兵攻占,母 七年,

嘉靖二年歸併泗城。

洪武二年,龍州土官趙帖堅遣使奉表,貢方物。 龍州,古百粤地。 漢屬交阯。 朱置龍州,隸太平寨。元大德中,陞州爲萬戶府。 韶以帖堅爲龍州知州,世襲。八年改

報下 隸廣西布政司。〔三〕時帖堅言:「地臨交阯,所守關隘二十七處,有警須申報太平,達總司 涉 旬月,恐誤事機,乞依奉議 、泗城 二州,隸廣西便。」從之。 十六年,帖堅以孝慈皇 此

后喪,上慰表,貢馬及方物,賜綺帛鈔錠有差。

|壽勿問,下吏議帖堅妻與圓泰罪,旣而以遠蠻俱釋之。 諸物,又欲併取龍州之地。 乃自至京,告宗壽實從子,不應襲,宗壽亦上章言狀。 帝乃詔宗 堅妻惶懼,使人告宗壽擄掠,又與圓泰謀劫茂妾幷其奴婢往太平州,又盡掠趙氏祖父官誥 亦肆侮宗壽。宗壽乃與把事等以計取土官印,上奏,言茂已死,幷械觀海等至京。於是帖 職,帖堅妻猶持土官印,與茂、圓泰專擅州事,數陵逼宗壽。 謫居龍州。[B] 帖堅妻黃氏有二女,一爲太平州土官李圓 一十一年,帖堅病,無子,以其從子宗壽代署州事。 泰妻,茂納其一爲妾。 帖堅卒、宗壽襲。 會茂以病卒,其閣者趙觀海等 鄭國公常茂以罪 時宗壽 雖襲

Ł 諭宗壽捕茂,延玩使者 其妻與茂結 民,言:「昔鄭國 以 功 外之,復有人告<u>茂</u>匿龍州未死,前宗壽所言皆妄。 臣 子, 爲婚姻,誘合諸蠻,肆爲不道。 猶 公常茂有罪, 加 憐憫, **久不復命**,其意莫測。 釋二人告訐罪。 上以開平王之功,不忍遽置於法,安置龍州 今有人言茂實未死,宗壽等知狀。 帖堅姪宗壽襲職, 特命榜論爾宗壽等知之,如茂果存,則送至京 遂詔右軍都督府榜諭宗壽及龍州官 與黃氏 互相告託, 土官趙帖堅故, 已遣散騎 言茂已死 含人

কা

傳

第

師 以贖罪,如茂果死,宗壽亦宜親率大小頭目至京,具陳其由。」

秋初俱 謝 吳高 龍州 變。 朝,乞罷 親 爲 岩 罪,貢 來 唐 將軍 2鐸往 見,具陳茂已死之由,則宥其罪。若詐遣人來,則進兵討之。旣,鐸還京,言宗壽伏 領之,柳州衞 趙宗壽之故,令陳日焜愼守邊境,毋助逆,勿納叛。 師行,帝撰文遣使祭嶽鎭海瀆,復遣禮部尚書任亨泰、監察御史嚴震直使安南,諭以討 廣 赴 西 方物 兵 ,劉眞 廣 諭宗壽,訖不從命。 布 勿 西。命都督楊文佩征南將軍印,爲總兵官,都指揮韓觀爲左將軍,都督僉事宋晟 政司言宗壽屢詔赴京,拒命不出,又言南丹、奉議等蠻梗化。帝復命致仕兵部尚 征 爲參將,率京衞馬步軍三萬人至廣西,會討龍州及奉議、南丹、向武等州叛 韶文移兵於奉議,仍命鐸至軍參軍 兵千人,安陸侯吳傑領之,皆令其建功自贖。又詔文等,如兵至龍州 詔發湖廣、江西所屬衛所馬步官軍六萬餘,各齎三月糧,期以 事。 遣人諭文調南寧衞兵千人,江陰侯 宗壽偕耆民農里等六十九人來朝 、宗壽 罪

遺腹。 官岑濬率兵攻 後者。以源庶兄浦有二子,相 宗 <u>|</u> | 岑氏特兄子猛方兵雄, | 楷遂奏言, | 璋實源子,當立,爲相所篡。 壽 死,子景升襲。 田州 回,劫 龍州,奪其 景升死,無嗣,以叔仁政襲。 居長當立。 印,納故 相弟楷 知 府源妻岑氏。 不能 無望,則謀於岑氏,以僕 仁政再傳爲趙源,源死無子。 韶下 鎭巡官剿賊,而 事下督府勘、未決。 韋隊 議立 子 璋詭云 思 思 爲 源 土

璋賂鎭 村。 都 守太監傅倫舍人, 御 史楊 旦討 璋,猛 殺之, 詭稱有詔, 檄猛調二萬兵, 納璋入龍州。 相乃歸。 相 二子,長燧,次寶。 相枝 左江 拇, 寶亦 大震, 枝 相擊印奔況 拇 **; |相 絕

之,曰:「肖我當立。」猛乃以寶去,髠爲奴。

朝 州 所。 言楷當 高 攝 千人夜 家十三年矣, 自援。 村。 締好,乞兵爲 職,俟寶長讓之。 用 事 寶妻黃氏,思明府土官黃朝女也, 嘉靖元年,相死 立,以 至 ,楷賂伯高,言煖非趙氏裔,當立者楷也。 楷計寶弱易與,不如邀厚利而徐圖之,遂聽命。 寶寢門呼良,良開門納楷兵,執寶寢所,斬之, 州 安等行百金購得之。言之督府,都御史林富謂楷勢已張,毋持之急,乃令楷 衞 印畀楷。 楷復時時謀殺寶。 ,州人立燧。 寶 日荒悍,刑狡男子王良 楷遂殺煖,龍州大亂。 楷弑之,州人立其族弟煖。 貮 富諭楷,令以印還寶,寶謝以五 (於寶 爲 而 閽 州目黃安等潛往田州購寶。 與 遣上 應通。 楷 思州知州黃熊兆覈之。 知良恨寶,激使內應,良許 楷復求韋璋之子應育之, 以他盜聞。 應乃厚結州目,又數遣 時王守仁提督兩廣,幕客岑伯 應以兵千人據州 一千金,益以腴田三十 寶時爲奴楊布 熊兆黨伯高 令往 之。 人與 向 來 楷 寶 武

擒 斷 都 其中 御 史蔡 堅, 經 然 屬 後 副 可 次第 使翁萬達謀之。 獲, 督撫 ※善之。 萬達 萬達 謂楷狙詐, 行部至太平,使人以他 未可 速圖 章應巽懦· 事 召朝 寡慮, 諭 之計,論 미 日

見,伏壯士劫之,曰:「汝罪大,宜自爲計。誠死,尚可爲爾子留一官。」楷自分無生理,乃手 應當死,言楷才勇,正須藉爲龍州當一面耳。時諸言楷事者,故不爲理,州人大譁。萬達愈 龍州趙氏仍得襲。 書諭其黨曰:「業已如此,亂無益也,可善輔我子以存趙。」萬達卽杖楷,斃之,以楷書諭 厚楷,楷信之,遂統精兵千人詣萬達言狀,幷以三十一村地獻。 時楷子匡時,生四年矣,立之,一州悉定。 乃以十三村還龍州,十八村隸崇善縣,於是 萬達召楷及州目鄧瑀等入 其州

其峒主岑瑛每効勞於官,乞設州治,授以土官知州。 凡出兵令備土兵五千,仍歲 領 土 兵 瑛、屢率兵報効。 歸順州,舊爲峒,隸鎭安府。永樂間,鎭安知府岑志綱分其第二子岑永綱領峒事,傳子 弘治九年,總督鄧廷瓚言:「鎭安府之歸順峒,舊爲州治,洪武初裁革。

猛,召都指揮沈希儀謀。希儀雅知璋女失寵,恨猛,又知部下千戶趙臣雅善璋。 璋多智略。 田州岑猛以不法獲譴,都御史姚鏌將舉兵討之。璋,猛婦翁也。 希儀因使趙 鏌慮璋黨

臣語璋 封之。 別館,使人請猛。 應矣。」時田州兵殊死拒戰,諸將莫利當隘者,希儀獨引兵當之。 故,且與 「敗矣!」田州兵驚潰,希儀麾兵乘之,斬首數千級,邦彦死焉。猛聞敗,欲自經。 障旣知猛印所在,乃鴆殺猛,斬其首,并府印函之, 間道馳軍門。 圖猛,璋受命。 爾同禍。 時隘倉皇不知所出,遂挈印從璋,使走歸順。 今發精兵來,幸努力堅守。」邦彦欣納之。 時猛子邦彥守工堯隘,璋詐遣兵千人助邦彥,言:「天兵至,以姻黨 |璋遣人報||希儀曰:「謹以千人內 璋詭 約戰三合,歸順兵大呼曰: 爲猛草奏,促猛出印實 爲讒言所阻,竟不 而 璋先已築

帶,許立功贖。 從之。 障死,次子殲襲。嘉靖四年,提督盛應期以瓛先助猛逆攻泗城,許自新,出兵討賊自贖。 十四年,田州盧蘇叛,糾瓛攻鎭安府。 | 蹴後從征|| 交阯,卒於軍。子|| 代襲,萬|| 層間以貢馬違限,給半賞。 蠍破鎭安,幷發岑眞寶父母墳墓。 事閒,革冠

論功。

洪武二年七月, 向武 州,宋置,隸横山寨。 土官黃世鐵遣使貢馬及方物 元隸田州路。 其界東北抵田州 (金) 韶以世鐵為向 ,西抵鎭安,南抵 武州 知州,許 世襲。

一十一年,廣西 布政司言向武 州叛蠻梗化。 時都督楊文佩征南將軍印、討龍州、奉議等處,

復奉命移師向武。 文調右副將軍韓觀分兵進討都康、向武、富勞諸州縣,斬世鐵。 以兵部

尚書唐鐸言、置向武州守禦千戶所。

永樂二年,土官知州黃彧遣頭目羅以得貢馬,賜鈔幣。 宣德四年,故土官知州黃謙昌

子宗蔭貢馬,賜鈔。

嘉靖四年,田州岑猛叛,向武土官以兵助猛。 提督盛應期議大征,檄向武出兵討賊,以

功贖罪。

職,免赴京。 怨眞寶,遂與合兵,破鎭安。 十六年,田州盧蘇叛,鎭安土官岑眞寶以兵納岑邦佐,蘇求助於向武。 四十二年,又以剿平瑶寇功,加仲金四品服。 事聞,革仲金冠帶。 二十七年,以仲金聽調有勞, 時 韶許承襲原 土官黃仲金

初,省武林入焉。 向武領縣一,日富勞,元置。 土官亦黃氏世襲。 洪武間, 爲蠻僚所據。 建文時復置,仍隸向武州。 永樂

奉議州 宋置。 初屬靜江軍,後屬廣西經略安撫司。 元屬廣西兩江道宣慰司。

洪武初,土官黃志威舊爲田州府總管,來歸附。 二年詔授其子世鐵爲向武州知州, 世

侯州 襲。三年,志或入朝貢。六年招撫奉議等州百十七處人民,皆款服。 、陽縣屬之。 七年 以志威爲 奉議州 知州兼守禦,直隸廣西行省。 帝嘉志威功,命以安州、 二十六年, 奉議州知

州黃嗣隆遣人貢馬及方物,賜以鈔錠。

從者。 遂平。 官黃世鐵弁其黨萬八千三百餘人,招降蠻民復業者六百四十八戶,徙置象州 韓觀等遂分兵追討都康、向武、富勞、上林諸州縣,破其更吾、蓮花、大藤峽等寨,斬向武 **| 真等領兵分道攻南丹叛寇。初,文等駐師奉議州之東南,分兵追捕賊黨,且遣人招降其脅** 征。 流 移兵奉議剿賊,遣使諭文等:「近聞奉議、兩江溪峒等處,林木陰翳,蛇虺遺毒草莽中,雨過, 勢,置奉議等衞幷向武、河池、懷集、武仙、賀縣等處守禦千戶所,設官軍鎭守。 爾等其愼察之。」文發廣西都司及護衞官軍二萬人,調田州、泗城等土兵三萬八千九百人從 毒溪澗,飲之令人死。師入其地,行營駐劄,勿飲山溪水泉,恐餘毒傷人。 師至奉議州,蠻寇聞官軍至,悉竄入山林,據險自固。文督諸將分兵捕之,復調參將劉 二十八年,廣西布政司言,奉議、南丹等處蠻人梗化。時都督楊文討龍州,伏罪,帝命 宣德二年,署州事 賊皆焚廬舍,走山谷,憑險阻立栅自固。」文督將士屢攻破之,賊衆潰散。 時兵部尙書致仕唐鐸參議軍事,以朝廷嘗命征剿畢日,置衞守之。 土官黃宗蔭遣頭目貢馬。「私」正統五年,宗蔭科斂劫殺, 乃會諸將 武 宜鑿井以飲, 甚且欲戕其 韶從 山 縣 左副將 其言。 相 蠻寇 度形 土

八二七〇

母。 母避之,殺母侍者以洩怒,爲母所告。 **愈事鄧義奏其事,帝敕總兵官柳溥及三司按驗**

以聞。

田州 出兵討賊,以功贖罪。 嘉靖四年,田州岑猛叛,奉議土官嘗助猛攻泗城州。 ,獨南界鎭安,其勢甚蹙。 後土官知州死,皆以土判官掌州事。 明初置衞,銓官如宋、元故事,蓋欲中斷田、鎭,以伐其謀云。 至是提督盛應期言,許其自新,令 論者以奉議彈丸地,三面交迫

江州界,東抵忠州,西抵龍州,南抵思明, 北抵太平府。 其州宋置,隸古萬寨。 元屬思

明路。

年,以平路、僮功,准江州土官子黃恩暫署本職 明初,土官黃威慶歸附。 授世襲知州、設流官吏目以佐之、直隸布政司。 嘉靖四十二

領縣一,日羅白。 洪武初,土官梁敬賓歸附,授世襲知縣。 敬賓死,子復昌襲。 永樂

間,從征逐阯被陷,子福里襲。

二十七年, 思陵州 土官韋延壽貢馬及方物。 ,宋置,屬永平寨。 元屬思明路。 宣德四 年,護印土官韋昌來朝,貢馬,賜鈔幣。 洪武初,省入思明府。二十一年復置思陵州。 正統

其界東至忠州

,西北至思明,南至交阯

間,貢賜如制。

具前史。元改置瓊州路,屬海北海南道宣慰司。 , 居環海中。 漢武帝平南粤,始置珠崖、儋耳二郡。 歷晉、隋、唐、宋叛服不一 天曆初,改乾寧軍民安撫司。

洪武 元年,征南將軍廖永忠平廣東,改乾寧安撫司爲瓊州府,以崖州吉陽軍、儋州萬安

軍俱爲州,南建州爲定安縣隸焉。〔日〕

等作 儋州黎人 之,送京師。 儋州宜倫縣 旺等討平之。 調 兵剿。 亂,陷陵水縣,爲海南衞官軍擊敗,追至藤橋 六年,儋州宜倫縣民陳昆六等作 符均勝等作亂,海南衛指揮張仁率兵討平之。又海南羅屯等洞黎人作亂,千戶周 黎民唐那虎等亂,海南衛指揮張信發兵討之。 其儋、萬二州,山深地曠,宜設兵衞鎭之。」詔置儋、萬二州守禦千戶所。 知州 澄邁縣賊王官舍亂,典史彭禛領民兵捕斬之。 魏世吉受賄 ,縱銀去。 亂,攻陷州 帝謂兵部曰:「知州不能捕賊,及官軍捕 城。 ,斬鼎叔等三百餘人,餘黨悉平。 廣東指揮使司奏言:「近儋州山 那虎及其黨鄭銀等敗遁,信追擒 十 ·五年, 萬、崖 二州民陳鼎叔 至而 十七年, 賊 七年, 反縱 亂,

列

傅

第

百

七

废 西 土

之乎。」命遣力士卽其州杖世吉,責捕所縱者。

潘隆本齎敕 |黎歸化者,免稅三年;峒首則量所招民數多寡授以職。 賢祐,量授以官,俾招諭未服,戒約諸 罹 甚且引誘 言:「瓊州周圍皆海,中有大、小五指,黎母等山,皆生熟黎人所居。比歲軍民有逃入黎洞者, 餘戶,俱已向 其瘴毒,鮮能 永樂三年,廣東都司言:「瓊州所屬七縣八洞生黎八千五百人,崖州抱有等十八村一千 生黎,侵擾居民。朝廷屢使招諭,黎性頑狠,未見信從。、又山水峻惡, へ 無 論 化,惟羅活諸洞生黎尚未歸附。」帝命遣通判劉銘齎敕撫諭之。 全活。 近訪宜倫縣熟黎峒首王賢祐,嘗奉命招諭黎民, 峒,無納逋逃。 其熟黎則令隨產納 如此庶幾黎人順服。」從之。 歸化者多。 稅,悉発差徭;其生 御史汪俊民 風氣亦異, 遣知縣 請仍詔

昌縣斬脚寨黎首周振生等來歸,賜以鈔幣,俾仍往招諸峒。 賢祐、王惠、王存禮等來朝,貢馬。 |Щ 撫 銘 院臨 招 撫。 四 高 仍授顯等知縣、縣丞、巡檢等官,賜冠帶鈔幣,遣還。 年,瓊州屬縣生黎峒首羅顯、許志廣、陳忠等三十三人來朝。 諸縣生黎峒首王罰、鍾異、王琳等來朝,命爲主簿、巡檢。 至是向化者萬餘戶,顯等從銘來朝,且乞以銘撫其衆。 命賢祐爲儋州同知,惠、 存禮爲萬寧縣主簿。八年,文 九年,臨高縣典史王寄扶奉命 自是諸黎感悅,相 六年,銘復率土黎峒首王 帝遂授銘瓊州 初以生黎多未 繼 知 來 府,專職 向化,遣 歸 瓊

黄茂 Щ 招至生黎二千餘戶,而以峒首王乃等來朝。 縣 奉 東 洋都 命招撫深峒、那呆等二十四峒生黎,率黎首王聚、符喜等來朝貢馬,黎民來歸者戶四 通計前後所撫諸廖共千六百七十處,戶三萬有奇,蓋皆本廟算云。 民周孔洙招諭包黎等村黎人王觀巧等二百三十戶,願附 命寄扶爲縣主簿,幷賜王乃等鈔。 籍爲民。從之。 + 年,瓊 臨高民

海南, 治數人,黎人遂安。 有寇城邑殺良民之惡,不足煩官軍。」衞將不從,伯貞乃遣寧遠縣丞黃童按視。 以私忿相戰鬭,衞 年,感恩土知縣樓吉祿率峒首貢馬。十九年,寧遠土縣丞邢京率峒首羅淋朝貢。 慕義來歸,若朝貢頻繁,非存撫意。 四年,王賢祐率生黎峒首王撒、黎佛金等來朝貢,帝嘉納之。命禮部曰:「黎人遠處 將利漁所欲,發兵剿之。 瓊州知州王伯貞執不可,曰:「彼自相仇殺耳,非 自今生黎土官峒首俱三年一貢,著爲令。」十六 果仇殺,逮 時崖州民

王觀 從賊二百六十二人,斬首二百六十七級,餘衆潰,奔走入山,招撫復 實討之。 黎人居海島,不識 宣德元年, 珠、瓊山 二年,指揮王瑀等追捕黎賊,兵至金鷄嶺,賊率衆拒敵,敗之,生擒賊首王 縣黎王觀 樂會土主簿王存禮等遣黎首黎寧及萬州黎民張初等來貢, 政等聚衆殺瓊山土知縣許志廣,流劫鄉村,殺掠人畜,命廣東三司 禮儀,叛服 不常,昔專設官撫綏,今來朝 ,當加賚之。」九月,澄邁縣 一業黎八百一十二月,以 帝謂尚書胡濙 觀政及 勘 黎

列傅

捷聞,械送觀政等至京。 帝謂尚書蹇義曰:「蠻性雖難馴,然至爲變,必有激。 宜嚴戒撫黎

諸官,寬以馭之,若生事激變,國有常刑。」

首出見,政等輒殺之。又令軍旗孫得等十五人焚其廬舍,殺其妻孥數人,擴其財物。各黎 激變,政及官軍百人,皆爲所殺。 正統九年,崖州守禦千戶陳政聞黎賊出沒,偕副千戶洪瑜領軍搜捕賊,乃圍熟黎村,黎 巡按御史趙忠以聞,坐瑜激變律斬。

有年。 不得擅入村峒,擾害激變。」 景泰三年敕萬州判官王號曰:「以爾祖父能招撫黎人,特授土官。 茲特降敕付爾,撫諭該管村峒黎人,各安生業,不得倣傚別峒生黎所爲。 爾能繼承 父志,亦旣 其官軍亦

天順 五年敕兩廣巡撫葉盛,以海南賊五百餘占據城池,可馳至瓊, 相機撫捕, 勿使

滋蔓。

弘治 二年,崖州故土官陳迪孫、冠帶舍人陳崇祐朝貢。 以其能撫豫人之逋逃復業者,

厚賜之。

故。 Щ 峒 成化間,黎人作亂,三度征討。 十五年,黎賊符南蛇反,鎭兵討之,不下。 黎人雜 居。 外有三州、十縣、一衞、十一所。 將領貪功,殺戮無辜。 戶部主事馮顒奏:「府治在大海南。 水樂間 ,置土官州縣以統之,黎民安堵如 迨弘治間,知府張桓、余濬貪殘 有五指

苛斂,大失黎心,釀成今日南蛇之禍。 各集土兵,可得數萬,聽鎭巡官節制。 臣本土人,頗知事勢,乞仍考原設應襲土官子舍,使 有能擒首惡符南蛇者,復其祖職。 以蠻攻蠻,不數月

可奏績矣。」詔從之。

|嘉靖十九年,總督蔡經以崖、萬二州黎岐叛亂,攻逼城邑,請設參將 一員,駐劄瓊州

分守。

可克。 患,非九千兵可辨,必添調狼土官兵,兼召募打手,集數萬衆,一鼓而四面攻之,然後 其勢彼聚而我散。故自開郡來千六百餘年,無歲不遭黎害,然無如今日甚矣。今日黎 二十八年,崖州賊首那燕等聚衆四千人爲亂,詔發兩廣官軍九千剿之。給事鄭廷鵠言: 瓊州諸黎盤居山峒,而州縣反環其外。其地彼高而我下,其土彼膏腴而 我鹹鹵,

巢岡,無處不至。 道而廢,旋爲賊資,以至復有今日。 田府,立定安、會同二縣,惜其經略未盡,故所得旋失。 嘗考剿除||黎患,其大舉有二。||元||至元辛卯,曾空其穴,勒石五指山。 於是議者謂德霞地勢平衍,擬建城立邑,招新民耕守。 謹條三事 嘉靖庚子,又嘗大渡師徒,攻毁 業已舉行,中 其時雖 建屯

崖黎三面郡縣,惟東面連郎溫、嶺脚二峒岐賊,〔六〕實當萬州陵水之衝。崖賊被

列傳

第

攻,必借二峒東訌以分我兵勢。[2]計須先分奇兵攻二峒,而以大兵徑擣崖賊。 救不暇,莫能 且訛言搖惑,以堅諸部助逆之心。 相顧,則殲滅可期。 傳聞賊首那燕已入凡陽搆集岐賊。此必多方誤我, 宜開示慰安,以解狐疑之黨。 彼此自

活等膏腴之地盡還州縣,設立屯田,且耕且守。仍由羅活、磨斬開路,以達定安,〔10〕 由德霞沿溪水以達昌化。 一,隋、唐郡縣,輿圖可考,今多陷入黎中。 蕩平後悉宜恢復,幷以德霞、千家、羅 道路四達,井邑相望,非徒懾奸銷萌,而王路益開拓矣。 其新附之

擇仁明慈惠之長,久任而安輯之,則瓊人受萬世利矣。 民中有異志者,或遷之海北地方屯田,或編入附近衞所戎籍,如漢徙潳山蠻故事。 ,軍威旣振,宜建參將府於德霞,各州縣許以便宜行事,以鎭安人心。 叉

疏下兵部議, 詔悉允行。

九人,奪牛羊器械倍之,招撫三百七十六人。 一十九年,總兵官陳圭、總督歐陽必進等督兵進剿,斬賊五千三百八十級,俘一千四十 捷聞,帝嘉其功,賜圭、必進祿米廕襲有差。

營,斬黎首百餘級,於是黃村、田尾諸峒黎皆出降。

萬曆十四年,長田峒黎出掠,兵備道遣兵執戮之。

草子坡諸黎召衆來報復,戰於長沙

置 東秀首百番紀 が長遺析 田尾諸岬豫督田路

瓊州黎人,居五指山中者爲生黎,不與州人交。其外爲熟黎,雜耕州地。原姓黎,後多

居之,各稱脋首。 姓王及符。 熟黎之產,半爲湖廣、福建奸民亡命,及南、恩、藤、悟、高、化之征夫利其土,占 成化間,副使涂棐設計犁掃,漸就編差。 弘治間,符南蛇之亂,連郡震驚,

校勘記

其小醜侵突,無時而息云。

- [1] 二年豹攻利州 二年,同卷到州傅作正統元年。 按英宗實錄卷二六繫此於正統二年正月庚戌,
- 並有英宗敕命,則「二年」應是奏報到京之年。
- 六年總兵官柳溥奏 卷七九,「正德」顯係「正統」之誤。上文已見「正統元年」,此處不應複述「正統」,據删。 六年,原作「正德六年」。按柳溥此奏在正統六年五月丁巳,見英宗實錄
- 八年改隸廣西布政司 八年,本書卷四五地理志龍州條及明一統志卷八五俱作「九年」。
- 常茂傳,太祖實錄卷一八五洪武二十年九月丁酉條改。 鄭國公常茂以罪謫居龍州 龍州,原作「壽州」,據下文及卷三太祖紀、卷一二五常遇春傳附
- abla五 祖實錄卷四二洪武二年七月丁未條改。 土官黃世鐵遣使貢馬及方物 黄世鐵,原作「黃士鐵」,據下文及明史稿傳一九三向武州傳、太
- **八**六 土官黄宗蔭遺頭目 貢馬 黄宗蔭,原作「黄宗允」,據上文及明史稿傳一九三奉議州傳、英宗實

列

庳

第

百

七

校勘

記

明一統志卷

錄卷六四正統五年二月癸巳條改。下同。

によし 南建州爲定安縣隸焉 定安縣,原作「安定縣」,據本書卷四五地理志瓊州府條、

八二瓊州府條、世宗實錄卷三五一嘉靖二十八年八月庚申條改。太祖實錄卷三一洪武元年十

月丁酉條亦誤倒作「安定」。

惟東面連郎溫嶺脚二峒岐賊 原作「惟東南連郎溫脚二峒岐賊」,「東面」誤「東南」,「溫」下脫

紀要卷一〇五陵水縣獨秀山條改補。 「嶺」字,據世宗實錄卷三五一嘉靖二十八年八月庚申條、國権卷五九頁三七三八、讀史方輿 「郎溫」,國権作「瑯瑥」。

へたし 必借二峒東訌以分我兵勢 東訌,原作「東江」,據世宗實錄卷三五一嘉靖二十八年八月庚申

以達定安 條改。 定安,原作「安定」,據世宗實錄卷三五一嘉靖二十八年八月庚申條改。

明史卷三百二十

列傳第二百八

外國一

朝鮮

平壤爲西京。 也。 樂浪、玄菟四郡。漢末,有扶餘人高氏據其地,改國號曰高麗,又曰高句麗,居平壤,即樂浪 已,爲唐所破,東徙。 朝鮮,箕子所封國也。漢以前日朝鮮。 其國北鄰契丹,西則女直,南曰日本。元至元中,西京內屬,置東寧路總管府, 後唐時,王建代高氏,兼併新羅、百濟地,徙居松岳,日東京,而以 始爲燕人衞滿所據,漢武帝平之,置眞番、臨屯、

盡慈嶺爲界。

列傳

第

二百

八

外

國

方物,且請封。 明興,王高麗者王顓。 帝遣符璽郎偰斯齎詔及金印誥文封顓爲高麗國王,賜曆及錦綺。其秋,顓遣 太祖卽位之元年遣使賜璽書。二年送還其國流人。 顓表賀,貢

禦之道,王其念之。」因賜之六經、四書、通鑑。自是貢獻數至,元旦及聖節皆遣使朝賀,歲 以爲常。 戏。苟闕斯二者,而徒事佛求福,梁武之事,可爲明鑑。王國北接契丹、女直,而南接倭,備 耕,則民艱於食,且有居室,無廳事,無以示尊嚴。此數者朕甚不取。夫國之大事,在祀與 以食爲天,而國必有出政令之所。今有人民而無城郭,人將何依。武備不修,則威弛;地不 言:「東海波臣,惟知崇信釋氏,他未遑也。」遂以書諭之曰:「古者王公設險,未嘗去兵。民 製賜之。惟得等辭歸,帝從容問:「王居國何爲?城郭修乎?兵甲利乎?宮室壯乎?」頓首 總部尚書成惟得、千牛衞大將軍金甲兩上表謝,「二并賀天壽節,因請祭服制度,帝命工部

還。 年 諭 等一百五 五 金印。中書省言:「高麗貢使多齎私物入貨,宜征稅;又多攜中國物出境,禁之便。」俱不許。 入貢 年表請遣子弟入太學,帝曰:「入學固美事,但涉海遠,不欲者勿强。」 貢使洪師範、鄭夢周 聘。 謂 三年正月命使往祀其國之山川。是歲頒科舉詔於高麗,顓表謝,貢方物,幷納元所授 (毋數。 中 貢物惟所產, 毋過侈。 十餘人來京,失風溺死者三十九人,師範與焉。帝憫之,遣元樞密使延安答里往 書省臣曰:「高麗貢獻繁數,旣困敝其民,而涉海復虞覆溺。 而顓復遣其門下贊成事姜仁裕來貢馬,其賀正旦使金湑等已先至,帝悉遣 其明諭朕意。」 宜遵古諸侯之禮,三

|關爲權相||李仁人所弑。 [三] | 顓無子,以寵臣||辛肫之子||耦爲子,於是仁人立禑。 物稱「送太府監」。中書省言:「元時有太府監,本朝未嘗有,言涉不誠。」帝命却其貢。是歲 却之。七年遣監門護軍周誼、鄭庇等來貢,表請每歲一貢,貢道從陸,由定遼,毋涉海,其貢 六年,顓遣甲兩等貢馬五十匹,道亡其二,甲兩以聞。 及進,以私馬足之。帝惡其不誠,

弑君之賊,必討無赦。」 斤、銀萬兩、良馬百、細布萬,仍悉送還所拘遼東民,方見王位眞而政令行,朕無惑已。 奸臣竊命,春秋之義,亂臣必誅,夫又何言。第前後使者皆稱嗣王所遣,中書宜遣人往問嗣 歸。 王如何,政令安在。 請諡,將假吾朝命,鎭撫其民,且掩其弑逆之跡,不可許。 其家。帝疑其詐,拘原而遣使往祭弔。十年,使來請故王顓諡號,帝曰:「顓被殺已久,今始 其夏,復遣周誼貢馬及方物,却不受。 冬,又遣使賀明年正旦。 帝曰:「高麗王顓被弑, 八年,禑遣判宗簿事崔原來告哀,且言前有貢使金義殺朝使蔡斌,今嗣王禑已誅義,籍 若政令如前,嗣王不爲羈囚,則當依前王言,歲貢馬千匹,明年貢金百 前所留使者,其遣之。」 於是釋原 否則

又殺朝使,前堅請入貢又不如期,今遣誼來,以虛文飾詐,他日必爲邊患。自今來者,其絕 |李茂芳等來貢,以不如約却之。十三年,遼東送||高麗使||誼至京師,帝敕||敬等曰:「||高麗弑君, 十一年四月,禑復命誼來貢。十二年敕遼東守將潘敬、葉旺等謹 飭邊備。 其冬,同遣

列

第二百

八

外

者,當以前五歲違約不貢之物幷至。 勿通。」因留誼於京師。十六年來貢,却之,命禮部責其朝貢過期、陪臣侮慢之罪,誠欲聽約 且言金非地所產,願以馬代輸,餘皆如約。 十七年六月,禑遣司僕正崔涓、禮儀 遼東守將唐勝宗爲之請,帝許之。然 判 書金進宜貢馬

請顓

證號,襲王爵,未允也。

索之,遂以遼、瀋流民三百餘口來歸。十二月命戶部咨高麗王:「鐵嶺北,東西之地,舊屬開 表辭馬直,帝敕如數償之。先是,元末遼、瀋兵起,民避亂,轉徙高麗。 至三年也。冬,韶遣指揮僉事高家奴以綺布市馬於高麗。二十年三月,高家奴還,陳高麗 年正旦乃貢。」七月,禑上表請襲爵,幷請故王諡。命封禑爲高麗國王,賜故王顓諡恭愍。 元者,遼東統之。 以試其誠爲,非以此爲富也。今旣聽命,宜損其貢數,令三年一朝,貢馬五十匹。至二十一 十九年二月遣使貢布萬匹、馬千匹。九月,表賀,貢方物。其後貢獻輒踰常額,且未嘗 十八年正月,貢使至。帝諭禮臣曰:「高麗屢請約束,朕數不允,而其請不已,故索歲貢 鐵嶺之南,舊屬高麗者,本國統之。 各正疆境,毋侵越。」 至是因市馬,帝令就

今飾辭鐵嶺,詐僞昭然。其以朕言諭之,俾安分,毋生釁端 二十一年四月,禑表言,鐵嶺之地實其世守,乞仍舊便。 帝曰:「高麗舊以鴨綠江爲界,

八月,高麗千戶陳景來降,言:「是年四月,禑欲寇遼東,使都軍相崔瑩、李成桂繕兵西

京。 成桂使陳景屯艾州,以糧 不繼退師。 王怒,殺成桂之子。 成桂還兵攻破王 城,囚 王及

瑩。」景懼及 ,故降。 帝敕遼東嚴守備,仍遣人偵之。 十月,禑請遜位於其子昌。 帝 曰:「前

聞其王被囚 ,此必成桂之謀,姑俟之以觀變。」

是絕。 朝賀明年正旦。處未歸而成桂自立,遂有其國,瑤出居原州。 「三韓君臣悖亂,二紀於兹。今王瑤嗣立,乃王氏苗裔,宜遣使勞之。」十二月,瑤遣其子奭 月遣使來告。二十四年三月詔市馬高麗。八月,權國 二十二年,權國事昌奏乞入朝,帝不許。是歲,成桂廢昌,而立定昌國院君瑤。二十三 事瑤進所市馬千五百匹。 王氏自五代傳國數百年,至 帝曰:

麗解 之福,我又何誅。」冬,成桂聞皇太子薨,遣使表慰,幷請更國號。 姓無可當輿望者,中外人心咸繫成桂 讒,戕害勳舊,子奭癡騃不慧,國人謂瑤不足主社稷。 負罪惶懼,遜位於子昌。 權臣李仁人以辛肫子禑主國事,昏暴好殺,至欲興師犯邊,大將李成桂以爲不可而 處東隅,非中 二十五年九月,高麗知密直司事趙胖等持國都評議司奏言:「本國自恭愍王薨,無嗣 國所治,令禮部移諭:「果能順天道,合人心,不啓邊釁,使命往來,實爾國 國人弗順,啓請恭愍王妃安氏擇宗親瑤權國事。已及四年,昏戾信 臣等與國人者老共推主國事,惟聖主兪允。」帝以高 今以安氏命, 帝命仍古號曰 退瑶於私第。 朝鮮 回軍。禑 王氏子

列

朝鮮國招引女直五百餘人,潛渡鴨綠江,欲入寇。乃遣使敕諭,示以禍福。旦得敕,惶懼陳 表謝,貢馬及方物,幷上前恭愍王金印,請更己名曰旦。從之。是月,遼東都指揮使司奏, 一十六年二月遣使進馬九千八百餘匹,命運紵絲綿布一萬九千七百餘匹酬之。 六月

謝,上貢,幷械送逋逃軍民三百八十餘人至遼東。

拘其使。 云表實總等所撰,道傳病不能行。帝以總等亂邦搆釁,留不遣。三十年冬,復以表涉譏訕, 言表文乃門下評理鄭道傳所撰,遂命逮道傳,釋珣歸。二十九年送撰表人鄭總等三人至, 二十七年,旦遣子入貢。二十八年遣使柳珣賀明年正旦。帝以表文語慢,詰責之。珣 建文初,且表陳年老,以子芳遠襲位。 許之。

翟冠、霞帔、金墜,及經籍綵幣表裏。 表謝,因請冕服書籍。 奏芳遠父有疾,需龍腦、沉香、蘇合、香油諸物,齎布求市。 成祖立,遣官預卽位詔。 帝嘉其能慕中國禮,賜金印、誥命、冕服、九章、圭玉、珮玉,妃珠翠七 永樂元年正月,芳遠遣使朝貢。四月復遣陪臣李貴齡入貢, 自後貢獻,歲輒四五至焉。 帝命太醫院賜之,還其布。 芳遠

納女後宮,立爲妃嬪者四人。其秋,遣陪臣鄭耀來告其父旦之喪。命官弔祭,賜諡康獻。 部運絹布萬五千匹償之。六年,世子禔來朝,賜織金文綺。及歸,帝親製詩賜之。時朝鮮 二年十二月詔立|芳遠子|禔爲世子,從其請也。 五年十二月, 貢馬三千 匹 至遼東,命戶

謝,幷陳己年老,請以棡理國事。 十六年奏世子禔不肖,第三子胸孝弟力學,國人所屬,請立爲嗣,詔聽王所擇。 命光祿 少卿韓確 、鴻臚丞劉泉封胸爲朝鮮國 時帝已 因上表

遷北 .都,朝鮮益近,而事大之禮益恭,朝廷亦待以加禮,他國不敢望也。

貢馬萬匹,至是如數至,賜白金綺絹。 二十年,芳遠卒,賜諡恭定。二十一年七月,胸請立嫡子晌爲世子,從之。先是,敕胸

而已。」八年,胸奏遣子弟詣太學或遼東學,帝不許,賜五經、四書、性理、通鑑綱目諸書 書:「珍禽異獸,非朕所貴,其勿獻。」後又敕胸:「金玉之器,非爾國所產,宜止之,土物效誠 宣德二年三月遣中官賜白金紵紗,別敕進馬五千匹,資邊用。九月如數至。 四年賜胸

京。」 賜綵幣。 州長言,所部爲朝鮮追殺,阻留一百七十餘家。 復還建州 中官送回。 帶東寧等衞,密邇王境,中多細人逃至王國,或被國人誘脅去者,無問漢人、女直,至卽解 初,瓦剌密令女直諸部誘朝鮮,使背中國。 正統元年三月放朝鮮婦女金黑等五十三人還其國。金黑等自宣德初至京師,至是遣 九年春,倭寇 三年八月賜痾遠游冠、絳紗袍、玉佩、赤鳥。先是,建州長童倉避居朝鮮界,已 朝鮮言:「昔以窮歸臣,臣遇之善。 犯邊,胸命將擒獲五十餘人,械送京師。 今負恩還建州李滿住所,慮其同謀擾邊。」建 五年韶棡還之。 胸拒之,白其事於朝。帝嘉其忠,敕獎之,幷 十年又獲餘黨來獻。帝連敕 七年五月諭 胸曰:「鴨綠江

列傳

第

卽

位,遣官頒詔於其國

諭 賜 **資加等。** 十三年冬,命使調發朝鮮及野人女直兵會遼東,征北寇。時英宗北狩,處

子晌 賜珦及妃權氏誥命,封其子弘暐爲世子。 住等爲嚮導,因諭响相爲掎角截殺之。 詔 日 景泰 爲國王。 ·「寇今少息。 元年貢馬五百匹。 會遼東奏報開原、瀋陽有寇入境,掠人畜,係建州、海西、野人女直頭目李滿 馬已至者,償其直。未至者,止勿貢。」是年夏,胸卒,賜弔祭,諡莊憲,封 奏稱奉敕辦馬二三萬匹,比因鄰寇搆釁,馬畜踣斃,一時未能。 其秋,續貢馬千五百餘匹。 二年冬,以建州頭目潛與朝鮮通,戒晌絕其 賜冕服,幷償其直。冬又

幼且 悔 | **瑈疏辨,復諭曰:「宣德、正統年间,以王** 一嬰夙 天順 三年秋,珦卒,來告哀。 (疾,請以叔瑈權國 三年,邊將奏,有建州三衞都督私與朝鮮結,恐爲 事。 遣中官往弔祭,賜諡恭順,命子弘暐嗣 七年上表遜位,乃封瑈爲國王。 國 與彼互相侵掠,敕解怨息兵, 中國患。 **蹂請立子疃爲世子,從之。** 立。 因敕瑈毋作不靖,貽後 弘暐立三年,以 初 不令交通 給 年

311 法 比 止 車 可 之思復讐也。 於 國中,豈得加 聞阿比車之母尚在,宜急送遼東都司,令阿比車領回, 於鄰境。 郞 ト兒 哈有罪,宜奏朝廷區處。 今輒 行殺害,何怪 以解讐怨。」 其子 Ŧi.

宜

絕

私

一交,以全令譽。」四年復

諭瑈曰:「王奏毛憐衞都督郎

卜兒哈通謀煽亂,已置之法。

夫

加之,是與朝廷抗也。

王素秉

禮義,

何爾

文過

飾

非?

後

賞授官也。

彼旣受朝廷官職,王又

年,建州衞野人至義州殺掠,瑈奏乞朝命還所掠。兵部議「朝鮮先嘗誘殺郎卜兒哈, 誘致都指揮兀克,縱兵掠其家屬。 今野人實係復讐,宜諭朝鮮,寇盜之來皆自取,惟守分安 繼叉

法,庶弭邊釁。」從之。

府知事康純統衆萬餘渡鴨綠、潑猪二江,攻破九獼府諸寨,斬獲 異物,三年春,敕諭、孫修常貢,勿事珍奇。 成化元年冬,陪臣李門炯來朝,卒於道。 是時朝廷用兵征建州,敕瑈助兵進剿。 命給棺賜祭,幷賜綵幣慰其家。 多。 時朝鮮頻貢 |承遣中樞

體。 安封 賞賚遣內臣,其册封正副使,選廷臣有學行者。」 選有學行文望者出使。 起,今復禾稼不登,軍民乏食。 世子晄爲王,給妃韓氏誥命。 乞寢成命,或翰林,或給事中及行人內推選一員,往使爲便。」帝曰:「英所言良是。自後 四年正月遣官來獻俘。 今同、安俱朝鮮人,墳墓宗族皆在,見其國王,不免屈節, 韶從厚賚,敕獎諭之。 太監鄭同等隨從人員所過驛騷。 旣行,巡按遼東御史侯英奏曰:「遼東連年被寇, 是年,孫卒,賜諡 臣考先年曾於翰 惠莊。 遣太監鄭同、崔 殊褻 林 瘡 院 痍未 中國

悼, 命娎嗣 六年,晄病篤,以所生子幼,命其兄故世子暲之子」娎權國事,遣陪臣以聞。及卒,賜諡 位,娎妻韓氏 封王妃。 十年追贈數父世子障爲國王、諡懷簡、母韓氏爲王妃,從 襄

所請也。

弓角,不與外番同禁。」兵部議歲市弓角五十,後以不足於用,請無限額,詔許倍市 兵之用,不可缺一。而弓材所需牛角,仰於上國。高皇帝時嘗賜火藥、火礮,今望特許收買 爲繼妻尹氏請封,賜誥命冠服。時禁外國互市兵器,娎奏:「小邦北連野人,南鄰倭島,五 年四月,娎奏建州野人糾聚毛憐等衞侵擾邊境不已,乞朝命戒飭。十二年十月,娎

窮究所掠,期在必得,仍賜熙白金綵幣慰安之。 尚書尹旻等以遼東連年用兵,未可輕動,宜以此意諭恆。 獎其能繼先烈,賜金幣,領兵官賞賚如例。後使還,遣其臣許熈伴送。熈歸至開州,建州騎 期。 二千邀之,掠其從卒三十餘人,馬二百三十餘匹,他所亡物稱是。 復遣左議政尹弱商、節度使金嶠等渡江進剿。十六年春遣陪臣來獻捷,帝命內官齎敕 十五年十月命娎出兵夾擊建州女直。 娎遂遣右贊成魚有沼率兵至滿浦江,以氷泮 後 敕遼東守臣整飭邊備,更令譯者 奏聞,英國公張懋、吏部

七年,燮奏繼妃尹氏失德,廢置,乞更封副室尹氏。從之。十九年四月封燮長子隆

爲世子。

請敕官追捕。」時遼東守臣亦奏如艦言,報可。 奏:「本國 弘治七年十二月,娎卒,賜諡康靖。明年四月,封漋爲國王,妻愼氏爲王妃。十二年,隆 人屢有違禁匿海島,誘引軍民,漸至滋蔓。 十五年冬,封艦長子頗爲世子。 乞許本國自行搜刷。 其係上國地方,

二月 部 議 隆母 命懌權理 正 德二年,[修以世子頭夭亡,哀慟成疾,奏請以國事付其弟懌,其國人復奏請封 妃奏||長且賢,堪付重寄。 國 事,俟隆卒乃封。 旣,陪臣 於是禮部奏:「隆以痼疾辭位,懌 盧公弼等以朝貢至京,復請封懌,廷議 以親弟承托,接受旣 不允。 懌。 禮

明,友愛不失。

通國

臣民舉無異詞,宜順其請。」上乃允懌嗣位,遣

中官敕封,幷賜其妃尹氏

典
詳
載
・ 列祖訓 宗詔可徵,宜從其請。」詔曰:「可。」 而 組訓 初 本朝制度,事涉外國,疑似之際,在所略。 於朝鮮國。 ,成桂之自立也,與宰相李仁人本異族。 亦載仁人子成桂更名旦。 貢使市以歸,懌上疏備陳世系,辨先世無弑逆事,乞改正。 後成桂子芳遠奏辨,太宗許令改正。至是修大明會典,仍 永樂間,降祭海嶽祝文,稱成桂爲仁人子, 況成桂得國出皇祖命,其不繫仁人後,太 禮部議:「會

年,世宗卽 十五 年冬,命內官封懌子皓爲世 位, 禮官言:「天子初踐祚, 子, 宜正中國之體,絕外裔狎侮之端。 賜懌金帛珠 玉,令括取異物及 童男女以進。 請諭懌非朝廷意

召內臣還,毋有所索取。」帝從之。

嘉靖二年八月, 以俘 獲倭夷來獻 ,并送還中 國 被掠八人。 賜 白 金

八年八月 ′,陪臣 柳 溥 上言; 國祖李旦係本國全州人。 二十八世祖瀚 仕新 羅爲 司 空。新

傳第二百八 外國一

列

弑。 成桂,請於高皇帝,立爲王,更名旦,贍瑤別邸,終其身,實未嘗爲弑。 隅懼,遜位於子昌。昌以爲姓見黜,復立王氏裔定昌君瑤,竄仁人於外。 子春與男成桂避地東遷。至正辛丑,當恭愍王之十年,有紅巾賊入境,成桂擊賊有功,授武 羅亡、六世孫兢休入高麗。 奏請,俱蒙兪允,而迄未改正。 班職事,時尚未知名。 權臣李仁人誅倫、萬生而立隅,擢成桂爲門下侍中。禑遣成桂侵遼東,成桂不從,返兵。 恭愍無嗣,陰蓄寵臣辛肫之子禑爲子,晚爲嬖臣洪倫、內豎崔萬生所 十三世孫安社仕元爲南京千戶所達魯花赤。元季兵興,安會孫 前永樂、正德間屢經 瑤復不道,國人戴

十八年二月,睿宗祔太廟,配享明堂禮成,懌表賀。 二十三年冬,懌卒。 二十四年正月來計,賜諡恭僖。 今遇重修會典,乞賜昭雪。」詔送史館編纂。 帝特御奉天門引見,賜宴禮部 韶立其子皓。 **峼未踰年卒,賜**

諡

樂靖。

九月,皓弟權國

事峘遣使謝祭諡,幷請襲封,詔許之。

從無泛海至本國者,因往日本市易,爲風所漂,前後共獲千人以上,皆挾軍器貨物, 火礮亦爲倭有,恐起兵端。」詔:「頃年沿海奸民犯禁,福建尤甚,往往爲外 十五五 年,恒遣使送下海番人六百餘至邊,賜金幣。二十六年正月,恒咨稱「福建 國所獲,有傷 致中 戜 國 人

三十一年冬,以洪武、永樂間所賜樂器敝壞,奏求律管,更乞遣樂官赴京校習,許之。

海道官員令巡按御史察參。仍賜王銀幣,以旌其忠。」

導陳得等十六人,俱獻闕下。」復降敕獎勵,厚賚銀幣,幷賜鐸等有差。 駕船二十五隻來抵海岸,臣命將李鐸等剿殺殆盡,獲中國民陳春等三百餘人,內招通倭嚮 逆者三十餘人來獻,因賀冬至節,帝賜璽書褒諭。三十八年十一月奏「今年五月,有倭寇 三十五年五月有倭船四自浙、直敗還,漂入朝鮮境。 恒遣兵擊殲之,得中國被俘及助

之名,帝令附錄會典。 四十二年九月,恒復上書辨先世非李仁人後,今修會典雖蒙釐正,乞著始祖旦、父子春

隆慶元年六月遣官預卽位詔。時帝將幸太學,來使乞留觀禮,許之。是年冬,峘卒,賜

諡恭憲,命其姪舩襲封。

許之。十七年十一月,陪臣奇芩等入賀冬至,奏稱本年六月,大琉球國船遭風至海岸,所有 (典,爲其先<u>康獻王</u>旦雪冤。十六年正月,<u>會典成,適貢使愈泓在京,請給前書,以終前命</u> 男婦合解京,給文放歸。 從之。 萬曆元年正月上穆宗尊諡、兩宮徽號禮成、昖表賀、獻方物馬匹。 時昖 屢請 賜皇明會

州。 摩州人,初隨倭關白信長。 朝鮮與日本對馬島相望,時有倭夷往來互市。 十九年十一月奏,倭酋關白平秀吉聲言明年三月來犯,詔兵部申飭海防。平秀吉者,薩 會信長爲其下所弑,秀吉遂統信長兵,自號關白,劫降六十餘 二十年夏五月,秀吉遂分渠帥行長、清

列傳第

江爲界 松督諸 於惟敬 正 之,於是嘉興人沈惟敬應募。 望 並 要害爲聲援。 中朝震動, 出避愛州 所必爭。 臣 駐 等率 一劄險要,以待天兵,號召通國勤王,以圖恢復。 復,三清正 風皆潰。 ,剽府庫,八道幾盡沒,旦暮且渡鴨綠江,請接之使絡繹於道。 廷議以朝鮮爲國 平壤 舟師 將進戰 乃題署遊擊,赴軍前,且請金 遣行人醉潘諭昖以興復大義,揚言大兵十萬且至。而倭業抵平壤,朝鮮君臣益急, 以宋應昌爲經略。 松棄王 逼 遊擊史儒等率 以西盡屬朝鮮耳。」惟敬 惟敬至平壤,執禮 釜 亦遁還王京。 ,大捷於平壤。 Щ 一城,令次子琿攝 鎭 ,潛渡臨津。 . 師 如松旣 至平壤,戰死。 惟敬者,市中無賴也。 行長渡大同江 八月,倭入豐德等郡,兵部尚書石星計 甚卑。 時朝鮮承平久,兵不習戰,啞又湎酒,弛備,猝島夷作難, 國 勝 行間。 以 事,奔平壤。 ?,輕騎 聞。 行長紿曰:「天朝幸按兵不動,我不久當還。 ,遁還龍山。 十二月,以李如松爲東征提督。 趨 廷議倭詐未 副總兵祖承訓統兵渡鴨綠江援之,僅以身免。 碧蹄館,敗,退駐開城。 而是時倭已入王京,毁墳 已,復走義州, 是時秀吉次對馬島,分其將行長等守 可信,乃趣應昌等進兵。 所失黃海、平安、 願內屬。 無所出,議遣人偵探 事具 京畿 墓,劫王子、陪 (如松 七月,兵部議令 明年 傳 江 E 而 藩籬,在 以大同 原四 星 月 頗 , 如

乏食有歸志,因而封貢之議起。

應昌得倭報惟敬書,乃令遊擊周弘謨同惟敬往諭倭,獻王

初,

如

松誓師,欲斬惟敬

以參軍李

應試

言

而止。

至是敗,氣縮,而

應昌

急圖

[成功)

已而 朝鮮 帑給軍費,已累百萬。廷臣言虛內實外非長策,請以所留川兵命擬訓練,兵餉令本國自辦。 等南兵,合薊、遼兵共萬六千,聽艇分布慶尙之大丘,月餉五萬兩,資之戶兵二部。先是,發 並有斬獲。兵科給事中張輔之、遼東都御史趙耀皆言款貢不可輕受。七月,倭從釜山移西 京、漢江爲界。 宜令王還國居守,我各鎭兵久疲海外,以次撤歸爲便。 京,返王子,如約縱歸。 於是詔撤惟忠等兵,止留挺兵防守。 生浦,送回王子、陪臣。時師久暴露,聞撤,勢難久羈。應昌請留劉綎川兵,吳惟忠、駱尙志 宜少需,俟倭盡歸,量留防戍。」部議留江浙兵五千,分屯要害,仍諭觃蒐練軍實,毋恃外援。 境, 沈惟敬歸自釜山,同倭使來請款,而倭隨犯咸安、晉州,逼全羅,聲復漢江以南,以王 有如倭覘 如松計全羅饒沃,南原府尤其咽喉,乃命諸將分守要害。已,倭果分犯,我師 我罷兵,突入再犯,朝鮮不支,前功盡 倭果於四月棄王城遁。時漢江以南千有餘里朝鮮故土復定,兵部 諭朝鮮世子臨海君津居全慶,以顧養謙爲經略 詔可。 棄。 今撥兵協守爲第一策,即議撤, 應昌疏 稱:「釜山 雖瀕海南,猶

晉州隨陷,而欲恃款冀來年不攻,則速之款者,正速之來耳。 關白捲土重來,則 月,兵部主事曾偉芳言:「關白大衆已還,行長留待。 九月,伀以三都旣復,疆域再造,上表謝恩。 風 不利,正苦冬寒。 故款 亦去,不款亦去。 然時倭猶據釜山也,星益一意主款。 知我兵未撤,不敢以一矢加 故款亦來,不款亦來。 沈惟敬前 於倭營 講 遺。欲歸報 購,咸安、 宜令朝 九

列

傳第

鮮 自爲守,弔死問孤,練兵積粟,以圖自强。」帝以爲然,因敕諭、吐者甚至。

督僉事 定,命臨淮侯李宗城充正使,以都指揮楊方亨副之,同沈惟敬往日本,王給 旣封不與貢,一,誓無犯朝鮮。 羣臣阻 從寧波,關白宜封爲日本王,諭行長部倭盡歸,與封貢如約。 封貢。」詔兵部議。 萬曆十九年中國被掠人許儀所寄內地書、倭夷答劉綎書及歷年入寇處置之宜,乞特敕急止 鮮束手受刃者六萬餘人。倭語悖慢無禮,沈惟敬與倭交通,不云和親,輒曰乞降。 二十二年正月,吸遣金晬等進方物謝恩。禮部郎中何喬遠奏:「晬涕泣言倭寇猖獗,朝 撓,追褫御史郭實等。 時廷臣交章,皆以罷封貢、議戰守爲言。八月,養謙奏講貢之說,貢道宜 韶小西飛入朝,集多官面議,要以三事:一,勒倭盡 倭俱聽從,以聞。 帝復諭於左闕,語加周複。 九月,吆請許保國。帝乃切責 金 印,行長授都 十二月, 一歸巢;一, 臣謹將 封議

差,遂不許。 請立暉,禮部仍執不可,詔如議。 光 海君琿收集流散,頗著功績,奏請立之。 二十三年九月,昖奏立次子琿爲嗣。 至是復奏,引永樂間恭定王例上請,禮臣執奏,不從。 時國儲未建,中外恫疑,故尚書范謙於朝鮮易封事三疏力 先是,吸庶長子臨海君津陷賊中,驚憂成疾,次子 禮部 尚書范謙言繼統大義,長 二十四年五月,昖復疏 幼定分,不宜管

特云。

副之。 曰:「若不思二子、三大臣、三都、八道悉遵天朝約付還,今以卑官微物來賀,辱小邦邪 李宗城以貪淫 九 及是奉册至,關白怒朝鮮王子不來謝,止遣二使奉白土綢爲賀,拒其使不見,語惟敬 月,封使至日本。 爲倭守臣所逐,棄璽書夜遁。 先是,沈惟敬抵釜 山,私奉秀吉蟒玉、翼善冠、地圖、武經、良馬。而 事 聞,逮問。乃以方亨充正 使,加惟敬神機 營衡 辱

天朝邪。且留石曼子兵於彼,候天朝處分,然後撤還。」翌日奉貢,遣使資表文二道,隨册使

海至朝鮮。 廷議遣使於朝鮮,取表文進驗,其一謝恩,其一乞天子處分朝鮮。

改麻貴 罪惟敬 釜 不奉正 Щ 如故、謝表後時不發、方亨徒手歸。 初 爲備倭大將軍,經理朝鮮, ,幷呈石星前後手書。 朔,無人臣 ,方字詭報去年從<u>釜山渡海,倭於大版受封,即回和泉州。然倭方責備朝鮮,仍留兵</u> 禮。 而寬奠副總兵馬棟報淸正擁二百艘屯機張營。 帝大怒,命逮石星、沈惟敬案問。以兵部尚書邢玠總督薊、遼; · **愈都御史楊鎬駐天津,申警備,楊汝南** 至是,惟敬始投表文,案驗潦草,前折用豐臣圖書, 方亨始直吐本末,委 、丁應泰贊畫軍前

倭未 望鴨 調 薊 綠江 備,掩釜 、遼、宣、大、山 五月,玠至遼。 🖾 行長 東發, 山 ·; 則 所統兵 行長擒,清正走。 、陝兵及福建、吳凇水師,劉綎 (僅萬七千人,請濟師。 建樓, 清正 **) 野以爲奇計,乃檄楊元屯南原,吳惟忠屯忠州** 一布種, 島倭窖水,索朝鮮 督川、漢兵 朝鮮兵惟嫺水戰,乃疏請募 、聽剿。 地圖,玠遂決意用 貴 密報候宣、大兵至, 兵川、浙,并 兵。 麻貴

列 傳 第 百 八 外 國

潛 釜 檄守王京西之漢江、大同江,扼倭西下, 兼防運道 遂入慶州 山 失守則沿海無備,天津、登、萊皆可揚帆而至。 月 **玠陽爲慰藉,檄楊元襲執之,縛至貴營,惟敬執而嚮導始絕。** 侵閑山。 倭數千艘泊釜山、黎朝鮮郡守安弘國、漸逼梁山、熊川。 統制元均兵潰,遂失閑山。 閑山島在朝鮮西海口,右障南原,爲全羅外 而我水兵三千甫抵旅順,閑山破,經略 七月,倭奪梁山、三浪, 惟敬率營兵二百,出入

使蕭 大 以 主 失,東西皆倭,我兵單弱,因退守王京,依險漢江。 由 慶,逼王京。 急,愚衷不敢救,聞已破,棄城走。 動 處 畫 烏嶺 兵,有乖靜候處分之實。 分 云 應宮以爲不可,自平壤兼程趨王京止之。 八月,清正圍南原,乘夜猝攻,守將楊元遁。 何 絕望,其不敢殺楊元,猶望處分也。 出忠清 玠 王京爲朝鮮八道之中,東阻烏嶺、至忠州,西則南原、全州,道相通。 日「陽戰陰和 道遮賊鋒。 **)** 新既身赴王京,人心始定。 行長、正成亦尤清正輕舉,乃退屯井邑。 ,陽剿陰撫,政府八字密畫,無泄也。」應試曰:「然則易耳。倭叛 麻貴遣遊擊牛伯英赴援,與愚衷合兵,屯公州。倭遂犯全 九月,倭至漢江,楊鎬遣張貞明持惟敬手 直使人諭之曰沈惟敬 麻貴發兵守稷山,朝鮮亦調都體察使李元 時全州 麻貴 **玠召參軍李應試問計,應試** (請於)對,欲棄王京退守鴨綠江 有陳愚衷,去南原僅 不死,則 麻貴遂報青山、稷山大 退矣。」 百里,南原告 書往,責其 因請 請 自 問 ·。 海 使李 二城 廟 廷 翼

捷。 遂劾應

宮恇怯,不親解惟敬,並逮。

編等 塗撤. 蔚 倭饑甚,偽約降緩攻。 將乃議曰:「倭艱水道,餉難繼,第坐困之,清正可不戰縛也。」鎬等以 兵先登,連破之,斬獲甚多,倭堅壁不出。 制 餘,獲其勇將,乘勝拔兩栅。 來授,乃多張疑兵,又遣將遏其水路,遂進逼倭壘。遊擊擺寨以輕騎誘倭入伏,斬級四 勿往援。 分三協。 行長東援。 山,印域依山險,中一江通釜寨,其陸路由彥陽通釜山。 兵還王京,士卒物故者二萬。上聞之,震怒。 十· 一 月,玠徵兵大集,帝發帑金犒軍,賜玠尙方劍,而以御史陳效監其軍。玠大會諸將, 鎬 復遣中協屯宜城,東援慶州,西扼全羅。 同貴率左右協,自忠州、鳥嶺向 十二月,會慶州。麻貴遣黃應賜賄清正約和,「弘而率大兵奄至其營。 俄行長援兵大至,將繞出軍後。 倭焚死者無算,遂奔島山,連築三寨。 翌日,遊擊茅國器統衙 島山視蔚山 東安, 乃罷鎬聽勘,以天津巡撫萬世德代。 趨慶州,專攻淸正。 以餘兵會朝鮮合營,詐攻順天等處,以牽 高,石城堅甚,我師仰攻多損傷。 鎬不及下令,策馬西奔,諸軍 貴欲專攻蔚山、恐釜倭由彦陽 爲然,分兵圍 使李大諫通行長,約 一十月 時倭屯 一皆潰。 百 諸

一十六年正 月,邢玠以前役乏水兵無功,乃益募江南水兵,議海運,爲持久計。二月,都

列傳

第

番休濟餉,往來 如 駛。 正,據蔚山 一元代。 中路如梅,東路貴,西路凝,水路璘,各守汛地,相機行剿。時倭亦分三窟。 西路則行長,據粟林、曳橋,建砦數重。 我師約日並進,尋報遼陽警,李如松敗沒,詔如梅還赴之,中路以董 中路則石曼子,據泗州。 而行長 東路則清 水師

素効忠順故也,毋以人言自疑。」 爲編罪案,〔<〕謂堅城得志,啓朝鮮異日之患,於是昖奏辨。 當應泰之劾鎬也,啞請回乾斷,崇勵鎭撫,以畢征討。 上不許。 帝曰:「連年用兵發餉,以 又應泰曾以築 城之議 爾

國

擊以徇,一元等各帶罪立功。是月,福建都御史金學會報七月九日平秀吉死,各倭俱有歸 營中火藥崩,烟焰漲天。倭乘勢衝擊,固城倭亦至,兵遂大潰,奔還晉州。 |倭退保||泗州老營,鏖戰下之,前逼新寨。 寨三面臨江,一面通陸,引海爲滾,海艘泊寨下千 舟 頗 `,築金海、固城爲左右翼。 十月,董一元遣將四面攻城,用火器擊碎寨門,兵競前拔栅。忽 有 **、師協堵擊,毀倭船百餘。** 斬 九月,將士分道進兵,劉綎進逼行長營,約行長爲好會。 獲,倭僞退誘之。 貴入空壘,伏兵起,遂敗。董一元進取晉州,乘勝渡江,連燬二寨。 行長潛出千餘騎扼之,艇不利,退,隣亦棄舟走。 翌日,攻城,斬首 帝聞,命斬二遊 麻貴 九十二。陳璘 至蔚山,

志。 十一月,清正發舟先走,麻貴遂入島山、西浦,「亞劉挺攻奪曳橋。 石曼子引舟師救行

長,陳璘邀擊敗之。諸倭揚帆盡歸。

自倭亂朝鮮七載,喪師數十萬,糜餉數百萬, 中朝與屬國迄無勝算,至關白死而禍

始息。

凋起敝,爲力倍艱。 邦。 宜臥薪嘗膽,無忘前恥,惟忠惟孝,纘紹前 乘之,追奔逐北,鯨鯢盡戮,海隅載淸,捷書來聞,憂勞始釋。 蓋不殺乃天之心,而用兵非予得已。安疆靖亂,宜取蕩平。 朕念王世篤忠貞,深用憫惻。

七年之中,日以此賊爲事。

始行薄伐,繼示包容,終加嚴 二十七年閏四月,[10]以平倭詔告天下,又敕諭昖曰:「倭奴平秀吉肆爲不道,蹂躪爾 倭雖遁歸,族類尚在。 休。」 兹命邢玠振旅歸京,量留萬世德等分布戍守。王 惟王雖還舊物,實同新造,振 神惡凶盈,陰殲魁首,大師

分汛 匹。 東等處,每年十三萬石。 更爲繁費。 地 五月, 一,定月餉,每年計銀九十一萬八千有奇。 玠條 況彼 ,議操練。 陳東征善後事宜十事。 國 兵荒之後,不獨苦倭之擾,兼苦我兵。 一,責成本國。 一,留中路海防道。〔二〕一,裁餉司。 廷臣議:「數年疲耗,今始息肩, ,留戍兵,馬步水陸共計三萬四千有奇,**馬三**千 一,定本色,合用米豆,分派 故今日善後 一,重將領。 事宜,仍當商之彼國, 自宜 內固 遼東、天津、山 ,添巡 根 本, 捕。 不當

列傳

八千,以資戍守。其撤回官兵,駐劄遼陽備警。二十八年四月請將義州等倉遺下米豆運回 悉宜停止。」帝命督撫會同國王酌奏。八月,昖獻方物,助大工,褒賞如例。十月,請留水兵 先量彼餉之贏絀,始可酌我兵之去留。至於增買馬匹,添補標兵,創立巡捕,及至管餉府佐, 戶部議:「輸運維艱,莫若徑與彼國,振其彫敝,以昭皇仁。」詔曰:「可。」

唬造 訓 爲咽喉,應接之兵,不宜盡撤。我自固,亦所以固朝鮮也。」詔朝鮮刻勵以行。 往往走倭走敵,爲本國患,宜破格搜採。 誥命冕服遭變淪失,祈補給,從之。 鮮八道,十九無城。 斷絕,皆應修築屯聚。 宜 左右烏、竹二嶺,羊腸繞曲,有一夫當關之險。 各守以重兵、幷蔚山、開山等處皆宜戍守。 練無方,宜以束伍之法教之。 百十艘爲奇兵,幷添造神機百子火箭。〔三〕一,訪異材。朝鮮貴世官,賤世役,一切禁錮 二十九年二月,兵部覆奏經督條陳七事:「一,練兵士。麗人鷙悍耐寒苦,而長衫大袖, 平壤西北鵬、浿二江,俱南通海。 一,造器械。倭戰便陸不便海,自己以船制重大,不利攻擊。 一,守衝要。 一,修內治。 朝鮮三面距海,釜山與對馬相望,巨濟次之, 一,修險隘。王京北倚叢山,南環滄海。 今營壘遺址尚存, 亟宜修葺。 倘倭別遣一旅占據平壤,則王京聲援 國家 東南臨海,以登、旅爲門戶,鎭江 九月,奏所頒 ,建城池。朝 今准福 忠州

時倭國內亂,對馬島主平義智悉遺降人還朝鮮,遺書乞和,且揚言秀吉將家康將輸糧

仍執立長之議。三十五年四月,昖以家康求和來告,兵部議聽王自計而已。由是和款不絕, 十二月,昖以島倭求款來請命。 習,成法具在,無容再遣。」因命其使臣齎敕誡勵。三十三年九月,昖復請封暉爲世子,禮部 **吆**言倭使頻來要挾 後,絕開 數十萬石爲軍興資,以脅朝鮮。 市,因百計脅款。 和款,兵端漸露,乞選將率兵,督同本國訓練修防。 秀吉死,我軍 兵部以事難遙度,令總督世德酌議,詔可。 朝鮮與對馬島一水相望,島地不產五穀,資米於朝鮮。兵興 盡撤,朝鮮畏倭滋甚。 欲與倭通款,又懼 帝曰:「曾留將士敎 三十年十一月, 開罪 中國

幷請敕遼左督撫鎭臣,遣官宣達毋相侵犯之意。從之。 國 三十七年二月,諡昖曰昭敬,遣官賜琿及妃柳氏 臣民公議以聞。 三十六年,坠卒。 時我大清兵征服各部,漸近朝鮮。 光海君琿自稱署國事,遣陪臣來計,且請諡。 語命。 兵部議令該王大修武備,整飭 十月,封暉爲國王,從其臣民請也 帝惡其擅, 不允,令該 邊防,

後三年始畫開市之事。

圖釜山 初 朝鮮與之通。 朝鮮失守,賴中國力得復,倭棄釜山遁。 四十一年九月,總兵官楊宗業以 然陰謀啓疆,爲患不已。 聞。 琿 疏 辨,詔慰解 於是海上流言倭 之。

命封 爲國王 四十二年四 一次妃。 月,奏請追封生母金氏。 四 十三年十一月,表賀冬至,因奏買回吾學編、弇山堂別集等書,載本國 禮部按會典, 嫡母受封 而 生母先亡者得 追)贈,乃

列

傳

四十五年正月,暉請至再,帝以暉屢次懇陳,勉從之。 事 與會典 報可。 乖 錯,乞改正。 初,琿爲生母 已得封,至是復祈給冠服。 禮部言:「野史不足憑。 今所請恥與逆黨同譏, 禮臣以金氏側室,禮有隆殺,執不可。 宜憫其誠,宣付史

心。 宰賽皆滅,不可使朝鮮獨存。 降。 陰順,宜遣官宣諭,或命將監護,其說紛挐。 與昌城、義州諸堡隔水相望,孤危非常。 將,令經略熊廷弼調委。四十八年正月,琿奏:「敵兵八月中攻破北關,金台吉自焚,白羊出 長驅,寬鎭、昌城俱莫自保。 戰死。 禮、兵二部請降 鐵嶺之役,蒙古宰賽亦爲所滅。聞其國謀議以朝鮮、北關、宰賽皆助兵南朝,今北關 望速調 四 琿告急,詔加優恤。十一月,兵部覆,朝鮮入貢之道,宜添兵防守。 詔鎭江等處設兵 十七年,楊鎬督馬林、杜松、劉綎等出師,爲我大淸兵所敗。朝鮮助戰兵將,或降或 大兵,共爲掎角,以固邊防。」時遼鎭塘報稱朝鮮與大淸講和,朝議遂謂 敕令曉諭,以安其心。 內而 又聞設兵牛毛寨、萬遮嶺,欲略寬奠、鎭江等處。寬奠、鎭江 遼左八站,外而 敵若從靉陽境上鴉鶻關取路遶 帝是其議,然敕令陪臣往,不遣官也 **暉疏辨:「二百年忠誠事大,死生一節。」** 東江 一城,彼此隔斷, 聲援阻絕, 可為寒 出 鳳 凰 城裏,一日 琿陽 詞極剴 衡

民 爲兵,而仰給於朝鮮。 天啓元年八月,改 朝鮮貢道,自海至登州,直達京師。 十一月,琿奏力難餽餉,乞循萬曆東征例,發運山東粟,從之。 時毛文龍以總兵鎭皮島,招集逃

留 有謂宜聲罪致討者,有謂勿遽討且受方貢覈顚末者,或謂當責以大義,察輿情之向背者,或 轉奏,文龍爲之揭報。登州巡撫袁可立上言:「琿果不道,宜聽太妃具奏,以待中國 中。 三年四月,國人廢琿而立其姪綾陽君倧,以昭敬王妃之命權國事,令議政府移文督撫 八月,王妃金氏疏請封倧,禮部尚書林堯愈言:「朝鮮廢立之事,內外諸臣抒忠發憤, 更立。」疏

| 倧統 謂當令倧討敵自洗者,衆論咸有可采。其謂琿實悖德,倧討叛臣以赤心奉朝廷者,惟文龍 之中,不失固圉之道。」從之。 民共稱倧爲恭順。 信臣,會同文龍,公集臣民,再四詢訪。勘辨旣明,再請聖斷。」報可。十二月,禮部復上言: 「臣前同兵部移咨登撫,并劄毛帥,遣官往勘。 人耳。皇上奉天討逆,扶植綱常,此正法也。毋亦念彼素稱恭順,迥異諸裔,則更遣貞士 理國事,仍令發兵索賦,同文龍設伏出奇,俟漸有次第,始遣重臣往正封典。 且彼之陪臣相率哀籲,謂當此危急之秋,必須君國之主。乞先頒敕諭,令 四年四月,封倧爲國王 今據申送彼國公結十二道,自宗室至八道臣 庶幾字小

孽韓潤 謂雲從島是也。 守,暫移鐵山之衆就雲從島柴薪。」登萊巡撫武之望奏:「毛帥自五月 五年十二月,文龍報:「朝鮮逆黨李适、韓明璉等起兵昌城,直趨王京,被臣 、鄭梅等竄 今十月又徙兵民商賈以實之,而鐵山之地空矣。 入建州,有左議府尹義立 約爲內應,期今冬大舉犯朝鮮。 故朝鮮各道疑其 以 來,營室於須彌,所 臣已咨國王防 擒 有逼 獲。 處 餘

傳

之嫌 也。 帝乃飭勉鎭撫同心,而韓潤、尹義立等令朝鮮自處。 朝鮮者,毛鎭也,駕馭毛鎭者,登撫也。今撫臣與鎭臣不和,以至鎭臣與屬國不和,大不利。」 信焉。 人去留,文龍是視。 宜令鎭臣將遼民盡刷過島,登撫刻期運糧朝鮮,量行救振,以資屯牧。」帝是之。 ,甚至布兵以防禦之。今鎭臣所稱李适等之叛,尹義立之內應,臣等微聞之,而未敢遽 信之則益重鮮人之疑,不信則恐貽後來之患。」兵部言:「牽制敵國者,朝鮮也,聯屬 文龍一日不去,則遼人一日不離。 **倧又請撤遼民安插中土,兵部言:「遼** 鮮人驅之入島可也,驅之離島不可

六年十月,除上疏曰:

件 罄 直犯 聽毛鎭 臣 .自權署之初,不敢遑寧,卽命陪臣張晚爲帥,李适副之,付以國中精銳,進屯寧邊,一 京 於是役矣。 皇朝之於小邦,覆幬之恩,視同服內。 城。 節制,以候協剿之期。 晚收餘兵躡其後,與京輔官兵表裏夾攻,賊皆授首, 而适重兵在握,潛蓄覬覦,遂與龜城府使明璉舉兵內叛, 頃遭昏亂,潛通敵國,皇天震怒,降黜厥命 而西邊軍實及列鎮儲

難。 也。 顧以 遼民迫於饑餒,散布村落,强者攫奪,弱者丐乞。 |毛鎭當全||遼淪沒之後,孤軍東渡,寄寓海上,招集遼民前後數十萬,亦小邦所仰藉 封 疆多故,土瘠民貧,內供本國之軍需,外濟鎭兵之待哺,生穀有限,支給實 小邦兵民被撓不堪,拋棄鄉邑,

轉徙內地。遼民逐食,亦隨而入。自昌、義以南,安、肅以北,客居六七,主居三四。 向

者將此情形具奏,見兵部題覆處分已定,何敢再干。

家,並無怨叛之事。 命已不在臣。 至韓潤及弟潭係逆賊明璉子姪,口即亡命潛逃,因而勾引來寇。 尹義立曾任判書,本非議政。頃年差爲毛鎭接伴官, **毛鎭據王仲保等所訴,都無實事。 意必有讒邪之臣,欺妄督撫,以** 不稱任使,褫職歸 賊旣叛國而去,制

售其交搆之計者。

損。 臣 本不介意。 國攜貳」之語,似海外情事,未盡諒悉。 . 方與毛鎭同心一力,建功報主,豈敢有一毫猜防意乎。 且其須彌之遷,直爲保護累重,將以就便芻薪。一進一退,兵家常事。 |毛帥久鎭海外,臣與周旋已近十稔。 竊見部撫移咨曰「虞其逼處」,曰「驅其民,驅其帥」,甚至有「布兵以防,屬 臣之請刷遼民,因力不足濟,初非慮及逼處也。 雖餼牽將竭,彼此俱困,而情誼之殷,實無少 訛言噂沓,

形也。 生寡 帝 報日 傳訛之言,未足介懷,幷力一心,王其勉之。」 食多。微王言,朕有不坐照萬里之外者。 : 「王和協東鎭,愛戴中朝,忠貞之忱,溢乎言表。 海上芻輓,已令該部區畫,刻期運濟。 逃難邊民,亦令毛帥悉心計處,俾無重爲王 然毛帥在中朝爲牽制之師,在王 鎭軍久懸,鮮、遼雜處。 國則唇齒之 **外客累主**,

漢、山城俱破,平壤、黃州不戰自潰,敵兵直抵中和,遊騎出入黃、鳳之間,又分向雲從,攻掠 除輸款,遂班師。 安州,節度使南以興自焚死,中國援兵都司王三桂等俱陣亡。」「三既復奏、「義州及郭山、凌 毛 百餘萬, 帥, 七年三月,兵部上文龍揭言:「魔官、魔人招敵攻鐵山,傷我兵千人,殺魔兵六萬,焚糧 國王及士民遷於江華以避難。」時大淸兵所至輒下,朝鮮列城望風奔潰,乃遣使諭悰。 敵遂移兵攻麗矣。」帝敕文龍速相機應援。 九月,除奏被兵情形。 時熹宗崩,莊烈帝嗣位,優詔勵勉焉。 登撫李嵩奏「朝鮮叛臣韓潤等引敵入

孫元化 煥督師,題改覺華,迂途冒險,其國屢請復故。 年六月,督師袁崇煥殺平遼將軍左都督毛文龍於雙島。 <u>崇</u>禛二年,改每歲兩貢爲一貢。 先是,遼路阻絕,貢使取道澄、歲,已十餘年矣。自袁崇 ,屬其陳請。」元化委官伴送,仍疏聞。 帝以水路旣有成命,改途嫌於自便,不 至是遣戶曹判書鄭斗源從登海來,移書登撫 許。是

徵糧。本國以有德等룛在皮島爲本國患,故未之應。」龍以聞 六年六月,除遺書總兵黃龍言:「文龍舊將孔有德、耿仲明率士卒二萬投順大淸,向朝

江華已破,世子被擒,國王出降。今大治舟艦,來攻皮島、鐵山,其鋒甚銳。 陳洪範調 十年正月, 太宗文皇帝親征朝鮮, 責其渝盟助明之罪, 列城悉潰。 各鎭舟師赴援。三月,洪範奏官兵出海。 越數日,山東巡撫顏繼祖奏屬國失守, 朝鮮告急,命總兵 宜急敕沈世魁、

陳洪範二鎭臣,以堅守皮島爲第一義。 帝以繼祖不能協圖匡救,切責之。亡何,皮島並爲

大清兵所破,朝鮮遂絕,不數載而明亦亡矣。

者於篇。 朝鮮在明雖稱屬國,而無異域內。 至國之風土物產,則具載前史,兹不復錄。 故朝貢絡繹,錫賚便蕃,殆不勝書,止著其有關治亂

校勘記

[1] 成惟得至金甲兩上表謝 成惟得、高麗史卷四一作「成准得」。金甲兩,作「金甲雨」。

題為權相李仁人所弑 李仁人,李朝實錄太祖實錄卷一恭讓王元年十二月條、明世宗實錄卷

一〇四嘉靖八年八月壬午條都作「李仁任」。作「仁人」或係傳訛。 太祖實錄卷二二一洪武二十

五年九月庚寅條、葉向高朝鮮考,統作「仁人」,今姑仍之。下同。

29 _/ 黃海平安京畿江原四道並復 五月玠至遼 按邢玠至遼東,以及上文所述楊方亨自朝鮮還奏、邢玠爲薊遼總督等事,均在萬 江原、原作「江源」,據李朝實錄世宗實錄卷一五三地理志改。

曆二十五年,見神宗實錄卷三〇八三月已酉、己未各條,傳文失載年分。

五 東阻 烏嶺 烏嶺,原作「鳥嶺」,據本書卷二四七劉綎傳、 神宗實錄卷三一五萬曆二十五年十月

辛酉條改。下同。

列傳第二百八 校勘記

- 遣黄應賜賄清正約和 黄應賜,明史稿傳一九四朝鮮傳、國権卷七八頁四八〇五作「黄應暘」。
- 時倭屯蔚山 蔚山,原作「尉山」,據本書卷二五九楊鎬傳及卷二三八麻貴傳、神宗實録卷三一
- 又應泰曾以築城之議爲鎬罪案 七萬曆二十五年十二月丙戌條、國權卷七七頁四八〇四改。下同。 應泰,原作「應」,脱「泰」字,據上文及神宗實録卷三二七萬
- 曆二十六年十月癸丑條補。「應泰」指丁應泰,不宜省。

八九

麻貴遂入島山酉浦

二十七年閏四月 閨四月,原作「四月」,脱「閏」字,據本書卷二一神宗紀、 神宗實録卷三三四

酉浦,本書卷二三八麻貴傳作「西浦」,疑是。

留中路海防道 萬曆二十七年閏四月丙戌條補。 中路,原作「中都」,據明史稿傳一九四朝鮮傳、 神宗實録卷三三五萬曆二十七

年五月壬戌條改。

- 倭戰便陸不便海 原作「倭便戰陸不便海」,據神宗實録卷三五六萬曆二十九年二月辛卯條改。
- 並添造神機百子火箭 火,原作「大」,據神宗實録卷三五六萬曆二十九年二月辛卯條改。
- 至韓潤及弟潭係逆賊明璉子姪 辛酉條俱作「弟澤」。 弟潭,明史稿傳一九四朝鮮傳、熹宗實録卷七二天啓六年十月
- ○三〕中國援兵都司王三桂等俱陣亡 王三桂,熹宗實録卷七七天啓七年三月戊寅條作「王三貴」。

明史卷三百二十一

列傳第二百九

外國二

安南

爲交阯郡王,三傳爲大臣黎桓所篡。黎氏亦三傳爲大臣李公蘊所篡。李氏八傳,無子,傳 安南,古交阯地。唐以前皆隸中國。五代時,始爲土人曲承美竊據。宋初,封丁部領

其壻陳日炬。[1]元時,屢破其國。

漢陽知府易濟招諭之。 塗金銀印。 明年六月達京師。 洪武元年,王日煃聞廖永忠定兩廣,將遣使納款,以梁王在雲南未果。十二月,太祖命 詔曰:「咨爾安南國王陳日煃,惟乃祖父,守境南陲,稱藩中國, 克恭臣職,以永 日煃遣少中大夫同時敏,正大夫段悌、黎安世等,奉表來朝,貢方 帝喜,賜宴,命侍讀學士張以寧、典簿牛諒往封爲安南國王,賜駝紐

第二百九 外國一

列

傳

織金文綺紗羅四十匹,同時敏以下皆有賜。 效哲王之盛典,爵超五等,俾承奕葉之遺芳。 世 封。 朕荷天地之靈,肅淸華夏,馳書往報。 眷兹勤誠,深可嘉尙。是用遣使齎印,仍封爾爲安南國王。於戲 卿卽奉表稱臣,專使來賀,法前人之訓,安退 益茂令猷,永爲藩輔,欽哉。」賜日煃大統曆、 !視廣同仁,思

綺紗 主事 復遣 仁等還,言却其贐不受,帝嘉之,加賜季龍等。 龍、下大夫黎元普等謝恩,貢方物。魚卒於道,詔賜其王及使臣,而送魚柩歸國。 於其國,且以更定嶽瀆神號及廓淸沙漠,兩遣官詔告之。 王廉 張福 往祭,賻白金五十兩、帛五十匹。 社舜欽等請命於朝,以寧駐安南俟命。 羅四十匹。 以寧等至,日煃先卒,姪日熞嗣位。 諭令罷兵,兩國皆奉詔。 廉旣行,帝以漢馬援立銅柱鎭南蠻,厥功甚偉,命廉就祀之。 明年,舜欽等至告哀。 別遣吏部主事林唐臣封日熞爲王,賜金印 遣其臣阮汝亮來迎,請

請即,以寧等不予。 時安南、占城搆兵,帝命翰林編修羅復仁、兵部 日熞遣上大夫阮兼、中大夫莫季 帝素服御西華門引見,遂命編修 尋頒科舉詔 及織金文 頃之,復 日熞乃

明懼罪,貢象及方物。 罪,且請封。其使者抵言日熞實病死,叔明遜避於外,爲國人所推。帝命國人爲日熞服,而 四年春,遣使貢象,賀平沙漠,復遣使隨以寧等來朝。其冬,日熞爲伯父叔明逼死。叔 踰年至京,禮官見署表非日熞名,詰得其實,詔却之。 叔明復朝貢謝

叔明姑以前王印視事。七年,叔明遣使謝恩,自稱年老,乞命弟煓攝政,從之。 請貢期。 韶三年一貢,新王世見。尋復遣使貢,帝令所司諭却,且定使者毋過三四人,貢 煬遣使謝恩,

物無厚。

雲南 懼,遣使謝罪,頻年貢奄豎、金銀、紫金盤、黃金酒尊、象馬之屬。 **煒遣使謝,復進象。** 西思明土官訴安南 城,反致喪敗。 軍 十年,煓侵占城,敗沒。 餉, **煒卽輸五千石於臨安。** 帝遣官諭前王叔明毋搆釁貽禍,以叔明實主國事 犯境,安南亦訴思明擾邊。 帝以其頻煩,且貢物侈,命仍三歲一貢,毋進犀象。 弟煒代立, 二十一年,帝復命禮部郎中邢文偉齎敕及幣往賜。〔三〕 遣使告哀, 帝移檄數其奸誑 命中官陳能往祭。 一罪, 敕 也, 帝命助敎楊盤往使,令饋 叔明貢· 時安南怙强,欲滅占 守臣 (方物) 一勿納 謝 其 使。 罪。 煒 廣

州陸道險,請運至憑祥洞。 方討龍州趙宗壽,命禮部尚書任亨泰、御史嚴震直諭日焜,毋自疑。季犛聞言,稍自安。帝 又遣刑部尚書楊靖諭令輸米八萬石,餉龍州軍。季犛輸一萬石,餽金千兩、銀二萬兩,言龍 官詰責,却其貢。 知 而 納之,越數年始覺,命廣西守臣絕其使。 時國相黎季犛竊柄,廢其主煒,尋弑之,立叔明子日焜主國事,仍假煒名入貢。 季犛益懼,明年復詭詞入貢。帝雖惡其弑逆,不欲勞師遠征,乃納之。大軍 睛不可,令輸二萬石於<u>海海江,江距龍州</u>止半日。 睛因言:「日焜 季犛懼,二十七年遣使由廣東入貢。 帝怒,遣 朝廷不

列

傳

第二

百

年幼,國事皆決季犛父子,乃敢觀望如此。」時帝以宗壽納款,移兵征向武諸蠻,遂諭靖令輸 一萬石給軍,而発其所餽金銀。 明年,季犛告前王叔明之計。帝以叔明本篡弑,弔祭則獎

亂,止不行,移檄使知之。

立,更姓名爲胡一元,名其子蒼日胡查,謂出帝舜裔胡公後,僭國號大虞,年號元聖,尋自稱 等復命,帝知其終不肯還,乃曰:「蠻夷相爭,自古有之。彼恃頑,必召禍,姑俟之。」建文元 平,越銅柱二百餘里,侵奪思明所屬丘溫、如整、慶遠、淵、脫等五縣地,近又告任尚書置驛 太上皇,傳位宣,朝廷不知也 年,季犛弑日焜,立其子顒。又弑顒,立其弟奏,方在襁褓中,復弑之。大殺陳氏宗族而自 行人陳誠、呂讓往諭,季犛執不從。誠自爲書諭日焜,季犛貽書爭,且爲日焜書移戶部。誠 思明洞登地。臣嘗具奏,蒙遣楊尙書勘實。乞敕安南以五縣地還臣,仍畫銅柱爲界。」帝命 征交阯,去鲖柱百里立水平寨萬戶府,遣兵戍守,令交人給其軍。元季喪亂,交 思明土官黃廣成言:「自元設思明總管府,所轄左江州縣,東上思州,南銅柱爲界。元 人攻破冰

事,於今四年。 貢,言:「高皇帝時安南王日**煃率先翰誠,不幸早亡,後嗣絕。** 成祖旣承大統,遣官以卽位詔告其國。 望天恩賜封爵,臣有死無二。」事下禮部,部臣疑之,請遣官廉訪。 永樂元年,查自署權理安南國事,遣使奉表朝 臣陳氏甥,爲衆所推, 乃命行人 權理 爽

所以誑帝者,乞卽賜'全封爵。 楊渤等齎敕諭其陪臣父老,凡陳氏繼嗣之有無,胡至推戴之誠偽,具以實聞。 還,復命行人呂讓、丘智賜絨錦、文綺、紗羅。 帝乃命禮部郎中夏止善封爲安南國王。 旣 | 全遣使謝恩,然帝其 **齊**室使者遣

國中自若也。

好。 激於忠義,推臣爲主以討賊。 至,言:「臣天平,前王日烜孫,奣子,日煃弟也。 忠臣良士疾首痛心,願興弔伐之師,隆繼絕之義,蕩除奸凶,復立陳氏後,臣死且不朽。敢 子,世事陳氏,叨竊寵榮,及其子蒼,亦蒙貴任。一旦篡奪,更姓易名,僭號改元,不恭朝命。 逃,伏處山谷,思詣闕庭,披瀝肝膽,展轉數年,始睹天日。竊惟季犛乃故經略使黎國髦之 故陪臣裴伯耆詣闕告難,言:「臣祖父皆執政大夫,死國事。 效申包胥之忠,哀鳴闕下,惟皇帝垂察。」帝得奏感動,命所司周以衣食。 主篡位,屠戮忠良,滅族者以百十數,臣兄弟妻孥亦遭害。 王,官五品,後隸武節侯陳渴眞為裨將。洪武末,代渴眞禦寇東海。 **| 查陽言奉命,侵掠如故,且授印章逼爲屬,又邀奪天朝賜物。** 思 明所轄祿州、西平州、永平寨爲所侵奪,帝諭令還,不聽。 方議招軍,賊兵見迫,倉皇出走,竄伏巖谷,萬死一生,得達老 黎賊盡滅陳族,臣越在外州獲免。 遺人捕臣,欲加誅醢。 臣母,陳氏近族。 占城訴安南侵掠,詔令修 帝惡之,方遣官切責,而 而賊臣黎季犛父子弑 會老撾送陳天平 故臣幼侍國 臣 臣僚佐 棄 軍 遁

列

濄。 與此 賊不 恭聞 ·共戴天。 皇帝陛下入正大統,臣有所依歸。 伏祈聖慈垂憐,迅發六師,用章天討。」帝益感動,命所 匍匐萬里,哀翹明庭。 陳氏後裔 司館之。 止臣一 人,臣

能容。」 答。 帝諭侍臣:「宜父子悖逆,鬼神所不容,而國中臣民共爲欺蔽。 <u></u> 查方遣使賀正旦,帝出天平示之,皆錯愕下拜,有泣者。 伯耆責使者以大義,惶恐不能 一國皆罪人也,朕烏

乃令天平還國,敕廣西左、右副將軍黃中、呂毅將兵五千送之。 以君禮,當建爾上公,封以大郡。」查復遣景眞從聰等還報,迎天平。 主,且退還祿州、寧遠地。 掠其壻女。 三年命御史李琦、行人王樞齎敕責查,令具篡弑之實以聞。雲南寧遠州復訴查侵奪七 **<u></u> <u>全</u>**遣其臣阮景眞從琦等入朝謝罪,抵言未嘗僭號改元,請迎天平歸,奉爲 帝不虞其詐,許之。 '命行人聶聰齎敕往諭,言:「果迎還天平,事 聰力言查誠可信,帝

副 月 入 陵 命能 (安南坡壘關,傳檄數|一元父子二十大罪, 諭國人以輔立陳氏子孫意。 關 將 軍 ,將至芹站,全伏兵邀殺天平,中等敗還。 四年,天平陛辭,帝厚加賚,敕封宜順化郡公,盡食所屬州縣。三月,中等護天平入雞 佩征夷將軍印 豐城侯李彬 、雲陽伯 **充總兵官,西平侯沐晟佩征** 陳旭爲左、右參將, 帝大怒,召成國公朱能等謀,決意討之。 督師 夷副將軍印爲左副將軍,新城侯張! 南征。 能 至龍州病卒, 師次芹站,遂造浮 輔代 將其軍。 輔爲右

列傅第二百九 外國二

邦城對 椿,所居東都,嚴守備,水陸兵號七百萬,欲持久以老官軍。 樹棚,增築土城於多邦隘,城栅連九百餘里,大發江北民二百餘萬守之。諸江海口皆下木 彬 橋 口,造戰艦。 海。 軍 於昌江以濟。 亦自雲南至白鶴,乃遣驃騎將軍朱榮往會之。 壘。 郡縣 大軍 相 循富良江 輔遣旭攻洮江州,四造浮橋濟師,遂俱抵城下,攻拔之。 帝慮賊緩師以待瘴癘,敕輔等必以明年春滅賊。十二月,晟次洮江北岸,與多 繼納款,抗拒者輒擊破之。 前鋒抵富良江北嘉林縣,而輔由芹站西取他道至北江府新福縣,「三課晟、 .南下,遂擣東都。 財棄城走,大軍入據之,薄**西**都。 士民上書陳黎氏罪惡,日以百 時輔等分道進兵,所至皆克。 輔等乃移營三帶州箇招市 賊所恃惟此城,旣破, 數。 賊大燒宮室,駕舟 賊乃緣

江,追至日南州 望山,安南盡平。 破賊於富良江,季犛父子以數舟遁去。 陳氏 五. 年 庄 爲黎賊殺盡,無可繼者。 月大破季犛於木丸江,宣詔訪求陳氏子孫。 奇羅 羣臣請如耆老言! 海口, 命柳升出海追之。 安南本中國 一設那縣 諸軍水陸 **賊數敗,不能軍。** 地,乞仍入職方, |並追,次茶籠縣,知季犛走乂安,遂循 於是耆老千一百二十餘人詣 五月獲季犛及偽太子於高 同內郡。」輔等以聞。 軍門, 舉厥 尋大

部侍郎張顯宗、福建布政司左參政王平爲左、右布政使,前河南按察使阮友彰爲按察使,裴 六月朔,詔告天下,改安南爲交阯,設三司:以都督僉事呂毅掌都司事,黄中副之,前工

屬吏。 錄用。 贈官,軍民死亡暴露者瘞埋之。居官者仍其舊,與新除者參治。黎氏苛政一切蠲除,遭刑 控制之。乃敕有司,陳氏諸王被弑者咸予贈諡,建祠治塚,各置灑掃二十戶。宗族被害者 伯耆授右參議,又命尚書黃福兼掌布、按二司事。 設 | 交州、北江、諒江、三江、建平、新安、建 習兵法及容貌魁岸、語言便利、〔邑膂力勇敢、陰陽術數、醫藥方脈諸人,悉以禮敦致,送京 求山林隱逸、明經博學、賢良方正、孝弟力田、聰明正直、廉能幹濟、練達吏事、精通書算、明 者悉放免。禮待高年碩德。鰥寡孤獨無告者設養濟院。懷才抱德之彥敦遣赴京。又詔訪 又設太原、宣化、嘉興、歸化、廣威五州,直隸布政司,分轄二十九縣。 其他要害,咸設衞所 昌、奉化、清化、鎭蠻、諒山、新平、演州、义安、順化十五府,分轄三十六州,一百八十一縣。 於是張輔等先後奏舉九千餘人。九月,季犛、蒼父子俘至闕下,與偽將相胡杜等悉 赦蒼弟衞國大王澄、子芮,所司給衣食。

行封賞,輔進英國公,晟黔國公,餘敍賚有差。 奇,米粟一千三百六十萬石,船八千六百七十餘艘,軍器二百五十三萬九千八百。 撫人民三百一十二萬有奇,獲蠻人二百八萬七千五百有奇,象、馬、牛二十三萬五千九百有 六年六月, 輔等振旅還京, 上逐胜地圖, 東西一千七百六十里, 南北二千八百里。安 於是大

時中朝所置吏,務以寬厚輯新造,而蠻人自以非類,數相驚恐。 陳氏故官簡定者,先

降, 慶, 命沐晟爲征夷將軍,統雲南、貴州、四川軍四萬人,由雲南征討。 交州近境。 將遣詣京師,偕其黨陳希葛逃去,與化州爲官鄧悉、阮帥等謀亂。 日大越。 慈廉、威蠻、上洪、天堂、應平、石室諸州縣皆嚮應,守將屢出討,皆無功。 出沒义安、化州山中,何大軍還,卽出攻盤灘鹹子關,扼三江府往 而遣使齎敕招降者予世 定乃僭大號,紀元興 來孔道,寇 事聞,

官。

賊不應,晟與戰生厥江,大敗,呂毅及參贊尙書劉儁死之。

世毎 朱廣、兪讓、方政等舟齊進,礮矢飇發,斬首三千級,生擒爲監門將軍潘低等二百餘 慈廉、廣威諸營柵。 異太平海 四百餘艘。 輔 征之。 衆二萬,對岸立寨栅,列船六百餘艘,樹椿東南以扞蔽。 七 年,敗書聞, 口 輔以賊負江海,不利陸師,乃駐北江仙游,大造戰艦,而撫諸遭寇逋播者, ,獲其黨范必栗。 逐進擊景異,景異先走,乃定<u>交州、北江、諒江、新安、建昌、鎭</u>蠻諸府。 偵其黨鄧景異扼南策州盧渡江 益發南畿、浙江、江西、福建、湖廣、廣東、廣西軍四萬七千人,從英國 太平橋,乃進軍鹹子關。 時八月,西北 風 急,輔督陳旭、 偽金吾將軍 阮 人,獲船 追破景 逐連 破 公

餘 求 日 封爵。 抵清化 時 阮 輔 帥等推簡定爲太上皇,云別立陳季擴爲帝,紀元重光。 ,水陸畢會。 叱斬之,由黃江、阿江、大安海口至福成江,轉入神投海口,盡去賊 定已奔演州,季擴走乂安,帥、景異等亦散亡。 乃遣使自稱前安南王 於是駐軍,捕餘黨。 所 樹 椿 棚。十

定走美良縣吉利棚, [計] 輔等窮追及之。 定走入山,大索不得,遂圍之,幷其偽將相陳希葛、

阮汝勵、阮晏等俱就擒。

降。 栅遁。 都督江浩,都指揮兪讓、花英、師祐等軍,佐晟守禦。」從之。五月,晟追季擴至虞江,賊 江交州後衞道路,遂往征之。 伏兵,水陸夾攻。 進,阮帥、胡具、鄧景異、鄧鎔等來拒。 據月常江 參政,潘季祐按察副使。 而鄧鎔塞神投福成江口,據淸化要路,出沒乂安諸處。若諸軍盡還,恐沐晟兵少不敵。 悉斬之,築京觀。 餘人。八年正月,輔進擊之,斬首四千五百餘級,擒其黨范支、陳原卿、阮人柱等二千餘人, 帝心知其 先是,賊黨阮師槍僭王,與爲金吾上將軍杜元措等據東潮州安老縣之宜陽社,衆二萬 追至古靈縣及會潮、靈長海口,斬首三千餘級,獲偽將軍黎弄。季擴大蹙,奉表乞 ,樹樁四十餘丈,兩崖置栅二三里,列船三百餘艘,設伏山右。 輔乃督水軍剿季擴,聞石室、福安諸州縣 、詐,姑許之,韶授交阯布政使,阮帥、胡具、鄧景異、鄧鎔並都指揮,陳原樽右 賊大敗,帥等皆散走。 輔將班師,言:「季擴及黨阮帥、胡具、鄧景異等尙在演州、乂安,逼淸化。 詔旣下,念賊無悛心,九年復命輔督軍二萬四千,合晟軍討之。 輔令朱廣等連艦拔椿以進,自率方政等以步隊剿其 生擒爲將軍鄧宗稷、黎德彝、阮忠、阮軒等,獲船百 偽龍 虎將軍黎蕊等斷銳江浮橋阻生厥 斬偽將軍阮陁,獲偽將軍楊汝梅、 秋,輔、晟等水陸並 請留 賊

防禦使馮 **翕,斬首千五百級,追殺餘賊殆** 盡。 慷及杜箇 旦、鄧明、阮思瑊等亦 就

祐按察副 追之不及。 十 年 使, ,輔督方政等擊賊舟於神投海, 輔軍至乂安土黃,四為為少保潘季祐等請降,率爲官十七人上 署乂安府事。 於是偽將軍、觀察、安撫、招討諸使陳敏、阮士勤、陳全勖、陳全 大敗之,擒僞 將 軍陳磊、鄧汝戲等。 謁。 阮帥 輔承 等遠遁, 制授季

敏等相繼降

魯、潘勤等盡降。 十餘里,聞更鼓聲,輔率政等銜枚疾趨,黎明抵叱蒲幹栅,江北賊猶寨南岸。官軍渡江圍之, 遙蠻昆浦栅。 破之,生擒僞將軍潘徑、阮徐等五十六人,追至愛母江。 矢中景異脇,擒之。 大搜暹人 明 年,輔及晟合軍至順州。 關諸山,獲帥及季擴等家屬。 遂進羅蒙江,[f] 舍騎步行, 比至, 賊已遁。 明年春,進軍政和。賊帥胡同降,言偽大將軍景異率黨黎蟾等七百人逃 |鎔及弟戲亡走,追擒之,盡獲其衆。 阮帥等設伏愛子江,而據昆傳山險,列象陣迎敵。 帥逃南靈州,依土官阮茶彙。 別將朱廣追偽大將軍阮 **賊潰散,鄧鎔弟爲侯**鐵 追至叱蒲捺栅,又遁。 指揮薛聚追獲帥, 帥於暹蠻, 及 昏夜行二 諸軍大 將 軍 潘

膼懼官軍躪其 初, 鄧鎔之就 地 請 執也,季擴逃乂安竹排山。 自 縛以獻 輔檄索之,令酤深入,克三關,抵金陵箇 輔遣都指揮師祐襲之,走老撾。 一,賊黨盡 祐 奔 踵 其後,老 逐 獲 季

列

夷將軍印 擴 及 其 弟爲相國 出鎭。 [驩國王季揝,他賊盡平。 十四年召還。明年命豐城侯李彬代鎭。 明年二月,輔、晟等班師入京。四月復命輔佩征

季祐子 黨韋五 安衞 僧, 者猶 爲左參將,助之。 司空、大將軍,攻掠城邑。。彬東西征剿,日不暇給。中朝以賊久未平,十八年命榮昌伯陳智 老起大灣,范玉起安老,皆自署官爵,殺將吏,焚廬舍。 丘溫,陳木果起武定,阮特起快州,吳巨來起善誓,鄭公證、黎姪起同利 州判官阮擬、左平知縣范伯高、縣丞武萬、百戶陳已律等一時並反。 還,卽並起爲亂。 何時得安。 自言天降 百戶陳直誠,亦乘機作亂。其他奸宄,范軟起俄樂,[10]武貢、黃汝典起偈江 不 交人故好亂。 也, 譚 止。 興邦、阮嘉爲太師、平章, 嗣父職,不堪馬騏虐,遂反。土官指揮路文律、千戶陳苔等從之。 俄樂巡檢黎利、四忙故知縣車綿之子三、乂安知府潘僚、南靈州千戶陳順慶、乂 宜廣爲方略,速奏蕩平。」彬皇恐,督諸將追剿。明年秋,賊悉破滅,惟黎利不 印劍,遂僭稱羅平王,紀元永寧,與范善、吳中、黎行、陶承等爲亂,署爲相國、 又降敕責彬曰:「叛寇潘僚、黎利、車三、儂文歷等迄今未獲,兵何時得息, 陸那阮貞,順州黎核、潘强與土官同知陳可論、判官阮昭、千戶陳悩、南 中官馬騏以採辦至,大索境內珍寶,人情騷動,桀黠者鼓煽之,大軍 與羣寇相倚,而潘僚、范玉尤猖 有楊恭、阮多者,日日皆自稱王,署其 彬皆遣將討滅之,而反 獗。 陶强起善才,丁宗 僚者,故义安知府 玉爲塗山寺 ,儂文歷起 甫

撾。 疑老撾匿賊,令彬送其使臣至京詰問,老撾乃逐利。 深匿。彬奏言:「利竄老撾,老撾請官軍毋入,當盡發所部兵捕利。今久不遣,情叵測。」帝 等,利遁去。 反 及政等還,利潛出,殺玉局巡檢。已,復出掠磊江,每追擊輒遁去。及羣盜盡滅,利益 ,僭稱平定王,以弟石爲相國,與其黨段莽、范柳、范晏等放兵肆掠。 利 初仕陳季擴爲金吾將軍,後歸正,用爲清化府俄樂縣巡檢,邑邑不得志。及大軍還, 。人之,出據可藍棚行劫。自己諸將方政、師祐剿獲其僞將軍阮箇立等,利逃匿老 官軍討之,生擒晏

雖求撫,願以所部來歸,而止俄樂不出,造軍器未已,必當進兵。 天下,因敕智善撫之,而利已寇茶籠州,敗方政軍,殺指揮伍雲。 年秋,智奏利初逃老撾,後被逐歸瑰縣。 二十年春,彬卒,詔智代彬。二十一年,智追利於寧化州車來縣,敗之,利復遠竄。 官軍進擊,其頭目范仰等已率男婦千六百人降,利 奏至,會仁宗以踐阼大赦 明

利得 萬死。」 日 :「此賊狡詐,若爲所紿,則其勢益熾,不易制也。」壽叩頭言:「如臣往諭,而 ,敕,無降意,卽借撫愚守臣,佯言俟秋涼赴官,而寇掠不已。 利未叛時,與鎭守中官山壽善。 帝領之,遣壽齎敕授利淸化 知府,慰諭甚至。 至是壽還朝,力言利與己相信,今往諭之,必來歸。 敕 甫降, 利已寇清化,殺都指揮陳忠 利 不來,臣當

汝笏 茶籠又敗。 司官。 乞命總兵者速行剿滅。」奏上,爲降敕切責,期來春平賊。 貳,旣陷茶籠,復結玉麻土官、老撾酋長與之同惡。 坐 無 將 視 有怨,乞改授茶籠州,而遣逆黨潘僚、路文律等往嘉興、廣威諸州招集徒衆,勢日滋蔓。 不 略 救。 智等不爲意,茶籠遂陷,知州琴彭死之。 熙改元,鑄將軍印分頒邊將,智得征夷副將軍印,又命安平伯李安往佐之。 一賊,因借撫以愚中朝,且與方政迕,遂頓兵不 閱 政勇而 七月、城中糧盡、巡按御史 寡謀,智懦 而多忌,素不相能,而山壽專招撫,擁兵乂安不救,是以屢敗。 以聞,奏至而仁宗崩。宣宗初即位,敕責智及三 尚書掌布按二司陳洽言:「利雖乞降,內攜 始言俟秋凉,今秋已過,復言與參政梁 · 進。 智始懼,與政薄可留關,敗還,至 賊 益 無所忌,再圍茶籠, 智等 智素

贖罪。 政督 之。 往討黎利 莊、太原黃菴等結雲南寧遠州 手三千赴交阯,且敕老撾 諸 詔 宣 德 未幾,智遣都指揮袁亮擊賊黎善於廣威州,欲渡河,土官何加伉言有伏。 軍 大 進 赦 元年春,事聞,復降敕切責。 (交阯罪人) 黎利、潘僚降亦授職; 討,李安及都指 削陳智、方政職,充爲事官。 不得容叛 揮于瓚、謝鳳、薛聚、朱廣等先奔,政由 紅衣賊大掠。 人。 時渠魁未平,而 四月,命成山侯王通爲征夷將軍,都督馬瑛爲參將, 通未至,賊犯淸化。 帝敕沐晟剿寧遠, 停採辦金銀、香貨,冀以弭賊, 小寇鑑起,美留潘可利助逆,宣化周 又發西南諸衞軍萬五千、弩 政不出戰,都指揮王演擊敗 此敗,俱 謫 爲 而 事官,立功 亮不從,造 賊 無悛心。

指揮陶森、錢輔等渡河、中伏並死、亮亦被執。 善遂分兵三道犯交州,其攻下關者爲都督陳

濬所敗,攻邊江小門者爲李安所敗,善夜走。

柳升 |忠爲左、右副將軍,從雲南進兵,兩軍共七萬餘人。 復敕通固守,俟升。 利移兵攻之不下。 舉 進 中,遇伏兵,大敗。 動 重 爲總兵官,保定伯梁銘副之,督師赴討,又命沐晟爲征南將軍,興安伯徐亨、新寧伯譚 東關。 乖張,不奉朝命,擅割清化以南地予賊,盡撤官吏軍民還東關。 通聞之,亦分兵三道出擊。 馬瑛敗賊淸威,至石室與通會,俱至應平寧橋。士卒行泥濘 通素無戰功,以父眞死 賊分兵萬人圍隘留關,百戶萬琮奮擊,乃退。 尚書陳洽死焉,通亦中脇還。 事封。 朝廷不知其庸劣,誤用之。一戰而 利在义安聞之,自己鼓行至清潭,攻北江 帝聞通敗,大駭,命安遠侯 惟清化知州羅 敗,心膽皆喪, 通不從,

懼升大軍至,攻益力。夏四月,城陷,任死之。時賊圍交州久,通閉城不敢出,賊益易之,致 往來要道,發衆八萬餘人來攻,都指揮李任等力拒,殺賊甚衆。閱九月,諸將觀望不救,賊 萬三千人,從柳升、沐晟征討。 賊分兵圍丘溫,都指揮孫聚力拒之。 先是,賊以昌江爲大軍 破 膽奔遁,諸將請乘勢追之,通逗留三日。 賊知其怯,復立寨濬濠,四出剽掠。 三月復發三 和。 二年春,利犯交州。 通欲許之,集衆議,按察使楊時習曰:「奉命討賊,與之和,而擅退師,何以逃罪」」 通與戰,斬僞太監黎祕及太尉、司徒、司空等官,獲首級萬計。

列

第

=

百九

外

國

通怒,厲聲叱之,衆不敢言,遂以利書聞。

奉表及方物進獻。 相繼盡 目具書詣丹軍,乞罷兵,立陳氏裔。 升不啓封,遣使奏聞。 |升奉命久,俟諸軍集,九月始抵隘留 歿。 通聞,懼甚,大集軍民官吏,出下哨河,立壇與利盟誓,約退師。 沐晟軍至水尾,造船將進,聞通已議和,亦引退,賊乘之,大敗 關。 利旣與通有成言,乃詭稱陳氏有後,率大小頭 無何,升進薄倒馬坡,陷歿,後軍 **遂遣官偕賊使**

順三世嫡孫」,其詞與|利書略同。 帝心知其詐,欲藉此息兵,遂納其言。 <u> 撾二十年,本國人民不忘先王遺澤,已訪得之。倘蒙轉達黼宸,循太宗皇帝繼絕明詔,還其</u> 爵土,匪獨陳氏一宗,實蠻邦億萬生民之幸。」帝得書領之。明日,暠表亦至,稱「臣暠,先王 弑,太宗皇帝興師討滅,求陳氏子孫。陳族避禍方遠竄,故無從訪求。今有遺嗣暠,潛身老 鴻臚寺進賊與丹書,略言:「高皇帝龍飛,安南首朝貢,特蒙褒賞,錫以玉章。 後黎賊篡

意。 司官,盡撤軍民北還。 左侍郎李琦、工部右侍郎羅汝敬爲正使,右通政黃驥、鴻臚卿徐永達爲副使,齎詔撫諭安南 人民,盡赦其罪,與之更新,令具陳氏後人之實以聞。 士奇、**傑力贊之,惟蹇義、夏原吉不可。然帝意已決,廷臣不敢爭。十一月朔,命禮** 初,帝嗣位,與楊士奇、楊燦語交阯事,卽欲棄之。至是,以表示廷臣,諭以罷兵息民 韶未至,通已棄交阯,由陸路還廣西,中官山壽、馬騏及三司守令,由 因敕利以興滅繼絕之意,幷諭通及三

水路還欽州。 凡得還者止八萬六千人,為賊所殺及拘留者不可勝計。 天下舉疾通棄地殃

民,而帝不怒也。

實無罪,皆同論,時議非之。廷臣復劾沐晟、徐亨、譚忠逗留及喪師辱國罪,帝不問 布 政使一謙,俱論死下獄,籍其家。帝終不誅,長繫待決而已。 騏恣虐激變,罪尤重,而 三年夏,通等至京,文武諸臣合奏其罪,廷鞫具服,乃與陳智、馬瑛、方政、山壽、馬騏及 謙

朝命。 後、利必不言,然以封利無名,復命琦、汝敬敕諭 「臣九歲女遭亂離散,後知馬騏攜歸充宮婢,臣不勝兒女私,冒昧以請。」帝心知陳氏卽有 其眷屬。 琦等還朝,利遣使奉表謝恩,詭言屬於正月物故,陳氏子孫絕,國人推利守其國,謹俟 帝亦知其詐,不欲遽封,復遣汝敬、永達諭利及其下,令訪陳氏,幷盡還官吏人民及 明年春,汝敬等還,利復言陳氏無遺種,請別命。 再訪,且以利女病死告之。 因貢方物及代身金人。

利及使臣皆有 使臣 印,命利 飾 詞 對,復進頭目耆老奏,仍爲利乞封。 歸,帝復以訪陳氏裔,還中國遺民二事諭之,詞不甚堅。 五. 年春,琦等還,利遣使貢金銀器方物,復飾詞具奏,幷具頭目耆老奏請令利攝 權署安南 賜。 國事。 明 年八月來貢,命兵部侍郎徐琦等與其使偕行,諭以順天保民之道。 利遣使齎表及金銀器方物,隨敞等入貢。 帝乃許之, 命禮部右侍郎章敞、 明年夏, 七年二月達京 利遣使謝罪,以二事 右通政徐琦齎敕 師,比還, 國政 是

列

傅

第

年,利卒。

擬 陽、安邦、諒山、太原、明光、諒化、淸華、乂安、順化、廣南。各設承政司、憲察司、總兵使司, 中國三司。 利雖受敕命,其居國稱帝,紀元順天,建東、西二都,分十三道: 日山南、京北、山西、海 東都在交州府,西都在淸華府。 置百官,設學校,以經義、詩賦二科取士,彬

告計,命侍郎章敞、行人侯遜敕麟權署國事。 子麟繼,麟一名龍。 自是其君長皆有二名,以一名奏天朝,貢獻不絕如常制。 明年遣使入貢謝恩。 麟遣使 彬有華風焉。

僭位六年,私諡太祖

思郎州· 使還,令齎皮弁冠服、金織襲衣賜其王。是歲,麟卒,私諡太宗。改元二:紹平六年,大寶 還侵地。 乃命兵部右侍郎李郁、左通政柰亨齎敕印,封麟爲安南國王。明年遣使入貢謝恩。時安南 並遣使表質,貢方物。 正統元年四月以宣宗賓天,遣使進香。 土官攻掠廣西安平、思陵二州,據二峒二十一村。帝命給事中湯鼐、行人高寅敕麟 麟奉命,遣使謝罪,而訴安平、思陵土官侵掠思郞。帝令守臣嚴飭。七年,安南貢 **閏六月復貢。帝以陳氏宗支旣絕,欲使麟正位,下廷議,咸以爲宜。** 又以英宗登極及尊上太皇太后、皇太后位號,

子濬繼,一名基隆,遣使告訃。命光祿少卿宋傑、兵科都給事中嶭謙持節册封爲國王。

濬遣將侵占城,奪新州港,擴其王摩訶賁該以歸。 帝爲立新王摩訶貴來,敕安南使,諭濬歸

其故王。 濬不奉詔, 侵掠人口至三萬三千餘, 占城入訴。

宜民,篡位九月,改元天與,爲國人所誅,貶厲德侯,以濬弟灝繼。灝,一名思誠 月,其庶兄諒山王琮弑之而自立。 冕,如朝鮮例,不從。其使者乞以土物易書籍、藥材,從之。二年遣使賀英宗復辟。 景泰元年賜敕戒濬,迄不奉詔。四年遣使賀册立皇太子。天順元年遣使入貢,乞賜袞 濟改元二:大利十一年,延寧六年。 私諡仁宗。 三年十

封。未入境,聞踪已誅,灝嗣位,卽却還。 灝連遣使朝貢請封,禮官疑其詐,請命廣西守臣 年二月命侍讀學士錢溥、給事中王豫封灝爲國王。 覈實奏請,從之。使臣言:「禮,生有封,死有祭。今濬死旣白,請賜祭。」乃命行人往祭。六 溺,不敢煩天使,帝卽已之。使者言濬無子,請封琮。命通政參議尹旻、禮科給事中王豫往

但賜皮弁冠服及紗帽犀帶。 憲宗踐作,命尚寶卿凌信、自己行人邵震賜王及妃綵幣。灝遣使來貢,因請冕服,不從, 成化元年八月以英宗賓天,遣使進香,命赴裕陵行禮

城,執其王盤羅茶全,逾三年又破之,執其王盤羅茶悅,遂改其國爲交南州,設兵戍守。 灝 雄 桀,自負國富兵强,輒坐大。 四年侵據廣西憑祥。 帝聞,命守臣謹備之。七 年破占 安

南 遂以解送<u>廣西龍州罪人爲詞,隨景假道雲南入京,索夫六百餘,且發兵繼其後,雲南大擾。</u> 兵部言雲南非貢道,龍州罪人宜解廣西,不必赴京。乃令守臣檄諭,且嚴邊備 **貢道,故由廣西。時雲南鎭守中官錢能貪恣,遣指揮郭景齎敕取其貨。灝素欲窺雲南,**

如 土字,乞遣 |城非沃壤,家鮮積貯,野絕桑麻,山無金寶之收,海乏魚鹽之利,止產象牙、犀角、鳥木、沉 質苔所弑。自己其國自亂,非臣鬥罪。」中朝知其詐,不能詰,但勸令還其土宇。 畏忌,言:「占城王盤羅茶全侵化州道,為其弟盤羅茶悅所弑,因自立。 鎭安,亦數告警。 得其 灏旣得憑祥,滅占城,遂侵廣東瓊、雷,盜珠池。 廣西之龍州、右平,雲南之臨安、廣南、 、地不可居, 得其民不可使, 得其貨不足富, 此臣不侵奪占城故也。 朝使申畫郊圻,俾兩國邊陲休息,臣不勝至願。」時占城久爲所據,而其詞誕 韶守臣詰之。
,輔詭詞對。
廟堂務姑息,雖屢降敕諭,無厲詞。 及將受封,又爲子茶 明詔令臣復其 灏奏言:「占 灝盆玩侮無

復大破之,殺宜慰刀板雅、蘭、掌父子三人,其季子怕雅賽走八百以免。 灝復積糧練兵,頒 守臣力止之,始退。臟旣破占城,志意益廣,親督兵九萬,開山爲三道,攻破哀牢,侵老撾, 子,有韶禁飭之。十五年冬,瀾遣兵八百餘人,越雲南蒙自界,聲言捕盜,擅結營築室以居。 先是,安南入貢,多攜私物,道憑祥、龍州,乏人轉運,輒興讎釁。 會遣使賀册立皇太

刺加亦以被侵告,帝敕使諭令睦鄰保國。未幾,使臣入貢,請如暹羅、爪哇例賜冠帶。 萬餘人,灝始引還。 爲敕於車里,徵其兵合攻八百。將士暴死者數千,咸言爲雷霆所擊。八百乃遏其歸路,襲殺 而灝言未侵老撾,且不知八百疆宇何在,語甚誑誕。 帝下廷議,請令廣西布政司檄灝斂兵,雲南、兩廣守臣戒邊備而已。 帝復慰諭之,迄不奉命。 十七年秋,滿

之,不爲例

所畏。 古來以天朝力得還國,復愬安南見侵。兵部尚書馬文升召安南使臣曰:「歸諭爾主,各保疆 土享太平。不然,朝廷一旦赫然震怒,天兵壓境,如永樂朝事,爾主得無悔乎。」安南自是有 孝宗踐阼,命侍讀劉戩詔諭其國。其使臣來貢,以大喪免引奏。弘治三年,時占城王

之尊,又賜一品常服,俾不忘臣事中國之義。今所請,紊亂祖制,不可許。 乞改賜。 乃通事者導之妄奏,宜懲。」帝特宥之。 訃,命行人徐鈺往祭。尋賜暉皮弁服、金犀帶。其使臣言,國主受王封,賜服與臣下無別, 名敬甫,七月而卒,私諡 十年,灝卒,私諡聖宗。其改元二:光順十年,洪德二十八年。子暉繼,一名鱠,遣使告 禮官言一安南名爲王,實中國臣也。 庸宗。 弟誼繼,一名璿。 十七年,暉卒,私諡憲宗,其改元日景統。 嗣王新立,必賜皮弁冠服,使不失主宰一國 然此非使臣罪, 子澤繼,

列

諡誼 龍竊權 正 德 元 威穆帝。 武 年册爲王。 四年逼誼自殺,擁立其弟伯勝,貶誼 踐 阼, 誼在位四年,改元端慶。 命修撰倫文敍、給事中張弘至韶諭其國。 **誼竈任母黨阮种、阮伯勝兄弟,恣行威虐,屠戮宗親,耽殺祖母。 賙**,一名瀅,七年受封,多行不義。 爲厲愍王。國人黎廣等討誅之,立灝孫晭, **趙亦遣使告計,命官致祭如常儀。** 种等怙

討之。 不果。 庸等乃共立 皇帝,改元應天,貶晭爲靈隱王。 逼 虛位,別立 潓 十一年, 母,迎 暠敗走,獲昺及其黨陳璲等。 以登庸有功,封武川伯,總水陸 其族子酉榜,發兵攻都 **譓歸,自爲太傅仁國公。** 社堂燒香官陳暠與二子房、昇作亂,殺啁 城。 **晭臣都力士莫登庸初附暠, 暠與昇奔諒山道,據長寧、太原、淸節三府** 十六年率兵攻陳暠,暠敗走死 一諸軍。 譓出 走,登庸擊破綏兵,捕酉榜殺之,益恃 旣握兵柄,潛蓄異志。 **晭在位七年**,改元洪順。 而自立。 後與黎氏大臣阮弘裕 詭言前王陳氏後,仍稱大虞 黎氏臣鄭綏、以 譓將請封, 自保。日心登 功專恣,遂 譓徒 等起 因 國 擁 亂

至 華 春,登庸賂欽州判官唐淸,爲魔求封。 州 登庸立其庶弟懬 嘉 靖 聞其國大亂,道不通,乃却還。 元年, 登庸自稱安興王,謀弑譓。 ,遷居海東長慶府。 四年夏,譓遣使間道通貢,幷請封,爲登庸所阻。 總督張湒逮淸,死於獄。 世宗踐阼,命編修孫承恩、給事 . 聽母以告,乃與其臣杜溫潤問行以免,居於淸 六年,登庸令其黨范嘉謨 中愈敦 詔諭其國。 明

外援,作大誥五十九條,頒之國中。 來貢,至諒山城,被攻而還。九年,登庸禪位於方瀛,自稱太上皇,移居都齋、海陽,爲方瀛 **僞爲魔禪韶,篡其位,改元明德,立子方嬴爲皇太子。** 方嬴改元大正。 其年九月,黎譓卒於清華,國亡。 旋酖殺懬,諡爲恭皇帝。 踰年,遣使

其姓名不符,拒之。是彼欲貢不得,非負固不貢也。」章下兵部,亦以爲然,命俟勘官還 力陳用兵七不可,語詳其傳中,末言:「安南雖亂,猶頻奉表箋,具方物,款關求入。守臣以 吉罪人主名,較四川、貴州、湖廣、福建、江西守臣,預備兵食,候征調。 敕兩廣、雲南守臣整兵積餉,以俟師期,制可。乃命千户陶鳳儀、鄭璽等,分往廣西、雲南, 言及本兵張瓚等力言逆臣篡主奪國,朝貢不修,決宜致討。乞先遣錦衣官二人往覈其實, 既以道阻不通,今宜暫停使命。」帝以安南叛逆昭然,宜急遣官往勘,命言會兵部議征討。 黎應均非黎晭應立之嫡,莫登庸、陳暠俱彼國篡逆之臣,宜遣官按問,求罪人主名。且前使 十五年冬,皇子生,當頒韶安南。禮官夏言言:「安南不貢已二十年,兩廣守臣謂黎譓、 户部侍郎唐胄上疏,

時嚴嵩掌禮部,謂其言未可盡信,請羈之,待勘官回奏,從之。 國人立寧爲世孫,權主國事。 十六年,安南黎寧遣國人鄭惟僚等赴京,三〇備陳登庸篡弑狀,言三寧卽譓子。 屢馳書邊臣告難,俱爲登庸邀殺。 尋召鳳儀等還, **乞興師問罪,亟除國賊。**」 命禮、 譓 卒,

寧誠僞未審,令三方守臣從宜撫剿,參贊、督餉大臣俱暫停,旦調用,以張經代之。 時御史 抗疏切諫。帝怒,褫其職。兩廣總督潘旦亦馳疏請停前命,言:「朝廷方興問罪之師, 總兵,督軍征討,其大將需後命。兵部復奉詔,條用兵機宜十二事。日也獨侍郎潘珍持不可, 務,命户部侍郎胡璉、高公韶先馳雲、貴、兩廣調度軍食,以都督僉事江桓、牛桓爲左、右副 至京,奏上方略六事,以旦不可共事,請易之,優旨褒答。及兵部議上, 即有求貢之使,宜因而許之,戒嚴觀變,以待彼國之自定。」嚴嵩、張瓚窺帝旨,力言不可宥, 部會廷臣議,列登庸十大罪,請大振宸斷,剋期徂征。乃起右都御史毛伯温於家,參贊軍 且言黎寧在清都圖恢復,而旦謂彼國俱定,上表求貢,決不可許。 旦疏遂寢。五月, 帝意忽中變, 伯温 謂黎

庸能束身歸命,籍上興圖,待以不死。於是登庸父子遣使奉表乞降,且投牒文盛及黔國公 國。 言三莫之篡黎,猶黎之篡陳,不足深較。 沐朝輔,具述黎氏衰亂,陳暠叛逆,己與方瀛有功,爲國人歸附,所有土地,已載一統志中, 徐九臯、給事中謝廷蒞以修省陳言,〔三〕亦請罷征南之師 臣已遣使宣諭,彼如來歸,宜因以撫納。」帝以光輕率,奪禄一年。 時文盛招納黎氏舊臣武文淵得其進兵地圖,謂登庸必可破,遂上之朝。 八月,雲南巡撫汪文盛以獲登庸間諜及所撰僞大誥上聞。 但當罪其不庭,責以稱臣修貢,不必遠征, 帝震怒,命守臣仍遵前韶征 文盛卽傳檄安南,登 廣東按臣余光 疲敝中

興師。 萬。 **亟**宜 道有六,兵當用三十萬,一歲之餉當用百六十萬,造舟、市馬、制器、犒軍諸費又須 乞貰其罪,修貢如制。 國篡弑始末及軍馬之數、水陸進兵道里來上。俱下兵部,集廷臣 況 進師。 可取狀。兵部不能決,復請廷議。及議上,帝不悅曰:「朕聞卿士大夫私議,咸謂不當 我 爾等職司邦政,漫無主持,悉委之會議。旣不協心謀國,其已之。鸞、伯溫別用。」 調大衆,涉炎海,與彼勞逸殊勢,不可不審處也。」疏方上,欽州知州林希元 請以 原推咸寧侯仇鸞總督軍務,伯溫仍爲參贊,從之。 朝輔等以十七年三月奏聞,而黎寧承前詔,懼天朝竟納其降,備以本 議。 張經上言:「安南進兵之 愈言莫氏罪不可赦, 又力陳 七十餘

計,共作慢詞。 初,征討之議發自夏言,帝旣責綰,因發怒曰:「安南事,本一人倡,衆皆隨之。 縣一百七十有六。帝納之,下禮、兵二部協議。至七月,綰猶未行,以忤旨落職,遂停使命。 韶,仍遺鸞、伯溫 命甫下,方瀛遣使上表降,並籍其土地、戶口,聽天朝處分,凡爲府五十有三,州四十有九, 十八年册立皇太子,當頒詔安南。特起黃綰爲禮部尚書,學士張治副之,往使其國。 此國應棄應討,宜有定議,兵部卽集議以聞。」於是瓚及廷臣惶懼,請如前 南征。 如登庸父子束手歸命,無異心,則待以不死,從之。 登庸閒,大喜。 乃訕上聽言

月率從子文明及 部目 四十二人入鎮南關, 囚首徒跣,匍匐叩頭壇上,進降表, 時方瀛 已卒,登庸卽遣使請降。 伯溫稱詔赦

列

十九年

,伯溫等抵廣西,

傳檄諭以納款宥罪意。

歲給大統曆,仍三歲一貢以爲常。更令覈黎寧眞僞,果黎氏後,割所據四府奉其祀事,否則 擬制 復詣 疏聞 度悉除去,改其十三道爲十三宣撫司,各設宣撫、同知、副使、僉事,聽都統黜陟。 制下,登庸悚惕受命。 軍門匍匐再拜,上土地軍民籍,請奉正朔,永爲藩臣。 ,帝大喜,命削安南國爲安南都統使司,授登庸都統使,秩從二品,銀印。 伯溫等宣示威德,令歸 舊 國俟 廣 所 憯 西

其偕 牒。 兪大猷 文明 妻武氏通,得專兵柄。 名 同 子宏瀷嗣。 分未定,止來使勿進,而令守臣覈所當立者。 輩阮如桂、范子儀等亦避居田里。敬舉兵逼都齋,正中、如桂、子儀等禦之,不勝。 ,宏瀷卒,子茂洽嗣。 來使 率家屬 會部目黎伯驪與黎寧臣鄭檢合兵來攻,宏瀷奔海陽,不克赴。光賁等留 二十二年,登庸卒,方瀛子福海嗣,遣宣撫同知阮典敬等來朝。曰己二十五年,福海卒, 所敗,誅死。 人物故大半。 初,登庸以石室人阮敬爲義子,封西寧侯。 奔欽州 ,子儀收殘卒遁海東。 宏瀷初立時,遣使黎光賁來貢,至南寧,守臣以聞。 宏瀷立,方五歲,敬益專恣用事。 宏瀷祈守臣代請,詔許 萬曆元年授都統使。 敬詭稱宏漢歿,以迎立正中爲詞,犯欽州 入京,其都統告身,仍俟宏溪赴關 三年遣使謝恩,賀卽位,進方物,又補累年 至三十年事白, 敬有女嫁方嬴次子敬典,因與方嬴 登庸次子正中及文明避之都齋,其 命授宏漢都統使, 禮官以 南寧 且 其 則給。四十 干 國 赴關領 正中 ·五年, 內亂

所缺之貢。

知寧所在,迎歸清華,後遷於漆馬江。寧卒,其臣鄭檢立寧子寵。龐卒,無子,國人共立黎 <u></u>靖九年改元元和。居四年,爲<u></u>登庸所攻,竄占城界。 時莫氏 漸衰,黎氏復興,互相構兵,其國益多故。始黎寧之據清華也,仍僭帝號,以嘉 國人立其弟憲,改元光照。 十五 一年廉

|暉四世孫維邦。|維邦卒,檢子||松立其子||維潭,世居||清華,自爲一國

萬,起京北道,擊走黎黨范拔萃、范百祿諸軍,敦讓得復歸。 陵、欽州者悉還。 讓,勢益 殺茂洽,奪其都統使印,親黨多遇害。 東海新安,懼黎兵追索,竄至龍州、憑祥界、令土官列狀告當事。維潭亦叩關求通貢 王金印。 萬曆十九年,維潭漸强,舉兵攻茂洽,茂洽敗奔嘉林縣。曰曰明年冬,松誘土人內應,襲 張。 茂給子敬恭與宗人履遜等奔廣西思陵州,莫履機奔欽州。 黎兵攻南策州,敬邦被殺,莫氏勢益衰。 有莫敦讓者,奔防城告難,總督陳蕖以聞。 敬恭、敬用屯諒山高平, 衆乃推敬邦署都統,諸流 獨莫敬邦有衆十餘 松復擒敦 ,識以國 敬璋屯 寓 思

以彼之叛我服我爲順逆。 竊謂黎氏擅興之罪,不可不問。莫氏孑遺之緒,亦不可不存。 二十一年,廣西巡撫陳大科等上言:「蠻邦易姓如弈棋,不當以彼之叛服爲順逆,止當 今維潭雖圖 恢復,而茂洽固天朝外臣也,安得不請命而 倘 如 先朝故事,聽黎氏 撊 然戮

列

矣。」兩遣官往問,以敬恭等願居高平來告,而維潭求款之使亦數至。寅秋乃與之期,具報 總督,與廣西巡撫戴燿並以屬左江副使楊寅秋,寅秋竊計曰:「不拒黎,亦不棄莫,吾策定 往察,敬用卽遣使叩軍門告難,且乞兵。明年秋,維潭亦遣使謝罪,求款。時大科已爲兩廣 納款,而仍存莫氏,比諸漆馬江,亦不翦其祀,於計爲便。」廷議如其言。 會敬璋率衆赴永安,爲黎氏兵擊敗,海東、新安地盡失,於是款議益決。 明年,大科方遣官

育遁去。

大科等疏聞,謂其臣鄭松專權所致。

維潭復遣使叩關,自己非遁。

大科等再遣官 約,至期忽言於關東曰:「士卒饑病,款儀未備。且莫氏吾讎也,棲之高平,未敢聞命。」遂中 時維潭圖恢復名,不欲以登庸自處,無束身入關意。寅秋復遣官諭之,其使者來報如

諭之,維潭聽命。

之,立銷矣。」惟割高平居莫氏,猶相持不絕。復諭之曰:「均貢臣也,黎昔可棲漆馬江,莫獨 氏世臣,非亂黎氏也。」然則何宵遁,曰:「以儀物之不戒,非遁也。」何以用王章,曰:「權倣爲 曰:「復讎急,不遑請命。」次継潭宗派,曰:「世孫也,祖暉,天朝曾錫命。」次鄭松,曰:「此黎 不可棲高平乎。」乃聽命。 退謁寅秋,請用賓主禮,不從,四拜成禮而退。 二十五年遣使請期,寅秋示以四月。屆期,維潭至關外,譯者詰以六事。首擅殺茂洽, 授以款關儀節,俾習之。 維潭率其下入關謁 安南復定。 韶授維潭都統使,頒曆奉 御幄,一 如登庸舊

肅容。 如莫氏故事。先是,黎利及登庸進代身金人,皆囚首面縛,維潭以恢復名正,獨立而 當事嫌其倨,令改製,乃爲俯伏狀,鐫其背曰:「安南黎氏世孫,臣黎維潭不得蒲伏天

門,恭進代身金人,悔罪乞恩。」自是,安南復爲黎氏有,而莫氏但保高平一郡。

維新 中,復回高平,勢益弱。然迄明之世,二姓分據,終不能歸一云。 嗣。 十四年遣使入貢,命授都統使。 亦不能制。守臣檄問,數發兵夾剿,雖應時破滅,而邊方頗受其害。 天啓四年,發兵擊莫敬寬,克之,殺其長子,掠其妻妾及少子以歸。 二十七年,維潭卒,子維新嗣,鄭松專其柄。 時莫氏宗黨多竄處海隅,往往僭稱公侯伯名號,侵軼邊境, 會叛會潘彥搆亂,維新與松移保淸化。三 敬寬與次子逃入山 維新卒,子維祺

學,麼、愛二州多倜儻士,較他方爲異。 之思明、南寧、雲南之臨安、元江。土膏腴、氣候熱、穀歲二稔。人性獲悍。臟、演二州多文 安南都會在交州,即唐都護治所。其疆域東距海,西接老撾,南渡海即占城,北連廣西

校勘記

傳其壻陳 記全書本紀全書卷四作「陳煚」。 日炬 陳日炬,明史稿傳一九五安南傳、元史卷二〇九安南傳都作「陳日煚」,大越史

列傳第二百九 校勘記

- 帝復命禮部郎 中邢文偉齎敕及幣往賜 邢文偉, 太祖實錄卷一八九洪武二十一年三月庚寅條
- 作「邢文博」。
- 至北江府新福縣 北江府、原作「江北府」,據太宗實錄卷五〇永樂五年六月癸未條、明一統志
- 卷九○改。
- 輔遣旭攻洮江州 洮江州,原作「洮州」。太宗實錄卷四七永樂四年十二月辛卯條作「洮江」,又
- 卷五〇永樂五年六月癸未條及明一統志卷九〇稱洮江州屬三江府。此脱「江」字,據補
- 35. 語言便利 原脫「語言」,據明史稿傳一九五安南傳、太宗實錄卷五○永樂五年六月癸未條補。
- 時阮帥等推簡定爲太上皇 太上皇, 本書卷一五四張輔傳、 太宗實錄卷六八永樂八年正月丁
- 酉條作「越上皇」。
- \Box += 定走美良縣吉利栅 吉利栅,原作「吉利册」,據丘濬平定交南錄、王世貞安南 傳改。
- 輔軍至乂安土黃 土黄、原作「上黄」,據太宗實錄卷五〇永樂五年六月癸未條、又卷八五永樂
- 十年十月戊寅條及天南一統志卷一四改。
- 丸 遂進羅 蒙江 羅蒙江,原作「羅江」,脫「蒙」字,據太宗實錄卷九一永樂十二年正月壬辰條、國
- 范軟起俄樂 俄樂,原作「浮樂」, 據本書卷一五四李桃傳及太宗實錄卷一一四永樂十七年十

月壬申條改。

有楊恭阮多者 楊恭,原作「楊公」,據本書卷一五四李彬傳改。

出據可藍棚行劫 可藍栅,原作「可藍堡」,據本書卷一五四李彬傳及太宗實錄卷一一三永樂

十七年五月乙巳條改。

利在乂安聞之 乂安,原作「清化」,據本書卷一五四王通傳、 宣宗實錄卷二二宣德元年十一月

乙未條及王世貞安南傳改。 按時清化未破,黎利不得在清化,作「乂安」是。

命尚寶卿凌信 尚寶卿、原作「尙書卿」、據憲宗實錄卷二天順八年二月壬寅條改。

至き 又爲子茶質苔所弑 茶質苔, 憲宗實錄卷一四四成化十一年八月辛丑條、 國権卷三七頁二三

五八及殊域周咨錄卷七俱作「茶質苔來」。

二公 據長寧太原淸節三府自保 清節、明史稿傳一九五安南傳、殊域周咨錄卷五都作「淸都」。

二七 登庸等乃共立晭兄灝之子譓 灏,明史考證攟逸卷四○據識大錄改爲「灦」。

安南黎寧遣國人鄭惟僚等赴京 鄭惟僚, 明史稿傳一九五安南傳、 世宗實錄卷一九七嘉靖十

六年二月壬子條及殊域周咨錄卷六都作「鄭惟憭」。

條用兵機宜十二事 十二事,世宗實錄卷一九九嘉靖十六年四月辛酉條作「十一事」,具列十一

事條文。

列傳第二百九 校勘

記

- C=0〕給事中謝廷蒞以修省陳言 謝廷蒞,原作「謝廷茝」,據本書卷二〇七謝廷蒞傳、世宗實錄卷二
- 〇〇嘉靖十六年五月乙巳條及卷二二三嘉靖十八年四月甲寅條改。
- 遣宣撫同知阮典敬等來朝 阮典敬,原作「阮敬典」,據世宗實錄卷二七三嘉靖二十二年四月乙

未條、殊域周咨錄卷六改。

茂洽敗奔嘉林縣 嘉林縣,原作「喜林縣」,據太宗實錄卷五〇永樂五年六月癸未條、明一統志

卷九〇改。

明史卷三百二十二

列傳第二百十

外國三

日本

師十萬征之,至五龍山遭暴風,軍盡沒。後屢招不至,終元世未相通也 通中國,朝貢不絕,事具前史。惟元世祖數遣使趙良弼招之不至,乃命忻都、范文虎等帥舟 里,大不過五百里。戶小者千,多不過一二萬。國主世以王爲姓,羣臣亦世官。 有五畿、七道、三島,共一百十五州,統五百八十七郡。其小國數十,皆服屬焉。 日本,古倭奴國。唐咸亨初,改日本,以近東海日出而名也。 地環海,惟東北限大山, 宋以前皆 國小者百

縣。洪武二年三月,帝遣行人楊載詔諭其國,且詰以入寇之故,謂:「宜朝則來 廷, 明興,高皇帝卽位,方國珍、張士誠相繼誅服。諸豪亡命,往往糾島人入寇山東濱海州 列 傳 第二百 + 外 國 Ξ 不則修

兵自固。 倘必爲寇盜,即命將徂征耳,王其圖之。」日本王良懷不奉命,「己復寇山東,轉掠

溫、台、明州旁海民,遂寇福建沿海郡。

或 建海上諸郡。 八人送使者還國,賜良懷大統曆及文綺、紗羅。是年掠溫州。〔三五年寇海鹽、澉浦,又寇福 好語,語未旣,水軍十萬列海岸矣。以天之靈,雷霆波濤,一時軍盡覆。 東、未嘗不慕中國。 書抵良懷,良懷延秩入。 十月至京。 禮遇甚優。 天使亦趙姓,豈蒙古裔耶?亦將詸我以好語而襲我也。」目左右將兵之。 秩不爲動,徐曰: 我大明天子神聖文武,非蒙古比,我亦非蒙古使者後。能兵,兵我。」良懷氣沮,下堂延秩, 人頗敬信。 三年三月又遣萊州府同知趙秩責讓之,泛海至析木崖,入其境,守關者拒 太祖嘉之,宴賚其使者,念其俗佞佛,可以西方教誘之也,乃命僧祖闡、克勤等 遣其僧祖來奉表稱臣,貢馬及方物,且送還明、台二郡被掠人口七十餘,以四年 六年以於顯爲總兵官,出海巡倭,倭寇萊、登。祖闡等旣至,爲其國演教,其 而王則傲慢無禮,拘之二年,以七年五月還京。倭寇膠州 惟蒙古與我等夷,乃欲臣妾我。 諭以中國威德,而詔書有責其不臣語。 良懷曰:「吾國 我先王不服,乃使其臣趙姓者試我以 今新天子帝中夏, 一弗納。 雖處扶桑 秩以

書省,貢馬及方物,而無表。 時良懷年少,有持明者,與之爭立,國內亂。 帝命却之,仍賜其使者遣還。 是年七月,其大臣遣僧宣 未幾,其別島守臣氏人遣僧奉表 聞溪等齎書上中

移書責其王,幷責其征夷將軍,示以欲征之意。良懷上言: 源義滿奉丞相書,書辭叉倨。乃却其貢,遣使齎詔譙讓。十四年復來貢,帝再却之,命禮官 其表詞不誠,降韶戒諭,宴賚使者如制。 來貢。帝以無國王之命,且不奉正朔,亦却之,而賜其使者,命禮臣移牒,責以越分私貢之 吳韜略之兵法。又聞陛下選股肱之將,起精銳之師,來侵臣境。 博戲,臣 武施仁,八方奉貢。 權,宇宙寬洪,作諸邦以分守。蓋天下者,乃天下之天下,非一人之天下也。臣居遠弱 自有其備,豈肯跪途而奉之乎?順之未必其生,逆之未必其死。 星換宿。地發殺機,龍蛇走陸。人發殺機,天地反覆。昔堯、舜有德,四海來賓。陽、 萬乘之君,城池數千餘,封疆百萬里,猶有不足之心,常起滅絕之意。 夫天發殺機,移 之倭,褊小之國,城池不滿六十,封疆不足三千,尙存知足之心。陛下作中華之主,爲 又以頻入寇掠,命中書移牒責之。乃以九年四月,遣僧圭廷用等來貢,且謝罪。帝惡 臣聞天朝有興戰之策,小邦亦有禦敵之圖。論文有孔、孟道德之文章,論武有孫、 臣聞三皇立極,五帝禪宗,惟中華之有主,豈夷狄而無君。乾坤浩蕩,非一主之獨 何懼哉。 倘君勝臣負,且滿上國之意。設臣勝君負,反作小邦之羞。 十二年來貢。十三年復貢、無表,但持其征夷將軍 水澤之地,山海之洲, 相逢賀蘭山前,聊以 自古講

列傳第二百十 外國三

和爲 上,罷戰爲强,殆生靈之塗炭,拯黎庶之艱辛。 特遣使臣, 敬叩丹陛,惟上國圖

帝得表慍甚,終鑑蒙古之轍,不加兵也。

命福建備海舟百艘,廣東倍之,以九月會浙江捕倭,旣而不行。 巡檢司四十五,得卒萬五千餘人。又命信國公湯和行視浙東、西諸郡,整飭海防,乃築城五 四 郡,相視形勢。 十六年,倭寇金鄉、平陽。 十九年遣使來貢,却之。 民戶四丁以上者以一爲戍卒,得五萬八千七百餘人,分戍諸衞,海防大飭。 衞所城不當要害者移置之,民戶三丁取一,以充戍卒,乃築城一十六,增 明年命江夏侯周德興往福建濱海 閏六月

其狡謀 王子 四 交通 百餘 不征之國十五,日本與焉。自是,朝貢不至,而海上之警亦漸息 滕 其君臣。 先是,胡惟庸謀逆,欲藉日本爲助。 也。 祐 人,詐稱入貢,且獻巨燭,藏火藥、刀劍其中。 壽者,來入國學,帝猶善待之。 越數年,其事始露,乃族賢,而怒日本特甚,決意絕之,專以防海爲務。 尋奏復賢職,遺使召之,密致書其王,借兵助己。 二十四年五月特授觀察使,留之京師。 乃厚結寧波衞指揮林賢,佯奏賢罪,謫居 旣至,而 惟庸已敗,計不行。 賢還,其王遣僧如瑤率兵卒 後 帝 を著組訓 日本,令 亦未 然其時 知

成祖卽位,造使以登極詔諭其國。 永樂元年又遣左通 政趙居任、行人張洪偕僧道成

者至,上王源道義表及貢物。 所齎 宜 敕 所司 以助資斧,亦人情,豈可槪拘以禁令。至其兵器,亦准時直市之,毋阻向化。」十月,使 將行,而其貢使已達寧波。 '覈其舶,諸犯禁者悉籍送京師。」帝曰:「外夷修貢,履險蹈危,來遠,所費實多。 有 帝厚禮之,遣官偕其使還,齊道義冠服、龜鈕金章及錦綺、紗 禮官李至剛奏。「故事,番使入中國,不得私攜兵器鬻民。

敕,封義持爲日本國王。 十二月,其國世子源義持遣使來告父喪,命中官周全往祭,賜諡 寧波 偕中官王進賜其王九章冕服及錢鈔、錦綺加等, 兵 且 國之山 獻 盡 所 ,盡置其 殲其衆,縶其魁二十人,以三年十一月獻於朝,且修貢。 明 爲壽 獲海寇。 年十一月來賀冊立皇太子。 安鎮 人於甑,烝殺之。 使還,請賜仁孝皇后所製勸善、內訓二書,即 國之山,御製碑文,立其上。六月,使來謝,賜冕服。 時海上復以倭警告,再遣官諭義持剿捕 明年正月又遣侍郎兪士吉齎璽書褒嘉,〇一賜 時對馬、臺岐諸島賊掠濱海居民,因諭其王捕之。 而還其所獻之人,令其國自治 帝益 命各給百本。 恭獻,且致賻。 嘉之,遣鴻臚寺少 五年、六年頻 **資優渥。** 十一月再貢 之。 又遣官齎 卿 使者至 入貢 封其 潘 王發 賜

物貨。 年四 其君臣謀阻進不使歸,進潛登舶,從他道遁還。 一月,義持遣使謝恩,尋獻所獲海寇,帝嘉之。 自是,久不貢。是年,倭寇盤石。 明年二月復遣王進齎敕褒齊,收市 八三四五

列

傅

第

=

百

+

外

國 Ξ

若懷之以德,宜還之。」乃命刑部員外郎呂淵等齎敕責讓,令悔罪自新。 者,實非臣所知。願貸罪,容其朝貢。」帝以其詞順,許之,禮使者如故,然海寇猶不絕。 令送還。 五 一年,倭寇松門、金鄉、平陽。 明年四月,其王遣使隨淵等來貢,謂:「海寇旁午,故貢使不能上達。 有捕倭寇數十人至京者,廷臣請正法。 帝日 中華 ::「威之以刑,不 人被掠者,亦 其無賴鼠 竊

Щ 直 百四十二,生擒八百五十七。召爃至京,封廣寧伯。自是,倭不敢窺遼東。二十年,倭寇像 |抵馬雄島,進圍望海堝。||榮發伏出戰,奇兵斷其歸路。 賊奔櫻桃園,榮合兵攻之,斬首七 十七年,倭船入王家山島,都督劉榮率精兵疾馳入望海堝。 賊數千人分乘二十舟,[5]

宗嗣位,遣使來貢 日本,賜之敕。明年夏,王源義敎遣使來。 宣德七年正月,帝念四方蕃國皆來朝,獨日本久不貢,命中官柴山往琉球,令其王轉諭 帝報之,賚白金、綵幣。 秋復至。十年十月以英

福 所,又陷昌國 合,今改元伊始,例當更給。」從之。 困於徭役,叛入倭。 正統元年二月,使者還,齊王及妃銀幣。四月,工部言:「宣德間,日本諸國皆給信符勘 衞,大肆殺掠。 倭每來寇,爲之鄉導。 八年五月,寇海寧。 四年五月,倭船四十艘連破台州 至是,導倭犯樂淸,先登岸偵伺。 先是,洪熙時,黃巖民周來保、龍巖民鍾普 桃渚、寧波 大嵩 俄倭去,二 二千戶

張 人 其戎器 留村中丐食,被獲,置極刑,梟其首於海上。 而肆侵掠,不得則陳其方物而稱 朝貢,東南海濱患之。 倭性黠,時載方物、 戎器, 出沒海濱, 得間則

七千,銀價 增錢萬,循以 之屬,估時直給錢鈔,或折支布帛,爲數無多,然已大獲利。 乃賜以二舟,爲入貢用,後悉不如 心,不許。 人貪利,貢物外所攜私物增十倍,例當給直。 景泰 四年入貢,至臨淸,掠居民貨。 先是,永樂初,詔日本十年一貢,人止二百,船止二艘,不得攜軍器,違者以寇論 如之。 爲少,求增賜物。 宜大減其直,給銀三萬四千七百有奇。」從之。 韶增布帛千五百,終怏怏去 制。 宣德初,申定要約, 有指揮往詰,毆幾死。 禮官言:「宣德間所貢硫黃、蘇木、刀扇、漆器 人毋過三百, 舟毋過三艘。 今若仍舊制,當給錢二十一萬 使臣不悦,請如 所司 清執治, 帝恐失遠人 舊制。 而 倭

令轉請, 順初,其王源義政以前使臣獲罪天朝,蒙恩宥,欲遣使謝罪而不敢自達,移書朝鮮王 朝鮮以聞。 廷議敕朝鮮覈實,令擇老成識大體者充使,不得仍前肆擾,旣而貢使亦

復 市 來貢, 與日本, 成 化 傷 四年夏,乃遣使貢馬謝恩,禮之如制。 今請便道省祭,許之。 人於市 有司請治其罪,詔付清啓,奏言犯法者當用本國之刑,容還國如法論 戒其勿同使臣至家,引中國 其通事三人,自言本寧波村民,幼爲賊掠, 人下海。十一月,使臣清啓

列

僔

自今止許五十人入都,餘留舟次,嚴防禁焉。十八年冬來貢,時武宗已卽位,命如故事,鑄 諸書,

「

三部以法苑珠林賜之。使者述其王意,請於常例外增賜,命賜錢五萬貫。二十年十 金牌勘合給之。 一月復貢。弘治九年三月,王源義高遣使來,還至濟寧,其下復持刀殺人。所司請罪之,詔 且自服不能鈴束之罪,帝俱赦之。自是,使者益無忌。十三年九月來貢,求佛祖統紀

之數。 輔、山東盜充斥,恐使臣遇之爲所掠,請以貢物貯浙江官庫,收其表文送京師。」禮官會兵部 事覺,法當死,劉瑾庇之,謂澄已自首,並獲冤。 七年,義澄使復來貢,浙江守臣言:「今畿 習歌唱。麼使見,悅之,而寫叔澄負其直,因以寫償。至是,充正使,至蘇州,澄與相見。後 卿來貢,時劉瑾竊柄,納其黃金千兩,賜飛魚服,前所未有也。素卿,鄞縣朱氏子,名寫,幼 議,請令南京守備官卽所在宴賚,遣歸,附進方物,皆予全直,毋阻遠人向化心。從之。 無例,請殿西第七班。」從之。 正德四年冬來貢。禮官言:「明年正月,大祀慶成宴。朝鮮陪臣在殿東第七班,日本向 且無表文,賜敕與否,請上裁。」命所司移文答之。五年春,其王源義澄遣使臣宋素 禮官又言:「日本貢物向用舟三,今止一,所賜銀幣,宜如其舟

太監賴恩,宴時坐素卿於宗設上,船後至又先爲驗發。 |嘉靖二年五月,其貢使宗設抵寧波。 未幾,素卿偕瑞佐復至, 互爭眞偽。 素卿賄市舶 宗設怒,與之關,殺瑞佐,焚其舟,追

列 傅 第 百 +外 國 Ξ

卿還 卿雜治,因遣 閉關絕貢,振中國之威,寢狡寇之計。」事方議行,會宗設黨中林、望古多羅逸出之舟,爲暴 罪重不可貸,請幷治賴恩及海道副使張芹、分守參政朱鳴陽、分巡副使許完、都指揮張浩 朝。 素卿 之人,否則閉關絕貢,徐議征討。 指揮劉 南 日 飄至朝鮮。 本統 國,移咨其王,令察勘合有無,行究治。」帝已報可,御史熊蘭、給事張翀交章言:「素卿 **外之,皆瘐死。** 海 至紹興城下,素卿竄匿他所免。 但釁起宗設,素卿之黨被殺者多,其前雖有投番罪,已經先朝宥赦,毋容問。 錦追 路起程,比至寧波, 轄,無入貢例。 至海上,戰沒。 一給事中劉穆、御史王道往。 朝鮮人擊斬三十級,生擒二賊以獻。 時有琉球使臣鄭繩 因貢道必經西海,正德朝勘合爲所奪。 因詰其偽,致啓釁。」章下禮部,部議:「素卿言未可信,不宜 巡按御史歐珠以聞,且言:「據素卿狀,西海路多羅氏義興者,向 凶黨還寧波,所過焚掠,執指揮袁雞,奪船出海。 歸國,命傳諭日本以擒獻宗設,還袁璡及海濱被掠 至四 年,獄成,素卿及中林、望古多羅並論死 給事中夏言因請逮赴浙江,會所司與素 我不得已,以弘治朝勘 惟宣諭 一聽入 合, 素 都

屬

由

風

驗其文,無印篆,言:「倭譎詐難信,宜敕琉球王傳諭, 德勘合不達東都 九年 ,琉球使臣蔡瀚者,道經日本,其王源義晴附表言:「向因本 ,以故素卿捧弘治勘合行,乞貸遣。 望幷賜新勘合、金印 仍遵前命。」十八年七月, ·國多 一修貢 事,干戈梗道。 義 如 常。」 晴貢使至 禮官

其人利互市,留海濱不去。巡按御史高節請治沿海文武將更罪,嚴禁奸豪交通,得旨允行。 還素卿及原留貢物。部議:「勘合不可遽給,務繳舊易新。貢期限十年,人不過百,舟不過 三,餘不可許。」詔如議。二十三年七月復來貢,未及期,且無表文。部臣謂不當納,却之。 而 送,否則却回,且嚴居民交通之禁。明年二月,貢使碩鼎等至京申前請,乞賜嘉靖新勘合, 內地諸奸利其交易,多爲之囊橐,終不能盡絕。 守臣以聞。 時不通貢者已十七年,敕巡按御史督同三司官覈,果誠心效順, 如制遣

月事聞, 帝以先期 良等先期來貢, 善,乃命副都御史朱紈巡撫浙江兼制福、興、漳、泉、建寧五府軍事。 諸郡,有倭患,雖設衞所城池及巡海副使、備倭都指揮,但海寇出沒無常,兩地官弁不能 攝,制禦爲難。 一十六年六月,巡按御史楊九澤言:「浙江寧、紹、台、溫皆濱海,界連 請如往例,特遣巡視重臣,盡統海濱諸郡,庶事權歸一,威令易行。」廷議 用舟四, 非制,且人船越額,敕守臣勒回。 人六百,泊於海外,以待明 年貢期。 十二月,倭賊犯寧、台二郡,大肆殺掠, 守臣沮之,則以風 未幾,其王義晴遣使周 福建福、興、漳、泉 爲解。 十 一 稱 通

二郡將吏並獲罪。

去貢期亦不遠,若概加拒絕,則航海之勞可憫,若稍務含容,則宗設、素卿之事可鑑。 宜敕 明 年六月,周良復求貢,納以聞。禮部言:「日本貢期及舟與人數雖違制,第表辭恭順, 列傳第二百十 外國三

其賞,且謂:「百人之制,彼國勢難遵行,宜相其貢舟大小,以施禁令。」從之。 納循十八年例,起送五十人,餘留嘉賓館,量加犒賞, 大,勢須五百人。 可。 納力言五十人過少,乃令百人赴都。 中國商舶入海,往往藏匿島中爲寇,故增一舟防寇,非敢違 部議但賞百人,餘罷 諭 令歸國。 若互市防守事,宜在紈善 勿賞。 制制 良 部議 訴 舟

弘治勘合十五道,言其餘爲素卿子所竊,捕之不獲。 日本故有孝、武兩朝勘合幾二百道,使臣前此入貢請易新者,而令繳其舊。 部議令異時悉繳舊,乃許易新,亦報可。 正德勘合留十五道爲信,而以四十道 至是良持

紈, 罪,納自殺。 於朝,顯言大姓通倭狀,以故閩、浙人皆惡之,而閩尤甚。巡按御史周亮,閩產也,上疏詆 獲交通者,不俟命輒以便宜斬之。由是,浙、閩大姓素爲倭內主者,失利而怨。 請改巡撫爲巡視,以殺其權。其黨在朝者左右之,竟如其請。又奪啟官,羅織其擅殺 當 是時,日本王雖入貢,其各島諸倭歲常侵掠,濱海奸民又往往勾之。人執乃嚴爲申禁, 自是不置巡撫者四年,海禁復弛,亂益滋甚。 **純又數騰疏**

世宗, 禁,遂移之貴官家,負其直者愈甚。索之急,則以危言嚇之,或又以好言給之,謂我終不負若 祖 盡撤 制,浙江 天下鎭守中官,幷撤市舶,而濱海奸 一設市 舶提舉司,以中官主之,駐寧波。 人遂操其利。 海舶 至則平其直 初市猶商主之,及嚴 ,制馭之權在 Ļ 通 番之 及

直。 無不大利,故優患日劇,於是廷議復設巡撫。 逞,悉逸海 可撲滅。 倭喪其貲不得返,已大恨,而大奸若汪直、徐海、陳東、麻葉輩素窟其中,以內地不得 島爲主謀。 倭聽指揮,誘之入寇。 海中巨盜,遂襲倭服飾、旂號,並 三十一年七月以僉都御史王忬任之,而勢已 分艘掠內地,

伍 無統率御之。 虚 明初,沿海 及遇警,乃募漁船以資哨守。 以故賊帆所指,無不 要 一地建衞所,設戰船,董以都司、巡視、副使等官,控制周密。迨承平久, 殘 破 兵非素練,船非專業,見寇舶至,輒望風逃匿,而 船敝

徵 善,破崇明,復薄蘇州,入崇德縣。 崇明及常熟、嘉定。 數千里,同時告警。 兵四方,協 三十二年三月,汪直勾諸倭大舉入寇,連艦數百,蔽海 力進 有所爲。 剿 破昌國 三十三年正月自太倉掠蘇州,攻松江,復趨江 未幾,
「所改撫大同,以李天寵代,又命兵部尚書張經總督軍務。 衞。 四月犯太倉,破 六月由吳江掠 上海 嘉興,還屯柘林。 縣,掠江陰,攻乍浦。八 而至。 浙東、西、江南、 北,薄通、 縦横 來往, 月劫 泰。 若 金山 入 四 北, 無人之 月 陷 濱 乃大 嘉 犯 海

掠塘棲、新市、横塘、雙林等處,攻德淸縣。 是時,倭以川沙窪、柘林爲巢,抄掠四出。 五月復合新倭,突犯嘉興,至王江涇,乃爲經擊 明年正月,賊奪舟犯乍浦、海寧,陷崇德,轉

列傳第二百十 外國三

奔。 以周珫、胡宗憲。 三,從倭者十之七。 斬千九百餘級,餘奔柘林。 帝乃遣工部侍郎趙文華督察軍情。 踰月,珫罷,代以楊宜 倭戰則驅其所掠之人爲軍鋒,法嚴,人皆致死,而官軍 其他倭復掠蘇州境,延及江陰、無錫,出入太湖。 文華顚倒功罪,諸軍益解體。經、 天寵並被逮,代 素懦 大抵眞倭十之 怯,所至潰

滸墅。 戰傷者幾四千人,歷八十餘日始滅,此三十四年九月事也。「云 府 流劫溧陽、宜興。聞官兵自太湖出,遂越武進,抵無錫,駐惠山。 北新關西剽淳安,突徽州歙縣,至績谿、旌德,過涇縣,趨南陵,遂達蕪湖。 ,犯江寧鎭,徑侵南京。倭紅衣黃蓋,率衆犯大安德門,及夾岡,乃趨秣陵關而去,由溧水 時 爲官軍所圍,追及於楊林橋,殲之。是役也,賊不過六七十人,而經行數千里,殺戮 賊勢蔓延,江 浙無不蹂躪。 新倭來益衆,益肆毒。每自焚其舟,登岸劫掠。 一晝夜奔百八十餘里, 燒南岸,奔太平 自杭州

將之。 熾。 安、贛楡 亦不滿二百人,顧深 十月 應天 又約邦輔合剿,分道並進,營於松江之甎橋。 、沭陽 (巡撫曹邦輔以捷聞,文華忌其功。 ,倭自樂淸登岸,流劫黃巖、仙居、奉化、餘姚、上虞,被殺擴者無算。 、桃源 ,至清河阻 入三府,歷 一雨、爲徐、邳官兵所殲,亦不過數十人,流害千里,殺戮千餘, 五十日 L 始 平。 以倭之巢於陶宅也,乃大集浙、直兵,與宗憲親 其先一枝自山東 倭悉銳來衝,遂大敗,文華氣奪,賊益 日照流 劫東安衛, 至嵊縣 至淮 乃殲

其 高橋者自 悍 如 此。 如 ,他侵犯者無虛日,文華乃以寇息請還朝。 而 文華自甎橋之敗,見倭寇勢甚,其自柘林移於周浦, 與泊於川沙舊巢及嘉定

剿除舟山諸賊巢以自明。 及,第求開市通貢,隱若屬國然,其奸叵測。宜令督臣振揚國威,嚴加備禦。移檄直等,俾 諭各島,而送|可願還。|宗憲以聞,兵部言:「直等本編民,旣稱効順,即當釋兵。 入犯。又言,有薩摩洲者,行雖已揚帆入寇,非其本心,乞通貢互市,願殺賊自効。乃留洲 寇,招還通番奸商,許立功免罪。 至其國五島,遇汪直、毛海峰,謂日本內亂,王與其相俱死,諸島不相統攝,須徧諭乃可杜 明 《年二月,罷宜,代以宗憲,以阮鶚巡撫浙江。於是宗憲乃請遣使諭日本國王,禁戢島 果海疆廓淸,自有恩賚。」從之。 既得旨,遂遣寧波諸生蔣洲、陳可願往。 及是,可願還,言 乃絕不言 傳 其

倭寇於 巢, 丹陽及掠瓜洲 於乍浦 當是時 前後至者二萬餘人,命宗憲 畤 舟山,再敗之瀝表, 兩浙皆被倭,而慈谿焚殺獨慘,餘姚次之。浙西柘林、乍浦、 ,徐海、陳東、麻葉,方連兵攻圍 未幾,復蹴 了

燒漕艘者明春復犯如鼻、海門,攻通州,掠揚州、高郵,入寶應,遂侵淮安府 海於梁莊 又遣其黨招諭各島,相率効順,乞加重賞。」部令宗憲以便宜行。 ,海亦授首,餘黨盡滅。 **亟圖方略。** 桐鄉,宗憲設計問之,海遂擒康、葉 七月,宗憲言:「賊首毛海峯自陳可願還,一敗 江南、浙西諸寇略平,而江北倭則犯 烏鎭、 以降,盡殲其餘衆 皂林間,皆爲賊

集於廟灣,逾年乃克。 其浙東之倭則盤踞於舟山,亦先後爲官軍所襲。

言 皆違 詩頒 舟來謝罪,言前後侵犯,皆中國奸商潛引諸島 長 ,具咨送還被掠人口,而咨乃用國王印。 朝典。 勘合修貢,送洲還。 ,轉諭日本王,擒獻倡亂諸渠,及中國奸宄,方許通貢。」詔 洲奉使二年,止歷豐後、山口二島,或有貢物 先是,蔣洲宣諭諸島,至豐後被留,令僧人往山口等島傳諭禁戢。 然彼旣以貢來,又送還被掠人口,實有畏罪乞恩意。 前楊宜所遣鄭舜功出海哨探者,行至豐後島, 豐後太守源義鎭遣僧德陽等具方物, 夷 衆,義鎭等實不 而 無印信勘合, 可。 宜禮遣其使,令傳輸義鎭、 知。 或有印信而 於是宗憲疏陳其事, 島主亦遣僧清授附 於是山口都督源義 無國王 奉表謝罪, 一名稱,

招之。 甚至,指心誓無他。 直乃遣王滶入見宗憲,謂:「我以好來,何故陳兵待我。」激卽 四十餘人隨直等來貢市,於三十六年十月初,抵舟山之岑港。 爵 人歸者,往往怨直,直漸不自安。 、萬金之賞以購之,迄不能致。 汪直之踞海島也,與其黨王激、葉宗滿、謝和、王清溪等,各挾倭寇爲雄。 直知家屬固無恙,頗心動。 俄善妙等見副將盧饄於舟山,饄令擒直以獻。 及是,內地官軍頗有備,倭雖橫,亦多被剿戮,有全島無一 宗憲與直同郡,館直母與其妻孥於杭州,遣蔣洲齎其家書 義鎭等以中國許互市,亦喜。 毛海峯,直養子也。 將東以爲入寇也,陳兵備。 乃裝巨舟,遣其屬善妙等 語洩,直益疑。 朝廷至懸伯 宗憲慰勞 宗憲開

列傳

諭 |本固於杭州,本固以屬吏。 命指揮夏正往。 百方,直終不信,曰:「果爾,可遣激出,吾當入見。」宗憲立遣之。 直以爲信,遂與宗滿、淸溪偕來。 宗憲大喜,禮接之甚厚,令謁巡按御史王 激等聞,大恨,支解夏正,焚舟登山,據岑港堅守。 直又邀一貴官爲質,即

被逮。 以百 移於福 十一月,賊揚帆南去,泊泉州之浯嶼,掠同安、惠安、南安諸縣,攻福寧州,破福安、寧德。 年四月遂圍福州,經月不解。 侵犯他州縣者,亦爲諸將所破,福建亦平。 數,然未有破府城者。 逾年,新倭大至,屢寇浙東三郡。其在岑港者,徐移之柯梅,造新舟出海,宗憲不之追。 建,而潮、廣間亦紛紛以倭警聞矣。 明年十一 月陷興化府,大殺掠,移據平海衞 至是,遠近震動,亟徵兪大猷、戚繼光、劉顯諸將合擊,破之。 福清、永福諸城皆被攻燬,蔓延於興化,奔突於漳州 至四十年,浙東、江北諸寇以次平。 不去。 初,倭之犯浙江也,破州 宗憲尋坐罪 縣 衞所城 其患盡 明 其

所。[公]三年犯電白。 入雷、廉、瓊三郡境,亦被其患。萬曆二年犯浙東寧、紹、台、温四郡,又陷廣東銅鼓石 犯化州石城縣,陷錦囊所、神電衞。 其後 十六年犯浙江。 ,廣東巨寇曾一本、黃朝太等,無不引倭爲助。 四年犯定海。八年犯浙江韭山及福建澎湖、東湧。 然時疆吏懲嘉靖之禍,海防頗飭,賊來輒失利。 吳川、陽江、茂名、海豐、新寧、惠來諸縣,悉遭焚掠。轉 隆慶時,破碣石、甲子諸衞所。 十年犯溫州,又犯 其犯廣東者,爲蜑 雙魚 已,

賊梁本豪勾引,勢尤猖獗。 總督陳瑞集衆軍擊之,斬首千六百餘級,沈其船百餘艘,至之本

豪亦授首。帝爲告謝郊廟,宣捷受賀云。

有之。 年。 中國北京者用朝鮮人爲導,入浙、閩沿海郡縣者用唐人爲導。慮琉球洩其情,使毋入貢。 嚴,軍行有進無退,違者雖子壻必誅,以故所向無敵。 國王所居山城爲大閣,廣築城郭,建宮殿,其樓閣有至九重者,實婦女珍寶其中。其用法 部將行長等乘勝還兵誅之,威名益振。尋廢信長三子,僭稱關白,盡有其衆,時爲萬曆十四 支者,得罪信長,命秀吉統兵討之。俄信長為其下明智所殺,秀吉方攻滅阿奇支,聞變,與 馬,名曰木下人。 驚起衝突,執而詰之。 於是益治兵,征服六十六州,又以威脅琉球、呂宋、暹羅、佛郎機諸國,皆使奉貢。 日本故有王,其下稱 召問故時汪直遺黨,知唐人畏倭如虎,氣益驕。 後漸用事,爲信長畫策,奪幷二十餘州,遂爲攝津鎭守大將。 自言爲平秀吉,薩摩州人之奴,雄健蹻捷, 關白者最尊,時以山城州渠信長爲之。 乃改元文祿,幷欲侵中國,滅朝鮮 益大治兵甲,繕舟艦,與其下謀,**入** 有口辯。 偶出獵,遇一人臥樹下, 信長悅之,令牧 有參謀阿奇 乃改 而

情來告。 同安人陳甲者,商於琉球。 甲又旋故鄉,陳其事於巡撫趙參魯。 懼爲中國害,與琉球長史鄭迥謀,因進貢請封之使,具以其 參魯以聞,下兵部,部移咨朝鮮王。 王但深

列傳第二百十 外國三

辨嚮導之誣,亦不知其謀己也

主妻爲妾,慮其爲後患。而諸鎭怨秀吉暴虐,咸曰:「此舉非襲大唐,乃襲我耳。」各懷異志。 統兵計之。 城外,大敗,承訓僅以身免。八月,中朝乃以兵部侍郎宋應昌爲經略,都督李如松爲提督, 王京,執其王妃、王子,追奔至平壤,放兵淫掠。 鮮望風潰,淸正等遂偪王京。 艘,由對馬島渡海陷朝鮮之釜山,乘勝長驅,以五月渡臨津,(10)掠開城,分陷豐德諸郡。 由是,秀吉不敢親行。二十年四月遣其將清正、行長、義智,僧玄蘇、宗逸等,將舟師數百 初,秀吉廣徵諸鎭兵,儲三歲糧,欲自將以犯中國。會其子死,旁無兄弟。 朝鮮王李昖棄城奔平壤,又奔義州,遣使絡繹告急。倭遂入 七月命副總兵祖承訓赴援,與倭戰於平壤 前奪豐後島 朝

朝鮮傳。 稍有安枕之日矣。秀吉凡再傳而亡。 十萬,糜餉數百萬,中朝與朝鮮迄無勝算。至關白死,兵禍始休,諸倭亦皆退守島巢,東南 道並復。 沈惟敬應募。 當是時,寧夏未平,朝鮮事起,兵部尚書石星計無所出,募能說倭者偵之,於是嘉興人 久之,秀吉死,諸倭揚帆盡歸,朝鮮患亦平。 如松乘勝趨碧蹄館,敗而退師。於是封貢之議起,中朝彌縫惟敬以成款局,事詳 星卽假游擊將軍銜,送之如松麾下。 明年,如松師大捷於平壤,朝鮮所失四 然自關白侵東國,前後七載,喪師數

終明之世,通倭之禁甚嚴,閭巷小民,至指倭相詈罵,甚以噤其,小兒女云。

校勘記

- 日本王良懷不奉命 良懷,日本史籍作「懷良」,指懷良親王。
- 是年掠溫州 溫州,本書卷二太祖紀、太祖實錄卷六六洪武四年六月戊申條都作「膠州」。
- 又遣侍郎兪士吉齎璽書褒嘉 按本書卷一四九夏原吉傳附兪士吉傳及國朝獻徵錄卷四九兪公

<u>士吉傳,兪士吉出使日本時官僉都御史。</u>

29 十七年六月戊子條作「三十一艘」。 賊數千人分乘二十舟 二十舟,本書卷一五五劉榮傳作「三十餘舟」,太宗實錄卷一一三永樂

Ŧī. 求佛祖統紀諸書 佛祖統紀,原作「佛祖通紀」,據憲宗實錄卷一七〇成化十三年九月辛卯條、

嵇璜續文獻通考卷一八五、四庫全書總目卷一四五改。

ベジ 此三十四年九月事也 條都作「八月」。 九月, 本書卷十八世宗紀、 世宗實錄卷四二五嘉靖三十四年八月壬辰

[·] 有薩摩洲者 薩摩洲, 日本史籍俱作「薩摩州」。

又陷廣東銅鼓石雙魚所 銅鼓石,原作『銅鼓衞』,本書卷二一二張元勳傳及神宗實錄卷三二

列傳第二百十 校勘記

萬曆二年十二月乙卯條都作「銅鼓石雙魚城」。據改。按本書卷九〇兵志、銅鼓衞隸湖廣都司,

不在廣東。

九九山

沈其船百餘艘

(10) 以五月渡臨津 百餘,本書卷二一二李錫傳附黃應甲傳作「二百餘」。

原脫「臨」字,據本書卷三二〇朝鮮傳、國權卷七六頁四七〇〇補。

